

ՀԱՅ  
ԳՐԱԿԱՆ ՈՒԹՅՈՒՆ  
6

Սփյուռքի դպրոցների համար  
(արևելահայերեն ուսուցմամբ)



**ԶԱՆԳԱԿ**  
ՀՐԱՏԱՐԱԿՉՈՒԹՅՈՒՆ

ԵՐԵՎԱՆ 2019

ՀՏԴ 373.167.1:821.19(075.3)

ԳՄԴ 84(5Հ) ց72

Ձ 431

Զաքարյան Հովհաննես

Ձ 431 Հայ գրականություն 6: Սփյուռքի դպրոցների համար / Հ. Զաքարյան. — Եր.: «Զանգակ» հրատ., 2019. — 144 էջ:

Սույն դասագիրքը նախատեսված է Սփյուռքի այն դպրոցների համար, որոնցում ուսուցումը կատարվում է արևելահայերենով: Սա «Հայ գրականություն 5» դասագրքի շարունակությունն է: Գրքում տեղ գտած գեղարվեստական բնագրերը կարող են օգտագործվել նաև թելադրությունների, փոխադրությունների համար: Դրանց հարակից թեմաներով կարելի է հանձնարարել շարադրություններ:

Սիրով կընդունենք դասագրքի կատարելագործմանը վերաբերող դիտողություններն ու առաջարկությունները: Մեզ կարող եք գրել հետևյալ հասցեներով.

ՀՀ, 0051, Երևան, Կոմիտասի 49/2

info@zangak.am

ՀՏԴ 373.167.1:821.19(075.3)

ԳՄԴ 84(5Հ) ց72

ISBN 978-9939-68-506-9

© «Զանգակ-97» ՍՊԸ, 2019

Ի սկական ազգանունը՝ Սողոմոնյան: Ծնվել է 1897-ի մարտի 25-ին Կարսում: 1908–1912 թթ. սովորել է Կարսի ուսումնարանում: 1915–ին զինվորագրվել է Քանաքեռում կազմավորված հայկական կամավորական խմբերին: 1916–1917 թթ. սովորել է Մոսկվայի՝ Շանյավսկու համալսարանում, 1921–1924 թթ.՝ Մոսկվայի՝ Արևելքի աշխատավորների համալսարանում: Ապա մեկնել է արտասահմանյան շրջագայության: 1925–ին Երևանում ստանձնել է «Նոյեմբեր» գրական կազմակերպության ղեկավարությունը: 1935–ին նրան քաղաքական մեղադրանքներով հեռացրել են աշխատանքից և գրողների միությունից, 1937–ին՝ բանտարկել: Մահացել է 1937–ի նոյեմբերի 27–ին բանտում: Հիբիմի տեղն անհայտ է:

Գրել է բանաստեղծություններ («Ես իմ անուշ Հայաստանի», «Լուսամփոփի պես աղջիկ», «Տաղ անձնական» և այլն), պոեմներ («Կապուտայա հայրենիք», «Դանթեական առասպել», «Սոմա», «Ամբոլսները խելագարված», «Խմբապետ Շավարշը», «Պատմության քառուղիներով», «Դեպի լյառը Մասիս», «Կոմիտասի հիշատակին», «Նավգիկե» և այլն), բալլադներ («Ազգային երգ», «Հարդագողի ձամփորդներ» և այլն), «Երկիր Նաիրի» վեպը, «Երևանի ուղղիչ տնից» հուշագրությունը և այլ երկեր: Դրանց մեծ մասն ամփոփված է «Հրո երկիր», «Տեսիլաժամեր», «Ծիածան», «Ողջակիզվող կրակ», «Տաղարան», «Ութնյակներ արևին» և այլ շարքերում, «Պոեզոգությունա», «Կոմալմանախ», «Էպիքական լուսաբաց», «Գիրք ձանապարհի» ժողովածուներում:

Եղիշե Չարենցը համարվում է նորագույն շրջանի հայ գրականության հիմնադիրը:



*Չարենց անունը դարձել է մեր խղճի ու արժանապատվության խորհրդանիշը: Ու քանի դեռ շարունակվում է Նաիրյան պատմությունը, այդ անունը ժողովուրդը միշտ էլ կպարզի իբրև դրոշ...*

**Մարտիրոս Սարյան**

*Ասուպի նման ծնվեց ու մի ակնթարթում կիզվեց Չարենց մահկանացուն: Բայց հոգու լույսը հավերժաբար մնաց ու գնալով պայծառանում է:*

**Մարտիրոս Սարյան**

## ՀԱՅՐԵՆԻՔՈՒՄ



*Եղիշե Չարենցի  
հուշատախտակը Երևանում՝  
Մաշտոցի պողոտայում*



*Եղիշե Չարենցի դիմանկարը  
Նկարիչ՝ Մարտիրոս Սարյան*

*Չարենցը խոհուն, կիրթ, մեծ  
գարգացման տեր անձնավոր-  
ություն էր՝ անհանգիստ բնա-  
վորությամբ, ըմբոստ ու եռուն:  
Բոլոր ազգերի գրականություն-  
ները գիտեր, լավ ծանաչում էր  
և մեծ ձաշակի տեր էր:*

*Ավետիք Իսահակյան*

Չյունապատ լեռներ ու կապույտ լձեր:  
Երկինքներ՝ որպես երագներ հոգու:  
Երկինքներ՝ որպես մանկական աչեր:  
Մենակ էի ես: Ինձ հետ էիր դու:

Երբ լսում էի մրմունջը լձի  
Ու նայում էի թափանցիկ հեռուն,  
Զարթնում էր իմ մեջ քո սուրբ անուրջի  
Կարոտը այն հին, աստղային, անհուն՝:

Կանչում էր, կանչում ձյունոտ լեռներում  
Մեկը կարոտի իրիկնամուտին:  
Իսկ գիշերն իջնում, ծածկում էր հեռուն՝  
Խառնելով հոգիս աստղային մուրօին...

## ՄԵՐ ԼԵԶՈՒՆ

Մեր լեզուն ձկուն է ու բարբարոս,  
Առնական է, կոպիտ, բայց միևնույն պահին  
Պայծառ է նա որպես մշտաբորբոք փարոս՝  
Վառված հրով անշեջ դարերում հին:

Եվ վարպետներ՝ խոնարհ ու հանձարեղ,  
Հղկել են այն դարեր որպես մարմար,  
Եվ փայլել է նա մերթ ինչպես բյուրեղ,  
Մերթ կոպտացել ինչպես լեռնային քար:

Բայց միշտ պահել է նա իր կենդանի ոգին,  
Եվ եթե մենք այսօր կոտրատում ենք այն մերթ,  
Այդ նրանից է, որ ուզում ենք՝  
Մեր նոր խոհերի վրա ժանգ չչոքի:

Այդ նրանից է, որ մեր այսօրվա ոգուն  
Այլևս չի կարող լինել պատյան  
Ո՛չ Տերյանի բարբառը նվագուն,  
Ո՛չ Նարեկի մրմունջը մագաղաթյա:

<sup>1</sup> անասիման



Եվ ի՛նչ անգամ Լոռու պայծառ երգիչ  
Թումանյանի բարբառը գեղջկական.  
Բայց նա կգա՝ լեզուն այս երկաթյա բերքի  
Եվ խոհերի այս խո՛ր ու երկրական...

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Եղիշե Չարենցը:
2. Համացանցում գտիր լրացուցիչ տեղեկություններ Եղիշե Չարենցի ու նրա երկերի մասին և պատմիր դասընկերներին:
3. Դասընկերներով հայթայթե՛ք նշանավոր ասույթներ՝ քաղված Եղիշե Չարենցի երկերից:
4. Կարդա՛ Եղիշե Չարենցի «Խմբապետ Հավարշը» պոեմը և համեմատիր քո կարդացած այլ պոեմների հետ:
5. Վերհիշիր Եղիշե Չարենցի «Ես իմ անուշ Հայաստանի» բանաստեղծությունը:

## ՍԱՍՆԱԿԻՆ

### ՀԱՅՈՑ ԹԱԳՈՒՀԻՆ

Երբ Սասունի թագավոր Սանասարը մեռավ, Բաղդադի խալիֆն առաջվա գորությունը չունեի: Մեկ ուրիշ գորեղ թագավոր էր հայտնվել՝ Մսրա Մելիքը:

Անձուռնի մի հսկա էր՝ խոշոր ու գեթ, կոպերը կախված էին երեսի վրա: Նա հենց որ Սանասարի մահն իմացավ, գորք հավաքեց, եկավ Սասնա տան վրա կռիվ: Ավա՛ղ, Սասունը մնացել էր անպաշտպան:

Չկար Սանասար հսկան, ծուռ Բաղդասարը երկրից հեռացել էր, Դեղձուն-Ծամը կին էր՝ երեք պստիկ տղայի մայր, կախարդելու շնորհքն էլ վաղուց մոռացած: Քեռի Թորոսը մենակ էր մնացել: Ո՞վ պիտի վերցնեի Սանա տան գուրգը, բռներ Թուր-կեծակին: Վերգոն փորձեց հոր գուրգը վերցնել, չկարողացավ տեղից շարժել, ճողվեց ու հիվանդացավ: Օհանը փոքր էր, Մհերը՝ ավելի փոքր. թաքցրին, որ Մսրա Մելիքը չտեսներ: Քուռկիկ Ջալալին կապեցին մի մուլթ ախոռի մեջ, երգիկն ու դուռը շարեցին:

Մսրա Մելիքը առանց կռվի մտավ Սասուն: Հարկ դրեց մեր Սանա վրա:



Արարատյան դաշտը՝ Չարենցի կամարից



Հայկական դրամանիշ՝ Եղիշե Չարենցի նկարով



Քեռի թորոսը մի օր Սասնա մեծամեծերին ասաց.  
— Սասնա տան կառավարողը պետք է լինի Սաս-  
նասարի ցեղից: Ի՞նչ կասեն Սանասարի որդիները:

— Վերգո՛, մեր մեծ եղբայրը դու ես, դո՛ւ պետք  
է Սասունը կառավարես, — ասաց Ձենով Օհանը:

— Ես չեմ կարողանա: Ճողված եմ:

— Բա ո՞վ կառավարի, — հարցրեց Քեռի թորո-  
սը: — Օհանն ու Մհերը փոքր են:

Շատ խորհուրդ արին, վերջը Քեռի թորոսն ասաց.

— Թող Դեղձուն–Ծամը կառավարի, մինչև երե-  
խաները մեծանան:

Դեղձուն–Ծամը դուրս քաշեց Քուռկիկ Ջալա-  
լին, վրան դրեց Թամբ–սաղաֆին, բերանը՝ Սանձ-  
պողպատին, հագավ Սանասարի զգեստները, ձեռքն  
առավ Թուր–կեծակին, վահանը կապեց մեջքին, հե-  
ծավ, քշեց գնաց՝ իր Սասնա սարերը ման գալու, իր  
Թագավորությանն աչք ածելու:

Ամբողջ քաղաքը դուրս էր եկել, որ նայի Սաս-  
նա թագուհուն, քանի որ Դեղձուն–Ծամը Սանասարի  
մահից հետո չէր երևացել մարդկանց: Ժողովրդին  
բարև տվեց, իր ձին ասպանդակեց, գնաց:

Շատ գնաց, քիչ գնաց, հասավ Կաթնաղբյուրին,  
որից մի ժամանակ ջուր էին խմել Սանասարն ու  
Բաղդասարը: Ձիուց իջավ, սանձը հանեց, որ ձին  
արածի: Ինքը նստեց աղբյուրի մոտ, հաց կերավ,  
ջուր խմեց, Քուռկիկ Ջալալուն էլ խմեցրեց, պառկեց  
կանաչ խոտերի մեջ, քնեց: Ինքն էլ, Քուռկիկն էլ  
Սանասարից հետո շատ նիհարել էին, դարձել ոսկոր  
ու կաշի: Երբ արթնացավ, տեսավ՝ ինքն էլ, ձին էլ  
պարարտացել են, լցվել, խոշորացել: Շատ զարմա-  
ցավ: Եկավ տուն, տնեցիներին պատմեց այդ հրաշքը:

— Շատ մի՛ զարմացիր, — ասաց Քեռի թորոսը: —  
Չէ՞ որ Սանասարն ու Բաղդասարը իրենց դյուցազ-  
նական գորությունն այդ աղբյուրից էին առել: Այդ  
աղբյուրի մասին գրված է Սասնա գրքերում:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ է Մարա Մելիքը արշավում Սասուն:
2. Նկարագրիր հեծյալ Դեղձուն–Ծամին այնպես, ինչպես  
պատկերացնում ես:

**ՈՒՂԵՐԶ ՄԵՐ ՀԱՆՃԱՐԵՂ ՎԱՐՊԵՏՆԵՐԻՆ**

Ա.  
Մեր վարպետները հնուց տուֆ են սիրել ու մարմար,  
Շունչ ներշնչող են եղել կարծր քարին ու հողին.  
Մեր վարպետները հնուց երգ են սիրել ու պայքար,  
Մահ են քերել անքանքար, բուօ ու տխմար տիրողին.  
Ես խոնարհում եմ գլուխս հանձարի առջև ձեր անձառ,  
Ո՛վ վարպետներ, որ տվիք ձև, կերպարանք մեր հողին:

Բ.  
Քաղաքներ էիք կառուցում, կամուրջներ, բերդեր ու տներ,  
Հոյակապ շենքեր, որ դրին հանձարեղ կնիքն իրենց վառ  
Ողջ ձարտար արվեստի վրա՝ Մասիսից մինչև Միջագետք,  
Մեր երկրից մինչև Արևմուտք՝ սնելով գոթականն  
անմար...  
Ձեր ձիրքով թողիք աշխարհում դուք անանց և անջինջ մի հետք,  
Եվ մնացիք հավիտյան քերթության վարպետներ  
անմահ...

Գ.  
Աշխարհի ծայրերում բոլոր մենք գտնում ենք հիմա  
բեկորներ,  
Որ տաշած կողերի վրա աստղաձև խազեր են կրում.  
Այդ կորած անուններն են ձեր, ո՛վ անանուն վարպետներ,  
Որ կերտել եք լուռ ու անցել և ձեր շունչը թողել դարերում.



*Եղիշե Չարենցի արձանը  
Չարենցավանում, 1987 թ.  
քանդակագործ՝ Արա Շիրազ*

*Եղիշեն նրանցից է, որ բացի իր ժամանակինը լինելուց՝  
բացատրությունն ու այդ ժամանակի տեսանելի և շոշափելի մարմնացումը եղավ: Հին դարերում նման մարդկանց մարգարե էին անվանում:*

*Վահրամ Փափազյան*

Նա բազում գետեր ու առուներ է ընդունել իր մեջ և վերածվել է մի վիթխարի ջրվեժի, որ կոչվում է Չարենց: Նա համագումարն է հայ, ռուսական, ապա համաշխարհային բանաստեղծության լավագույն ավանդույթների: Այս ամենով հանդերձ՝ Չարենց է՝ գրական շեշտված, մեծ անհատականություն, դառաշրջանի նշանավոր երևույթ:

**Գուրգեն Մահարի**

«Ես իմ անուշ Հայաստանի արևահամ բարն եմ սիրում»...

Անոր չհանդիպած՝ արդեն գիտեի իր այս քերթվածը: Սկսած էի արտասանել Ամերիկայի մեջ: Ամեն մեկ բառ բացատրել տված էի ու գրեթե զոց սորված: Զայն մինչև այսօր կնկատեմ մեր երկրին, մեր հողին, մեր պատմությանը նվիրված ամենեն զեղեցիկ երգը, գովարանական աղոթքը, «Հայր մեր»-ին նմանող աղոթք մը:

**Վիլյամ Սարոյան**

Նա ապրում էր մեր ժամանակակիցների հետ և մեջ... Բայց միաժամանակ նա նրանց մեջ միակն էր, որ ապրում էր նաև ապագայում և անցյալում:

**Պարույր Սևակ**

Չի հաջողվում մեզ թեկուզ ձեր անունները գտնել, Բայց գիտենք, որ ապրել եք դուք գետնաքարշ, խարխուլ խոտերում:

**Դ**

Ունեիք դուք չափ ու կշիռ, ունեիք ձիրք անհեղի, Որ նյութին տալիս էր վսեմ կերպարանք ու ձև խորզգա. Թ՛րղ ձեզանից ուսանեմ ես այսօր գաղտնիքը գեղի, Որ արվեստս լինի դաշնավոր, ինչպես ձեր հմտությունն հսկա.

Ո՛ւժ ներշնչեք իմ երգին, որ ընթացքը իր չշեղի, Որ ժառանգորդը դառնամ հանձարեղ արվեստի ձեր ոսկյա:

**Ե**

Ուզում եմ աշակերտ լինել ձեզ և տիրել արվեստին ձեր անհուն,

Որ տողերս լինեն մեջտեղից ձեր ոսկյա օրենքով հատած, Որ հանգերս լինեն հարդարած ձեր արդար, անխարթեզանով,

Եվ ձեր նուրբ քարերի նման՝ բառերս լինեն սրբատաշ. Թող ձեր հին շենքերի նման գործերս մնան անանուն, Բայց լինեն դարի արևով և երկրի եղյամով պատած...

**Զ**

Մի՞թե իմ մեջ է այսօր արթնացել հանձարը ձեր սեզ. Ե՛ս եմ շառավիղն արդյոք ձեր, ո՛վ հանձարներ մեր մեռած.

Թ՛րղ հուրհուրա իմ գրքում ձեր ոգու ցուլքը լուսե, Թ՛րղ երգերում իմ այսօր, խոսքերում իմ ձեր ջանքը եռամ: Ո՛վ մեր մեռած վարպետներ, իմ թախանձանքը լսեք. Ձեր անմահ կնիքը դրեք իմ անմար երգերի վրա...

## **ՀԱՐՑԵՐ ԵՎ ԱՌԱՋԱԴՐԱՆՔՆԵՐ**

1. Դասընկերներով հայթայթե՛ք ասույթներ Եղիշե Չարենցի մասին:
2. Կարդա՛ր Եղիշե Չարենցի «Երկիր Նաիրի» վեպը և համեմատի՛ր քո կարդացած այլ վեպերի հետ:
3. Կարդա՛ր նաև Եղիշե Չարենցի «Պատմության քառուղիներով» պոեմը:

ՔՈՒՌԱԿԸ ՇԱԼԱԿԻՆ

Մհերը եղավ յոթ տարեկան: Մայրը նրան տարավ դպրոց: Շուտով Մհերը ամեն բան սովորեց, լցվեց ամեն շնորհքով: Մի օր էլ մորն ասաց.

— Թո՛ղ սար ու ձոր ման գամ, որս անեմ, դառնամ իսկական տղամարդ:

— Որդի՛, դու դեռ փոքր ես, այդ բաները դժվար են քեզ համար: Համբերի՛ր, որ մի քիչ մեծնաս:

— Մեր տանն իսկական տղամարդ չկա: Թո՛ղ պատրաստվեմ թշնամու դեմ կանգնելու համար:

Դեղձուն—Մամը տեսավ՝ չի կարողանա համոզել իր տղային, համաձայնեց:

Մհերը, նետ-աղեղն առած, գնում էր որս անելու: Ոտքով էր գնում—գալիս, ձի չուներ: Մի օր այնքան վազեց աղվեսների հետևից, որ երեկոյան հոգնած, նեղսրտած եկավ տուն ու նետ-աղեղը գցեց գետնին: Քեռի Թորոսը հարցրեց.

— Որդի՛ս, ինչո՞ւ ես նեղսրտել:

— Է՛, քեռի՛, այդ գազանները փախչում են, հետևներից վազելով՝ հոգիս դուրս է գալիս:

— Մարդ էլ ոտքով կվազի՞ որսի հետևից: Դու Բիթլիս քաղաքի մեջ մի քեռի էլ ունես՝ անունը Գորկիկ իշխան: Քառասուն ձիու տեր է: Գնա՛, այդ քեռուց մի լավ ձի՛ վերցրու, հեծի՛ր:

Առավոտյան Մհերը առավ մահակը, երկու կորեկ հաց ու ճանապարհ ընկավ: Հասավ Բիթլիս: Երեխաները փողոցում խաղում էին: Տեսան՝ գալիս է մի հսկա՝ ուսին մի ծածկի գերան: Մհերը հարցրեց.

— Երեխանե՛ր, Գորկիկ իշխանի տունը ո՞րն է:

Երեխաները տարան, տեղ հասցրին: Մհերը մահակը մի կողմ դրեց, ներս մտավ: Գորկիկ իշխանը իր ընկեր իշխանների հետ, սենյակում նստած, զրույց էր անում: Մհերը բարև տվեց: Գորկիկ իշխանը բարևը չառավ: Մհերը բռնեց քեռու թևը ու մի թեթև սեղմեց: Իշխանին թվաց՝ իր թևը յոթ տեղով կոտրեցին.

— Ո՞վ ես, կտրի՛ճ:

— Քրոջը որդին եմ՝ Սանասարի տղան՝ Մհերը:

— Վա՛յ, դու բարով եկար, հազար բարով եկար:

Մհերը նստեց, որ հանգստանա: Հաց բերել տվին, հացը կերավ պրծավ, նոր քեռին հարցրեց.







- Մհեր, որդի՛ս, ինչպե՞ս եղավ՝ եկար ինձ մոտ:
- Քեռի՛, եկել եմ, որ ինձ մի ձի տաս՝ հեծնեմ:
- Գնա՛ ախոռ: Ո՛ր ձին հավանես, տա՛ր:

Ախոռում քառասուն ձի էր կապած: Որի մեջքին ձեռք դրեց, փորն իջավ, դիպավ գետնին: Քառասունն էլ փորձեց ու մտքում ասաց. «Ինձ համար պետքական ձի չկա: Սրանք իմ տակ չեն դիմանա»:

Դուրս պիտի գար ախոռից, մեկ էլ տեսավ՝ երկու տարեկան փոչոտ մի քուռակ ախոռի մեջ արձակ ման է գալիս: Մհերը բռունցքով խփեց քուռակի մեջքին, քուռակը թռավ, տասը ձի հաշմեց, քացով դիպավ մի մեծ քարի, կայծեր թռան: Մհերը մտքում ասաց. «Ինձ վերցնող որ կա, այս քուռակն է: Ես իմ ուժը գիտեմ. բռունցքով որ խփեցի, քուռակը պիտի սատկեր»:

— Քեռի՛, տո՛ւր ինձ այն փոչոտ քուռակը, որ այնտեղ արձակ վազվզում է:

— Մհեր, ամոթ է: Մարդիկ պիտի ասեն՝ Գորկիկ իշխանի ձեռքը չգնաց, որ մի գեղեցիկ ձի տար:

— Քեռի՛, իմն այն քուռակն է, կտա՞ս՝ տանեմ:

— Դո՛ւ գիտես, որդի՛ս, տանում ես՝ տար:

Մհերը քուռակն ախոռից հանեց, մի պարան ուզեց, քուռակի չորս ոտքը կապեց իրար, իր մահակը մտցրեց ոտների մեջ, քուռակն իր շալակը գցեց: Բիթլիսի երեխաները, Մհերի հետևից ընկած, ծաղրեցին, թե մարդն է ձին շալակած տանում:

Եկավ, հասավ Սասուն: Քեռի Թորոսը տեսավ՝ Մհերն է գալիս՝ մի քնձոտ քուռակ շալակին.

— Որդի՛ս, հենց այդ քուռակը բերիր: Գորկիկ իշխանը չէ՞ր կարող քեզ մի գեղեցիկ ձի տալ:

Մհերը պատմեց, թե ինչու ընտրեց այդ քուռակը:

— Օօօ՛, տղա՛ս, դա հասարակ ձիու քուռակ չէ: Քուռակիկ Ջալալիի գարմից է երևում: Տո՛ւր՝ ես պահեմ, երեք տարի հետո նոր կհեծնես:

Երեք տարի հետո Մհերը եղավ ձիավոր: Գնում էր սարերը, այժյամ ու գազան էր խփում, բաժանում սասունցիներին: Յոթ տարի Սասունը որսով պահեց:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ


1. Ինչո՞ւ Մհերը գնաց Բիթլիս:
2. Նկարագրիր քուռակին հեծնած Մհերին այնպես, ինչպես պատկերացնում ես:

Օնվել է 1877-ի փետրվարի 18-ին Ախալքալաքում (այժմ՝ Վրաստանում): Սովորել է ծննդավայրի հայոց ծխական դպրոցում: 1892-ին ընդունվել է Էջմիածնի Գևորգյան ձեմարանը: 1898-ին ավարտել է Թիֆլիսի Ներսիսյան դպրոցը: 1900-ին հաստատվել է Թիֆլիսում, մասնակցել Հ. Թումանյանի նախաձեռնությամբ ստեղծված Վերնատուն գրական ընկերության աշխատանքներին: 1905-1910 թթ. սովորել է Ժնևի համալսարանում, վերադարձել Թիֆլիս և զբաղվել ուսուցչությամբ: 1925-ին տեղափոխվել է Երևան, եղել Հայաստանի գիտության և արվեստի ինստիտուտի գիտքարտուղարը: Վախձանվել է 1956-ի դեկտեմբերի 6-ին Երևանում:

Գրել է բանաստեղծություններ («Մի՛ լար, մի՛ թացիր աչքերդ», «Լուսնակն ելավ ամպն ի վեր» և այլն), պոեմներ («Կյանքի տեսիլ», «Լենկ Թեմուր», «Սրբի աղջիկը» և այլն), պատմվածքներ («Ավելորդը», «Ստամոքս», «Ջութակ և սրինգ», «Գիրք ծաղկանց» և այլն), վիպակներ («Ռաշիդ», «Նիգյար» և այլն), վեպեր («Քաղաք», «Մեսրոպ Մաշտոց» և այլն), թատերգություններ («Վասակ», «Ազգային խայտառակություն», «Հովանա Մեծատուն», «Երկիր հայրենի», «Նապոլեոն Կորկոտյան» և այլն), մանրապատումներ, ակնարկներ, թերթոններ, քննադատական, գրականագիտական, լեզվաբանական, պատմագիտական, արվեստաբանական հոդվածներ:

Գլուխգործոցը «Վարդանանք» պատմավեպն է: Հայ թատերգության մնայուն արժեքներից է «Քաջ Նազար» կատակերգությունը:

Մանուկների համար գրել է «Պուպույ մուկիկը», «Արջուկ-լրջուկ», «Փիսիկի վիշտը» և այլ երկեր:



*Դերենիկ Դեմիրճյանի տուն-թանգարանում*

## ՀԱՅԸ



*Ես ձանաչեցի հայ ժողովրդի մեջ համամարդկայինը, ես գտա հայ ժողովրդին, երբ փայլեց իմ առջև նրա հանձարը հորենացու, Եզնիկի, Եղիշեի և այլոց գլուխգործոցների մեջ, երբ ժպտաց հայկական վերածնությունը Նարեկացու, Երզնկացու, Ֆրիկի, Քուչակի վերասլացքի մեջ, երբ իմ առաջ կանգնեց հայկական վեհ ծարտարապետությունը, ծաղկեց հայկական մանրանկարչությունը:*

**Դ. Դեմիրճյան**

Արդյոք մի բան հասկանում եք Հայից... Ինչ տարօրինակ, հանելուկային արարած: Որքան խաբուսիկ է առերևույթ: Բայց ի՞նչ է ինքը՝ իր նկարագիրը:

Անհանգիստ դեմք ունի, չի թողնում՝ նկարես: Իր ցեղային պատկերն էլ տարօրինակ է: Թվով գրեթե ամենափոքրն է, տառապանքով՝ ամենամեծը: Ժամանակով ամենահինն է, վիձակով՝ ամենից անփոփոխը: Ամենից աննպաստը իր երկրի դիրքն է, բայց ինքը ամենից համառ կառչեց դրան: Որքան անհույս է թվում իր ապագան, բայց և որքան հուսացող է նա: Ասենք՝ իր կյանքում երկու բան բնավ չտեսավ. մեկբախտ, մեկ էլ՝ հուսահատություն:

Ինչպե՞ս ձանաչես նրան, ինչպե՞ս չափես: Իր չափը չափագանցն է. զարմանալի՜ հավասարակշռություն, որ ծայրահեղության մեջ է:

Ահա նայիր, մեջքին մի սար բեռ՝ ձկվում է, մեջքը կոտրում: Աշխատանք է կատարում, թե՛ ինքնախորտակում: Ո՞ւմ դեմ է չարացել, որ իրեն է պատժում: Որքան ուժ, որքան աշխատասիրություն: Ի՞նչ է միտքը. մի փոքրիկ գումար վաստակի, գնա, խանութ բաց անի: Մարդը իր հացի և իր գործի տերն է ուզում լինել և ոչ թե սրա-նրա ծառան: Եվ արդեն Հայ նշանակում է տեր... Սա այն գյուղացին է, որ կատաղած, գազանացած՝ հողը քանդում է, չարչարվում, մզվում, հոգին հանում: Այնպես է հավաքում բերքը, կարծես հավիտյան պիտի ապրի, կարծես ոչ ոքի բաժին չպիտի թողնի: Բայց գնա՜ իր խրձիթը. հազար գող, մարդ, շուն ու գել նրա հացի վրա են: Ուտում են նրա հացը, ինչպես Հայր Աբրահամի սեղանից:

Տեսնլ եք նրա խղձուկ բնակարանը... բայց անցիր նրա երկիրը: Ինչ հիասքանչ վանքեր, հոյակապ աշտարակներ, գողտրիկ խաչքարեր: Հավատալ կարելի է, թե ինքն է շինել այդ բոլորը: Լցրել է իր երկիրը եկեղեցիներով, բայց տարին մեկ անգամ չի մտնում մեջը՝ աղոթելու: Իր կրոնը երբեք չի քարոզել ուրիշներին: Եվ հավատալի՜ բան է, որ իր պատմությունը կրոնական ամենամեծ պատերազմների պատմությունն է, և այս չաղոթող ցեղի Նարեկացու շուրթերից թռավ աղոթքի ամենաբարձր թռիչքը առ Աստված...



Տանել չի կարողանում ծես, ձև, աստիճան, քաղաքավարություն: Իր խրիմյան Հայրիկը ամենից շատ կաթողիկոսությունը ասեց: Դիվանագիտության մեջ մի բանում է շատ հոգաձու՝ անկեղծ լինել: Այնքան անկեղծ է և միամիտ, որ անկասկածելի խորամանկի և կեղծավորի տպավորություն է թողնում:

Խոնարհ է իր Սասունցի Դավթի նման և անսպասելի ըմբոստ, հարվածող նրա պես: Երբ վրա է հասնում գերագույն վտանգը, հերոսանում է հանկարծ և ծառանում վիշապի նման: Բարի է առհասարակ, շոյիր, ու կկողոպտվի, բայց և առհասարակ ինքն է բարեկամ քեզ, իսկ քո բարեկամությունը վանում է: Տաղանդ է՝ իր դեմ ատելություն ստեղծելու: Ուրիշի հաջողության մեջ նախանձոտ է: Եթե գժտվեց մեկի հետ, դիսակալ է, ինչպես ուղտ: Ամեն հայ մի հայ ունի, որի հետ թշնամի է մինչև մահ: Սա նրա անհրաժեշտությունն է: Անկարգ է և անհիշխանական թե՛ հասարակության, թե՛ պետության և թե՛ գաղափարների մեջ: Իբրև ժողովրդական՝ անմիաբան է, խռովարար:

Ուր՝ հեղափոխություն, այնտեղ՝ Հայություն: Բայց իբրև «-ական»՝ ծայրահեղական է: Ասենք՝ ամեն հայ մի փոքր Շիրակացի է՝ Դոն Բիշոտի պես: Կոտորածներից ամենագարհուրելին ինքը տեսավ, և ինքն էր, որ չխրատվեց: Ինչո՞ւ է այսպես, ինչի՞ց է դժգոհ, ի՞նչ է կամենում... Ինչո՞ւ է այսպես անհավասար, անչափելի՝ իր վեհ թռիչքներում:

Հայի ամենամեծ առաքինությունն էս ուզում. ամենաներողամիտ ցեղը աշխարհիս մեջ: Իր պատմությունը եղավ գարհուրելի ջարդեր, բնաջնջում... «Չարդիր ինձ, — ասում է նա, — ահա քո պատիժը և իմ վրեժը»: Ինձ թվում է՝ մի շատ մեծ վիրավորանք կա հայի սրտի խորքում թաքնված... Ինձ թվում է, թե դրա համար է նա ջարդվում, ձապոնացու պես, որ երբ մեկից խորապես վիրավորվում է, կանչում է իր բարեկամներին, հայտնում է իր վիրավորանքը և վերցնելով դանակը՝ պատռում է իր որովայնը:

Այսպես է Հայը: Չի ուզում, որ իրեն դիպչեն, մոտենան, սիրեն թեկուզ: Նա մեկուսի է, խստակյաց, բարի և ազատասեր:

*«Ավելորդը» պատմվածքը եզակի է մեր գրականության մեջ, մշտարժեք: Զանազան անկյուններից կարելի է նայել այդ երկին և միշտ ընդունել այն գեղեցիկ ու կատարյալ:*

*.... Ինձ գարմացնում են հոգեբանական այն խորունկ, ձշմարիտ վերլուծումները, որ անում է հեղինակը խղճմտանքի անպարտելի ուժի, խղճի խայթերի և ներքին ահեղ ու արդար դատաստանի վերաբերմամբ: Մրանք համաշխարհային գրականությունը գարդարող էջեր են:*

**Ավետիք Իսահակյան**

*Դու եկել էիր հին Ավարայրից,  
Քո ձեռքերի մեջ թուրն էր վարդանանց,*

*Դու եկել էիր հինգերորդ դարից,  
Ավանդում էիր մեր փառքը  
անանց:*

**Համո Սահյան**

Դերենիկ Դեմիրձյանը հոգեբանական վերլուծության վարպետ է, ունի դիտող սուր աչք, թափանցող միտք, օժտված է հումորով, նրա լեզուն յուրահատուկ է՝ անհատական մի ոճ, որ գեղեցիկ է ինքնին, հարուստ՝ ինքնուրույն պատկերներով, անսպասելի փոխաբերություններով, թեևավոր դարձվածքներով:

**Ավետիք Իսահակյան**

Երբ նայում եմ Հային, ինձ թվում է, թե նրա վիրավորանքը այն արծվի վիրավորանքն է, որին ցած են բերել բարձր լեռներից: Թպրտում է, ընկնում քարերի մեջ, թևերը կոտրում: Չի սիրում ո՛չ ստրկություն, ո՛չ երջանկություն, գերադասում է տառապանք և ազատություն: Մաղձոտ է, մեկուսի, բայց չունի ատելություն, որ բարձր լեռներին անձանոթ զգացում է:

Գերի արծվի խոր վիշտն է իր սրտի մեջ: Սա Հայկն է, որին զրկել են իր կյանքի միակ պայմանից՝ ազատությունից: «Ոչինչ չեմ ուզում ձեզնից, — ասում է նա իր նեղիչներին, — ձեզ լինի ձեր լուծը, ձեզ լինի ձեր երջանկությունը, գնացե՛ք, ապրե՛ք խաղաղ և երջանիկ: Եթե դուք սիրում եք կյանքը, ես սիրում եմ կյանքից ավելի թանկ բանը՝ Ազատությունը...»:

## **ՀԱՐՑԵՐ ԵՎ ԱՌԱՋԱԴՐԱՆՔՆԵՐ**

1. Հայ գրականության համար ինչո՞վ է նշանավոր Դերենիկ Դեմիրձյանը:
2. Համացանցում գտիր լրացուցիչ տեղեկություններ Դերենիկ Դեմիրձյանի ու նրա երկերի մասին և պատմիր դասընկերներին:
3. Դասընկերներով հայթայթե՛ք նշանավոր ասույթներ՝ քաղված Դերենիկ Դեմիրձյանի երկերից:
4. Կարդա՛ Դ. Դեմիրձյանի «Ավելորդը» պատմվածքը և համեմատիր քո կարդացած այլ պատմվածքների հետ:
5. Կարդա՛ նաև Դերենիկ Դեմիրձյանի «Քաջ Նազար» կատակերգությունը:



### **ԱՌՅՈՒԾԱԶԵՎ ՄՀԵՐ**

*Մհերը հազիվ տասնհինգ տարեկան էր, երբ Սատուռում հացի թանկուլթյունն ընկավ: Ժողովուրդը, որ մեռնում էր սովից, եկավ, բռնեց Մհերի դուռը.*

*— Մհե՛ր, աստձո՛ւ սիրուն, մեզ մի ճա՛ր արա, վերե՛՛ աստված, ներքե՛՛ դու:*

*Մհերը կանչեց Քեռի Թորոսին.*

— Քեռի՛, ինչո՞ւ է հացը պրծել:  
 — Մհեր: Սասունը վար ու ցանք չունի: Մեր հացը գալիս է դրսից: Մարդակեր մի առյուծ կտրել է ճամփան: Հաց բերող չկա:  
 — Քեռի՛ թորոս, առյուծն ի՞նչ է:  
 — Գազան է. ասում են՝ գազանների թագավորը:  
 — Մարդկանց հեռվի՞ց է ուտում, թե՞ մոտենաս, նոր կուտի:

— Չէ՛, մոտենաս, նոր կուտի:  
 — Առավոտյան կգնամ այդ առյուծի վրա կռիվ:  
 — Մհեր՛, չգնա՛ս, քեզ կբռնի, կպատառտի:

Առավոտ վաղ Սասունում ինչքան հեծյալ կար, Մհերի հետ գնացին առյուծի վրա: Առյուծը, պոչը գետնին խփելով, փոշի անելով, գալիս էր: Եկավ կանգնեց Մհերի և նրա զորքի դիմաց: Այնպես էր մոնչում, որ սար ու ձոր դմբդմբում էին:

— Հացն ու գինին, տեր կենդանին, — ասաց Մհերը. — Ով առյուծին զարկի թրով կամ գուրզով, ես առյուծին կթողնեմ, նրան կապանեմ: Ես մոր բերած եմ: Առյուծն էլ է մոր բերած: Առյուծը գենք ու զրահ չունի, ես էլ իմ գենքն ու զրահը կթողնեմ գետնին, առյուծի հետ կբռնեմ գոտեկոխիվ:

Ձենքն ու զրահը հանեց, թևերը քշտեց, մեկ ձեռքով բռնեց առյուծի վերի ծնոտը, մյուսով՝ վարի ծնոտը, մեջտեղից ճղեց ու գցեց գետնին:

Համբավը տարան Դեղձուն-Ծամին, թե աչքդ լո՛ւյս, քո Մհերը այն ահռելի առյուծին սպանեց:

Մհերի անունը դրեցին Առյուծաձև Մհեր:

Սասունցիները հավաքվեցին, եկան Մհերի դուռը.

— Առյուծաձև՛ Մհեր, հիմա դու ես մեր թագավորը, Սասունը կառավարի՛ր:

Դեղձուն-Ծամը որդու երեսը համբուրեց, հանեց Սասնա տան գենքերն ու զգեստները, տվեց Մհերին.

Մհերը հագավ հոր զգեստներն ու գենքերը, հեծավ, գնաց ման գալու Սասնա սարերը, իր թագավորությանը աչք ածելու:

Թշնամիները կորագլուխ հեռացան Սասնա սարերից: Հիմա Սասնա երկրին կար տեր ու պաշտպան:



## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ էր Սասունում հացի թանկություն:
2. Նկարագրիր առյուծին պատող Մհերին այնպես, ինչպես պատկերացնում ես:



*Հոր է Ակսելի մեջ բնապաշտական զգացողությունը. նա ապրում է, զգում է հողը, տարերքը, եղբայրական մի բարությունը է համակված դեպի բույսերը, թռչունները, կենդանիները...*

**Ավետիք Իսահակյան**

Ի սկսական անունը՝ Ալեքսանդր Թևոսյան: Ծնվել է 1899 թ. հունիս 13-ին Գորիսում: Ավարտել է Գորիսի ծխական դպրոցը 1910-ին: 1910–1917 թթ. սովորել է Էջմիածնի Գևորգյան ձեմարանում:

Որոշ ժամանակ մանկավարժական աշխատանք է կատարել Զանգեզուրի Լոր գյուղում: 1917–1918 թթ. որպես շարքային զինվոր մասնակցել է թուրքերի դեմ Աշկալայի, Իլիջայի, Արդահանի կռիվներին և Սարդարապատի ձակատամարտին: 1919-ից սովորել է Թիֆլիսի պոլիտեխնիկական ինստիտուտում, 1920–1923 թթ.՝ Խարկովի գյուղատնտեսական ինստիտուտում: 1924–1926 թթ. որպես գյուղատնտես աշխատել է Գորիսում, 1926–1931 թթ.՝ Երևանում: 1936-ին բանտարկվել և 1937-ի հուլիսի 18-ին Ստալինի ցուցումով զնդակահարվել է որպես ազգայնական:

Գրել է պատմվածքներ (հիմնականում ամփոփված են «Մթնածոր», «Սև ցելերի սերմնացանը», «Անձրև» ժողովածուներում), վիպակներ («Հովնաթան Մարչ», «Կյորես»), անավարտ վեպեր («Կարմրաքար», «Որդի որոտման», «Խաչատուր Աբովյան»), կինոբեմագրեր («Սև թևի տակ», «Արևի զավակը», «Զանգեզուր» և այլն), ակնարկներ, գրաքննադատական, հրապարակախոսական, գյուղատնտեսական հոդվածներ: Աշխարհաբարի է փոխադրել Վարդան Այգեկցու առակների «Աղվեսագիրք» ժողովածուն:

Հատկապես աչքի է ընկնում նրա քնարական արձակը՝ «Ալպիական մանուշակ», «Միրհավ», «Խոնարի աղջիկը», «Ծիրանի փողը» և այլն:

Նրա պատմվածքների հիման վրա նկարահանվել են «Լուսաբացից առաջ» և «Այս կանաչ, կարմիր աշխարհը» ֆիլմերը:

## ԾԻՐԱՆԻ ՓՈՂԸ (հատված)

Հանդարտվում էր Ձյանբերդ գյուղի երեկոյան աղմուկը: Լեռան սպիտակ սառույցները լույս էին տալիս: Մարգագետինները ծխում էին դաղձի բույր:

Ներքևի կտուրի վրա հավաքվել են գյուղի հոգնած մշակները: Ես բարձրանում եմ կտուրը:

— Հագրո՛, — կանչում է մի մշակ, — նվագէս:

Ուրեմն այս բարձրահասակ մարդն է Հագրոն, որի մասին պատմել էր ինձ իմ վաղեմի ծանոթը:

Հագրոն մոտենում է ինձ և մեկնում ձեռքը:

— Բարի տեսանք:

Նա ունի լայն ձակատ, որ լուսնի տակ պղնձագույն է երևում, ձերմակ մազեր և կեռ արծվաքիթ: Նրա աչքերը փայլում են երիտասարդական ավյունով:

— Կպարե՞ք, — նայում է մյուսներին:

Ես երբեք, երբեք չեմ մոռանա այդ լուսնյակ գիշերը բարձր լեռան մի գյուղում, Հագրոյի տան կտուրը, նրա նվագը և հսկաների հին պարը:

Տնից բերեցին սրինգը՝ այն ծիրանի փողը, որ քիչ ավելի երկար էր մեր հովիվների սովորական սրինգից: Նա կանգնեց կտուրի ծայրին, փողի բերանը դարձրեց դեպի գյուղի կողմը, և հետզհետե, ինչպես լուսաբացը լեռներում, զարթնեց յարխուշտան: Նա սկսեց դանդաղ և մեղմ, հետո ձայները զորացան, արագացավ չափը: Հետո վայրենի կանչով վեր թռավ մեկը, նրան հետևեց երկրորդը, երրորդը, և շուտով նրանց երկու շարքը, ինչպես երկու վիթխարի ապառաժ, զարնվեցին իրար՝ ձեռքերով, ծնկներով և կրծքով: Դողում էին կտուրի գերանները, կարծես իրար վրա արշավում էին բանակներ: Նրանց ձեռքերի հարվածը պողպատի ձայն էր հանում, և կայծեր էին թռչում նրանց բորբոքված աչքերից:

Հարևան կտուրների վրայից, տների բակերից կանայք և աղջիկները դիտում էին լեռնականների պարը: Երբ մի շարքը մյուսին ետ էր մղում ձեռքերի հարվածով, կարծր կրծքերի զարկով, նահանջողները արշավում էին նոր թափով, որպեսզի վրիժառու լինեն ամոթի և պարտության համար:



*Կոմիտասի երգերի և Սարտիրոս Սարյանի գույների մասին խոսում են որպես բառերով անթարգմանելի հրաշքների մասին: Բայց դա այնքան էլ ձիշտ չէ: «Հայաստանում կա մի գրող, որի բառերը երգում են կոմիտասյան հանգով և փայլատակում Սարյանի կտավների բոլոր գույներով: Դա Ակսել Բակունցն է: Նա մեր արձակի ամենատաղանդավոր ներկայացուցիչն է»:*

**Ավետիք Իսահակյան**



**Ակսել Բակունցի  
տուն-թանգարանը  
Գորիսում**





**Հուշակոթող Երևանում՝ Ակսել Բակունցի տան մոտ քանդակագործ՝ Է. Աղայան**

*Պատմության և բնության գարմանայի ներդաշնակ համաձայնությամբ էր կյանքի կոչված նա: Մշտասևեռ, ներհուն ու թախծոտ հայացքով նա ասես հավաքել էր ուզում նորածագ արևի փրկարար գործությունը և կիզել ինչ-որ անլուծելի գաղտնիքների հանգույցը:*

*Հավերժ սիրելի և աչքերիս առջև կենդանի կանգնած Ակսելի յուրաքանչյուր բառի ու դարձվածքի մեջ մերթ մրմնջում են, մերթ երգում Հայաստան աշխարհի երկնահաս լեռներն ու անդնդախոր վիհերը, անհուն երկինքն ու արագավազ գետերը, և այդ ամենից վեհ ու պայծառ՝ Հայաստանի հրաշք արևը:*

**Ավետիք Իսահակյան**

Հազրոն նվագում էր իր ծիրանի փողը, նվագում էր նոր զվարթությամբ այն երգը, որ նվագել էր իր հայրենի քարանձավներում, այնտեղ, ուր ամպերը հյուղակներից ցածր են լողում, և երբ զարկում է կայծակի լախտը, մի վայրկյան բռնկվում են ձորերը:

Նվագն ավարտվեց: Մարդիկ ցրվեցին: Կտուրի վրա մնացինք Հազրոն և ես: Լուսնի տակ դիտում էի նրա կարմրավուն փողը, որ կարծես ձուլված էր ծանր մետաղից: Ես բռնում էի այդ փողը գիշերային զովի դիմաց, և փողը մեղմ քամուց մետաղի ձայն էր հանում:

Իսկ Հազրոն պատմում էր, որ իր կյանքում ամենածանր հարվածը եղել է կնոջ մահը: Աղջիկն ամուսնացել է դաշտի գյուղում: Պապի մոտ հաճախ է լինում փոքրիկ տղան՝ նրա առաջին թոռը:

Երբեմն նա իջնում է լեռան գյուղից, վերցնում է չոր ցախ և կնոջ գերեզմանի գլխավերևը կրակ վառում: Նա նստում է այնքան, մինչև հանգչում է կրակը, հետո ծիրանի փողով տխուր նվագում է այն երգերը, որ նվագում էր իրենց հեռու երկրում, որտեղ ինքը հովիվ էր, կինը՝ գյուղական աղջիկ: Հետո թեթև հոգով գնում է աղջկա տունը, լսում է նրա տան աղմուկը, խաղում է թոռների հետ և մենակ ձանապարհ ընկնում դեպի լեռը՝ դեպի լեռան գյուղի իր պարզ խրճիթը:

— Հազրո՛, դու լսվ՛ էիր ապրում քո գյուղում:

— Մեր քարափների վրա՞... — և լռում է: — Հեյ վա՛նիս շահելություն, թոռա...

Եվ նորից վերցնում է փողը: Նվագում է, այս անգամ ոչ թե լեռնականների կորովի երգը, որից բորբոքվում է արյունը, այլ հովվական պարզ մի երգ: Կա թախիծ այդ երգի մեջ, կարծես մեկը մոլորվել է խոր ձորերում և տխուր հեկեկում է, կա և ջինջ ուրախություն, երբ լեռների վրա ծագում է արևը, ելնում է ծուխը, մշակը գնում է աշխատանքի, վերջապես կան և կարոտի հնչյուններ՝ վերադարձի և վերջին հույսի:

— Գո՛նե մի անգամ գնամ տեսության մեր քարերին, մեր ձորերին, մեր Մարութա բարձր սարին: Առնեմ իմ ծիրանի փողը, ժողովեմ մարդկանց, նստեմ անուշ խոտերի վրա, գառների պես մարդիկ նստեն իմ չորս բոլորը, երգեմ նրանց խաղաղության իմ երգերը, մարդիկ եղբայրների պես գրկեն իրար, չլինի

ո՛չ տեր, ո՛չ մշակ, ո՛չ թուր, ո՛չ բռնություն: Փչեմ իմ ծիրանի փողը, էլի ծուխը բարձրանա երդիկներից, խմեմ մեր լույս աղբյուրներից, իմ քրտինքը կաթա մեր քարերի վրա, մեր բարձր սարի ամպը թող լիզի իմ սպիտակ ոսկորները...

— Հագրո՛ւ, իսկ ո՛ւմ կտաս քո ծիրանի փողը:

— Իմ փողը կտամ իմ քաջարժիվ թոռնիկին:

Չյանբերդ... Չյանբերդ...

Դու դառնում ես անպարտելի ամրոց, քո բարձր լեռները զարթնել են, և քո լանջերին հնչում են հաղթության երգերը:

Մի վիթխարի ծիրանի փող առանց հին ահի և նոր խնդությամբ հնչեցնում է մեր արդար երգերը:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Ակսել Բակունցը:
2. Համացանցում գտի՛ր լրացուցիչ տեղեկություններ Ակսել Բակունցի ու նրա երկերի մասին:
3. Դասընկերներով հայթայթե՛ք նշանավոր ասույթներ՝ քաղված Ակսել Բակունցի երկերից:
4. Կարդա՛ Ակսել Բակունցի «Միրհավ» պատմվածքը և համեմատի՛ր քո կարդացած այլ պատմվածքների հետ:
5. Կարդա՛ նաև Ակսել Բակունցի «Խաչատուր Աբովյան» անավարտ վեպի «Լիբեր Արմենիեր» հատվածը:

## ՍԼՍՆԸ ԾԻԲԻ

### ԱՐՄԱՂԱՆ

Մի օր Քեռի Թորոսն ու մյուս իշխանները եկան Դեղձուն–Շամի մոտ.

— Դեղձո՛ւն տիկին, Սանասարի որդին մեծացել է, պիտի ամուսնացնենք:

— Ես էլ այդ մտքին եմ:

— Մանազկերտի Թեաթորոս թագավորը մի լավ աղջիկ ունի՝ անունը Արմաղան, — ասաց Քեռի Թորոսը: — Այդ աղջիկն ուզենք Մհերին:

Խնամախոսները գնացին Մանազկերտ:

.... Եվ բառերի համար քո մարմարյա,  
Հնամենի, բուրյան, որպես մեր հին

Քարաքանդակ անդուտ մատուռների

Անջջելի գրերն հնադարյան ....

Քո «Միրհավի» համար և լուսեղեն ....

«Ալպիական ծաղկի» այն բուրավետ,

Որ բուրելու է հար աննյութեղեն....

Այս ամենի համար և «Ծիրանի»

Հագարամյա փողի՛ համար քո այն ....

Ես քեզ օրհնում եմ արդ իմ անադարտ երգով...

Եղիշե Չարենց



— Քեռի՛ թորոս, — ասաց թևաթորոսը, — որ դուք իմ դուռն եք եկել, պատի՛վս վկա, աղջիկս ձեզ մատաղ կանեի, բայց ահա եղավ յոթ տարի՝ Սպիտակ դևը փախցրել է իմ աղջկան: Թող Մհերը Արմազանին գերությունից ազատի, իրեն արժանի է:

Սպիտակ դևը խլաթի թագավորն էր: Երբ լսեց, որ Սասնա Մհերի անունն օրեցօր բարձրանում է աշխարհում, մտածեց. «Օրերից մի օր այդ Սասնա ծուռն ինձ վնաս կտա, խլաթը կվերցնի»: Մի թուղթ գրեց, տվեց Քամի կտրիճին, ուղարկեց Սասուն: Այնտեղ գրած էր. «Մհեր, դու պիտի դաս ինձ հետ կռիվ թե չէ Սասունը կավերեմ, քո ժողովուրդը կտանեմ գերության»: Մհերը թուղթը կարդաց, ասաց.

— Լա՛վ, Սպիտակ դևին ասա՛, շուտով գալիս եմ:

Գնաց տուն, հագավ հոր զգեստներն ու զենքերը, հեծավ Քուռկիկ Զալալին, մոր ձեռքը համբուրեց, քշեց: Հասավ Սպիտակ դևի արոտավայրերը: Այդ օրերին Սպիտակ դևը եկել էր հանդը:

Մհերը ծարավել էր: Երկու դև-հսկա մի աղբյուրի վրա գոմեշի տիկը ջրով լցրել, կանգնել էին: Մհերը բարև տվեց.

— Կթողնե՞ք՝ աղբյուրից մի պուտ ջուր խմեմ:

— Ձէ՛, այս աղբյուրը Սպիտակ դևինն է, հրաման չկա, որ ուրիշ մարդ այս աղբյուրից խմի:

— Մի պուտ ջո՛ւր տվեք: Ծամփորդ մարդ եմ:

— Ձէ՛, — ասին, — չի լինի:

Մհերի համբերությունը հատավ, պահապաններից մեկին սպանեց, մյուսն էլ վիրավոր փախավ:

Մհերը մի կուշտ ջուր խմեց ու դևի արյան հետքերով գնաց հասավ մի մեծ քարայրի մոտ: Քարայրից բոց էր դուրս գալիս: Քարայրի առջև ծառին կապած հուր-հրեղեն մի աղջիկ դևի արյունն էր լվանում: Մհերը դևին կապեց ու դրեց մի մեծ քարի տակ, ապա այդ հուր-հրեղեն աղջկա կապերն արձակեց:

Աղջիկը խորունկ ախ քաշեց.

— Ա՛խ, այս յոթ տարի է՝ տանջվում եմ Սպիտակ դևի ձեռքին: Այս անիրավը եկավ մեր Մանազկերտի վրա կռիվ: Ինձ փախցրեց, բերեց այստեղ, ուզեց՝ ինձ իր կինը դարձնի: Բայց աստված ինձ ուժ տվեց, ես դևին անձնատուր չեղա: Երազի մեջ ինձ ասին՝ շատը գնաց, քիչը մնաց. Մհեր անունով մի կտրիճ կգա, Սպիտակ դևին կսպանի, ինձ գերությունից կազատի:

— Ո՞ւր է Սպիտակ դևը, — հարցրեց Մհերը:

— Քնել է: Ինն օր է անցել: Այսօր կգարթնի:



ՄՆերը գնաց անտառ, մի վիթխարի կաղնու տակ սպասեց, մինչև Սպիտակ դեռ արթնանա: ՄՆերի բնույթում չկար զարկել քնած մարդուն:

Սպիտակ դեռ քնից ելավ, կուշտ կերավ, խմեց, տրամադրությունը լավացավ, ու սարսափելի ծարավեց: Ջուր բերող դեերը չէին գալիս: Հեծավ ձին, քշեց աղբյուրի կողմը: Մեկ էլ տեսավ՝ ահագին կաղնու տակ նստած է սարի պես մի մարդ, կողքին էլ արածում է հրեղեն ձին: Սպիտակ դեռ գոռաց.

— Է՛յ, հողածին, հավքն իր թևով, օձն իր պորտով չեն հանդգնում իմ սարերին մոտենալ: Դու ի՞նչ սրտով ես իմ սահմանն անցել:

— Կանչել էիր ՄՆերին կռիվ: ՄՆերը ես եմ:

Սիպտակ դեռ այդ անունը որ լսեց, ահից ոտքն ու ձեռքը թուլացան, ասաց.

— Վա՛յ, դու բարո՛վ եկար, ՄՆե՛ր, հագա՛ր բարով: Վե՛ր կաց՝ գնանք իմ վրանը, կերուխում անենք մինչև լույս. աստված կա՛մ ինձ կտա, կա՛մ քեզ:

— Ձե՛, մեր պապերը մեզ այնպես են խրատել, որ թշնամու դեմ ելնելուն պես պիտի կռվենք:

Առյուծածև ՄՆերն ու Սպիտակ դեռ ձիերը հեծան ու քշեցին իրար վրա: Երկու օր ու երկու գիշեր ձիերով կռվեցին: Գետինը ճկվում էր նրանց ոտքի տակ: Սար ու ձոր դմբդմբում էին: Կտրիճները ձիերից իջան ու բռնեցին գոտեկուրիվ: Օրվա վերջում ՄՆերը Սպիտակ դեռին սպանեց, Արմաղանին ձիու վրա առավ ու սլացավ Սասուն: ՄՆերը տուն հասավ այն պահին, երբ Քեռի Թորոսն ու Ձենով Օհանը Մանազկերտից նոր էին դարձել:

Շատ ուրախացան: Համբավը տարան Թևաթորոս թագավորին: Նա ու իր իշխանները ձիերը հեծան, քառատրոփ եկան Սասուն, այն լույս-լուսեղեն Արմաղանին պսակեցին Առյուծ ՄՆերի հետ, յոթ օր, յոթ գիշեր հարսնիք արին, եղնիկի միս կերան, նուան գինի խմեցին, ուրախացան:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Որտե՞ղ էր գերի ընկել Արմաղանը:
2. Նկարագրիր Միերի ու Սպիտակ դեռի գոտեմարտը այնպես, ինչպես պատկերացնում ես:





*Ակսել Բակունցի կիսանդրին  
Գորիսում՝ Բակունցի անվան  
Հրապարակում  
քանդակագործ՝ Արա  
Հարությունյան*

*Մեր հին շինարար վարպետները վանքերի համար ոչ թե վիթխարի ու բազում զանգեր էին անում, այլ զգայուն արձագանքիչներ. ոչ թե նախշագարդում էին վանքերն ու իշխանատները, այլ միակ զարդը հնչեցնում էին զարդախմբերի ուժով: Բակունցն այդ վարպետների զուգահեռ սկիզբն է մեր արձակի մեջ:*

*Հրանտ Մաթևոսյան*

## ԱԼՊԻԱԿԱՆ ՄԱՆՈՒՇԱԿ

(հատված)

Կաքավաբերդի գլխին տարին բոլոր ամա է նստում, բերդի առամնաձև պարիսպները կորչում են սպիտակ ամպերի մեջ: Հեռվից ավերակներ չեն երևում, և այնպես է թվում, թե գոց են ապարանքի երկաթե դռները, աշտարակի գլխից մեկը ահա ձայն է տալու քարափը բարձրացողին:

Իսկ երբ քամին ցրում է ամպերը, երևում են աշտարակի խոնարիված գլուխը և կիսով չափ հողի մեջ խրված պարիսպները: Ոչ մի երկաթյա դուռ, և ոչ մի պահակ՝ աշտարակի գլխին:

Լռություն կա Կաքավաբերդի ավերակներում: Միայն ձորի մեջ աղմկում է Բասուտա գետը, ասես նրա սպիտակ փրփուրի տակ ոռնում են հազար գամփոներ և կրծում քարե շղթաները:

Պարիսպների գլխին բույն են դրել ցինը և անգղը: Հենց որ պարիսպների տակ ոտնաձայն է լսվում, նրանք կռնչունով աղմկում են, թռչում բներից և ահարկու պտույտներ անում բերդի կատարին: Ապա բարձրանում է արծիվը՝ կտուցը կեռ թուր, մագիլները սրածայր նիզակներ, փետուրները պողպատե զրահ:

Կաքավաբերդի բարձունքի միակ ծաղիկը ալպիական մանուշակն է՝ ցողունը կաքավի ոտքի պես կարմիր, ծաղիկը ծիրանի գույն: Քարի մոտ է բուսնում ալպիական մանուշակը, պարիսպների տակ: Արևից քարերը տաքանում են, և երբ ամպերը ծածկում են քար ու պարիսպ, մանուշակը թեքվում է, գլուխը հեցնում քարին: Ծաղկափոշու մեջ թաթախված գունա-

վոր բզեզին մանուշակը ձոձք է թվում, աշխարհը՝ ծիրանագույն բուրաստան:

Ներքևը՝ ձորում՝ Բասուտա գետի մյուս ափին՝ քարաժայռերի վրա, թառել են մի քանի տներ: Առավոտյան ծուխ է ելնում երդիկներից, ձգվում կապույտ երիզի նման և հալվում ամպերի մեջ: Հոգ կեսօրին գյուղում կանչում է աքլորը, նրա կանչի հետ պառավ մի շինական ձեռնափայտով ավազի վրա նշաններ է գծում, նշանների հետ փորփորում գլխով անցածը:

Ե՛վ գյուղում, և՛ բերդի գլխին ժամանակը սահում է դանդաղ, տարիները նույն ծառի միանման տերևներն են: Դրա համար էլ խառնվում է ծերունու հիշողությունը: Գետն աղմկում է առաջվա հանգով, նույն քարերն են, և նույն արծիվը:

\* \* \*

Արև մի կեսօր Կաքավաբերդի քարափով բարձրանում էին երեք ձիավոր: Ոչ միայն զգեստից, այլև ձի նստելուց երևում էր, որ առաջին երկու ձիավորը քաղաքի մարդիկ են և չեն տեսել ո՛չ Կաքավաբերդը, ո՛չ նրա քարափը:

Երրորդ ձիավորը նրանց ուղեկցում էր, և մինչդեռ առաջինները պինդ բռնել էին ձիերի գլխից, համարյա թե կռացել՝ հավասարակշիռ մնալու, վերջին ձիավորը քթի տակ մոմում էր մի երգ՝ մելամաղձոտ ու հուսահատ, ինչպես ամայի ձորը, տխուր քարափը և հեռավոր գյուղը:

Առաջին ձիավորը աչքը պարիսպներից չէր հեռացնում: Նրա գլխում բերդի պատմությունն էր, մագաղաթյա մատյաններում գրած խոսքերը իշխանական օրերի մասին, երբ գրահապատ ձիերի սմբակները դոփում էին երկաթյա մուտքի առաջ: Նրա ուսյալ աչքերը տեսնում էին գրահավորներին, մագաղաթյա մատենագրին՝ եղեգնյա գրչով նրանց գովքը հորինելիս, և նա լսում էր հնօրյա ձիերի դոփյունը: Ի՛նչ դժվար էր նրա համար քարափը, որով քարայծի նման մագլցում էին երբեմնի տերերը:

Երբ հասան վրաններին, առաջին ձիավորը շարունակեց ձանապարհը: Նա փնտրում էր հին ձանապարհը և չէր տեսնում վրանների առաջ՝ մոխրի մեջ խաղացող կիսամերկ երեխաներին:

*Բակունցը մեր արձակի ամենատաղանդավոր ներկայացուցիչն է: Նրա ստեղծագործությունների վրա անհատական կնիք է դրված: Այնպես նուրբ են հյուսված նրա պատմվածքները, կարծես երազ են տեսնում, այնպես կախարդորեն հալվում են իրար մեջ անցյալն ու ներկան, որ հուշը դառնում է ներկա ու իրական, ներկան դառնում է երազ, անդրաշխարհային:*

**Ավետիք Իսահակյան**

*Քնարական էր ոչ միայն իր գրքերում, այլև կյանքում: Մոլորություններ չուներ, եթե չհաշվենք ծխախոտը... Ամենամեծ «անկարգությունը», որ նա կարող էր թույլ տալ, այն էր, որ փողոցում կկռանար, կվերցներ մի հողակոշտ և ագահաբար կհամբուրեր.*

— *Ոչ մի հող այսպես չի բուրում, չէ...*

*Ես համախ ուշ գիշերներին անցնում էի այն տան մոտով, ուր ապրում և ստեղծագործում էր մեծ, անկրկնելի, եղերական Ակսել Բակունցը: Նա հիմա առապել է ու երգ: Փողոցից այլևս չես տեսնի նրան իր համեստ, փոքրիկ սենյակում՝ նստած իր գրասեղանի մոտ, գրելիս կամ կարդալիս... Ես վերջին անգամ նրան տեսա, երբ նա երեսուկոթ տարեկան էր, և այդպես էլ մնաց իմ հուշերում...*

**Գուրգեն Մահարի**

Բնության սիրահար էր նա, և սիրտը՝ գեղջկական կյանքի կարոտով լի...

.... Երբեմն նստում էր դիմաց և խոսեցնում մեր սարերից, տավարածների կյանքից: Լսում էր թաքուն համակրանքով, և ես զգում էի դա:

— Ա՛խ, ուրիշ բան չեմ ուզում. ձերից իջնեինք իշխանասարի անմահական աղբյուրներից մեկի մոտ, ծաղիկների վրա փռեինք մեր վերարկուները և խմեինք քչքչացող վճիտ ջուրը:

Արցունքներ երևացին կապույտ աչքերում:

Ես զնցված էի, վա՛հ, այսքան էլ կարոտ...

**Վախթանգ Անանյան**

Անմահ Բակունցը միայն մերը չէ, դարերինն է: Ակսելը մեր լեզուն կոկեց, վճիտ ջրով ցողեց ու իր՝ ակսելյանը թողեց....

Բակունցի պատմվածքներում հազիվ թե կարելի է գտնել որևէ էջ, ուր աղամանդների պես չչողչողան նրա համեմատություններն ու փոխաբերությունները, որ իր սև ցելերի սերմնացանի օրինակով այդպես առատորեն շաղ է տվել իր գրավիչ երկերում:

**Հարություն Մկրտչյան**

Գլխարկով երկրորդ ձիավորը Կաքավաբերդի գլխին հնություններ չէր որոնում: Նրա ամբողջ հարստությունը ծոցի հաստ տետրն էր և սրածայր մատիտը: Հերիք էր՝ աչքն ընկներ մի դեմքի, տեսներ գեղեցիկ մի անկյուն, մամռապատ մի քար, որ թղթի վրա մատիտով նկարեր այն, ինչ տեսել էին նրա աչքերը:

Առաջին ձիավորը հնագետ էր, երկրորդը՝ նկարիչ:

Երբ ձիավորները հասան վրաններին, շները հարձակվեցին նրանց վրա: Մոխրի մեջ խաղացող երեխաները տեսան, թե ինչպես շները հաչելով վազեցին ձիերի վրա: Երրորդ ձիավորն իզուր էր մտրակով փորձում շներին հեռացնել: Շները հաչելով մինչև բերդի պարիսպները ուղեկից եղան ձիավորներին, հետո իրար հետ խաղալով վերադարձան:

Կաքավաբերդի քարերն ասես կենդանացել ու խոսում էին հնագետի հետ: Նա մոտենում էր այս ու այն քարին, կռանում, նայում, չափում, գրում, ուտքով փորում հողի փլվածքը, բաց անում հողի տակ թաղված տաշած քարի ծայրը: Նա բարձրացավ պարսպի վրա, գլուխը դուրս հանեց բուրգի դիտարանից և բարձր կանչեց, երբ բուրգի անկյունում՝ քարի վրա, տեսավ փորագիր խոսքեր:

Երրորդ ձիավորը, որ պարսպի մոտ նստած ծխում էր, հնագետի կանչից վեր թռավ: Նրան թվաց, թե օձը խայթեց այդ մարդուն:

Գլխարկով մարդը նկարեց պարիսպների փլվածքը, սրածայր բուրգը և պատերի հետքերը: Բերդի մուտքը նկարելիս մատիտը մի պահ ձեռքին մնաց, որովհետև նրա ոտնաձայնից մի անգղ կոնյունով թռավ բնից, պտույտներ արեց բերդի գլխին:

Ձիերը, անգղների կոնչոցից վախեցած, խլշեցին ականջները, իրար մոտեցան: Եվ երբ հնագետը բուրգի ծայրից կանչեց, թե ինքը գտել է Բակուր իշխանի դամբանը, նկարիչը չհասկացավ նրա խոսքը: Աչքերն անգղների պտույտի հետ էին, նրանց թևերի հզոր շարժումի, կեռ ու արնագույն կտուցների հետ: Ինչ անեղ թափ կար նրանց պտույտում: Մի պահ մատիտը ձեռքին մնաց և չնկատեց, թե ինչպես գլխարկը սահեց և ընկավ քարի վրա:

Վրաններից մի մարդ, մանգաղը գոտու մեջ խրած, գլուխը թաշկինակով փաթաթած, մահակին հենվելով, բարձրացավ բերդի քարափով և մոտեցավ ձիերի մոտ նստած պահակին: Մարդը տեսավ հնագետին մի քար տեղահան անելիս: Եվ երբ պահակին հարցրեց, թե ովքեր են եկվորները, ինչ են փնտրում բերդի ավերակներում, պահակը հանկարծակիի եկավ և պատասխանեց, որ գրքերում գրած է, թե Կաթավաբերդի գլխին թաղված են ոսկե գանձեր:

Հնավորը դարձավ դեպի ձորը: Ու գնում էր՝ ինքն իրեն խոսելով: Ի՜նչ կլինեք, եթե ինքը գտներ գանձը: Քանի՜ անգամ է նա նստել հենց այն քարի վրա, որ տեղահան արեց հնագետը: Եթե իմանար, ապա գանձերը կլինեին իր գրպանում: Քանի՜ կով կառներ...

Միտք էր անում հնավորը, երբ նկատեց, որ կորեկի արտի կողքին է: Նա թիկնոցը շարտեց, թիկնոցի հետ էլ՝ ավելորդ մտքերը, մանգաղով զարկեց մի կապ կորեկ ու կորեց:

Բերդի քարերի մոտ բուսել էր ալպիական մանուշակ՝ ծաղիկը ծիրանի գույն: Հնագետը չէր տեսնում ո՛չ մանուշակ, ո՛չ խոտ: Նա կրնկակոխ էր անում խոտ ու ծաղիկ: Աշխարհը նրա համար ընդարձակ թանգարան էր, ուր չկար ոչինչ կենդանի: Նա պոկոտում էր քարերին փաթաթված բաղեղը, փայտի ծայրով արմատախիլ անում քարի ձեղքում բուսած մանուշակը, ձեռքով քարը շոյում և սրբում գրերի հողը:

Գլխարկով մարդը երբ նկարեց այն ամենը, ինչ հարկավոր էր հնագետին, տետրի նոր էջի վրա նկարեց և պարսպի մի մասը, ատամնաձև քարերի արանքում՝ քարե արծվի բույնը, պարսպի ոտների տակ՝ ալպիական մանուշակներ:

## **ՀԱՐՑԵՐ ԵՎ ԱՌԱՋԱԴՐԱՆՔՆԵՐ**

1. Դասընկերներով վերլուծեք «Ալպիական մանուշակը» պատմվածքը և քննարկե՛ք ձեր ուսուցչի հետ:
2. Համացանցում գտի՛ր լրացուցիչ տեղեկություններ Գորիս քաղաքի մասին և պատմի՛ր դասընկերներիդ:
3. Կարդա՛ նաև Ակսել Բակունցի «Խոնարի աղջիկը» պատմվածքը:

*Բակունցը խիստ քնքուշ, զգայուն գրող է: Քնարական այն նուրբ զգացմունքը, որ Բակունցի մեջ դրսևորվում է մարդկանց հանդեպ տածած այնքան բնական ու ինքնարուխ սիրով, առանձնակի սրությամբ է տալիս նրա գեղարվեստական զննումներին:*

*«Միրիավ» պատմվածքը ես առանց երկմտելու կղասեի Մուպասանի նմանօրինակ նորավեպերի շարքը: Ինչի՞ց է հյուսված այս նորավեպը. ծիրանի ծառերի միջից սողոսկող արևի լույսից, խաղողի հյութի բույրից, որ գալիս է այգու խորքում ծածկված հնձանից, որտեղ աշխատում է երիտասարդը: Զարմանալի ողջախոհությամբ է վերարտադրված այն տղամարդու տվայտանքը, որը, արդեն իր կյանքի մայրամուտին, սպանված միրհավի մեջ զգում է ջերմությունն այն աղջկա, որը մի ժամանակ՝ երիտասարդության օրերին, անձնատուր է եղել իրեն ու ընդմիշտ մնացել իր հիշողության մեջ:*

**Կոռնելի Զելինսկի**

*Պետք է ունենալ Ակսելի վրձինը՝ կենդանի գույներով նկարելու համար այն երազկոտ գանգեզուրցուն, որն իջել էր հայրենի լեռներից, որպեսզի տասը տարվա ընթացքում բարձրանա մեր գրականության Արարատը:*

**Մկրտիչ Արմեն**

*Բակունցը ամեննին էլ տխուր գրող չէ: Նրա էջերը լեցուն են պայծառ լավատեսությամբ:*

*.... Ամենուրեք նա տեսնում է զարմանալիորեն բազմազան, մարդուն բերկրանք պատճառող բնության գեղեցկությունը:*

*Բակունցը քնարական գրող է: Նրա նկարագրությունները աղբյուրի նման խոխոջում են ոչ բարձր ձայնով, բայց և բյուրեղյա մաքրությամբ ու տիրաբար:*

**Վալերի Կիրպոտին**





ԿՌԻՎ ՄՍՐԱ ՄԵԼԻՔԻ ՀԵՏ

Մսրա Մելիքը Մհերի համբավը լսել էր ու կատարել: Մհերն անտեղյակ էր, որ Սասունը հարկատու էր Մելիքին, ու նրան հարկ չէր ուղարկում:

— Գնացե՛ք Սասուն, ասե՛ք Մհերին, որ ես ու ինքը պիտի կովենք, — հրաման տվեց Մսրա Մելիքը: Մսրա Մելիքի մարդիկ եկան Սասուն, ասացին.

— Մհե՛ր, Մսրա Մելիքը քեզնից կռիվ է ուզում:

— Կռի՞վ է ուզում: Թող գա, տեսնենք՝ մենք նրան ինչ ենք պարտք:

Ձենով Օհանն այստեղ ասաց.

— Մհե՛ր, հեծի՛ր, գնա՛ Մսրը, Մսրա Մելիքի հետ խաթրո՞վ խոսիր, խնդրի՛ր, աղաչա՛նք արա, որ մեր հարկը մի քիչ պակասեցնի: Մեր հարկը շատ է, այդքանը տալու կարողություն չունենք:

— Հայ-հա՛յ, Օհա՛ն, ես չգիտեի, դուք էլ չէիք ասում, թե մենք Մսրա Մելիքին հարկ պիտի տանք:

Մհերը հագավ, կապեց, հեծավ Քուռկիկ Ջալալին, քշեց մինչև Մսրա սահման:

Մսրա Մելիքը նստած էր դաշտում՝ իր վրանի առաջ: Հեռվից տեսավ, որ գալիս է մի ձիավոր. մի ահագին ամրոց, ամրոցի վրա նստած, գալիս է:

Եկավ, մոտեցավ, Մսրա Մելիքին բարև տվեց:

Մսրա Մելիքը ահից բարևն առնել չկարողացավ: Մտքում ասաց. «Աշխարհում այսպես մա՞րդ էլ կա»: Մսրա Մելիքը, վախը սրտում պահած, հարցրեց.

— Կտրի՛ճ, ո՞րտեղացի ես:

— Սասունցի եմ, Սանասարի տղան:

— Աա՛, — ասաց Մսրա Մելիքը, — դո՞ւք եք, որ նստում եք իմ հողի մեջ: Մհերը դո՞ւ ես:

Մհերը բարկացավ ու մտքում ասաց. «Այս անասունը չի ասում «Սանա հող», ասում է «իմ հող»: Բայց հանգիստ պատասխանեց.

— Մհերը ես եմ:

— Ինչո՞ւ իմ հարկը չեք տալիս, նստել եք իմ հողի մեջ, իմ հարկը չեք տալիս:

— Մսրա՛ Մելիք, մենք չենք նստել քո հողի մեջ, մենք նստել ենք մեր հողի մեջ՝ մեր Սանա տանը:

— Մհե՛ր, զորքո՞վ կովենք, թե՞ ես ու դու:

— Զորքն ի՞նչ մեղք ունի: Կովենք ես ու դու:

Առավոտյան Մհերն ու Մսրա Մելիքը առան

իրար: Առաջ գուրգերով զարկեցին: Ամեն մեկի մկուռնը կշռում էր երեք հարյուր փութ: Արևելքում նրանց կովի ձայնը լսող մարդիկ ասում էին. «Այս ի՞նչ ամպեր են գոռգոռում»: Արևմուտքի լսողներն ասում էին. «Երկրաշարժ է, սարեր են փուլ գալիս»:

Մհերն ու Մսրա Մելիքը տեսան, որ գուրգերով իրար հաղթել չեն կարողանում, կպան գոտեկով: Հողը հերկվում էր նրանց ոտքերի տակ, ասես յոթ գուլթան մեկտեղ դաշտը վարում էին:

Մսրա Մելիքը տեսավ՝ Մհերը չի հաղթվում, իր ուժն էլ թուլանում է, ասաց.

— Հայ-Հայ, Սասնա՛ Մհեր, իմ խելքով՝ աշխարհի մեջ ինձնից ուժեղ կտրիճ չկար: Բայց ես ու դու իրար հաղթել չկարողացանք: Արի պայման կապենք: Էլ Սասունն ինձ հարկատու չէ: Սասունը՝ քեզ, Մսրը՝ ինձ: Մի պայման էլ կապենք. ես կովեմ՝ դու ինձ օգնության դաս, դու կովես՝ ես քեզ օգնության գամ: Ես մեռնեմ՝ իմ թագուհին ու տղերքը հանձնեմ քեզ, դու մեռնես՝ քո թագուհին ու տղերքը հանձնես ինձ: Որ մարդիկ չասեն, թե մնացին որբ:

— Հոժար եմ, — ասաց Մհերը:

Այս պայմանները կապեցին, ամեն մեկն իր մատը կտրեց, արյուններն իրար խառնեցին, եղբայրացան: Մսրա Մելիքը Մհերին կանչեց իր պալատ, յոթ օր, յոթ գիշեր նրան թագավորական խնջույք տվեց:

Մհերը վերադարձավ Սասուն: Ձենով Օհանը կանգնած էր բերդի դռան մոտ: Իրար բարև տվին, իրար երես համբուրեցին, Ձենով Օհանը հարցրեց.

— Մհեր, մեր հարկը պակասեցրի՞ր:

— Ի՛նչ հարկ, ի՛նչ բան, — ծիծաղեց Մհերը: — Մսրա Մելիքը լավ մարդ էր, մեր հարկը ինձ բաշխեց: Մենք նրա հետ եղբայրության ուխտ արինք:

Մհերը դարձավ Սասնա տան թագավոր: Շատ բարեկարգեց ու զորացրեց երկիրը: Քառասուն տարի Սասունն այնպես պահեց, որ ոչ մի դև ու թշնամի չէր հանդգնում ծուռ նայել մեր աշխարհին: Հավքը չէր համարձակվում անցնել Սասնա երկնքով, օձը չէր փորձում սողալ Սասնա հողերով:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ էին գոտեմարտում Մհերն ու Մսրա Մելիքը:
2. Նկարագրի՛ր Սասնա թագավոր Մհերին այնպես, ինչպես պատկերացնում ես:





*Հայկական դպրոցները փակվելու հետևանքով անգործ հայ ուսուցիչները երեխաներ էին ընդունում և պատրաստում ամեն տեսակ առարկաներից, չնայած մեր ավանում բացվել էր արդեն ռուսական դպրոց: Այստեղ կար երկու նպատակ. նախ՝ ուսուցիչներին պահել մինչև հայկական դպրոցների բացումը և մյուս կողմից՝ երեխաներին չուղարկել ռուսական դպրոց՝ որպես բողոք:*

**Ստեփան Զորյան**

Ի սկսկան ազգանունը՝ Առաքելյան: Ծնվել է 1889-ի սեպտեմբերի 15-ին Վանաձորում (նախկինում՝ Կիրովական): Նախագիտելիքներ է ստացել Զաքար վարժապետի «գաղտնի դպրոցում», ապա ընդունվել է ծննդավայրի նորաբաց ռուսական ուսումնարանը: 1906-ին մեկնել է Թիֆլիս, աշխատել «Սուրհանդակ», «Մշակ» թերթերում: 1919-ին տեղափոխվել է Երևան: Եղել է Հայաստանի գրողների միության վարչության քարտուղար (1950-54 թթ.): Վախձանվել է 1967-ի հոկտեմբերի 14-ին Երևանում: Թաղված է Կոմիտասի անվան զբոսայգու պանթեոնում:

Գրել է պատմվածքներ («Ցանկապատ», «Պատերազմը», «Ծովանը», «Գելի ձուտը», «Կատակ» և այլն), վիպակներ («Գրադարանի աղջիկը», «Սարաշենի տղաները» և այլն), վեպեր («Ամիրյանի ընտանիքը», «Մի կյանքի պատմություն», «Հայոց բերդը», «Վարազդատ» և այլն), զրույցներ («Եղևնին», «Սուտը» և այլն), մանրապատումներ («Գդալը», «Գեղեցկուհիները» և այլն), հուշեր («Հուշերի գիրք»), ակնարկներ:

Գրել է նաև պատմվածքներ պատանիների ու մանուկների համար («Խուժան Արշոն», «Մի գիշեր անտառում», «Սև Սեթոն», «Ճանապարհորդ Ջեկոն» և այլն), հեքիաթներ («Հագարան բլրով», «Ոսկին», «Հրաշալի սրինգը», «Մահակը» և այլն):

Ամենից նշանավորը նրա «Պապ թագավոր» պատմավեպն է:

Զորյանի ստեղծագործությունների հիման վրա նկարահանվել են «Ջրհորի մոտ», «Հեղկոմի նախագահը», «Խնձորի այգին» ֆիլմերը:



## ԶՐՈՒՅՑ ԵՐԳԻ ՄԱՍԻՆ

Մի օր Ռոմանոսը պատմեց:

Ուսանող էի Պետերբուրգի երաժշտանոցի վերջին լսարանում, ամառային արձակուրդներին գնացի Ֆինլանդիա՝ հազար ու մեկ լձերի երկիրը տեսնելու, նրա կիրթ ժողովրդին մոտիկից ձանաչելու: Հյուրանոցներից մեկում վարձեցի մի համար և սկսեցի պարապել. փորձում էի նոր եղանակներ ձայնագրել ու հետն էլ երգում էի կամ դաշնամուր նվագում:

Ու այսպես պարապում էի մի քանի օր՝ չմտածելով՝ իմ այս աղմկոտ պարապմունքը հաձելի՞ կլինի հարևաններիս, թե՞ տհաձ:

Բայց ահա դուռս ծեծում են մի օր:

Բացում եմ: Դիմացս կանգնած է կոկ հագնված, հիսունի մոտ մի եվրոպացի:

— Կարելի՞ է, — ասում է:

— Խնդրեմ, — հրավիրում եմ նրան ներս: — Ինչո՞վ կարող եմ ծառայել:

Հարցիս պատասխանելու փոխարեն հարցնում է.

— Ասե՛ք, խնդրեմ, դո՞ւք եք երգում այստեղ:

— Այո՛:

— Թո՛ղյլ տվե՛ք հարցնել ձեր ազգությունը:

— Ես հայ եմ:

— Հայ, — զարմանում է այցելուս և նայում ինձ ոտքից գլուխ: — Դուք երգի՞չ եք:

— Ո՛չ, երգահան:

— Երգահան, — երկարեց մտքերի մեջ: — Բայց և այնպես կարո՞ղ եմ խնդրել ձեզ, որ մի երգ երգեք ինձ համար: Ես ձեր սենյակի հարևանն եմ. ամեն օր լսում եմ ձեր երգերը, և դրանք հաձելի են ինձ:

Չլինելով երգիչ և չունենալով մշակված ձայն՝ ես այնուամենայնիվ չուզեցի մերժել անակնկալ հյուրիս և, երբ նա նստեց իմ հրավերով, սկսեցի.

*Կռունկ, ուստի՛ կուզանս...*

Այցելուս, որ սկզբում լսում էր՝ նայվածքն ինձ հառած, գլուխը կախեց և ձեռը տարավ ձակատին:

Լսում էր անշարժ, խորասույգ: Գոնե ինձ այդպես էր թվում: Այդ դիրքում մնաց մինչև երգիս ավարտը: Երբ ավարտեցի, նոր միայն գլուխը բարձրացրեց:

— Հնորհակալություն, — ասաց մի տեսակ բեկ-



**Ստեփան Զորյանի  
տուն-թանգարանը  
Վանաձորում**

Ունանք ազգային ձևը համարում են միայն լեզուն: Ինձ թվում է, որ արվեստի ազգային ձևը շատ ավելի լայն հասկացողություն է, քան լեզուն. ազգային ձևի մեջ մտնում է ազգային պատմելաձևը, ազգային բներանգը, աշխարհագրացումը, հոգերանությունը և շատ պատկերներ ու դարձվածքներ: Որքան երկր հագեցած է լինում այս առանձնահատկություններով, այնքան նա հարազատ է դառնում ժողովրդին և այնքան հետաքրքիր ու նոր՝ օտարների համար: Եթե ազգային ձևը լիներ միայն լեզուն, մենք չէինք զգա թարգմանության մեջ այս կամ այն հեղինակի ազգային առանձնահատկությունները, որոնք փայլ ու երանգ են տալիս նրանց երկերին:

**Ստեփան Զորյան**

Լեզուն իրոք մի գանձ է, որին չի կարող փոխարինել աշխարհի ոչ մի հարստություն: Նա ուրախության պահին բացում է մեր սիրտը, իսկ վատ տրամադրության ժամին նա է սփռփում մեզ .... ուստի իր մայրենի լեզուն վատ իմացողը կես մարդ է, չիմացողը՝ թշվառ, ծառից ընկած մի տերև, որ տարվում է ամեն մի պատահական քամուց:

**Ստեփան Զորյան**

ված, ես կասեի՝ տխուր ձայնով: — Ներեցե՞ք, ես կուզեի լսել ևս մի երգ, եթե միայն կարելի է:

Ես դարձյալ չմերժեցի: Օտար մարդ է, ցանկանում է ծանոթանալ մեր երգերին... Ինչպե՞ս մերժես: Ու սկսեցի «Արագն եկավ»: Բայց դեռ մի տուն չերգած՝ այցելուս տեղից վեր կացավ ու զնաց դեպի լուսամուտը և թիկունքն ինձ արած՝ նայեց դուրս:

«Ինչ անքաղաքավարություն», — մտածեցի ես, բայց շարունակեցի երգել՝ նայվածքս նրա կողմը: Երգեցի ևս մի տուն և հանկարծ ինչ եմ նկատում՝ հյուրս թաշկինակով սրբում է աչքերը... Ընդհատեցի երգս:

— Ներողություն, ինչ պատահեց ձեզ:

— Ձեր երգը, — այլայլված ասում է այցելուս, — ձեր երգը... Երեք օր է, գիտե՞ք, ձեր երգերը հուզում են ինձ, և ես չէի հասկանում պատճառը: Այսօր միայն իմացա, որ դուք հայ եք...

— Իմ երգերը, — զարմանում եմ: — Իմ երգերն այնքան օտար պիտի լինեն ձեզ:

— Օտար... Ո՛չ, ձեր երգերը հարազատ են ինձ. այո՛, մոտ ու հարազատ...

— Ինչպե՞ս: Դուք եղևի՞ եք Հայաստանում:

— Ո՛չ, սիրելիս: Իմ նախնիները եղել են Անիի բնակիչներ և Լեհաստան են գաղթել 13-րդ դարում: Ձեր ձայնի և երգի հնչյունները, ո՛չ, այդ հնչյունների արձագանքը ես միշտ լսել եմ մեր տանը և իմ հոգում... Ինձ թվում է՝ ես այդ երգերը լսել եմ վաղուց...

Այս ասելով՝ կրկին խնդրեց, որ երգեմ ևս մի երգ: Եվ ես երգեցի...

### ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Ստեփան Զորյանը:
2. Համացանցում գտիր լրացուցիչ տեղեկություններ Ստեփան Զորյանի ու նրա երկերի մասին:
3. Դասընկերներով հայթայթե՛ք նշանավոր ասույթներ՝ քաղված Ստեփան Զորյանի երկերից:
4. Կարդա՛ Ստեփան Զորյանի «Հազարան բլբուլ» հեքիաթը և համեմատիր քո կարդացած այլ հեքիաթների հետ:
5. Կարդա՛ նաև Ս. Զորյանի «Պլպա թագավոր» վեպը:

ՄՀՆԲԸ ԳՆՈՒՄ Է ՄՍԸՐ

Ժամանակ անցավ. մեռավ Մսրա Մելիքը: Նա ժառանգ չուներ:

Մսրա Մելիքի թագուհին՝ Իսմիլ խաթունը՝ ջահել ու գեղեցիկ մի կին, մտածեց. «Ինձ հարկավոր է զորեղ մի մարդ, որ իմ երկրին տիրություն անի, մեր այս հաստակող իշխաններին ճգմի: Մի թուղթ չուղարկե՞նք Սասնա Մհերին, որ ինձ հյուր գա, ինձ հետ անկողին մտնի, ես ունենամ Սասնա ցեղից մի կտրիճ տղա: Մսրա Մելիքն էր ասում. «Իսմիլ, եթե Սասնա Մհերի և իր ձիու սերմը չվերցնենք, Մհերի ցեղը մեր ցեղին մեծ վնաս կտա»:

Իսմիլ խաթունը մի նամակ գրեց, հանեց իր գոտիկ-լաչակը, կանչեց երկու կտրիճ, ասաց.

— Տարե՛ք Սասուն, տվե՛ք Մհերին:

Մհերը Իսմիլ խաթունի գոտիկ-լաչակը վերցրեց ու նամակը կարդաց. «Մհե՛ր, Սասունը քո ձեռքին է, Մսրա երկիրն էլ առ քո ձեռքը: Դու Մսրա Մելիքի հետ ուխտ ես արել, որ նրա կնիկ-տղեքը պահես: Եթե չգաս, կնիկ ես ինձնից առավել»:

— Հե՛յ, կտրիճնե՛ր, — ասաց Մհերը, — նստե՛ք, հա՛ց կերեք, ապա բարեւ տարե՛ք Մսրը՝ Իսմիլ խաթունին, ասե՛ք՝ ուխտս ուխտ է մնացել, քառասուն օր հետո կգամ իր մոտ, կտեսնենք՝ ուզածն ինչ է:

Մհերը Մսրա կտրիճներին ճանապարհ դրեց, ապա գնաց, Արմաղանին պատմեց նամակի մասին.

— Մհե՛ր, մի՛ գնա, — ասաց Արմաղանը: — Իսմիլ խաթունը խաբոււմ է քեզ: Նա քո գեղեցկությանը չի կարոտ, քո ուժն ու քաջությունն է ուզում: Գիտի քո զորությունը, կանչել է, որ քեզնից տղա ունենա, Մսրա ճրագը վառ պահի, Սասնա ճրագը մարի: Մի՛ գնա, Մսրա խաթունի համար ինձ մի՛ թող:

— Ես Մսրա Մելիքի հետ ուխտ եմ արել. ճար չկա, պիտի գնամ:

— Մհե՛ր, կանչի՛ր Սասնա տան իշխաններին, թող նրանք ասեն՝ գնա՞ս, թե՞ չգնաս:

Մհերը կանչեց իշխաններ, վարդապետներ, ազգ ու բարեկամ, պատմեց եղելությունը.

Ձենով Օհանն ասաց.

— Մհե՛ր, Մսրա խաթունը խորամանկ է, մեր Սասնա թշնամին: Խաբոււմ է քեզ: Մի՛ գնա: Դու ժառանգ չունես, կա՛ց քո տանը, միգուցե աստված քեզ





մի լաճ պարգևի՝ քեզ փոխարինող Սասնա ապավեն:  
Իշխաններն ու հոգևոր հայրերը ասին.

— Թագավորն ապրած կենա, մենք իշխանություն  
չունենք ասելու՝ մի՛ գնա: Դու գորեղ, իմաստուն  
մարդ ես: Մեր փափագն է՝ ոչ միայն Մսրբը, ուրիշ  
հողեր էլ առնես մեր ձեռքի տակ: Ուրիշ թագավոր-  
ներ կռվով են երկիր առնում, Մսրբը սիրով են քեզ  
տալիս: Ինչո՞ւ չվերցնես: Գնա՛:

— Մհեր, — ասաց Արմաղանը, — Իսմիլ խաթու-  
նը կռապաշտ է, դու՛ խաչապաշտ: Մեղք մի՛ գործիր:

— Գլուխը մեռնի այն մարդու, որ իրեն ուղարկված  
կնոջ գոտիկը չի վերցնի, — բարկացավ Մհերը: —  
Ես կտրիճի խոսք եմ տվել, պիտի գնամ:

— Մհեր, ես քո վրա ուժ չունեմ: Կին եմ՝ բե-  
րանս կապած: Գնա՛: Քեզ չեմ անիծի: Բայց ուխտ  
եմ անում. եթե գնաս, իմ հայրն ու իմ եղբայրն են.  
քառսուն տարի դու իմ բարձին չես մոտենա:

Երեսունինն օրը լրացավ, մնաց մեկ օր:

Մհերը պատրաստություն տեսավ Մսրբ գնալու:

Արմաղանը սև շոր քաշեց իր ամուսնու սնարին,  
իր սևը ներս արեց, սիպտակը դուրս արեց, Մհերին  
գնաս բարով ասաց:

Մհերը հեծավ Քուռկիկ Ջալալին: Ձենով Օհանը  
վազեց, կախ ընկավ ձիու վզից, լաց եղավ, աղաչեց.

— Մհեր, մի՛ գնա, Սասնա տան ճրագը մի՛ մա-  
րիր: Այն անառակ Մսրա խաթունը խաբուժ է քեզ:

Մհերի ճարը կտրեց, գուրգը թափահարեց Օհանի  
վրա: Գուրգի քամուց Օհանն ընկավ, ուշաթափվեց:  
Մհերը չիմացավ՝ ինչ աներ. ձիուց իջավ, Օհանի  
սիրտը մածեց.

— Օհան, իմ մե՛ծ եղբայր, վե՛ր կաց, մի՛ սրտմտիր:  
Ես իմ աստծու առաջ ուխտ եմ արել. եթե չգնամ,  
ուխտագանց կլինեմ, կմեռնեմ:

Օհանը ելավ կանգնեց, ասաց.

— Ա՛խ, Մհեր, Մհեր, գնա՛: Ուր էլ գնաս, ճամ-  
փաներդ քո առջև կանաչեն, թշնամիներդ հեռու  
մնան, բարեկամներդ՝ մոտիկ:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ էր Իսմիլը իր մոտ կանչում Մհերին:
2. Նկարագրիր Իսմիլ խաթունին այնպես, ինչպես պատ-  
կերացնում էս:

**ՍՄԲԱՏ ԲԱԳՐԱՏՈՒՆԻ**  
(հատված)

Բյուզանդիայի Մորիկ կայսրը, որ ծագումով հայ էր, իր տիրապետությանը ենթակա Արևմտյան Հայաստանը թուլացնելու նպատակով պարբերաբար զորահավաք էր անցկացնում և հայ զինվորներին ուղարկում հեռավոր վայրեր՝ կռվելու Բյուզանդիայի թշնամիների դեմ: Հայ նշանավոր իշխան Սմբատ Բագրատունին այլ հայ իշխանների հետ փորձում է չենթարկվել Մորիկին: Բայց նրանց դավադրաբար ձերբակալում են և տանում Բյուզանդիայի մայրաքաղաք: Կայսրը Սմբատին ամենախիստ պատիժն է սահմանում՝ կայսերական կրկեսում մերկ ու անզեն նետել վայրի գազանների առաջ:

Եվ ահա մի օր արյունոտ տեսարանների ծարավ, անգութ ամբոխը հավաքվել էր կրկեսում: Այստեղ էին պաշտոնյաներ և Մորիկ կայսրն իր կայսրուհու հետ:

Երբ կայսրը գլխով հավանության նշան արեց, հնչեցին փողերը, կրկեսի հրապարակի վրա մի դուռ բացվեց, և այնտեղից դուրս եկավ մի կիսամերկ, բարձրահասակ ու ջլապինդ տղամարդ: Առաջ եկավ նա դանդաղ ու համրընթաց, ջղուտ, խոշոր ձեռքերը կրծքին ծակած: Մի տասը-քսան քայլ առաջանալով՝ կանգ առավ ծանրախոհ արժանապատվությամբ և արհամարհոտ հայացքով նայեց շուրջը: Դա Սմբատ Բագրատունին էր: Նա երկար չսպասեց... Բացվեց հրապարակի դռներից մեկը, և այնտեղից կարծես ականա դուրս եկավ մի սևամազ արջ ու հետին ոտքերը ծուռ դնելով՝ առաջացավ՝ օդը հոտոտելով:



*Ստեփան Զորյանի  
կիսանդրին Վանաձորում*

*Ստեփան Զորյանը, արդարև, ժողովրդի կյանքում տեղի ունեցած կերպարանափոխությունների ու նրա պատմական ձևկատազրի տարեգիրն է: Դրանով էլ նրա ստեղծագործությունն արժանացել է համաժողովրդական ձանաչման:*

**Սուրեն Աղաբաբյան**



**Ստեփան Զորյանին նվիրված նամականիշ**

Սպասումից անհամբեր ամբոխը ծափահարեց գագաճին ուրախ ու ցնծալի՝ ասես հաջողություն մաղթելով նրան: Եվ արջը, կարծես այդ ծափերից խրախուսված, գնաց դեպի Բագրատունին հանգիստ քայլերով, բայց ահավոր մի համարձակությամբ:

Եվ այն պահին, երբ արջը, իր որսն ուսումնասիրելով, թափ առավ հարձակվելու, Սմբատ պատրիկը, թողնելով իր արհամարհոտ դիրքը, վազեց դեպի արջը՝ ասես նրանից խուսափելու, նրա կողքով անցնելու նպատակով... Սակայն հասնելով գագաճին՝ նա բարձր գոռաց նրա ականջի տակ ու բռունցքը մուրձի պես իջեցրեց նրա ձևկատին:

Կատարվեց տարօրինակ մի բան. գագաճը նախ մարդու գոռոցից, ապա նրա հարվածից շշմած, ետետ գնաց և ընկավ հետին ոտքերի վրա: Ամբոխին թվաց, թե դա պատահմունք էր կամ արջի կողմից մի ձարպիկ հնար... Սակայն արջն այլևս չէլավ տեղից. նրա մարմինը շուտով փռվեց գետնին: Ամբոխը մի «ամի» արավ զարմացած ու լռեց: Սպասեց, թե արջը կելնի տեղից... Բայց շուտով կրկեսի աշխատողները եկան և արջի լեշը քարշ տալով տարան:

Մինչ Բագրատունի իշխանը ծանր շնչում էր ու մտածում, թե էլ ինչ գագաճն են թողնելու իր վրա, հանկարծ մի այլ դռնից դուրս վազեց մի կատաղած ցուլ, որը նախ կանգ առավ, գլուխը բարձրացրեց և դիտեց կրկեսի հարկերը, պոչը թափահարելով խփեց կողերին, ապա գլուխը իջեցնելով՝ նայեց դիմացը կանգնած զոհին ու սուրաց՝ նրան հարվածելու և տրորելու, ինչպես արել էր շատերին:

Սմբատ պատրիկը չփախավ ցուլի առջևից, ոչ իսկ փորձ արեց մի կողմ քաշվելու: Նա կանգնել էր՝ ձեռքերն առաջ պարզած, ոտքից մինչև վիզը լարված. և երբ ցուլը վրա վազեց նրան հարվածելու, Սմբատը անակնկալ բռնեց նրա եղջյուրները իր ջլապինդ ձեռքերով և ... աշխատեց ոլորել ցուլի վիզը:

Սկսվեց մի լարված պայքար: Մարդ ու ցուլ հեռում, տնքում ու մոնչում էին միասին: Ցուլը ջանում էր եղջյուրներն ազատել, որ հարվածի կամ տապալի մարդուն, իսկ մարդը, մկանները լարած, ուզում էր ոլորել նրա վիզը՝ եղջյուրներից բռնած: Իրար ընկձելու մո-



լուցքով դառնում էին նույն տեղում՝ գետինը ուռքերով ակոսելով ու քանդելով: Հանկարծ կրկեսը թնդաց ցուլի ահավոր գոռոցից... Ցուլը ետ-ետ գնաց ու շրջվելով փախավ՝ գլուխն իջեցրած: Սմբատ պատրիկը նրա զույգ եղջյուրները հանել էր իրենց միջուկների վրայից, և ցավից սարսափած ցուլը փախչում էր արյունվա գլխով: Սմբատը, ձեռքի եղջյուրները մի կողմ նետելով, վազեց ցուլի հետևից և ակնթարթորեն մի ձեռքով բռնեց նրա պոչը, մյուսով՝ ուռքի կծղակներից մեկը... Եվ ինչպես ցուլի եղջյուրները, այնպես էլ նրա հետևի մի ուռքի կծղակը մնաց Սմբատի ձեռքին: Ցուլն այս անգամ փախավ՝ վիրավոր ուռքը գետնից վեր պահած, միայն երեք ուռքով:

Ամբոխը նորից մի «անի» արավ՝ զարմացած մարդու ուժի և հնարքի վրա, բայց համակրանք չհայտնեց՝ կայսեր ներկայությունից վախեցած: Ամենքը գիտեին, որ Մորիկը գայրանում է ուրախության ու հավանության արտահայտություններից այն դեպքերում, երբ մարդն ընկձում կամ հաղթում է գազանին:

Զարմացած հանդիսականները սպասում էին, թե կայսրն ահա հրաման կտա, որ այդ անօրինակ քաջության համար ներեն դատապարտյալին:

Բայց... Մորիկի կողմից ոչ մի նշան: Նրա երկար դեմքը, որ մորուսի պատճառով ավելի երկար էր թվում, անգամ զարմանք չարտահայտեց. վրեժխնդրության մոայլը դեռ նստած էր նրա երեսին, և Բագրատունու հաղթությունն ավելի մոայլեց նրան:

Ու ոչ միայն ներում չեղավ, այլև հայ գորավարի վրա բաց թողեցին ամեհի մի առյուծ, որը դռնից դուրս ելավ այնպես, ինչպես բոցերի խուրձը կծայթքի հնոցից: Արյան ու մահի տեսարաններ սիրող ամբոխի բերանից թռան հիացումի ու վախի ձիչեր, իսկ կայսեր և նրա պճնագարդ պալատականների դեմքով հեզմանքի նման մի բան անցավ:

Իսկ Սմբատ պատրիկը, մահն աչքի առաջ, պաղարյուն կանգնել էր կրկեսի հրապարակում ու ակնդետ հետևում էր առյուծի շարժումներին: Երբ առյուծը մարդուն գննելուց հետո թափ առավ հարձակվելու, Սմբատը կանգնած տեղից նետվեց մի կողմ՝ առյուծի աջ կողմը. բայց այն վայրկյանին, երբ առյուծը, նպա-

*Ստեփան Զորյանի արվեստը պարզ է ու բնական, ինչպես ինքը՝ բնությունը: Հիրավի, նա պարզ հոգիների երգիչ է: Նա արտակարգ ձիրք ունի հասարակ մարդկանց հոգու գեղեցկությունները ծանաչելու և ձշմարտացիորեն արտացոլելու:*

**Աշոտ Գրաշի**



*Ստեփան Զորյանի դիմանկարը նկարիչ՝ Մարտիրոս Սարյան*



**Ստեփան Զորյանի գեմանկարը նկարիչ՝ Դմիտրի Նալբանդյան**

Մեր տնեցիները, մեր բարեկամները հաճախ էին խոսում մեր ժողովրդի թե՛ հետո անցյալից և թե՛ նրա ներկա ծանր վիճակից: Խոսում էին, որ մեր ժողովուրդը եղել է անկախ, ինքնուրույն և հիմա իրավագուրկ ձնչվում է օտարներից: Խոսում էին կործանված մայրաքաղաք Անիի մասին, նրա մեծ շենքերի ու հարուստ ավերակների մասին ու տխրում...

Տասն երբ նկատում էր, որ գրուցողները տխրում են հուսահատ, միշտ մինևույն խոսքերով ոգևորում էր նրանց.

— Էպես չի մնա, ձեզ մատաղ: Մենք էլ մեր թագավորը ունենք: Դեռ երեխա է: Կաթողիկոսը պահում է, որ մեծանա, մեզ ազատի...

**Ստեփան Զորյան**

տակից վրիպած թռիչքից հետո կանգնեց թաթերի վրա, Սմբատը իսկույն նետվեց դեպի գազանը, մի ակնթարթում ձախ ձեռքով բռնեց առյուծի ականջն ու թռավ նրա մեջքին... Ապա աջով սկսեց սեղմել նրա խոչափողը... և առյուծն այլևս չկարողացավ գործի դնել ո՛չ իր ատամները, ո՛չ ձանկերը: Նա, գլուխը բարձր բռնած, վազում էր առաջ՝ կարծես մեջքն ու կուկորդը ազատելու համար: Սակայն կրկեսի լայն հրապարակում դեռ մի շրջան չարած՝ շնչահեղձ եղավ և ընկավ գետնին: Նրա հետ ընկավ և Սմբատը, որովհետև այնպես էր կպել գազանին, որ չէր կարող իսկույն ցատկել մի կողմ: Ամբոխը կարծեց, թե դա առյուծի կողմից մի հնար էր՝ իր բեռից ազատվելու: Բայց Սմբատն ընկած տեղից հանգիստ վեր կացավ, երկու ձեռքով բռնեց առյուծի գլուխը, բարձրացրեց նրան ամբողջ հասակով մեկ այնպես, որ նրա պոչը կախ ընկավ թուլացած, ապա սեղմեց նրա կուկորդը այնպես, որ գազանի լեզուն էլ կախ ընկավ ատամների արանքից: Ապա նա առյուծին զզվանքով զցեց գետնին:

Այս անգամ արդեն ամբոխը չկարողացավ զսպել իր հիացմունքը. ծափերն ու աղաղակները թնդացրին կրկեսը: Բոլորը ծափահարում էին և գոռում.

— Ներել... Ներել...

Այդ համառ աղաղակները լսելուց, թե խղձահարությունից, կամ գուցե դատապարտյալի խիզախությունից ազդված՝ շքեղահանդերձ կայսրուհին թեքվեց, բռնեց կայսեր ձեռքը և նույնպես ներում խնդրեց:

Համառ ու դաժան Մորիկը, ինքն էլ երևի զարմացած Սմբատ զորավարի ուժի և հնարամտության վրա, լսեց կայսրուհու և պալատականների խնդրանքը, գուցեև ամբոխի պահանջը և ներումի նշան տվեց:

### **ՀԱՐՑԵՐ ԵՎ ԱՌԱՋԱԴՐԱՆՔՆԵՐ**

1. Դասընկերներով հայթայթե՛ք ասույթներ Ստեփան Զորյանի մասին:
2. Կարդա՛ն Ստեփան Զորյանի «Խնձորի այգին» վիպակը և համեմատի՛ր քո կարդացած այլ վիպակների հետ:
3. Կարդա՛ն նաև Ստեփան Զորյանի «Հայոց բերդը» վեպը:



ԻՍՄԻԼ ԽԱԹՈՒՆ

Մհերը լուսաբացին հեծավ ձին, քշեց Մսրա քաղաք: Ճանապարհին Արմաղանի ու Ձենով Օհանի խոսքերը միտքն ընկան, սիրտը երկտակվեց:

Երեկոյան տեղ հասավ: Մսրա խաթունը ճանապարհին մինչև մեկ ժամվա երթ գորգ էր փռել, աչքերը ներկել էր, հյուսքերը ոլորել, նստել պատուհանին: Մհերը եկավ, կանգնեց պատուհանի տակ.

— Իսմիլ՛ խաթուն, ուզածդ ի՞նչ է:

— Ա՛յ Մհեր, հյուրը այդպե՞ս կխոսի: Ձիուցդ իջի՛ր, արի վե՛ր, նոր քեզ ամեն բան կպատմեմ:

— Ձէ՛, հիմա պիտի պատմես: Ուխտ եմ արել՝ ձիուց չեմ իջնի, մինչև չիմանամ՝ քո ուզածն ինչ է:

— Տնաշե՛ն, ձեր երկիրը հո չի՞ քանդվի, դու կրակ տանելու հո չե՞ս եկել: Իջի՛ր ձիուց, արի վերև՛, հանգստացի՛ր, հա՛ց կեր, նոր կգնաս քո Սասունը:

— Ձէ՛, այդ խոսքերդ տո՛ւր քամուն:

Իսմիլ խաթունը տեսավ՝ Մհերն ուզում է հետ գնա, իր ծառաների վրա գոռաց.

— Մենք չունե՞նք յոթ տարվա գինի, բերե՛ք:

Ծառաները մի մեծ կժով յոթ տարվա գինի բերեցին, Մհերը ձիու վրա խմեց, գլուխը պտույտ եկավ: Այդ ժամանակ Իսմիլ խաթունը հրաման տվեց.

— Բռնե՛ք Մհերի ձին:

Ծառաները սանձը բռնեցին, Մհերը ձիուց իջավ:

Իսմիլ խաթունն էլ պատուհանից իջավ, Մհերին տարավ իր պալատը, «բարի գալուստ» ասաց:

— Մհե՛ր, քեզ կանչել եմ, որ իմ երկիրը խաղաղեցնես: Յոթ իշխան իմ դեմ ապստամբել են:

— Լա՛վ, լուսանա՛ այդ իշխաններին կանչե՛ք:

Իսմիլ խաթունն ուրախացավ, ժպտաց.


— Մհե՛ր, ես քեզ իմ գոտիկ-լաչակն եմ ուղարկել: Կանչել եմ, որ գաս «ինձ մոտ»:

— Այդ մեկը չեղած բան է, — ասաց Մհերը: — Ինքդ անօրեն ես, ես՝ քրիստոնյա:

— Մհե՛ր, ես քեզ վաղուց եմ սիրել, այն օրվանից, երբ դու Մսրա Մելիքի հետ կռվեցիր: Ես քեզ եմ սպասում այսքան տարի: Դու պիտի լինես ինձ ամուսին, իմ թագավորութունը ձեռքդ առնես, կանգնես իմ թշնամիների դեմ:

Իսմիլ խաթունը քաղցր խոսքով, փաղաքշանքով ու յոթ տարվա գինով արբեցրեց Մհերին, տարավ





«իր մոտ»: Իսմիլ խաթունը հասավ իր նպատակին: Հետո իր մշակներին կանչեց, ասաց.

— Քուռկիկ Ջալալին քաշե՛ք մեր մատակների վրա: Շո՛ւտ արեք:

Մսրա խաթունը Մհերից մնաց երկուսով: Մսրա մատակները Քուռկիկ Ջալալուց քուռակ բռնեցին:

Լուսաբացին Մսրա յոթ ապստամբ իշխանները եկան Մհերի մոտ, հնազանդության երզում տվին:

Մհերը պետք է հետ դառնար Սասուն, բայց Իսմիլը չթողեց, որ նրա գինովությունն անցներ:

Ինն ամիս որ լրացավ, Իսմիլ խաթունը բերեց մի տղա: Անունը դրեցին Մսրա Մելիք:

Յոթ տարի սիրուց ու գինուց արբեցած Մհերը մոռացել էր Արմաղանին, Սասունը, ազգ ու բարեկամ: Մի օր Մհերը գալիս էր տուն, լսեց, որ Իսմիլը իր տղային ծնկների վրա թուցնում էր ու երգում.

Մսրա օջախը վառ պահես,

Հայոց օջախը մար պահես:

Մհերը դառնացավ, սրտի մեջ ասաց. «Հայ–հայ՛, եկա այս երկիրը, Մսրա ճրագը վառեցի, Սասնա ճրագը հանգցրի»: Մտավ Իսմիլ խաթունի սենյակը.

— Իսմի՛լ, այդ ի՞նչ խրատ ես տալիս դրան: Ձվից դեռ դուրս չի եկել, և դու իրեն չարության դա՞ս ես տալիս: Որ մեծանա, հայի ճրագը հանգցնի՞:

— Լավ եմ անում: Ուրախ եմ տղայիս համար: Կմեծանա, ամբողջ աշխարհը կզավթի:

— Է՛, դու ինձնից մի տղա ունեցար, որ Սասնա ճրագը հանգցնե՞ս, որ իմ ազգը փչացնես, քոնը զորացնե՞ս: Կդառնամ, կգնամ Սասուն:

— Մհե՛ր, ես ուզում էի, որ ինձ քեզնից մի տղա ծնվեր, որ Մսրեն ունենար մի զորեղ ժառանգ, որ Մսրա ճրագը վառ մնար: Ես իմ նպատակին հասա: Հիմա կուզես՝ գնա՛:

Այս խոսքերի վրա Մհերի գինովությունն անցավ, մտքում ասաց. «Ա՛խ, իմ ոտքը կոտրվե՛ր, Մսրը չգայի: Յոթ տարի օտարի արտը կանաչ պահեցի, իմ արտը չորացավ: Վա՛յ, դու այս ի՞նչ արիր, Մհե՛ր»:

Սուսուժուս դուրս եկավ Մսրա քաղաքից ու գլխիկոր դարձավ դեպի Սասուն:

## ՀԱՐՅԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Մհերը յոթ տարի մնաց Մսրում:
2. Նկարագրիր հարբած Մհերին պատկերացրածիդ պես:

Իսկական անունը՝ Կոստանդին Եղիազարյան: Ծնվել է 1885-ի փետրվարի 2-ին Շամախի քաղաքում (այժմ՝ Ադրբեջանում): Սովորել է Բաքվի ռուսական գիմնազիայում, Փարիզի Սեն-ժերմեն քոլեջում, Բրյուսելի համալսարանում: 1910-1913 թթ. Վենետիկի Մխիթարյան միաբանությունում սովորել է գրաբար ու գրական արևմտահայերեն: Մինչ այդ իր երկերը գրել և հրատարակել է իտալերեն, ֆրանսերեն: 1914-ին Պոլսում հիմնել է «Մեհյան» ամսագիրը: Հայոց մեծ եղեռնից մազապուրծ՝ մեկնել է Բուլղարիա, ապա՝ Իտալիա: 1961-ին ներգաղթել է Հայաստան: 1962-1969-ին աշխատել է Ե. Չարենցի անվան գրականության և արվեստի թանգարանում: Վախձանվել է 1969-ի դեկտեմբերի 11-ին Երևանում:

Գրել է բանաստեղծություններ («Նամակ առ պարուհին», «Ընկուզենու տերևը» և այլն), պոեմներ («Երեք երգ՝ ասելու համար վիշտը երկրի և վիշտը երկնքի», «Տատրագոմի հարսը», «Արա աստված», «Վահագն» և այլն), վեպեր («Բանկոռպը և մամութի ոսկորները», «Նավը լեռան վրա»), հուշագրություններ («Անցորդը և իր ձամփան», «Հռոմեական հուշագրություններ» և այլն), ուղեգրություններ («Սպանիա», «Դեպի Արարատ», «Միացյալ Նահանգներ» և այլն), խոհագրություններ («Արևմուտք», «Քաղաքներ», «Երկրներ և աստվածներ» և այլն), հողվածներ («Հային Հիսուսը», «Հեթանոսություն» և այլն), գրականագիտական ու արվեստաբանական երկեր:

«Երեք երգ» պոեմի հիման վրա իտալացի երգահան Օտտորիանո Ռեսպիգին ստեղծել է «Գարուն» օրատորիան: Օ. Ռեսպիգին և Տ. Մանսուրյանը Չարյանի մի շարք երկերի հիման վրա գրել են երգեր:



*Օտարի պարտադրած գաղափարները հայերեն գրելը դեռ հայ գրականություն չէ:*

**Կոստան Զարյան**

*Լեզուն արյուն է. արյունը չի կարելի փոխել: Լեզուն ոգի է. ոգին չի կարելի աղավաղել:*


**Կոստան Զարյան**

## ՀԱՅՈՒԹՅԱՆ ԿՈՉՈՒՄԸ

(հատված «Անցորդը և իր ձամփան» երկից)

Ովքեր ուզում են օտարա-  
նալ, բարի ձանապարհ, թող  
օտարանան: Արդեն հայությունը  
քանակ չէ, այլ որակ է:

**Կոստան Զարյան**



Հայոց երկիրը լեցուն է քա-  
րացած ուղտերի կարավաննե-  
րով: Տեղ-տեղ բուքը շարժում  
է նրանց դունչը: Չյունը նրանց  
ոլոր կոնակների վրա հսկա բեռ-  
ներ է դիզում, մրրիկը փորում է  
նրանց ամայի աչքերը, և ար-  
հավիրքի օրերին, երբ փոթո-  
րիկը բարկացած ման է գալիս,  
նրանք դանդաղորեն տատա-  
նում են իրենց գլուխները, շար-  
ժում հսկա հոնքերը և ծոված  
բերաններով որոձում դարերի  
կատարից պոկած չոր և կարծր  
կյանքի խտոր:

**Կոստան Զարյան**

Մենք՝ հայերս, կանգնած երկու հսկա աշխարհ-  
ների՝ մշակութային Արևելքի և քաղաքակրթական  
Արևմուտքի միջև, ի՞նչ կերպով պիտի կարողանանք  
իրագործել մեր պատմական ձակատագիրը:

Պիտի կառչենք մեռնող եվրոպական քաղաքա-  
կրթությանը, թե՛ արևելյան մտքի նոր ձառագայթումի  
և ստեղծագործական նոր թափի հետ պիտի լինենք  
ներուժ մշակութային կենտրոն: Պիտի կրկնենք մեր  
նախնիների սխալը, թե՛ գիտակցորեն, հերոսաբար  
պիտի կարողանանք, հակառակ մեզ շրջապատող  
անողոք պայմաններին, դրսևորել մեր ազգային եսը,  
ընդունել պատմությունից մեզ վիճակված խորհրդա-  
վոր, հակատրամաբանական, ձակատագրական դերը:

Մեծ մշակույթները առաջ են եկել միշտ էլ հակա-  
ռակ նյութական, տնտեսական և քաղաքական պայ-  
մաններին: Մշակույթը հոգեկան արկածախնդրու-  
թյուն է. վսեմ մի խենթություն, որով տիեզերքը  
գտնում է իր իմաստը: Մշակույթը պահանջում է մեծ  
ձիգ, հավատք և զոհաբերություն՝ առաքինություն-  
ներ, որով հայ ժողովուրդը լիովին օժտված է: Այլա-  
պես անկարելի է հասկանալ նրա ամբողջ պատմու-  
թյունը, նրա դարավոր նահատակությունը, նրա թա-  
փած արյան համաշխարհային իմաստը:

Եթե հայերս կուրորեն ենթարկվենք ներկա քա-  
ղաքական պայմաններին, մեզ վիճակված է ռուսա-  
կան ապագա հսկա տնտեսական կազմակերպու-  
թյան մեջ չնչին արտադրողի դիմագուրկ և աղքա-  
տիկ մի վիճակ:

Բավական է թեթև հայացք նետել մեր քարտեզի  
վրա՝ ըմբռնելու համար, որ մեր երկիրը մեծ արդյու-  
նաբերական ապագա չունի: Հայոց աշխարհը, ինչ-  
պես Հիմալայի ստորոտը և Հռոմեական բլուրները,  
գերազանցապես կրոնական է: Դրանք խորհրդավոր  
կետեր են, ուր երկրագունդը մի վայրկյան կանգ է առ-  
նում և երկար շնչում:

Մեր հոգեկան սնունդը Արարատից է գալիս՝ չոր ու  
ցամաք, տնտեսապես անպետք մի լեռից: Եվ իզուր չէ,

որ հայ ժողովուրդը պատմության մեջ չտեսնված չարչարանք է կրել, միլիոնավոր զոհեր է տվել, ծով արյուն է թափել այդ լեռը չկորցնելու համար:

Եթե մենք ուրանանք մեր անցյալը, դավաճանենք մեզ և ընդունենք քաղաքակրթական շուկայում մեզ վիճակված փոքրիկ խանութպանի դերը, մենք կստորագրենք մեր մահը: Հայաստանը կլինի, ինչպես այսօր, Մոսկվայի առջև դողացող մշտնջենական մուրացիկ, որը պետք ունի դրամագլխի, որպեսզի աշխատի, պետք ունի շուկայի, որպեսզի ծախսի, պետք ունի դրական գիտության, որպեսզի մտածի:

Ես մերժում եմ ստամոքսային այդ Հայաստանը:

Մեր երկիրը այն բախտավոր վայրերից է, որոնք չեն կերակրում, այլ կերակրվում են: Այդպես էր Աթենքը, այդպես էր մասամբ Հռոմը, և այդպես է Արևելքի մեծ մասը: Ուստի հայ լինելը պահանջում է մեծ ձիգ, հոգեկան կենտրոնացում, զոհաբերության ոգի, խոր հավատք և առաքելական մոլեռանդություն:

Արևմուտքը խենթացած գազանի նման քերում է երկրագնդի մակերեսը նոր գանձեր գտնելու համար և անգիտակցաբար փորում է իր գերեզմանը: 18-րդ դարից նա ժառանգել է նյութապաշտ իմացականության ոյուրին գենքը, որով կարողանում է հաղթել բնության տարերային ուժերին: Նա ուրանում է հոգեկան արժեքների ավանդական շաղկապումը, մարդը իրի է վերածում, ազգությունը՝ տնտեսական ազդակի, խորհուրդը՝ նախապաշարումի: Ու իր ծոցից դուրս եկած լավագույն խորհողները վկայում են նրա մոտալուտ մահը:

Նոր մշակութային շրջանը սկսվում է Արևելքում: Չմոռանանք, որ քրիստոնեությունը առաջ եկավ Հրեաստանի ամենահետամնաց և աղքատիկ գավառի մեջ Հռոմեական կայսրության հզորագույն դարում:

Հայոց աշխարհը՝ արյունի և մահի ողբերգական այդ երկիրը, արդեն հղի է բուրբ կարելիություններով: Արարատի աստվածաշնչյան ոգին պատրաստ է ձառագայթելու նրա թաքնված ստեղծագործական թափը, հսկա սերմի նման պայթելու վրա է, ու մոտենում է դարը, երբ վերջապես հայ ժողովուրդը պիտի գտնի ինքն իրեն, կատարի իր դերը, ասի իր խոսքը:

*Եթե այդ վեհատեսիլ ծերունագարդ մարդն իր ամբարած իմացությամբ և մտքի անկախ թռիչքով հարուցում է պատկառանք ու երկյուղածություն, ապա մեզ համար սրբություն ու հեռավոր առասպել դարձած մեծերի հետ ունեցած շփումների անձիգ մտաբերումները այնքան շատ են ու ազդու, որ հարուցում են մի գգացում, որ հեռու չէ երկյուղից:*

**Լևոն Հախվերդյան**

*Հայր իր հայրենիքից դուրս դադարում է հայ լինելուց, որովհետև նա իր ազգային դիմագիծը պահում է այնքան ժամանակ, ինչքան ժամանակ որ հիշում է իր գյուղը, իր տան մոտից անցնող վտակը, բակի ընկուզենին: Ինչքան ժամանակ, որ իրեն զգում է ժամանակավոր գաղթական, վտարանդի...*

**Կոստան Զարյան**

Մեզ վիճակված է ապրել բարձրավանդակի վրա: Մեր դաշտերը և մեր լճերը մագլցում են դեպի լեռը: Վայ մեզ, եթե վար իջնենք. կրնկնենք արդի քաղաքակրթության ծխնելույզի տակ, մեքենայի մաս կդառնանք կամ խանութպան:

### ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Կոստան Չարյանը:
2. Համացանցում գտիր լրացուցիչ տեղեկություններ Կոստան Չարյանի ու նրա երկերի մասին:
3. Դասընկերներով հայթայթե՛ք ասությունը՝ քաղված Կոստան Չարյանի երկերից:
4. Կարդա՛ Կոստան Չարյանի «Տատրագոմի հարսը» պոեմը և համեմատիր քո կարդացած այլ պոեմների հետ:
5. Կարդա՛ նաև Կ. Չարյանի «Նավը լեռան վրա» վեպը:

### ՍԱՄՆԱ ԾԻԲԻ

*ԾՆՎՈՒՄ Է ԴԱՎԻԹԸ*

*Ուրախ լուր տարան Արմաղանին.*

*— Աչքդ լո՛ւյս, թագուհի՛, Մհերը եկավ:*

*Արմաղանը հրամայեց, որ դարպասները հողեն, դռները փակեն, ինքն էլ սևեր հագավ, նստեց:*

*Մհերը եկավ, տեսավ, շատ վշտացավ.*

*— Սա ի՞նչ է, տանս դռները փակված են իմ դեմ, չեն թողնում, որ մտնեմ իմ տուն: Պատճառն ի՞նչ է:*

*Արմաղանը պատուհանից գլուխը դուրս հանեց.*

*— Այն է պատճառը, որ դու իմ մարդը չես, Մհեր: Քանի որ դու ինձ անպատիվ թողեցիր, գնացիր Մսրա խաթունի մոտ, էլ ինձ մոտ մի՛ գա:*

*Մհերը գղջուժի աղերսանքով կանչեց.*

*— Արմաղա՛ն, դուռը բա՛ց արա:*

*— Ո՛չ, Մհեր: Ես երգում եմ կերել: Քառասուն տարի դու չես գա ինձ մոտ: Դու գնացիր, Մսրա օջախը շենացրիր, Սասնա օջախը քանդեցիր: Դու քո մեղքը պիտի քավես քառասուն տարի:*

*— Քառասուն տարի հետո ուշ կլինի: Իսմիլ խաթունի տղան կմեծանա, կավերի մեր Սասունը:*

*Մհերը ինչքան համոզեց, Արմաղանը մնաց ան-*





դրդվելի: Ձենով Օհանը բերեց վարդապետներ, իշխաններ, որ արձակուժեւ տան Արմաղանի երդումին:

— Օրհնվա՛ծ, քո երդումը դու զա՛նց արա, վնաս չունի: Հողածին էր, մարդ էր ու խաբվեց: Հաշվենք, թե Մհերը գնացել, յար է բռնել, գղջացել է ու դարձել քեզ մոտ: Քանի՞ տարով ես երդում կերել:

— Քառասուն տարով:

Մի ալևոր վարդապետ ասաց.

— Օրենքը վարդապետների ձեռքին է: Մենք երդումիդ արձակուժեւ կտանք. թող տիրոջ կամքով քառասուն տարին լինի քառասուն ամի՛ս, քառասուն ամիսը՝ քառասուն շաբա՛թ, քառասուն շաբաթը՝ քառասուն օր, քառասուն օրն էլ՝ քառասուն ժա՛մ:

Մեջները մի ծուռ տերտեր էլ կար, ասաց.

— Քառասուն ժամն էլ կանենք հիմա:

Ալևոր վարդապետը պահպանիչ ասաց.

— Թող աստված երկուսիդ էլ թողություն տա: Այսօրվանից եղե՛ք մարդ ու կին: Սիրեցե՛ք իրար, աճե՛ք ու բազմացե՛ք, կտրիճ կռվան սերունդո՛վ լցրե՛ք Սասնա տունը: Ամե՛ն:

— Արմաղա՛ն, — ասաց Մհերը, — սուրբ հայրերը ճշմարիտ են ասում: Միգուցե աստված մեզ մի զավակ տա, Սասնա տան ճրագը չհանգչի:

— Ե՛կ իմ առագաստը. աստված մեզ մի տղա կպարգևի, բայց երդմնազանց կլինենք, երկուսս էլ կմեռնենք, տղան կմնա անտեր, խսիրի վրա:

— Թող աստված մեզ տա մի արու ժառանգ, որ դեմ կանգնի Մսրա Մելիքին, թող Սասնա տան ճրագը վառ մնա, մենք էլ հանգիստ կմեռնենք:

Արմաղանը Մհերից մնաց երեխով:

Ուրախացավ Մհերը: Արմաղանի պատվին Ծովասարում մի գեղեցիկ անտառ տնկեց, պալատ կառուցեց, անտառը լցրեց անասուններով, շուրջը պարիսպ քաշեց: Ծովասարի գլխին շինեց մի հոյակապ վանք, անունը դրեց Մարութա բարձր Աստվածածին:

Ինն ամիս, ինն օր, ինը ժամը երբ լրացավ Սասնա թագուհին բերեց մի արու զավակ: Անունը դրեցին Դավիթ: Նրա հայրն ու մայրը երդմնազանց էին, իրար հետևից մեռան: Դավիթը մնաց որբ:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Միերն ու Արմաղանը երդմնազանց եղան:
2. Նկարագրի՛ր Ծովասարը պատկերացրածիդ պես:





Ծնվել է 1889-ի սեպտեմբերի 1-ին Արևմտյան Հայաստանի Խարբերդ գավառում՝ Եփրատի առափնյա Մեզրե քաղաքում: Սովորել է տեղի նշանավոր Ազգային կեդրոնական վարժարանում, ապա ԱՄՆ Վիսքոնսինի համալսարանում: 1915-ին ամերիկահայ կամավորականների հետ մեկնել է կովկասյան ռազմաձևակառուցման և մասնակցել ազատագրական պայքարին: 1920-ի մայիսին մեկնել է Պոլիս, ապա՝ Եվրոպա: 1922-ին հաստատվել է Խորհրդային Հայաստանում: Բազմաթիվ այլ մտավորականներին բախտակից թոթովենցը ստալինյան բռնությունների գոհերից է: Նա գնդակահարվել է 1938-ի հուլիսի 18-ին:

Գրել է բանաստեղծություններ («Զքեզ ըմպեմ, ի՞նչ աղջիկ», «Մարտահրավեր» և այլն), պոեմներ («Ողբ անմահության», «Արևելք» և այլն), պատմվածքներ («Աղավնիներ», «Գավառական ողբերգություն», «Մի կյանք և մի սեր», «Ներման աղոթքը» և այլն), վիպակներ («Հովնաթան որդի Երեմիայի», «Հրկիզված թղթեր», «Մոխրակույտ», «Ծիրանի ծառ» և այլն), վեպեր («Փոթորիկին մեջ», «Դոկտոր Բուրբոնյան», «Տոնոն» և այլն), թատերգություններ («Պողպատի ձաշ», «Նոր Բյուզանդիոն», «Սասմա ծռեր», «Հրդեհ» և այլն), գրական դիմանկարներ, ակնարկներ, հոդվածներ, թերթոններ:

Գլուխգործոցը «Կյանքը հին հռոմեական ձանապարհի վրա» ինքնակենսագրական վեպն է (1933):

«Բաց կապույտ ծաղիկներ» պատմվածքի հիման վրա 1980-ին նկարահանվել է «Կտոր մը երկինք» ֆիլմը, իսկ «Աղավնիներ» ստեղծագործության հիման վրա 1984-ին՝ «Ճերմակ անուրջներ» ֆիլմը:

*Վահան Թոթովենցը մեր ազգային վերածննդի բոցաշունչ հոռետորն էր:*

**Վահրամ Փափազյան**

## ԿՅԱՆՔԸ ՀԻՆ ՀՌՈՎՄԵԱԿԱՆ ՃԱՆԱՊԱՐՀԻ ՎՐԱ (հատվածներ)

\*\*\*

Մթնշաղի մանուշակագույն մշուշում սուրում էին բյուրավոր ծիծեռնակներ, երբեմն անցնում էին իմ գլխի վրայով՝ շատ մոտիկից, սուր ձիչ արձակելով: Երբ ես հետևում էի նրանցից մեկնումեկի թռիչքին և պատկերացնում էի նրա թռիչքի գիծը իբրև թել, իմ առաջ դիզվում էր խձձված թելի մի կույտ:

Իմ մանկությունն անցել է մեր ագարակում՝ մարմարյա ավազանի եզրին: Գիշերը կապույտ երկնքից այնքան աստղեր էին թափվում ավազանի ջրերի պայծառ, աստղասարսուռ խորության մեջ: Ցերեկն արեգակը լողում էր նրա մեջ, կարծես գովանում էր նրա ջրերում: Գիշերը ավազանի սպիտակ հատակը կապտանում էր, ջուրը՝ մուգանում: Անսահման լուծություն: Ոտիները կռանում էին ավազանի վրա, ագարակի բոլոր ծառերը շջնում էին, հանկարծ մի ասուպ ձեղքում էր ավազանը և կորչում:

Մրգեր, մրգեր, մրգեր, որ գույն էին ձչում, խտոր՝ հրավառ կանաչ, կանաչի մեջ՝ կարմիր կակաչներ: Սարալանջ, որ ներկվում էր արևային արյունով, սարալանջի հետևը՝ կապույտ լեռներ, այդ լեռների գրկում՝ բարձր, ջինջ, փիրուզյա մի լիճ:

Խաղողի հատիկները կախվում էին, ինչպես մանկական պայծառ, ջինջ աչքեր: Կարմիր, սև, դեղին և սպիտակ խաղողի ողկույզները ծծում էին արևից լույս, գույն և քաղցրություն, կարծես հենց արևն էր խտացած, կաթիլ-կաթիլ մղված և կլորացած:

Մայրս ժպտում է մեր կապույտ լեռներից բարձրացող արևի միջից, տեսնում եմ նրա ծամերը՝ արևի շողերին խառնված, և լսում եմ նրա շողերի ձայնը. «Տո՛ւր թախիծդ ինձ, մանուկ իմ, ցնձա՛ գարնան մեջ, գարուն իմ ցնձագին, վազի՛ր դալար դաշտերում, իմ եղնիկ թեթևասույր, ժպտա՛ ինձնից ծծած կաթի մաքրությամբ, ջերմագին է աշխարհը, իմ գավանկ, իմ ծանր երկնապաղ, իմ խնդություն, իմ սեր»:

*Ո՛վ Հանձար Հայկյան, դու խավարին մեջ լուսակարկաչ լեզվի արարիչն ես, դու հավիտենական երգիչն ես ազատության, դու հաստիչն ես այն լուսեղեն իդեալին, որ կռիվ է հայտարարած մութին դեմ:*

**Վահան Թոթովենց**

*Նա շատ ու շատ հայրենասեր մարդ էր՝ հայ ժողովրդին, հայ մշակույթը սիրող ու պաշտող:*

**Ավետիք Իսահակյան**



*Տեսարաններ «Կտոր մը  
երկինք» ֆիլմից  
բեմադրող դերուստույց՝ Հենրիկ  
Մալյան*

Արևի միջից լսում եմ նրա ձայնը: Արևը ինքը մայր է՝ խարտյաշ աչքերով և ոսկյա մազերով: Թափվում է կանաչների վրա նրա ոսկեհնչյուն երգը:

Եվ բացվում է մի մեծ առավոտ, որի թևերը ոսկեգոծում են իմ հոգու մռայլ ավերը:

\*\*\*

Մերոպյան տառերն ինձ սովորեցրեց մի ասորի վարժապետ՝ պարոն Աշուրը: Կարձախասակ էր նա, բայց լայնաթիկունք, ոսկրոտ, լայն և բարձր ձակատով, ձաղատ գանգով, ցցված այտոսկրերով, ժայռային մուգ կապույտ և խոշոր աչքերով, անգուսպ աճած բեղերով, որոնք գնալով լայնանում էին և ապա մեղմորեն բարականում ու կախվում անխնա կերպով բացված բերանի երկու կողմերից, ինչպես փոքրիկ պոչեր՝ ծածկելով վերևի մեծ ատամները: Հին, բարելոնական արձաններից պարոն Աշուրը տարբերվում էր միայն մի բանով՝ ակնոցով, մի բան, որ խախտում էր նրա հնօրյա վսեմ կերպարանքը:

Պարոն Աշուրը նաև բանաստեղծ էր. գրում էր ոտանավորներ կիսագրաբար և հին վարպետների ոճով՝ «Նիհնջ մանկան», «Հրեշտակք», «Դստերք երկնի» և այլն: Այս բոլորը նա գրում էր մի որևէ դեպքի առթիվ և նվիրում էր որոշ մարդկանց:

Պարոն Աշուրն էր, որ ինձ հեգելով կարդալ սովեց առաջին նախադասությունը՝ «Խաչ, օգնեա՛ ինձ»: Կային երեխաներ, որ դժվարությամբ էին «կանչում» խաչին օգնության: Պարոն Աշուրը այդ դժվարությունը հեռացնելու համար ուներ մի շատ պարզ միջոց՝ փայտի հարվածը: Պետք է խղձմտորեն հիշատակել այստեղ, որ փայտի հարվածներն իջնում էին բացառապես մարմնի փափուկ տեղերին: Բոլոր ծնողներն էլ գոհ էին այս եղանակից:

Տառերը սովորելուց և հեգելով կարդալուց հետո մենք հեռացանք պարոն Աշուրի մոտից և գնացինք դպրոց: Տարեվերջին նա կարդաց մի ձառ՝ գրած մեծ թերթի վրա, որից մենք ոչինչ չհասկացանք, որովհետև գրաբար էր ամբողջովին, միայն այնքանը հասկացանք, որ մեզ խրատներ էր տալիս:

Բայց պարոն Աշուրը մեզ չմոռացավ: Նա երբեմն հանդիպում էր մեզ փողոցում, կանգնեցնում ու հրա-

մայրում. «Հայերեն գիրքդ կարդա»: Ուզում էր ստուգել մեր առաջադիմությունը: Երբ լավ էինք կարդում, պարոն Աշուրը անսահման գոհ ժպիտով մոթմոթում էր. «Հիմքը լավ եմ դրել, Աստված վկա»:

Մի օր պարոն Աշուրը հայտնվեց մեր տանը՝ գոհունակ ժպիտով և ժայռագույն աչքերն ավելի խոշորացած: Նրա հայտնվելուց մի քանի շաբաթ առաջ գրել էի մի ոտանավոր և առանց ոչ ոքի մի բան ասելու՝ ողարկել էի Զմյուռնիա՝ «Արևելյան մամուլ» շաբաթաթերթին: Այդ ոտանավորը տպվեց՝ առաջին տպագրված «երկր» իմ կյանքում: Պարոն Աշուրը եկել էր մեր տուն այդ ոտանավորը կարդալուց հետո, եկել էր գոհունակ ժպիտով և ժայռային աչքերն ավելի խոշորացած: Մի քանի գովասանական խոսքեր ասելուց հետո նա հայտարարեց. «Հիմքը լավ եմ դրել, Աստված վկա»:



### ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Վահան Թորոպենցը:
2. Համացանցում գտիր լրացուցիչ տեղեկություններ Վահան Թորոպենցի ու նրա երկերի մասին:
3. Դասընկերներով հայթայթե՛ք ասույթներ՝ քաղված Վահան Թորոպենցի երկերից:
4. Կարդա՛ վ. Թորոպենցի «Բաց կապույտ ծաղիկներ» պատմվածքը և համեմատիր այլ պատմվածքների հետ:
5. Կարդա՛ նաև Վահան Թորոպենցի «Կյանքը հին հռովմեական ձանապարհի վրա» վեպն ամբողջությամբ:

*Որքան ժամանակը սահի, ավելի խոր կերպով կը սիրենմ Վահան Թորոպենցի կյանքը, ծշմարտությունը, առասպելն ու ողբերգությունը:*

**Վիլյամ Սարոյան**

### ՍԱՍՆԱԿԻՆ

#### ԴԱՎԹԻՆ ՏԱՆՈՒՄ ԵՆ ՄՍԸՐ

*Ձենով Օհանը որբ Դավթին որդեգրեց: Բայց ո՞նց պահեց: Սասնա քաղաքի բոլոր ծծամայրերին հերթով տուն կանչեց, որ Դավթին կերակրեն: Դավթի՞ծը ոչ մեկի ծիծը չվերցրեց: Օհանի կինը՝ Սառյան, ասաց.*

*— Ուղարկի՛ր Մսըը՝ Իսմիլ խաթունի մոտ: Յոթ տարի Մհերի կինն է եղել, Մհերի տղային ծիծ կտա:*





Մհերը երկու զորեղ կտրիճներ ուներ՝ անունները Չարբահար Քամի և Բաթմանա Բուղա: Ձենով Օհանը կանչեց այդ կտրիճներին, նրանց գրկը տվեց մանուկ Դավթի բարուրը, հետո էլ մի թուղթ:

Քամին ու Բուղան բարուրը թղթի հետ մեկտեղ հասցրին Մսրը, հանձնեցին Իսմիլ խաթունին: Սա թուղթն առավ, կարդաց: Ձենով Օհանը գրեց էր.

«Իսմիլ խաթուն, մեր եղբոր կին, Մհերը որ հետ եկավ Սասուն, մի տղա ունեցավ, անունը դրինք Դավիթ: Մհերն ու իր կինը մեռան, տղան մնացել է որբ: Չի մոտենում Սասնա ծծմայրերին: Թե հարգում ես Մհերի հիշատակը, վերցրո՛ւ մեր մանուկ Դավթին, մինչև մի քիչ կմեծանա, ես պահեմ»:

Իսմիլը մտածեց. «Մհերն ինձ լավություն է արել, ես նրա որդուն պետք է պահեմ: Լավ է, որ չի մոտենում Սասնա ծծմայրերին: Իմ ծիծը կուտի, կդառնա իմ տղան, Մելիքիս հետ եղբայրություն կանի, մեկտեղ կիշխեն Մսրա, Սասնա և աշխարհի վրա»:

Միառժամանակ Դավիթն Իսմիլ խաթունի ծիծը կերավ, հետո էլ չէր ուտում: Իսմիլ խաթունը կանչեց Մսրա Մելիքին, մեծ վեղիրին, ասաց.

— Այս տղան երեք օր է՝ իմ ծծին չի մոտենում: Սոված է մնացել, ի՞նչ անենք:

— Իսմիլ խաթուն, — ասաց Վեղիրը, — Սասնա տանը չկա՞ մեղր ու կարագ, չկա՞ն ուրիշ անուշ ուտելիքներ: Բերել տանք, Սասնա յուզն ու մեղրը Սասնա տղան կուտի, կմեծանա:

Քամին ու Բուղան գնացին Սասուն: Մի բեռ մեղր, մի բեռ կարագ, վերցրին բերին Մսրը:

Իսմիլ խաթունը Դավթին պահեց Սասնա մեղր ու կարագով: Թե որ ուրիշ տղաներ տարով էին մեծանում, Դավիթն օրով էր մեծանում:

Մհերը գերեզմանում էր, Դավիթը՝ օրորոցում:

Մսրա Մելիքը զորքով եկավ, Սասունն ավերեց, առավ հարկ ու ավար, շատ գերիներ տարավ Մսրա երկիր: Սասունը դարձրեց իրեն հպատակ, Յոան Վերգոյին կարգեց Սասնա կառավարիչ:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ նորածին Դավթին տարան Մսրը:
2. Նկարագրի՛ր նորածին Դավթին պատկերացրածիդ պես:



Ի սկսկան անուն-ազգանունը՝ Հայաստան Եղիազարյան: Ծնվել է 1900-ի դեկտեմբերի 31-ին Արևմտյան Հայաստանի Վանի նահանգի Խառակոնիս գյուղում: Կրթությունը սկսել է տեղի դպրոցում: 1915-ի Մեծ եղեռնից մազապուրծ՝ հազարավոր հայրենակիցների հետ միասին գաղթել է Արևելյան Հայաստան, ապաստան գտել Երևանի և Դիլիջանի որբանոցներում: 1918-ին աշխարհագրի կազմում կռվել է թուրքերի դեմ: Ավարտելով Երևանի թեմական դպրոցը՝ կրթությունը շարունակել է Երևանի պետական համալսարանի պատմագրական բաժանմունքում: Ավարտել է նաև Լենինգրադի արվեստագիտության պետական ակադեմիայի գրական բաժնի ասպիրանտուրան:

1944-1946 թթ. եղել է Հայաստանի գրողների միության վարչության նախագահը: Վախճանվել է 1969-ի հուլիսի 11-ին Երևանում:

Գրել է բանաստեղծություններ («Դու քաղցր ես, հո՛ղ իմ հայրենի», «Արգաքանդի խնձորները», «Երկու հանձարեղ գլուխ», «Ինչո՞ւ» և այլն), պոեմներ («Ռուշանի քարափը», «Ցորենի դեզ», «Զայն հայրենական», «Արշակ և Շապուհ» և այլն), թատերգություններ («Այրող դիմակ», «Աղբյուրի մոտ», «Փորձադաշտ», «Արտավազդ և Կլեոպատրա» և այլն), «Հացավան» վեպը, ինքնակենսագրական վիպակներ («Պարոն Պետրոսն ու իր նախարարները», «Երկրորդ կյանք»): Արձակ վերամշակել է «Սասնա ծռեր» ժողովրդական վիպերգությունը՝ «Սասնա Դավիթ» խորագրով:

Նրա գլուխգործոցն է «Արա Գեղեցիկ» դիցապատմական ողբերգությունը:



*Սեղանիս վրա նրա գիրքն է դրված, և երբ ուզեմ, կրացեմ գիրքը, ու Նաիրին նորից ինձ հետ կլինի, մեր հայոց աշխարհի ժողովրդի հետ: Արվեստագետի, գրողի կյանքը այսպես պետք է չափել:*

*Մարտիրոս Սարյան*

Ես իմ գլուխը հպարտ և հի-  
ացմունքով խոնարհում եմ իմ  
ժողովրդի առաջ և ինձ կհամա-  
րեն անչափ երջանիկ, եթե կա-  
րողանամ մի աննշան աղյուս  
դնել նրա հոյակապ մշակույթի  
շենքին, արժեքավոր մի տող  
ավելացնել նրա մարդասեր,  
ազատարարձ գրականությանը

**Նաիրի Զարյան**

Արի, եղբայր, փառաբանենք մեր  
քաղցրաբառ հայոց լեզուն,  
Մեր սրտի ջուր, մեր ձեռքի թուր,  
մեր հոգու լար հայոց լեզուն:

Հոսել է նա մեր դարերից, մեր  
սարերից ու մեր սրտից,  
Արաքսի պես միշտ կենդանի,  
միշտ անսպառ հայոց լեզուն:

Նա առաջին կանչն է եղել դյու-  
ցագնական մեր նախահոր,  
Օրորոցից մեզ փայփայել է մայ-  
րաբար հայոց լեզուն:

Քերթողահայր խորենացուց մին-  
չև Քուչակն ու ձեր ծառան  
Տվել է մեզ երազ ու երգ և ձանա-  
պարհ հայոց լեզուն:

**Նաիրի Զարյան**

## ՀԱՅԵՐԵՆ

### (Մի հայուհու)

Ինչո՞ւ չես խոսում հայերեն...

Ես երգ եմ հյուսում քեզ համար,  
Հոնքերդ հպարտ ու կամար՝  
Իջնում ես հայոց լեռներեն.  
Ինչո՞ւ չես խոսում հայերեն:

Ես երգ եմ հյուսում քեզ համար,  
Դու չես հասկանում իմ լեզուն:  
Ես խորթ եմ, օտար քո հոգուն,  
Բայց քո տեսիլով խանդավառ՝  
Ես երգ եմ հյուսում քեզ համար:

Հոնքերդ՝ հպարտ ու կամար,  
Հանց վեհ տաճարները հայոց,  
Հայացքդ մաղում է ամառ:  
Հայկից են աչքերը քո բոց,  
Հոնքերդ՝ հպարտ ու կամար:

Իջնում ես հայոց լեռներեն,  
Ինչպես թեթևոտ մեր պախրան,  
Նազանքդ այնպես նաիրյան,  
Հմայքդ այնպես հայերեն՝  
Իջնում ես հայոց լեռներեն:

Ինչո՞ւ չես խոսում հայերեն:  
Նորքից ես թռել դու, իմ լո՛ր,  
Զանգուն է երգել քեզ օրոր,  
Մասիսն է հսկել վեհորեն,  
Ինչո՞ւ չես խոսում հայերեն:

## ՀԱՅՐԵՆԻ ՏՈՒՆ

Այս գիշեր տեսա մի անուշ երազ.  
Ես հայրենի տունն էի նորոգում.  
Մանկության երկինքն էր բացվել վրաս,  
Եվ արշալույսներ կային իմ հոգում:

Այնտեղ էր մայրս՝ հայացքը պայծառ,  
Մայրենի լեզվով խոսում էր առուն,  
հշշում էր բակում հինավուրց մի ծառ...  
Այնպես ծանոթ էր և այնպես գարոն...

Երդիկից կաթած շողն արեգական  
Թվում էր հոգուս ոսկյա բանալի:  
Արևն էր նայում աչքով հայրական,  
Եվ քաղցր էր աշխարհն ու հասկանալի...

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչն՞վ է նշանավոր Նաիրի Զարյանը:
2. Համացանցում գտիր լրացուցիչ տեղեկություններ Նաիրի Զարյանի ու նրա երկերի մասին:
3. Դասընկերներով հայթայթե՛ք նշանավոր ասույթներ՝ քաղված Նաիրի Զարյանի երկերից:
4. Կարդա՛ն Նաիրի Զարյանի «Արա Գեղեցիկ» ողբերգությունը և համեմատիր այլ ողբերգությունների հետ:
5. Կարդա՛ն նաև Ն. Զարյանի «Ձայն հայրենական» պոեմը:

## ՄԱՍՆԱԿԻՑ

### ՄԱՆԿԱԿԱՆ ԽԱՂԵՐԸ ԵՎ ԱՐԵՎԻ ՇՈՂԸ

Երբ Մսրա Մելիքը Սասնա ավարն ու գերին բերեց, Դավիթն օրորոցից արգեն իջեկ էր, դուրս էր գնում, խաղում էր Մսրա երեխաների հետ:


Մի օր մտավ պալատի պարտեզը, տեսավ՝ նազիր-վեզիրներն տղաներն այնտեղ են. դալար ճյուղերի վրա նստած՝ իջնում են ու բարձրանում: Բռնեց բարձր մի բարդի ծառ, ճկեց մինչև գետին: Երեխաները ծառը հեծան, շատ ուրախացան, ճվճվում, ծիծաղում էին: Դավիթն այդ բարդին երկար ճկած պահեց, ձեռքը հոգնեց, ու երեխաներին ասաց.

— Հերիք է, ցա՛ծ իջեք, ձեռքս հոգնեց:

Երեխաները ոչ մի կերպ չլսեցին նրան ու ցած չիջան: Դավիթը զայրացավ ու բարդու կատարը բաց թողեց: Ծառը նետի պես արագ բարձրացավ, երեխաներին շարժեց այս ու այն կողմ. որի թևը կտորվեց,

Սկզբունքային, կրքոտ, իր ժողովրդի ու մարդկության ցավերով ու հոգսերով այրվող և ուրիշներին միշտ օգնելու և քաջալերելու պատրաստ մարդ էր Նաիրի Զարյանը:

Գևորգ Էմին



որի՝ ոտքը, որն էլ քարին կպավ ու մեռավ:

Է՛, նազիր-վեզիրների որդիներ էին: Նրանց հայրերը եկան Մսրա Մեղիքի պալատը, բողոքեցին:

Մսրա Մեղիքը շատ կատաղեց, մանուկ Դավթին փակեց մի մուխ սենյակի մեջ, որ արևի լույս չտեսներ, վրան մի վարժապետ կարգեց, ասաց.

— Այս Սասնա ծռին գրել-կարդալ, խելք ու հնազանդությո՛ւն սովորեցրու: — Դավթին հաց-կերակուր տանողներին էլ պատվիրեց. — Դրան երբ հաց կտանեք, մսից ոսկո՛րը հանեք, չրից՝ կորիզը:

Մի օր Դավթին հաց-կերակուր տանողը շատ էր նեղացել Դավթի վարժապետից, մտքում ասաց. «Ես Դավթին միսը ոսկորով կտանեմ, Դավիթը կուտի, կհիվանդանա, թագավորը քո վրդը կկտրի»:

Դավիթը հացի հետ միսը գցեց բերանը, ոսկորն ընկավ ատամի տակ: Հանեց ու տեսավ՝ մի սիպտակ բան էր, նորից գցեց բերանը: Ատամները ցավեցին, ու չկարողացավ այդ սիպտակ բանը ծամել: Դավիթը զայրացավ, բերանից ոսկորը հանեց, խփեց պատին: Պատը ծակվեց, ու ներս ընկավ արևի շողը:

— Ո՞վ մտավ սենյակ, — զարմացավ Դավիթը:

Սկսեց արևի շողի հետ կռվել, ձեռքը մեկնում էր, որ բռնի, փորով ընկնում էր վրան, որ ճզմի, վեր էր թռչում ու նորից գետնին զարկվում, բայց արևի շողը դուրս չէր գնում: Եկավ վարժապետը:

— Դավիթ, աչքերդ փակի՛ր:

Թաշկինակով խցեց պատի ճեղքը, շողն անհետացավ: Դավիթն աչքերը բացեց, տեսավ՝ շողը չկա:

— Վա՛յ, այսօր առավոտից չարչարվում եմ, չկարողացա դրան դուրս հանել: Դու ինձնից ուժե՞ղ ես:

— Դավիթ, դա մարդ հո չէ՞ր, արևի շողն էր:

— Արևի շողը... Դրսում արև՞ կա:

— Արև էլ կա, աստղեր էլ, գիշեր էլ, ցերեկ էլ:

— Բա ինչո՞ւ եք ինձ նստեցրել մուխ սենյակում:

Վարժապետը ներկայացավ Մսրա Մեղիքին:

— Թագավո՛րն ասըստ կենա, Դավիթն ուզում է դուրս գալ, արևի լույս տեսնել:

— Գնա՛, դրան դո՛ւրս բեր, արևի տակ մա՛ն ածա:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ էին Դավթին բանտարկած պահում:
2. Նկարագրի՛ր արևի շողի հետ կռիվ տվող Դավթին այնպես, ինչպես պատկերացնում ես:

**ԱՐԱ ԳԵՂԵՑԻԿ**

(հատված չորրորդ արարից)

ԱՐԱ

Այսպէս... Եվ փարատվեց մշուշը դյութական...  
 Եվ նենգությունը մեր դիմաց կանգնած է մերկ:  
 Ուրեմն Համիրամն ազատ բարեկամից  
 Գերադասում էր ստրուկին կամակատար...  
 Սիրո շռայլ խոստումներով նա կախարդել էր ինձ  
 Եվ երազներս խորտակեց անարգաբար:  
 Վերադարձէք Նինվե և ասացէ՛ք Համիրամին,  
 Թե բռնության շնչից սիրո ծաղիկը թառամեց,  
 Եվ նրա տեղ աձեց ատելության կաղնին:  
 Եվ ասացէ՛ք՝ Արան սիրում է Նուարդին,  
 Պատրաստ է պահպանել նրա պատիվն անեղծ:  
 Եթե անապատի հեղեղն է Համիրամ,  
 Նուարդ Հայոց Երասխն է մաքրաջուր,  
 Եթե մուլեգնության հրդեհն է Համիրամ,  
 Նուարդ արևն է հեզության ու բագնի հուր:  
 Եվ ասացէ՛ք՝ Արան չունի սովորություն  
 Գոռոզ ոճին պատասխանել ոճով խոնարհության:  
 Ահա ձեզ ոճս, պատասխանս բարձրագույն,  
 Եվ արդ՝ վերադարձէ՛ք Ասորեստան:

ՆԻՐԱՐ

Ավանդ, հարբել ես դու պատանությամբ և մոռացել,  
 Թե ով է Համիրամ և յուր բանական սպառնագին:

ԱՐԱ

Գնա՛ Ասորեստան և հիշեցրո՛ւ, թե ով էր Բել,  
 Չմոռանաս նաև աղեղնավոր Հայկին...



*Նաիրի Զարյանի դիմանկարը,  
 1940 թ.  
 նկարիչ՝ Մարտիրոս Սարյան*

Կմուղրվեր մեր քարավանն  
ամպրոպաշունչ գիշերներին,  
Կկորչեինք, եթե ձամփին չբոց-  
կլտար հայոց լեզուն:

*Նաիրի Զարյան*



*Նաիրի Զարյանի կիսանդրին  
Երևանի թիվ 130 դպրոցի  
առջև  
քանդակագործ՝ Ն. Նիկողոսյան*

## (հատված հինգերորդ արարից)

ՆՈՒԱՐԴ

Արան չէր կամենում պատերազմել ձեզ հետ,  
Ձեր դաշինքին հավատարիմ էր նա հավետ:  
Ինչո՞ւ ուրեմն դուք սպանեցիք նրան:

ՀԱՄԻՐԱՄ

Տիկին, վաղուց եմ ես ընտելացել  
Տալու լոկ հարց, այլ ոչ թե պատասխան:

ՆՈՒԱՐԴ

Ես անհիծում եմ քեզ և ցեղդ ամենայն,  
Դուք սեր տարաք մեզնից, բերիք աստելություն,  
Մենք ձեզ հավատարիմ եղանք, իսկ դուք՝ դրուժան.  
Ուստի թող կործանվի Ասորեստան,  
Ձեր տեղը թող մոխիր մնա և լոկ անուն՝  
Իբրև պագշտության խորհրդանիշ:  
Իսկ ժողովուրդը Արայի՝ նրա հոգով զինված,  
Իր սեփական մոխրից հազար անգամ վերածնված,  
Կապրի, կանցնի փոթորիկները դարեդար:

*Մտնում է Վարուժանը՝ Հայկի աղեղը ձեռքին:*

ՎԱՐՈՒԺԱՆ

Ներիր ինձ, թագուհի՛, որ ես հեռում եմ քո դիմաց,  
Վազել եմ բուռն տագնապով և անդադար:  
Ահա հայկյան ազատավանդ աղեղը: Ա՛ռ:  
Արքան ռազմի դաշտում այսպես ասաց.  
«Եթե մեռնեմ, պահիր աղեղս, տո՛ւր իմ Նուարդին,  
Մինչև կաճի իմ սիրեցյալ Անուշավան որդին  
Եվ կստանձնի հայկյան աղեղը լայնալիձ»:

ՁԱՅՆԵՐ

Թող փառապանծ մնա հայկյան աղեղը լայնալիձ:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայթայթե՞ք ասույթներ Նաիրի Զարյանի մասին:
2. Կարդա՛ն Նաիրի Զարյանի «Ասք Անդրանիկ գորավարի» պոեմը և համեմատիր այլ պոեմների հետ:
3. Կարդա՛ն նաև Նաիրի Զարյանի «Ասք Էության» պոեմը:



ԴԱՎԻԹԸ ԲՈՆՈՒՄ Է ՄՍՐԱ ՄԵԼԻՔԻ ՆԻԶԱԿԸ  
Վարժապետը Դավիթին տարավ քաղաքի մեջ, որ  
ման ածեր: Դավիթը հարցնում էր ամեն բան.

— Սա ի՞նչ է: Դա ի՞նչ է: Նա ի՞նչ է:

— Սա տավար է, դա էջ է, նա էլ՝ գոմեջ:

Այդպես ման գալով քաղաքից դուրս եկան: Անհա-  
շիվ մարդ էր հավաքվել դաշտի մեջ:

— Վարժապետ, արի գնանք այնտեղ:

— Մեռնե՛մ քեզ, Դավի՛թ, այնտեղ բան չկա,  
գնանք ուրիշ կողմ:

— Ձէ՛, տա՛ր ինձ այնտեղ, — համառեց Դավիթը:

Վարժապետը սանիկին կամացուկ մի ապտակ  
տվեց: Դավիթը բռնեց վարժապետի ականջը, մազ  
մնաց՝ պոկեր: Վարժապետը վախեցավ: Դավիթին տա-  
րավ հրապարակի ծայրը: Այնտեղ Մսրա Մելիքը իր  
մարդկանց հետ նիզակ էր խաղում: Նետելու հերթը  
Մսրա Մելիքինն էր: Դավիթը երբ տեսավ՝ երկնքով  
մի բան է գալիս, ձեռքը մեկնեց, բռնեց: Նիզակ էր,  
ետ նետեց ու Մելիքի գլխով տասը կանգուն էլ անց  
կացրեց այն կողմ:

— Հայ-հայ՛, — ասաց Մսրա Մելիքը, — այդ ո՞վ  
էր՝ իմ նիզակն իմ գլխի վրայով անց կացրեց: Կա-  
կան, Ասլան, գնացե՛ք, տեսե՛ք՝ ով էր:

— Թագավո՛րն ապրած կենա, Դավիթն էր:

— Բերե՛ք՝ վիզը կտրեմ, — բղավեց Մելիքը:

Վեզիր-նազիր ընկան Մսրա Մելիքի ոտքը.

— Թագավո՛րն ապրած կենա, երեսա է: Նա ի՞նչ է,  
որ դու նրա վիզը կտրես:

Վեզիրը կանչեց վարժապետին.

— Քո տո՛ւնը չքանդվի, տեղ չկա՞ր, որ դու Դավ-  
թին այս կողմը բերիր:

— Բա ես իմ կամքո՞վ բերի: Ուժով բերել տվեց:

Վարժապետը, շատ ազաչելով, Դավիթին տարավ  
տուն: Տանը Դավիթն իսմիլ խաթունին ասաց.

— Մարե՛, Մելիքը ամեն առավոտ ո՞ւր է գնում:

— Գնում է ման գալու, հոլ են խաղում:


— Բա ինչո՞ւ ինձ էլ չի տանում իր հետ, ես էլ  
հոլ խաղամ, սիրտս բացվի:

— Դու պատիկ ես, ձիերը քեզ կձխլեն:

— Ես կկանգնեմ ձիերից հեռու:

— Մելի՛ք, — ասաց իսմիլը, — առավոտյան Դավ-  
թին տա՛ր քեզ հետ, թող հոլ խաղա, սովորի:





— Ախար այդ ազգը ծուռ է, հաստակող: Վախենում եմ՝ այս տղան փորձանք բերի գլխիս:

— Բան չի լինի: Տար դի՛ր մի բարձր տեղ, թող իր համար նայի: Ձի գա ձիերի մոտ, մի՛ վախենա:

— Որ չտանեմ, շատ մարդ կասի՝ որը էր, Մելիքն անտեր թողեց: Լավ, Դավթին կտանեմ ինձ հետ:

Առավոտյան Մելիքը Դավթին տարավ դաշտ:

Կական ու Ասլան կտրիճները թագավորի հրամանով ծուռ Դավթին տարան սարի գլուխ, ձեռքերն ու ոտքերը կապեցին, դրեցին այնտեղ, իրենք էլ նստեցին կողքին պահապան:

Դավթիթը մինչև կեսօր նայեց, նայեց, բան չտեսավ, սիրտը նեղվեց ու կտրիճներին ասաց.

— Իմ ձեռքն ու ոտքն արձակե՛ք:

— Ձի լինի, թագավորի հրամանն է, որ քեզ կապած պահենք, չգնաս ընկնես ձիերի տակ:

Դավթիթը գայրացավ, իր կապերը կամացուկ ձգեց կտրտեց: Կտրիճները կախվեցին Դավթից, պահել չկարողացան: Դավթիթը երկուսին էլ քիթ-բերանի վրա քաշեց մինչև տուն, գնաց մի պուճախ, գլուխը դրեց գետնին, պառկեց:

— Ինչո՞ւ տուն եկար, — հարցրեց Իսմիլը:

— Մելիքը իմ ձեռուտոր կապեց ու դրեց մի բարձր սարի գլխին, ինքը խաղում էր, ես բան չտեսա:

Երեկոյան Իսմիլ խաթունը Մսրա Մելիքին ասաց.

— Ինչո՞ւ Դավթին չտարար հօլի դաշտը:

— Մարե՛, նա ինձ չի լսում: Հոլը դրան դիպչի, սպանի, մարդիկ պիտի ասեն՝ Մսրա Մելիքը որբին սպանեց, որ իր հացը չուտեր:

Նստեցին հաց ուտելու, Դավթիթը չմոտեցավ:

— Մելի՛ք, — ասաց Իսմիլ խաթունը, — եղբորդ մի՛ նեղացրու: Վաղը կտանես, կղնես մոտիկ մի տեղ:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Մելիքը չէր ուզում Դավթին դաշտ տանել:
2. Նկարագրի՛ր նիզակախաղը այնպես, ինչպես պատկերացնում ես:

Ի սկական ազգանունը՝ Աձեմյան: Ծնվել է 1903-ի օգոստոսի 1-ին Արևմտյան Հայաստանի Վան քաղաքում: Նախնական կրթությունն ստացել է տեղի Նորաշեն և Երեմյան դպրոցներում: 1915-ի կոտորածների ժամանակ գաղթել է Արևելյան Հայաստան՝ Ճանապարհին կորցնելով հարազատներին: Մեծացել է Երևանի ու Դիլիջանի որբանոցներում, սովորել ԵՊՀ-ի պատմագրական բաժանմունքում: Մի քանի տարի անց գտել է իր կորած մորը և մյուս հարազատներին:

Որբանոցներից մեկում ծանոթացել է Եղիշե Չարենցի հետ, և սկսվել է նրա ստեղծագործական կյանքը: Նրա գրական գործունեությունն ընդհատվել է 1936-ին, երբ քաղաքական անհիմն մեղադրանքով արքայազն է Սիբիր: 1953-ին արդարացվել և վերադարձել է Երևան: Վախձանվել է 1969-ի հունիսի 17-ին Լիտվայի Պալանգա առողջարանական քաղաքում: Աձյունն ամփոփվել է Երևանում:


Գրել է բանաստեղծություններ («Այգեստաններ», «Երեք բարդի», «Աղավնիներ», «Բալլադ Չալոյի և առաջին սիրո մասին», «Օրոր, օրոր...» և այլն), պոեմներ («Գյուղերի երգը», «Կեսգիշերից մինչև առավոտ», «Էն տարին» և այլն), պատմվածքներ («Սև մարդը», «Հայկական բրիգադ», «Անտառային հեքիաթ» և այլն), վիպակ-հուշագրություններ («Մանկություն», «Պատանեկություն», «Երիտասարդության սեմին» և այլն), վեպեր («Ինքնակենսագրություն», «Գուրգեն խանի տոհմը»), թատերգություններ և այլն:

Նրա գլուխգործոցներն են «Այրվող այգեստաններ» վեպը և «Ծաղկած փշալարեր» վիպակ-հուշագրությունը:



*...եթե այս րոպեին ներս մտներ ահեղ և ամենակարող տերը, նստեր իմ դիմաց, մի ծխախոտ վառեր և ասեր՝ «Տալիս եմ քեզ երկրորդ կյանք, գծիր քո երկրորդ կյանքի ուղին օրորոցից մինչև գերեզման, ինչպես որ ցանկանաս, և կկատարվի քո կամքը... ինչպես կուզեիր ապրել», ես նրան կպատասխանեի առանց վարանելու. «Ճիշտ այնպես, ինչպես ապրեցի»:*

**Գուրգեն ՄաՀարի**



## ՀԱՅԵՐԵՆ

.... Եվ հաստատաբայլ, աստիճանն աստիճան  
Ու պսակե ի պսակ և լուսե ի լույս,  
հրր զավակը մտածումիդ,  
Ես ի քեզ գամ՝ իմ այս երգս երգելու...  
Սիամանթոն

Հայ լեզու, քեզ կսիրեմ մրգաստանի մը նման...  
Վահան Թեքեյան

Դու մեզ տվիր բանալին անմահության ու փառքի,  
Նարեկացի մեզ տվիր՝ մինչև Չարենց ու Սևակ.  
Դու մեզ տվիր մրգերի անմահական մի այգի,  
Սյուն եղար մեր գոյության, եղար պատվար ու հենակ:

Ու պատմությունը մեր մեծ, պայծառալույս կամ մռայլ,  
Մեր ինքնությունը տոկուն քո մեծ ուժով է հառնել,  
Նրանք պատվար են եղել, եղել գրահ ու խրամ,  
Երեսունվեց հաղթ այուներ, երեսունվեց դյուցազներ:

Արդ, քեզ բյուր փանք ի բարձունս, հրամանատար  
մտքերի,  
Տասնվեցդարյան մշուշից արդ կանգնել ես հայրորեն  
Քո վիթխարի հասակով՝ սքանչելի, անթերի,  
Ու նայում ես գալիքին անվախ, ժպտուն, հայերեն...

## ԳԱԶԵԼ ՀԱՅԱՍՏԱՆԻ

Ես կզնամ, դու կմնաս, ես ուզում եմ՝ դրն լավ լինես,  
Ես՝ հասարակ, իսկ դու՝ անհաս. ես ուզում եմ՝ դրն  
լավ լինես:

Ո՞վ ինչ տարավ, որ ես տանեմ. մերկ եկել եմ, մերկ  
էլ կերթամ՝  
Հետև թողած ծուխ ու երագ. ես ուզում եմ՝ դրն լավ  
լինես,

Բանաստեղծության աստ-  
վածք, երբ ջախջախվում էին  
մեր երազները, այն հեռավոր  
տարիներին Մահարուն շշուշ-  
ցել էր մի մեծ գաղտնիք՝ պետք  
է գրականությամբ ետ խլել  
այն, ինչ պահել չենք կարենում  
ռազմիկների զնդերով: Երբեմն  
«պարտիզանական կռիվնե-  
րով», երբեմն կեղծ նահանջնե-  
րով և վերջապես փայլուն մի  
ձակատամարտով նա անհայ-  
տությունից խլեց ու իր հայրենի-  
քին վերադարձրեց իր Վանը, և  
մեծ գրող ու այդպիսով մեծ հայ-  
րենասեր Գուրգեն Մահարու այդ  
Վանն արդեն անկորնչելի է: Դա  
ոչ միայն այլևս անկողոպտե-  
լի մասն է հայ գրականության,  
այլ նաև հայ ապագա իրակա-  
նության: Դա թոհչքային հրա-  
պարակ է դեպի իրական Վան:  
Դա Արևմտյան Հայաստանի մեծ  
խավարից Մահարու լույսով բա-  
ցազատված այն հովիտն է, որ  
դեպի իրեն կգրավի խարխա-  
փող սերունդներ ու սերունդներ:

**Հրանտ Մաթևոսյան**

Որ ձանաչես քո թշնամուն, որ ձանաչես բարեկամիդ,  
Ունեցածովդ ուրախանաս. ես ուզում եմ՝ դու լավ լի-  
նես,

Լեռներիդ պես հպարտ ու վես, հովիտներիդ նման  
խոնարհ,

Ու չլինես հոսուն ավազ. ես ուզում եմ՝ դու լավ լինես:

Քեզ լավ տեսնեմ, հետո փակեմ աչքս՝ շաղված քո  
շողերից.

Ինչին ձգտել ես, տիրանաս. ես ուզում եմ՝ դու լավ  
լինես...

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչնով է նշանավոր Գուրգեն Մահարին:
2. Համացանցում գտիր լրացուցիչ տեղեկություններ Գուրգեն Մահարու ու նրա երկերի մասին:
3. Դասընկերներով հայթայթեք նշանավոր ասույթներ՝ քաղված Գուրգեն Մահարու երկերից:
4. Կարդա՛ Գ. Մահարու «Ծաղկած փշալարեր» վիպակը և համեմատիր քո կարդացած այլ վիպակների հետ:
5. Կարդա՛ նաև Մահարու «Այրվող այգեստաններ» վեպը:

## ՍԱՍՆԱ՝ ԾԻԲԵՐ

ԴԱՎԻԹԸ ԲՌՆՈՒՄ է ՄՍՐԱ ՄԵԼԻՔԻ ԳՈՒՐԶԸ  
Լուսաբացին Մսրա Մելիքը, իշխաններն ու  
կտրիճները դաշտ գնացին, որ գուրգ խաղան: Դավ-  
թին նստեցրին մի արտաչափ հեռու: Մելիքն ասաց.

— Դավիթ, այս գուրգը տեսնո՞ւմ ես, շատ վատ  
բան է, մարդու որ կպավ, կսպանի: Չգաս, չմտնես  
խաղի մեջ: Այստեղ կանգնի՛ր, քեզ համար նայի՛ր:

— Լա՛վ, եղբա՛յր, քո ասածը կանեմ:

Այնտեղ Մելիքն իր ընկերներով գուրգ էր նե-  
տում, այստեղ Դավիթը խաղում էր իր համար: Թա-  
վալվում էր հողի մեջ, հողը վերցնում էր, լցնում իր  
ոտքերին: Գուրգ խաղացին մինչև կեսօր:

Հիվանդ արդարության կե-  
նացր խմենք, ծանր է նրա դրու-  
թյունը, բայց նա չի մեռնի: Երբ  
հիվանդ է արդարությունը, մար-  
դիկ խեղձանում են, մանրանում,  
դառնում երկերեսանի, չար,  
եսամոլ, ստորաքարշ: Նրանք  
քծնում են, լիզում իրենց ոտնա-  
կոխ անող մույկերը, ասում են  
խոսքեր, որոնց հետ համաձայն  
չեն, բայց կատարում են, որով-  
հետև արդարությունը հիվանդ է,  
չի կարող նրանց կարգի բերել:

**Գուրգեն Մահարի**



Դավիթը հեռվից նայում էր, մինչև գուրգ նետելու հերթը հասավ Մսրա Մելիքին: Բոլորը հավաքվեցին եկան, որ տեսնեն, թե թագավորն ինչպես գուրգ կնետի: Թագավորի գուրգը ամենածանրն էր: Մսրա Մելիքը ձախ ձեռքով գուրգը նետում էր վեր, աջով բռնում էր: Երբ գուրգը նետում էր հեռու, գետինը ճեղքվում էր, ինչպես սայլի անվահետք: Գուրգը դիպչում էր քարին, կրակ էր հանում:

Երբ Դավիթը տեսավ՝ գուրգը նետելու հերթը հասել է Մսրա Մելիքին, զնաց նստեց մի փոսորակի մեջ, իր ծակծկված գլխարկով հող էր չափում:

— Է՛յ, Դավիթ, վե՛ր կաց, ես գուրգ պիտի նետեմ, — երեք անգամ բզավեց Մելիքը:

Դավիթը չլսելու տվեց: Մելիքը հրամայեց.

— Գնացե՛ք, թևը բռնե՛ք, փոսից դո՛ւրս գցեք:

Հինգ կտրիճ հասան, Դավիթի թևը բռնեցին, որ գուրս գցեն: Ինչքան ուժ գործադրեցին, չկարողացան Դավիթին իր տեղից շարժել, ինչպես որ չես կարողանա ծառն արմատով հանել իր հողից: Կտրիճները շվարած կանգ առան: Մսրա Մելիքն ասաց.

— Գուրգերը նետե՛ք, թող դիպչեն դրան, սպանեն:

Կտրիճները նետեցին: Դավիթը մի ձեռքով գուրգը բռնում, նետում էր երկինք: Մելիքը կատաղեց.

— Դե՛ն գնացե՛ք՝ ես իմ գուրգով զարկեմ: Իմ գլխակերն է սա: Լավ է՝ հիմա զարկեմ ու սպանեմ:

Դավիթն այդ խոսքը լսեց, ասաց.

— Մելի՛ք, գուրգը նետի՛ր, թող գա: Չերկմտես:

Մսրա Մելիքը, գուրգը նետեց: Դավիթը գուրգը բռնեց, մի քիչ ծանր ու թեթև արեց, ասաց.

— Ափսո՛ս, թեթև է շատ, — ու գուրգը հակառակ նետեց, յոթ կտրիճի տեղնուտեղը սպանեց: Մսրա Մելիքը փրփրեց ու թուրը քաշեց.

— Թողե՛ք, ես այդ շան որբի վիզը պիտի կտրեմ: Մեծ վեզիրն ասաց.

— Իմ տե՛րն ապրած կենա, Դավիթը թագավորի տղա է, օրենք չկա, որ նրա վզին թուր բանեցնեն:

Վեզիրը և իշխանները չթողեցին, որ Մսրա Մելիքն այդտեղ Դավիթին սպաներ:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Մսրա Մելիքն ուզեց սպանել մանուկ Դավիթին:
2. Նկարագրի՛ր գուրգ նետող Մելիքին այնպես, ինչպես պատկերացնում ես:



Օ նվել է 1905-ի օգոստոսի 8-ին Դիլիջանի գավառի Պողոսփիլիսա (հետագայում՝ Շամախյան) գյուղում (այժմ՝ Դիլիջան քաղաքի թաղամաս): Սկզբնական կրթությունը ստացել է տեղի դպրոցում: 1915-ին ընդունվել է Դիլիջանի ծխական դպրոցը:

1926-ին տեղափոխվել է Երևան, աշխատել «Ավանգարդ», «Մաձկալ», «Սովետական Հայաստան» և այլ թերթերի խմբագրություններում: 1941-1945 թթ. մասնակցել է 2-րդ աշխարհամարտին: Վախձանվել է 1980-ի մարտի 4-ին Երևանում:

Գրել է պատմվածքներ («Անլեզու մայրեր», «Կարմրախայտ», «Խուստուփ սարի արջերը», «Զարմանք» և այլն), վիպակներ («Կրակե օղակի մեջ», «Քարանձավի տղան» և այլն), վեպեր («Հովազաձորի գերիները», «Հին վրանի փոքրիկ բնակիչը», «Ուր են տանում կածանները» և այլն), հուշեր («Հուշագրություններ», «Ինչպիսիք էին քո նախնիք» և այլն), ակնարկներ, հոդվածներ: Գերակշռում են արկածային երկերը մանուկների ու պատանիների համար:

Հայաստանի կենդանիների մասին ընթերցողներին բազմակողմանի ծանոթացում է տալիս գրողի «Հայաստանի կենդանական աշխարհը. հնագույն ժամանակներից մինչև մեր օրերը» (հ. 1-5) աշխատությունը:

Գլուխգործոցներն են «Սևանի ափին» վեպը և «Որսորդական պատմվածքներ» շարքը (8 գրքով):

Վ. Անանյանի երկերը թարգմանվել և հրատարակվել են աշխարհի բազմաթիվ լեզուներով:

Նրա երկերի հիման վրա նկարահանվել են «Լեռնային լճի գաղտնիքը» և «Հովազաձորի գերիները» ֆիլմերը:



*Տասնմեկ տարեկան էի, երբ գրկվեցի դպրոցից, ուսուցիչներից: Այնուհետև գրքերը դարձան իմ ուսուցիչները, իմ դաստիարակները, լեռնականի իմ անտաշ հոգին հղկողները:*

**Վախթանգ Անանյան**

## ԱՀԸ



*Վահրամյան Վահրամյանի  
նվիրված նամականիշ*



*Նկարագրողում «Հովազաձորի  
գերիները» գրքից  
նկարիչ՝ Պ. Դավիդով*

Ինչ շողշողուն մրգեր կան Սև ծովի ափին...

Աշնանը հանգստանում էինք Սուխումում՝ Գասպար քեռու տանը, և ամեն օր վայելում հյուրասեր տանտիրոջ տնամերձ այգու պտուղները: Այգին տարածվում էր լեռան ստորոտում, իսկ նրանից վեր կանաչ անտառն էր ուղղահայաց բարձրանում մինչև ամալերը՝ մինչև ծեր Կովկասի ձերմակ գագաթները: Ինչ փարթամ, ինչ պտղաբեր երկիր է. այստեղ ժայռերն անգամ պատած են պտղատու ծառերով:

Ափսոս որ իմ խանձված ու մերկ երկրի համն ու հոտը չունեն այս շքեղ երկրի շքեղ պտուղները:

— Գասպար քեռի, ինչո՞ւ են անհամ ձեր մրգերը...

— Արևը, արևը... Հայաստանի արևը որ այստեղ լիներ, մեր միրգն էլ ձերի նման կլիներ:

Այո, արևն է աղբյուրը բոլոր այն բույրերի, որոնցով արբենում ենք: Բայց մի՞թե միայն արևը: Այդ խնդրով էր գրադված բնասերի իմ միտքը, երբ հաշորդ տարի ավելի բարդ հարցի դեմ առա:

— Այսքան անձրևների, այսքան առատ ջրի մեջ ինչո՞ւ են ցամաք այստեղի մրգերը, — մի անգամ դիմեց ինձ իմ ընկեր Հրաչյա Քոչարը՝ ձեռքի կիսատ խնձորին տարակուսանքով նայելով: — Բնասեր ես, դե բացատրիր...

Այո, մեր քարքարոտ հողում տանձենիներ են աճում, որոնց պտուղը կծելուն պես ջուր է ցայտում: Կա՞ ավելի հյութեղ պտուղ, քան մեր Արարատյան երկրի խանձված ու քարքարոտ վայրերի պտուղը:

Դե, եկ պատասխան տուր հարցասեր ընկերոջը: Այստեղ պակաս է ջուրը, ամեն ինչ խանձվում է հարավի արևի տակ, բայց պտուղները հյութեղ են, իսկ այնտեղ Սև ծովը տարին տասներկու ամիս անձրև է թափում Կովկասի լանջերին, ծառերը ջրվում են լիովի և տալիս ... անհյութ ու ցամաք տանձ ու խնձոր:

Արտաշատից վերև որս են փնտրում մերկ բլրի լանջին. այստեղ դաշտահավեր են լինում: Մի փորող մեքենա հոնդոցով լայնացնում է բլրին գոտի կապած հին առվի հունը, իսկ նրա ետևից վրա են տալիս սա-

թի նման սև սերմնագրավները, որդեր են փնտրում ընդերքից հանված թարմ հողի մեջ:

Ցած իշա, հրացանիս տեսքից թռչունները թռան սարսափահար: Նայում եմ առվի հատակից հանված թարմ տիղմին ու զարմանքով ծառի արմատի կտորտանքներ նկատում նրա մեջ: Մոտերքում ծառ չկա, թուփ չկա: Չէ, ինչպե՞ն չկա, վերևում բլուրը մի կրծքախորշ ունի իր մեջ, և այդ խորշում կույ է եկել մի գաձաձ տանձենի: Բայց մի՞թե նրա արմատներն այստեղ են հասել. չէ՞ որ տանձենին հեռու է: Տնտղեցի արմատի կտորտանքը. տանձենի է:

Բարձրացել եմ վեր, նայում եմ տոթից, երաշտից կարձ մնացած, ձյուղերը ծուռումուռ տարածած ծառին, որն իր հասակի համեմատ խոշոր արմատներ ունի և չափազանց մանր, կոշտ ու սուր–սուր տերևներ: Չննում եմ ու մտածում: Հետզհետե քանդվում է ինձ զբաղեցնող հանելուկի կծիկը: Ամեն ինչով այս բույսը հարմարվել է քարքարոտ ու շոգ տեղանքին, հարմարվել է, որ ապրի: Խոր ու լայն տարածված այս արմատները նրա համար են, որ այս պապակ ու աղքատ վայրից ջուր հայթայթեն մայր ծառին:

Մեր Դիլիջանի անտառներում վիթխարի հաձարենիներ կան, որոնք այս թզուկ ծառի արմատների կեսն էլ չունեն: Դե, ինչներին է հարկավոր. այն խոնավ սևահողում առատ է և՛ ջուրը, և՛ սնունդը:

Այս տանձենու տերևները նեղ են և կոշտ շերտով պատած, որ քիչ ջուր գոլորշիացնեն: Ներքևից դժվարությամբ ստացած ջրի չնչին քանակը իր ներսում պահպանելու ձգտումից է: Իսկ պտուղները: Հաստ և կոշտ կեղև ունեն դրանք, բայց երբ կծում ես, հյութը դուրս է ցայտում, քաղցր ու համեղ հյութը:

Եվ այդտեղ մի միտք փայլատակեց գլխումս, մի շատ կարևոր միտք: Չէ՞ որ երաշտի ահն է ստիպում այս ծառին ջուր կուտակել իր պտուղների մեջ, այս ծարավ վայրում ծարավ մնալու ահր...

Հիմա հասկացա՞ր, Հրա՛չ Քոչար, թե ինչու ցամաք պիտի լինեն ծովափի տանձն ու խնձորը: Նրանց համար ջուրը, հյութը ավելորդ բեռ է, քանի որ միշտ կարող են ջուր վերցնել այնքան հաձախ տեղացող անձրևներից: Մեր չոր ու պապակ երկրում, երբ ամ-



**Վախթանգ Անանյանի  
կիսանդրին Երևանում**

*Վախթանգ Անանյանի «Սևանի ափին» վիպակը մի նոր նվաճում է ինչպես հեղինակի, այնպես էլ մեր գրականության համար: ... Նա գրում է հյութեղ, պարզ ու հասկանալի, ժողովրդական բառ ու բանով հարուստ, հետաքրքիր լեզվով: Նրա լեզվամտածողությունը գերազանցապես հայերեն է, գերծօտարարանություններից:*

**Պարույր Սևակ**

*Վ. Անանյանը մի գրող է, որ երեխաներին տոգորում է ազնվության, բարության, գեղեցիկի հանդեպ մեծ սիրո զգացմունքներով: Իսկ մեծերին վերադարձնում է իրենց մանկության հովիտները՝ մանկության գույները վերստին զգալու, բնության թրթիռներով ապրելու համար:*

**Հարի Ազեմիս  
(գեղեցիկ գրող)**

Վախթանգ Անանյանի երկերից փչում են մեր երկրի և հողի բույրերը: Նա չափել է անդունդների խորքը և զգացել է լեռների սլացքը, թեքվել է բոլոր ծաղիկների և բույսերի վրա: Մշտապես պահպանել է մոր ջերմության և անսահման սրտի զգացողությունը, հյուսել նրա սիրո երգը: Նա հասկանում էր բնության լեզուն և մարդու հոգին, անաղարտ հայացքով նայում մարդկանց և աշխարհին, ժողովրդական մեծ կյանքի ընթացքին:

*Հրանտ Թամրազյան*



*Նկարագարդում  
«Սևանի ափին» գրքից  
Նկարիչ՝ Ս. Կարայան*

ռանը վերևից արևը կրակ է թափում, ամեն բույս ու ծառ ահի մեջ է: Ահ՝ իր կյանքի համար, իր սերունդների կյանքի համար: Եվ այդ ահը ստիպում է նրան հյութեր կուտակել պտուղների մեջ և այդ հյութերը պատել կոշտ պատյաններով, որ կիզիչ արևը չկարողանա նրանից խլել այնքան դժվարությամբ ձեռք բերված հյութը...

Դրանից են այդքան համեղ ու հյութեղ մեր արևոտ ու չոր երկրի պտուղները:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչն՞վ է նշանավոր Վախթանգ Անանյանը:
2. Համացանցում գտիր լրացուցիչ տեղեկություններ Վախթանգ Անանյանի ու նրա երկերի մասին:
3. Դասընկերներով հայթայթե՛ք ասույթներ՝ քաղված Վախթանգ Անանյանի երկերից:
4. Կարդա՛ Վ. Անանյանի «Հովազաձորի գերիները» վեպը և համեմատիր քո կարդացած այլ վեպերի հետ:
5. Կարդա՛ նաև Վ. Անանյանի «Սևանի ափին» վեպը:

## ՍԵՄՆԸ ԾԻԵՐ

ԴԱՎԹԻՆ ՓՈՐՁՈՒՄ ԵՆ ՈՍԿՈՎ ՈՒ ԿՐԱԿՈՎ  
Դավիթը փախավ տուն, իրեն նետեց մոր գոգը:  
— Մարե՛, Մելիքը գալիս է, որ իմ վիզը կտրի:  
Դավիթը սկսեց պատմել: Ներս մտավ Մելիքը.  
— Ո՞ւր է այն անօրենը, ես նրա վիզը պիտի կտրեմ:  
Նա ինձ խայտառակեց աշխարհի առաջ: Գուրգ էի խաղում, նա ձեռքը մեկնեց, բռնեց իմ գուրգը:  
— Է՛, ի՞նչ անենք, երեխա է:  
— Ի՞նչ երեխա, — Մսրա Մելիքը Դավթի թևը բռնեց, բղավեց. — Ինչո՞ւ իմ գուրգը բռնեցիր:  
— Լավ արի: Ես քեզնից պակաս սղա չեմ: Ես էլ քեզ հետ գուրգ պիտի խաղամ:  
— Լսեցի՞ր, մարե՛, ես սրան պիտի մորթեմ:  
Մայրը նետվեց եղբայրների միջև.  
— Մելի՛ք, ծուռ հո չե՞ս: Ի՞նչ է արել երեխան:  
— Մարե՛, սա որ այսօր բռնեց իմ գուրգը, վաղն էլ ձեռք կմեկնի իմ տուն ու տեղին:

— Այդպես մի՛ խոսիր, հարազա՛տս: Դավիթը քո եղբայրն է, քո բազկի ուժը, քո մեջքի թուրը: Դուք մեկ հորից եք ծնվել, մեկ մոր կաթ կերել: Հավը որտեղ կուտ կերավ, ձուն այնտեղ կածի: Դավիթն էլ այստեղ է մեծացել, այստեղ կմնա, կդառնա քեզ եղբայր, մեկտեղ կտիրեք Մսրբին, Սասունին ու ողջ աշխարհին:

Մսրա Մելիքը մտածեց, ասաց.

— Չէ՛, մարե՛: Ուրիշ մարդիկ որ իմ գուրգը տակ ընկնեն, կմեռնեն: Սա բռնեց իմ գուրգը, չմեռավ ու նետեց ինձ վրա: Չէ՛, ես դրա վիզը պիտի կտրեմ:

— Այդպես չի լինի, կանչի՛ր, թող գան քո մեծավորներն ու իշխանները, տեսնենք՝ ինչ կասեն:

Մելիքը մեծավորներին ու իշխաններին ասաց.

— Այս խելառ անհավատը արդեն ձեռք է գցում իմ գուրգին, սպանում է իմ կտրիճներին: Հապա ի՞նչ կանի վաղը, երբ մեծանա: Աշխարհը կավերի:

— Թագավո՛րն ապրած կենա, — ասաց վեզիրը, — Դավիթը պատիկ է, խելքը չի հասնում:

— Չէ՛, դա իր արածը լավ է հասկանում:

Մեծավորները Մսրա Մելիքի ոտքն ընկան:

— Մի փորձ անենք, — ասաց վեզիրը: — Բերեք դնենք մի սկուտեղ ոսկի, մի սկուտեղ կրակ: Դավիթն դնենք ոսկու և կրակի միջև: Թե ոսկին վերցրեց, խելքը հասնում է, վիզը կտրի՛ր, թե կրակը վերցրեց, խելքը չի հասնում, պետք է խնայես:

Դավիթն տարան սկուտեղների մոտ: Դավիթի աչքերը շողվեցին, ձեռքը մեկնեց ոսկուն, Աստուհ հրամանով հրեշտակը Դավիթի ձեռը բռնեց ու տարավ դեպի կրակը, մատը կպավ կրակին, այրվեց: Դավիթն իր կրակաթաթախ մատը տարավ բերանը, լեզուն էլ այրվեց: Դավիթը վժժաց, լաց եղավ: Իսմիլ խաթունը տղային գրկեց, ասաց.


— Դավիթը երեխա է, մեղք է նրան սպանելը:

— Լա՛վ, ձեզ եմ բաշխում, թող ապրի:

Դավիթի լեզուն այրվել էր, թլուլ մնաց: Այդ օրվանից նրան կանչեցին «Թլուլ Դավիթ»:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Դավիթն փորձության ենթարկեցին:
2. Նկարագրիր լեզուն այրած Դավիթին այնպես, ինչպես պատկերացնում ես:







*Լիովին պարզ ու հասկանալի լեզվով անհեթեթ ոչինչ հնարավոր չէ ասել:*

*Գեղամ Սարյան*

Ի սկական ազգանունը՝ Բաղդասարյան: Ծնվել է 1902-ի դեկտեմբերի 25-ին Իրանի Թավրիզ քաղաքում: Արամյան ծխական դպրոցում նախնական կրթություն ստանալուց հետո ուսումը շարունակել է Թավրիզի կենտրոնական թեմական դպրոցում՝ աշակերտելով հռչակավոր Հրաչյա Աձառյանին: 1922-ին ներգաղթել է Հայաստան: Որոշ ժամանակ ուսուցչություն է արել, ապա աշխատել է տարբեր խմբագրություններում: Սյնուհետև զբաղվել է բացառապես ստեղծագործական աշխատանքով: Վախձանվել է 1976-ի նոյեմբերի 14-ին Երևանում:

Գրել է բանաստեղծություններ («Հոգնած նայում եմ ես ձամփաներին», «Սևանի ափին», «Գովք Երևանի», «Խոսք ռուս ժողովրդին», «Ուկրաինային» և այլն), պոեմներ («Դեպի կառափնարան», «Սայաթ-Նովա» և այլն), բալլադներ («Բալլադ սիրո և հերոսության մասին», «Լուսանկարը», «Դելֆրոշ և Էլ-Նուրի», «Գյուլնարա», «Փառքի տաձարը», «Մարմարակերտ գեղուհին» և այլն), «Օտար մարդը» վիպակը, «Հրաշալի սերունդ» չափածո վեպը, պատմվածքներ («Կոմունի ջաղացը» և այլն), թատերգություններ («Զրպարտություն», «Երեք երգ», «Գրիգոր Դերեն» և այլն), ավանդազրույցներ, մանրապատումներ, ակնարկներ, հուշեր, հրապարակախոսական և քննադատական հոդվածներ:

Գրել է նաև մանուկների համար («Փափուկ ձյուն», «Մանուկն ու ձյունը» և այլն):

Նրա խոսքերով գրվել են երգեր, որոնցից առավել հանրահայտ է «Մարտիկի երգը» (երաժշտությունը՝ Աշոտ Սաթյանի):



## ՄԱՅՐԵՐԻՆ

Մայրերն են պահել մեր հայոց լեզուն,  
Մեր մանուկներին տվել կաթի հետ,  
Եվ հայրենիքով դարձրել են լեցուն,  
Որ ժողովուրդը ապրի հար–հավետ:

Մայրերն են պահել մեր հայոց երգը,  
Երբ մանուկներին օրոր են ասել,  
Ացունքն աչքերին, սրտերում վերքը՝  
Մեր ազատ կյանքի օրն են երագել:

Նրանք չեն գիջել մեր երգն ու լեզուն  
Բիրտ հազկերտներին, սուլթանին, ցարին,  
Որոնք մեր վախճանն էին երագում՝  
Տիրելու համար հայոց աշխարհին:

Նրանք չեն եղել օտարի գերին  
Ու չեն վհատվել և ոչ մի դարում,  
Հայ գիրքն ու մանկան սեղմած կրծքերին՝  
Հպարտ են ապրել նրանք աշխարհում:

Եվ հայ մայրերն են պահում հիմա էլ  
Մեր երգը, լեզուն, մեր վսեմ ոգին  
Իրենց դարավոր մայրերին վայել՝  
Սրտով նվիրված մեր հայրենիքին:

Ես ձեր ձեռքերն եմ համբուրում, մայրեր,  
Սրբություն սրբոց եք դուք իմ հոգում,  
Պահպանեցե՛ք միշտ հայերենը մեր,  
Որ հար–հավիտյան մնանք աշխարհում:

### ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Գեղամ Սարյանը:
2. Համացանցում գտի՛ր լրացուցիչ տեղեկություններ Գեղամ Սարյանի ու նրա երկերի մասին:
3. Դասընկերներով հայթայթե՛ք նշանավոր ասույթներ՝ քաղված Գեղամ Սարյանի երկերից:

*Դարեր եկան ու գնացին,  
Դու՝ աննկուն, իմ Հայաստան.  
Մեր Արարատ սարի պես հին  
Դու՝ միշտ կանգուն, իմ Հայաստան:*

**Գեղամ Սարյան**

*Հայրենիքն իմ սրտում՝  
Թե՛ չընկնեմ ես մարտում,  
Ա՛յս, իմ մայր թանկագին,  
Տուն կգամ ես կրկին,  
Կսփոփեմ քո հոգին  
Համբույրով սրտագին,  
Կսեղմեմ քեզ իմ կրծքին:*

**Գեղամ Սարյան**  
**«Մարտիկի երգ»-ից**

4. Կարդա՛ր Գեղամ Սարյանի «Փառքի տաճարը» բալլադը և համեմատիր թո կարդացած այլ բալլադների հետ:
5. Կարդա՛ր նաև Գ. Սարյանի «Դեպի կառափնարան» պոեմը:

## ՍՆՍՆԱՆ ԾԻԷՐ

### ԴԱՎԻԹԸ ՄՍՐԱ ԹՐԻ ՏԱԿՈՎ ՉԱՆՑԱՎ

Դավիթը միառժամանակ պալատում ապրեց: Բայց բնույթը ծուռ էր, անհանգիստ: Մի օր դուռը եկավ քաղաք, հասավ Մսրա Մելիքի գինանոցը: Դուռը բաց էր, ներս մտավ, տեսավ մի մեծ գուրգ՝ դրված այնտեղ: Մտածեց. «Ի՞նչ սիրուն խաղալիք է»:

Գուրգը ձեռքն առավ, թափահարեց ու գցեց գետին: Ահռելի գմփոց ընկավ Մսրա մեջ: Քաղաքացիք՝ մարդ, կին, տղա, շատ վախեցան, ասին՝ երկրաշարժ եղավ: Մսրա Մելիքը քնից արթնացավ, ասաց.

— Դա իմ գուրգի գմփոցն էր: Տեսնես ո՞վ է իմ գուրգը վերցրել, ի՞նչ փորձանք է եկել քաղաքին:

Վեզիրը կռահեց, որ գուրգը վերցնողը Դավիթն է: Վազեվազ գնաց, հասավ գինանոց: Դավիթն այնտեղ մի գմփոց էլ հանեց: Վեզիրը գոռաց.

— Հե՛յ, Դավիթ, շո՛ւտ արա, փախի՛ր, թե չէ Մսրա Մելիքը որ եկավ, վա՛յ քո արևին:

Դավիթը փախավ: Մելիքը եկավ, հարցրեց.

— Վեզիր, այդ ո՞վ էր:

— Մելիքն ապրած կենա, դուռը բաց էր, չիմացա:

— Կա-չկա, Դավիթն էր: Էլ ո՞վ գուրգս կվերցնե:

Մսրա թագավորը՝ կատաղած, փրփրած, եկավ տուն: Դավիթը քնած էր քուրսու մոտ: Մսրա Մելիքն աղեղի լարն արձակեց, ուզում էր այդ լարով Դավիթին խեղդել: Մայրը վրա հասավ, ձեռքը բռնեց.

— Մելիք, այդ ի՞նչ ես անում:

— Ես այս լակոտին պիտի խեղդեմ: Գնացել է, գուրգիս հետ խաղացել, գմփոց է գցել քաղաքի մեջ:

— Մելիք, թե որ Դավիթին դու սպանես, իմ այս ծծերի կաթը, որ կերել ես, քթիցդ գա:


— Մարե՛, — մռնչաց Մելիքը, — իմացի՛ր՝ օձի ձագ է Դավիթը. ինձ ինչ վնաս որ գա, իրենից կգա: Չէ՛, հերի՛ք եղավ: Ես այսօր դրան պիտի սպանեմ:

Իսմիլ խաթունը ճարը կտրել էր, ասաց.

— Թե որ պիտի սպանես Դավիթին, տա՛ր, յոթ սարի հետև՝ սպանի՛ր, որ ականջս նրա ձայնը չառնի: Քաղցր ծիծ եմ տվել Դավիթին, սիրտս չի դիմանա:



Մեծ վեզիրը եկավ, այդ խոսքերը լսեց, ասաց.  
 — Ինչո՞ւ Դավթին սպանեք, արյունը վերցնեք  
 ձեր վզին: Ուղարկեցե՛ք Սասուն՝ իր հոր երկիրը:  
 Իսմիլ խաթունը Դավթին քնից հանեց, ասաց.  
 — Դավիթ, կգնա՞ս հորեղբայրներիդ մոտ:  
 — Ես հորեղբայրներ՞ը ունեմ: Որտե՞ղ են ապրում:  
 — Իրենց երկրում՝ Սասունում: Կգնա՞ս նրանց մոտ:  
 — Մարե՛, մինչև այսօր ինչո՞ւ չես ասել: Դե,  
 ինձ ինն օրվա հա՛ց կպատրաստես, կտաս ինը գույգ  
 տրեխ, ինը գույգ էլ գուլլա, առնեմ, գնամ Սասուն:  
 Իսմիլ խաթունն օրհնեց Մհերի որդուն, ասաց.  
 — Գնա՛, տղա՛ս, գնա՛ քո հոր երկիրը՝ քո հորեղ-  
 բայրների մոտ: Աստվա՛ծ քեզ հետ:  
 Այստեղ Մսրա Մելիքը թուրը բարձրացրեց, ասաց.  
 — Դավիթը պիտի գա, թրիս տակով անցնի, որ  
 թողնեմ՝ գնա իր Սասունը:  
 — Հայ-հա՛յ, ես գամ քո թրի տակով անցնե՞մ:  
 — Ի՞նչ կլինի, Դավիթ, որ անցնես, — ասաց Վե-  
 զիրը: — Անցի՛ր, քեզ համար գնա Սասո՛ւն:  
 — Ձե՛, Մսրա Մելիքն ուզում է՝ իր թրի տակով  
 անցնեմ, որ երբ մեծանամ, թուր չքաշեմ նրա դեմ,  
 ինքը ինձ վրա թուր բանեցնի՛ ես նրան չզարկեմ: Ես  
 այդ բանը չեմ անի: Մորս լաջակի տակով կանցնեմ,  
 Մսրա թրի տակով չեմ անցնի:  
 — Թրի տակով չե՞ս անցնի, — բղավեց Մելիքը:  
 — Ձեմ անցնի: Ինչ որ ձեռքիցդ գալիս է, արա՛:  
 Մեծ վեզիրը Դավթի թևից բռնեց, որ անց կաց-  
 նի Մսրա թրի տակով, Դավիթը աներեր կանգնած  
 էր: Վեզիրը նրա մեջքը բռնեց, հրեց: Դավիթը նետ-  
 վեց մի կողմ, չանցավ թրի տակով, կողքով անցավ,  
 ճկույթը առավ քարին, քարը կրակ տվեց:  
 Մելիքն այս որ տեսավ, շատ վախեցավ, ասաց.  
 — Սա որ այսքան պատիկ է, այսպես է անում,  
 մեծացավ՝ աշխարհը կավերի:  
 Իսմիլն ու մեծ վեզիրը Մելիքի ոտքերն ընկան,  
 խնդրեցին, երդում կերան, որ Դավիթն անխելահաս  
 ծուռ երեխա է, թող գնա իր Սասունը, պրծնենք:



**ՀԱՐՑԵՐ ԵՎ ԱՌԱՋԱԴՐԱՆՔՆԵՐ**

1. Ինչո՞ւ որոշվեց Դավթին ուղարկել Սասուն:
2. Նկարագրիր Մսրա Մելիքի ոտքերն ընկած Իսմիլ խաթունին ու մեծ վեզիրին, ինչպես պատկերացնում ես:



Ի սկական անունը՝ Արմենակ Սարգսյան: Ծնվել է 1901-ին Արևմտյան Հայաստանի Ռշտունիք գավառի Պախվանց գյուղում:

1915-ին գրկվել է ծնողներից, որոնք Մեծ եղեռնի զոհ են դարձել: Պապի հետ մեծ դժվարություններով գաղթել է Արևելյան Հայաստան, եղել է Գանձակի, Ծաղկաձորի, Լենինականի և Երևանի մանկատներում:

1924-ին ավարտել է Լենինականի մանկավարժական տեխնիկումը և զբաղվել ուսուցչությամբ: 1926-1932 թթ. սովորել է Երևանի պետական համալսարանի պատմագրական բաժանմունքում: Այնուհետև աշխատել է ՀԽՍՀ ժողովմխորհրդին կից ռադիոկոմիտեում և այլուր:

Վախճանվել է 1984-ի փետրվարի 18-ին:

Գրել է բանաստեղծություններ (ամփոփված են «Դաշտերը ժպտում են», «Սրտի ձայնով», «Գագաթների կարոտը», «Հայրենի տուն», «Կարոտի կրակներ», «Խոսող ծաղիկներ», «Բանաստեղծի աղբյուրը», «Կենաց բաժակ», «Ծաղկավոր ձմեռ», «Երագանք», «Հայոց սիրտ», «Մանուկների աշխարհում» և այլ ժողովածուներում), պոեմներ («Սեփո», «Հերոսական մահ», «Կորած ձեռքեր», «Սպանված սեր», «Հայոսն ու Քարթլոսը», «Մեսրոպ Մաշտոց» և այլն), առակներ:

Նրա խոսքերով գրվել են մի շարք հայտնի երգեր («Խնջույքի երգ», «Հայի աչքեր» և այլն):

## ՄԵՍԻՈՊ ՄԱՇՏՈՑ (հատված պոեմից)

Դարեր են եկել, գնացել անդարձ,  
Ազգեր են ծնվել ու մեռել անհետ,  
Այրուծիների արշավն հողմընթաց,  
Տրորելով մեր հողը ծաղկավետ,  
Մեր դաշտի, արտի, սրտի վրայով  
Անցել է որպես ավերիչ մորելս՝  
Հետքից թողնելով ավեր, մահ ու սով,  
Արյուն սփռելով ամեն, ամեն տեղ:  
Կործանվել են մեր կոթողները ձոխ,  
Մեր ոստանները դարձել ավերակ,  
Մեր երգի, կյանքի ծառը բողբոջող  
Եղել է կացնին ու հրին ձարակ,  
Մեր ավանները, մեր շեները նոր  
Քանդվել են, դարձել հողին հավասար,  
Մեր տառապանքից՝ խոր ու ահավոր,  
Մեր տեսած վշտից՝ մաշվել քար ու սար:  
Բայց մենք կանք նորից, կա երկիրը մեր,  
Անուշ հնչում է մեր հայոց լեզուն,  
Նորից կերտում ենք շքեղ կոթողներ,  
Հայրենաբարբառ երգեր ենք հյուսում.  
Ծաղկում-ծփում են մեր արտերը ծով,  
Ծովն է բարձրանում մեր օջախներից,  
Ու մեր խնդության երգի գնգոցով  
Սար ու ձորերը թնդում են նորից:  
Ու մեր հորդաբուխ ուրախության մեջ  
Մենք երբեք, երբեք քեզ չենք մոռացել,  
Դու մուֆն ակոսող հրի պես անշեջ  
Ժողովրդի հետ ձամփա ես անցել,  
Լուսավորել ես մեր դժվար ուղին,  
Մեր մաքառումին եղել ես սատար,  
Նոր ուժ ես տվել հայրենի հողին  
Ու քո ազգի հետ քայլել դարեդար:  
Դու քո գրերով գրահել ես մեզ,  
Դարձրել հավերժող ու անխոցելի.  
Մեր դեմ բացել ես անձիր ասպարեզ  
Խոսքի, խոյանքի, խիզախումների:  
Եվ արդ կանգնել են շիրիմիդ առաջ

*Այնպես քնքուշ, այնպես զվարթ  
Ժպտում ես դու, մե՛ր Երևան,  
Երկինքդ՝ պարզ, արևն՝ առատ,  
Քո շուրն՝ անուշ ու զլզլան:*

*Ով մի անգամ տեսել է քեզ,  
Չի մոռանա հար-հավիտյան,  
Դարձել ես դու շքեղ պարտեզ,  
Ակունքը մեր երջանկության:  
**Սարմեն***

Մեր սիրտը թնդաց, մեր կյանքը  
դարձավ խորն ու իմաստուն,  
փովեց, մեծացավ, օվկիանոս  
կտրեց մեր լիճը փոքրիկ,  
Ողբի ու որբի երկիրը դարձավ  
հերոսների տուն,  
Ծնվեց մի ազատ, անպարտ  
հայրենիք:

**Սարմեն**

Ես՝ շառավիղը քո երախտապարտ,  
Իմ սրտի բոլոր լույսերը վառած,  
Աշխարհի առաջ քեզանով հպարտ՝  
Պսակ եմ դնում քո շիրմաքարին  
Ջերմեռանդությամբ, հոգով պեկոծ.  
Ընդունիր սերս, հիացքս խորին.  
Դու, Մեսրոպ Մաշտոց, հանձար մեծագործ:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչնով է նշանավոր Սարմենը:
2. Համացանցում գտիր լրացուցիչ տեղեկություններ Սարմենի ու նրա երկերի մասին:
3. Դասընկերներով հայթայթեք ասույթներ՝ քաղված Սարմենի երկերից:
4. Համացանցում գտիր և սովորիր Սարմենի խոսքերով Ռոբերտ Ամիրխանյանի գրած «Հայի աչքեր» երգը:
5. Կարդա՛ նաև Սարմենի «Մեսրոպ Մաշտոց» պոեմն ամբողջությամբ:

## ՍԵՄԵՆ ԾԻԵՐ

### ԲԱԹՄԱՆԱ ԿԱՄՈՒՐՋԸ

Մսըրում էին կտրիճներ Բաթմանա Բուղան ու  
ՉարբաՀար Քամին: Մսրա Մելիքը նրանց կանչեց.

— Դավթին կտանեք յոթ սարի այն կողմը՝ Բաթմանա կամրջի վրա, կսպանեք ու կնետեք ջուրը, իր հագի շորը կթաթախեք իր արյունի մեջ, կբերեք, որ ես իմ աչքով տեսնեմ: Մի կժով էլ Դավթի արյունը կբերեք, որ խմեմ, սիրտս հովանա:

Դավթին Իսմիլ խաթունին «մնաս բարով» ասաց:

Հինգ-վեց օրվա ճանապարհ անցան: Դավթիլը չէր խոսում ծառաների հետ, խոտորվում էր ճամփից մեկ դես, մեկ՝ դեն, ընկնում էր սար ու ձոր, խաղում քարի, թփի հետ, փախցնում էր հավք ու գազան...  
Կտրիճները նստում, հաց էին ուտում, Դավթին չէին տալիս: Դավթիլը բանջար էր քաղում, արմատ հանում, լոր ու նապաստակ էր բռնում, ուտում:

Այսպես գնացին հասան Բաթմանա կամուրջը:  
Կտրիճները կանչեցին Դավթին.



— Դավիթ, մինչև այսօր Մսրա հողում էինք, հիմա քո հոր հող-ջուրը հասանք: Արի՛, հա՛ց կեր:

— Իսմիլ խաթունն ինն օրվա հաց էր դրել մեզ հետ: Ինքներդ կերաք, ինձ բան չտվիք: Այսօր, երբ ես իմ հոր հող-ջուրն եմ ընկել, ասում եք. «Դավիթ, արի՛, հա՛ց կեր»: Ձեր հացը հիմա չեմ ուզում:

Կտրիճները կամուրջի մոտ կանգ առան ու ասին:

— Մելիքը մեզ ասել է. «Դավթին կամուրջից այնպե՛ս անց կացրեք, որ չվախենա, ջուրը չընկնի»:

— Մսրբից մինչև այստեղ եկանք, մի օր չասիք. «Դավիթը պատիկ է, կվախենա»: Հիմա ի՞նչ եղավ:

— Դավիթ, մեկս կանցնի քո առաջ, մեկս՝ հետև, որ կամուրջը անցնելիս դու չվախենաս:

— Լավ, — համաձայնեց Դավիթը, — ապա մտածեց. «Սրանց մտքի մեջ մի վատ բան կա»:

Հասան կամրջի կեսը: Կտրիճները մեկն առջևից, մյուսը հետևից բռնեցին Դավթի թևերը:

— Բռնել եք ինձ, որ ջո՞ւրը գցեք:

— Թագավորի հրամանն է, որ քեզ գցենք ջուրը:

— Մելիքն ի՞նչ է ուզում ինձնից: Ձեռքս չեմ մեկնել ո՛չ նրա երկրին, ո՛չ նրա գանձին, ո՛չ գահին: Նա ի՞նչ է տվել ինձ, որ չի կարողանում առնել:

Դավիթը մի ձեռքով բռնեց մեկի օձիքը, մյուս ձեռքով՝ մյուսի օձիքը, իրար զարկեց, կամրջի երկու կողերից կախեց, ասաց.

— Դուք լավ չգիտեք՝ ինչպես են մարդու ջուրը գցում: Հիմա ես ձեզ կգցեմ, կսովորեք:


Կտրիճները սարսափահար բղավեցին.

— Դավիթ, ասածո՛ւ սիրուն, մեզ մի՛ գցիր ջուրը: Այն շուն Մսրա Մելիքը ստիպեց, որ քեզ բերենք այստեղ ու սպանենք: Մենք չէ՞ որ քո հոր՝ Առյուծ Մհերի ծառաներն ենք եղել, նրա սեղանի մոտ ենք մեծացել: Քո հոր հիշատակի համար մեզ խնայի՛ր: Մենք օր կենդանության քեզ կծառայենք:

Դավիթը կտրիճներին կամրջի վրա դրեց, ասաց.

— Դե որ այդպես է, գնանք ինձ հետ Սասուն:

Այստեղ երեքով իրար գլուխ համբուրեցին ու ճանապարհ ընկան դեպի Սասուն:



## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ կտրիճները չսպանեցին Դավթին:
2. Նկարագրի՛ր Բուդա և Քամի կտրիճներին այնպես, ինչպես պատկերացնում ես:



Ի սկական ազգանունը՝ Գաբրիելյան: Ծնվել է 1910-ի հունվարի 19-ին Արևմտյան Հայաստանի Բագրևանդ գավառի Ղումլիքուջաղ գյուղում, որը Նպատ լեռան ստորոտին է: 1915-ի գաղթի ճանապարհին մահացել է մայրը, ապա՝ հայրը՝ հայտնի խմբապետ Քոչոն (Քոչար Գաբրիելյանը), որ կռվել է Անդրանիկի ջոկատում: Հրաչյան համազյուղացիների հետ հասել է Արևելյան Հայաստան: Եղել է գառնարած, հանքափոր Ալավերդում: Այնուհետև սովորել է Երևանի պետական համալսարանի բանասիրական բաժանմունքում:

1939-ին Մարտիրոս Սարյանը նրան տեղավորել է իր ղեկավարած Պատմական հուշարձանների պահպանության կոմիտեում: Ոտքով շրջել և ուսումնասիրել է հայկական վանքերի ու մատուռների վիճակը, այդ աշխատանքներն ամփոփել «Գորիսի և Սիսիանի շրջանների ալբոմ-ուղեցույցի» մեջ: 1941-1945 թթ. մասնակցել է Երկրորդ աշխարհամարտին:

1946-1951 թթ. եղել է Հայաստանի գրողների միության վարչության քարտուղար, «Սովետական գրականություն» ամսագրի խմբագիր, 1954-ից՝ «Ոգնի» երգիծական հանդեսի խմբագիր: Վախձանվել է 1965-ի մայիսի 2-ին Երևանում:

Գրել է պատմվածքներ («Գեներալի քույրը», «Սպիտակ գիրքը», «Ուսուցիչը» և այլն), վիպակներ («Նահապետը», «Կարոտ», «Եփրատի կամրջին» և այլն), «Մեծ տան զավակները» վեպը, կինոբեմագրեր, ակնարկներ, ուղեգրություններ:

Գլուխգործոցը «Սպիտակ գիրքը» ժողովածուն է:

Նրա երկերի հիման վրա ստեղծվել են «Կարոտ» և «Նահապետը» ֆիլմերը:

## ԱՐՏԱՍՈՎՈՐ ՊԱՏՄՈՒԹՅՈՒՆ

Ճարտարապետ Անդրանիկ Թազվորյանը, հիմնարկից դուրս գալով, ուղղվեց դեպի Երևանի երկաթուղային կայարանը: Այդ օրը սպասում էին հատուկ գնացքի, որ պիտի բերեր հայրենադարձ հայերի առաջին կարավանը: Քաղաքը ցնծության մեջ էր:

Ճարտարապետը որոշեց ոտքով գնալ կայարան՝ անձնատուր անցյալի հուշերին, որոնք նրա հոգու մեջ հարություն էին առնում տարագիր հայերի՝ հայրենիք վերադառնալու օրը:

Հազար ինը հարյուր տասնհինգ թվականն էր: Բարբարոս թշնամին քշում էր հայ բազմությունները դեպի մահ: Խոր մի կիրճում հանկարծ կարծես գետնի տակից հայտնվեցին մինչև աստամները զինված ասկյարներ և սկսեցին կրակել իրենց վրա: Առաջին գնդակներից խոցվելով՝ ընկավ նրա հայրը, ընկան նաև մյուսները, և երախան իրեն նետեց հոր դիակի վրա: Այնուհետև ամեն ինչ մթնեց նրա համար...

Ուշքի եկավ գիշերը: Հետո ինչ-որ մարդիկ եկան և իրեն, դիակների միջից հանելով, տարան: Երկար տարիներ նրան բաժին ընկավ որբանոցային տխուր կյանքը: Ու երբ արդեն տասնհինգ տարեկան պատանի էր, միանալով առաջին կարավաններից մեկին՝ եկավ Հայաստան: Այնուհետև՝ աշակերտական և ուսանողական տարիներ, վերջապես՝ մասնագիտություն ունեցող մարդու ինքնուրույն կյանք:

Ճարտարապետը քայլում էր ինքնամոռաց և չզգաց, թե ինչպես հասավ կայարանի հրապարակը: Ովքեր էին եկողները. այնպիսի մարդիկ, ինչպիսին ինքն էր մի ժամանակ: Կարող էր այսօր վերադառնալ իր հայրն էլ, եթե չընկներ թշնամու գնդակից...

Կայարանը տոնական տեսք էր ընդունել: Բազմությունը հեղեղել էր կառամատույցն ու հրապարակը: Նվագում էր փողային նվագախումբը: Կառավարության անդամները ժողովրդի հետ միասին սպասում էին գնացքի ժամանելուն: Վերջապես երևաց գնացքը: Այդպիսի բացականչություններ, այդպիսի ցնծագին ուրախություն, այդպիսի գրկախառնումներ մայրաքաղաքի կայարանը չէր տեսել: Շատերն արտաս-



**Հրաչյա Քոչարի  
Հուշատախտակը  
Երևանում**

Երկրի գրեթե բոլոր գյուղերից գաղթականներ էին հավաքվել այստեղ 1918-20 թվականներին՝ հույս ունենալով, թե «երկիր երթալ» կլինի, ու իրենք առաջինն Արագը կանցնեն, իրենց երկակնանի սայլերն առաջինը կձոնչան ծանաչ ձամփաների վրա: Իսկապես, տարագների, բարբառների խառնարան էր այս գյուղը. ամեն թաղը մի աշխարհ էր, որ երկար տարիներ պահում էր իր դեմքն ու իր գույնը:

**«Կարոտ» վիպակից**



վում էին, ոմանք գտնում էին իրենց հարազատներին, ողջագուրվում, հեկեկում ուրախության արցունքներով: Ամբիոնից շերմ ձառեր էին արտասանվում:

Եկվորներից մեկը բարձրացավ ամբիոն, և նրա շրթունքներից դուրս թռան բանաստեղծի խոսքերը.

*Տնոր ինձ քու ձեռքդ, եղբայր եմք մեք,  
Որ մրրկավ էինք գատված...*

Երեկոյան, երբ ձարտարապետը վերադարձավ տուն, դռան շեմին նրան ուրախ դիմավորեց կինը.

— Մեզ մոտ է եկել շատ հաձելի մի ծերունի դերձակ՝ իր կնոջ հետ...

Ներս մտան: Ծերունին, տեսնելով ձարտարապետին, մոտեցավ և ձեռքը մեկնեց նրան.

— Շատ շնորհակալ եմք, ձեզի քիչ մը նեղություն տվինք անշուշտ: Աղվոր մանչ մը ունիք, արդեն բարեկամացեր է հետս և ինձի պապիկ կ'ըսե...

— Նա սիրում է ծերունիներին և նախանձում այն երախաներին որոնք պապիկ ու տատիկ ունեն, ինքը չունի: Իսկ դուք երեխաներ ու թոռներ չունեք, — հարցրեց ձարտարապետը:

Ծերունին մռայլվեց և թեթև հառաչեց.

— Ունեի, բայց դժբախտաբար... միայնակ եմք...  
— և հարևան սենյակից կանչեց կնոջը. — Թագուհի, հո՛ս եկուր, ծանոթացի՛ր մեր նոր բարեկամին հետ:

Եկավ կինը ու պարզեց ձեռքը ձարտարապետին:

— Ինչպե՛ս եք, մայրիկ, ուրա՛խ եք որ եկել եք:

— Թող ձեզի արևշատություն ըլլա: Ի՛նչպես ուրախ չըլլանք, մեր սուրբ երկիրն ենք եկեր...

Ծերունին շրջվեց դեպի ձարտարապետի որդին.

— Քո՛վս եկուր, մանչո՛ւկս, քեզի գեղեցիկ վերարկու մը պիտի կարեմ, Օ՛, ինչպես ծանր ես և անունս ես գողցեր՝ Վարդանիկ, իմ անունս ալ Վարդան է: — Եվ դառնալով ձարտարապետի կնոջը՝ ավելացրեց, — Տիկին Թագվորյան, ձեր մանչը ինձի տղաս կը հիշեցնե, գոր ես կորսնցուցի երեսուն տարի առաջ. ան ալ խելացի աչքեր և շեկ մազեր ուներ...

— Այդպես է մեր ժողովրդի ձակատագիրը, — տխուր ասաց ձարտարապետը, — ես էլ որք եմ եղել, թշնամիները հորս սպանեցին իմ աչքի առաջ...

— Որտեղացի՞ եք դուք, — հարցրեց ծերունին:

— Կիլիկիայից. հիշում եմ՝ մեր գյուղի անունը Բերդակ էր: Հորս անունը Վարդան էր, ազգանունը չեմ հիշում, այն ժամանակ վեց տարեկան էի, Թագվորյան՝ իմ բարերարի ազգանունն է, որը փրկել է ինձ սովից և որբանոց հանձնել:

— Իսկ ձեր անունն ի՞նչ է, — հարցրեց ծերունին:

— Անունս Անդրանիկ է:

Ծերունի դերձակը ամուր ծածկեց դեմքը և երկար մնաց այդ վիճակում: Շփոթվեցին բոլորը: Ծերունին իջեցրեց ձեռքերը, նրա դեմքն այրվում էր, հոնքերը վերև էին քաշվել, աչքերի բիբերը՝ լայնացել:

— Խնդրեմ, ըսե՛ք, ձիշտ է, որ ձեր գյուղը Բերդակ կը կոչվեր, իսկ ձեր անունը Անդրանիկ է...

— Այո՛, ձիշտ է, — պատասխանեց ձարտարապետը՝ շփոթմունքից կարկամած:

Դերձակը ծեր արծվի պես հարձակվեց ձարտարապետի վրա.

— Չավանկս, իմ կորսված զավանկս...

Հետևյալ օրը բերնեբերան էր անցնում ծերունու կյանքի պատմությունը: Խոսում էին այն մասին, թե ինչպես նա էլ որդու նման ողջ է մնացած եղել դիակների մեջ և ծանր վիրավոր վիճակում կարողացել է փախչել ու փրկվել ստույգ մահից...

Շուտով ծերունի Վարդանը աշխատանքի է տեղավորվում կարի արհեստանոցում: Ամեն օր, երբ նա վերադառնում է տուն, նրան դիմավորում է փոքրիկ Վարդանիկը և ուրախ ու զիլ ձայնով կանչում.

— Պապիկը եկավ, պապիկը:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Հրայրա Քոչարը:
2. Համացանցում գտիր լրացուցիչ տեղեկություններ Հրայրա Քոչարի ու նրա երկերի մասին:
3. Դասընկերներով հայթայթե՛ք նշանավոր ասույթներ՝ քաղված Հրայրա Քոչարի երկերից:
4. Կարդա՛ Հ. Քոչարի «Գեներալի քույրը» պատմվածքը և համեմատիր քո կարդացած այլ պատմվածքների հետ:
5. Կարդա՛ նաև Հրայրա Քոչարի «Կարոտ» վիպակը:

Գրիչն այդ մարդու ձեռքին սրի ուժ ու թափ էր ունեցել: Եվ այդ փայլուն սուրը ձեռքն առած՝ նա թրատել էր բոլոր նրանց, ովքեր իրեն դուր չէին եկել իրենց խոսքով ու գործով, թրատել էր առանց երկմտելու, հսկայի ուժով և երդվյալ զորավարի համատությամբ: Չէր խնայել ո՛չ իր ապրող ժամանակակիցներին, ո՛չ էլ իրենից դարեր առաջ մեռած մարդկանց: Այնպես էր վիճում, կռվում նրանց հետ, որ կարծես կանգնած էին իր առջև ու դիմադրելով անձնատուր չէին լինում: Կռվում էր հազար հինգ հարյուր տարի առաջ նահատակված զորավարի հետ՝ մեղադրելով նրան, որ բանակը անստույգ ձանապարհով է տարել և պատճառ դարձել ծանր պարտության ու ժողովրդական տառապանքների, հազար տարի առաջ մեռած հոգևոր առաջնորդի հետ, որ իր գործունեությամբ թուլացրել է պետական կյանքի ուժը՝ եկեղեցու շահերը գերադասելով: Թունավոր խոսքերով խոցում էր իր ժամանակակից վիպասանին, որ, Արևմտյան Հայաստանում առևանգված քույրերի լացն ու ողբը չլսելով, Կովկասում փարթամ կյանքով ապրող տիկիների սիրային տանջանքներն է նկարագրում: Պարսավում, անգոստում էր այն հասարակական գործիչներին, որ, հոգով խլացած ու մտքով բթացած, օտարածին գաղափարներ էին կրկնում՝ չձանաչելով իրենց ժողովրդի կարիքներն ու անտարբեր մնալով նրա նկրտումների հանդեպ, կամ նրանց, որ, եվրոպական քաղաքների սրձարաններում նստած, արցունքներ էին թափում «ազգի համար», երբ ուրիշները թշնամու զնդակներից արյունաքամ էին լինում Տավրոսի լեռներում:

**«Սպիտակ դերբը»**  
պատմվածքից



ԴԱՎԹԻ ՎԵՐԱԴԱՐՁԸ ՍԱՍՈՒՆ

Դավիթն իր կտրիճների հետ հասավ Սասնա սահմանը: Հորթարածները, գառնարածները, նախորդները, հովիվները, իրենց անասունը թողած, նայում էին Դավիթին: Իմացան, որ Ազնանց գերդաստանի տղա է: Դավիթը նրանց բարև տվեց, ասաց, որ գնում է Սասուն՝ իր հայրենիք: Հովիվներն իրար բռնեցին:

— Առյուծ Մհերի տղան վայ թե սա է, որ կա:

Մի ջահել նախորդ վազեց գնաց քաղաք՝ ավետիս տանելու Ձենով Օհանին:

Ձենով Օհանն այդ գիշեր երազ էր տեսել. Սասնա տան պարիսպը կանգնած էր: Սասնա բերդի ջահը վառվում էր, պարտեզը կանաչել էր, սոխակը երգում էր: Քնից արթնացավ, կնոջը ձայն տվեց.

— Վե՛ր կաց, ա՛յ Սառյա, լույս է արդեն, երազ եմ տեսել. կա—չկա, մեր մանուկ Դավիթը եկել է:

Սառյան պառկած տեղից ասաց.

— Ա՛յ ալևոր, չես թողնում, որ հանգիստ քնենք:

— Ա՛խ, — գայրացավ Ձենով Օհանը, — օտարի զարմ ես, սիրտդ չի ցավում Սասնա տան համար:

Ձենով Օհանը վեր կացավ, շորերը հագավ: Այդ պահին ավետաբեր նախորդը ներս վազեց, ասաց.

— Բարի լո՛ւյս, ազնա՛նց Օհան, ավետիս ունես: Մի ազնավուր մանուկ է գալիս: Դավիթն է գալիս:

Ձենով Օհանի սիրտը ցնծաց: Իմաց արեց Քեռի Թորոսին ու Սասնա բոլոր մեծամեծերին: Սասունցիները եկան բերդի հրապարակ: Քեռի Թորոսն ասաց.

— Հե՛յ, սասունցիներ՛ր, աստված մեզ նոր տղա պարգևեց, մեր Սասնա տան ճրագը եկավ:

Սասունցիները իշխանների հետ խմբով գնացին Դավիթին ընդառաջ: Հասան Սասնա սահմանը, տեսան՝ երեք անձանոթ մարդ նախորդների հետ զրույց են անում: Ձենով Օհանը ցույց տվեց երկու կտրիճի միջև կանգնած ազնավուր տղային.

— Քեռի՛ Թորոս, երևի դա է մեր ծուռ Դավիթը: — Մոտեցավ, հարցրեց. — Տղա՛, դու ո՞րտեղացի ես:

— Ես Սասնա քաղաքից եմ:

— Սասնա քաղաքի մեջ ես քեզ չեմ տեսել: Դու Սասնա մեջ մարդ ունե՞ս:

— Իմ մայրը՝ Իսմիլ խաթունը, ասում է՝ ես այնտեղ ունեմ երկու հորեղբայր՝ Վերգո ու Օհան:



Ձենով Օհանը Դավթին ամուր գրկեց, երկու այտը համբուրեց, ասաց.

— Դավթի՛թ, մեռնե՛մ քեզ: Ձենով Օհանը ես եմ:

Դավթի տրեխները կտրտված էին, գուլպաները՝ մաշված: Սասնա բնակիչները ձեռք էին տալիս Դավթին, ողջունում էին, «բարի գալուստ» ասում, իսկ Դավթի՛թը գլխի չէր ընկնում, որ բոլորը Սասնա երկրից են, իրեն պատիվ են տալիս: Մտածկոտ քայլում էր: Ամաչում էր ասել, որ անոթի է:

Ձենով Օհանը կանգ առավ, ասաց.

— Հե՛յ, սասունցիներ՛ր, բոլորիս աչքը լո՛ւյս, մեր Սասնա տան ճրագն է եկել, մեր միամորիկ Դավթի՛թը:

Ձենով Օհանը, Քեռի Թորոսն ու Սասնա ժողովուրդը Մհերի որդուն բերին քաղաք, իջեցրին այն սենյակը, որտեղ մի ժամանակ նստում էր Մհերը: Նստեցին, գինի խմեցին, եղնիկի միս կերան, ուրախուժյուն ու խնջույք արին, Դավթի երեսը համբուրեցին ու մեկ-մեկ «մնաս բարով» ասին, գնացին:

Մնացին մենակ Դավթի՛թն ու Ձենով Օհանը:

— Է՛, հորեղբա՛յր, ո՞նց ես, ո՞նց եք ապրում:

— Որդի՛, փա՛ռք աստծու, իր ողորմությամբ ու քո հոր գերեզմանով ապրուստ ենք անում:

Սասնա քաղաքի մեջ կար մի կաղ տերտեր: Ձենով Օհանը Դավթին տարավ նրա մոտ, ասաց.

— Տերտե՛ր, մեր Դավթին սաղմո՛ս կարդացրու:

Անցավ մի ժամանակ, մի օր Դավթի՛թն ասաց.

— Հորեղբա՛յր Օհան, այսպես պարապ-սարապ սաղմոս կարդալով ապրել չի լինի: Դու քաղաքի մեջ պատիվ կունենաս, ինձ մի գո՛րծ գտիր:

Ձենով Օհանը գնաց քաղաքի հրապարակ, այնտեղ կանգնած քաղաքի մեծերին առաջարկեց.

— Դավթին մի գործի տանք՝ աշխատի, ապրի:

Քաղաքի մեծերն իրար հետ խորհուրդ արեցին.

— Դավթի՛թը փոքր է, թող լինի Սասնա գառնարած: Ձենով Օհանը եկավ տուն:

— Դավթի՛թ, գառնարածուժյուն կանե՞ս:

— Ինչո՞ւ չեմ անի: Շատ լավ ես արել, հորեղբա՛յր, որ տվել ես ինձ գառնարածուժյան:



## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Ձենով Օհանը Դավթին ուղարկեց տերտերի մոտ:
2. Նկարագրիր կաղ տերտերին, ինչպես պատկերացնում ես:



**ԶՈՒԹԱԿԱՀԱՐԻ ՊԱՏՄԱԾԸ  
(կրճատումներով)**

Լեւինգրադի երաժշտանոցում սովորելու տարիներին ապրում էի մի հայ ընտանիքում: Ծագումով էին հայ այդ ընտանիքի անդամները, ոչ՝ լեզվով ու կենցաղով, ոչ՝ բարքերով կամ ազգային պատմության ու մշակույթի իմացությամբ: Ծագումով և մի քիչ էլ՝ ազգանունով: Տիգրանյանցներ էին եղել, հիմա դարձել էին Տիկրանովներ:

Տատը՝ Այյա Արտեմովնան, մոտ ութսուն տարեկան, բարձրահասակ, չկորացած, վեհաշուք տեսքով կին էր: Նրա հայրը գինվորական էր եղել, պաշտոնի բերումով Կովկասից Սանկտ-Պետերբուրգ էր տեղափոխվել ընտանիքով, երբ այս տատիկը երեք տարեկան, սև գանգուր մագերով աղջիկ էր եղել: Այդ ժամանակ տանը դեռ հայերեն էին խոսում, քանի դեռ ապրում էր Այյա տատիկի տատը, որ Պետերբուրգ տեղափոխվելուց երկու տարի անց վախճանվեց:

Հիմա Այյա տատիկն ապրում էր իր աղջկա՝ Նադեժդայի, և քսանամյա թոռան՝ Վերայի հետ:

Այյա տատիկը, որի անունը Աստղիկ էր եղել, շատ բարի կին էր: Պատահում էր, որ մենակ մնալով՝ կանչում էր ինձ հյուրասենյակ, թեյ էր առաջարկում ու հարց ու փորձ անում Հայաստանի մասին: Երեք տարեկան հասակից երբեք չէր եղել մեր կողմերում, բայց շատ տեղեկություններ ուներ, որ քաղում էր գրքերից ու մամուլից: Հարցնում էր՝ եղև՞ եմ Ղարաբաղում, տեսև՞ եմ Շուշի քաղաքը, ասում են՝ ավերակ է Անի քաղաքի պես, ասում են՝ գեղեցիկ է Ղարաբաղը...

— Տեսել եմ Եվրոպայի համարյա բոլոր մայրաքա-

ղաքները, բայց հայրերիս երկիրը չեմ տեսել... Մեղավոր եմ, բայց մեղքս քավել այլևս չեմ կարող:

Ծանր ցավ ու դառը գոշում կար նրա խոսքերի մեջ:

— Իսկ ինչպե՞ս է, որ հայերեն ոչ մի խոսք չգիտեք, — հարցրի մի անգամ նրան, — Ֆրանսերեն գիտեք, անգլերեն, իսկ հայոց գրերն անգամ չեք ձանաչում...

— Եվ իտալերեն, — ավելացրեց նա՝ դառը ժպիտն աչքերում: — Մանկության օրերին տատիկիս հետ ազատ խոսում էի հայերեն: Հիմա ոչինչ չեմ հիշում, ոչ մի բառ: Յոթանասունհինգ տարի է անցել: Հայրս հասել էր գեներալի աստիճանի, ապրում էինք կայսրերի այս մայրաքաղաքում տոհմիկ ազնվականների պես: Ֆրանսերենի ու իտալերենի ուսուցիչներ ունեի տանը, իսկ հայերենի հնչյունները մարեցին հիշողության մեջ տատիս վախճանվելուց հետո:

Եկավ ձմեռը: Խիստ ցրտեր եղան, և Այսա տատը հիվանդացավ թոքերի բորբոքումով: Նաղեժդան, Վերան և ես գլուխներս կորցրինք: Անընդհատ ոտքի վրա էի. վազում էի մեկ բժշկի ետևից, մեկ դեղատներ: Կան դասի չէի գնում, կան դասերից անմիջապես հետո վազում էի տուն:

Մի օր էլ՝ դասի նստած ժամանակ, ինձ թվաց, թե Այսա տատն ինձ է կանչում: Հստակ լսեցի նրա դողդոջուն ձայնը. «Տիգրան, Տիգրան»...

Մարմինս փշաքաղվեց: Նույն այդ թոպեին, հավատում եք, նույն այդ թոպեին լսարանի դուռը բացվեց, և շեմին երևաց Վերայի այրվող, թուխ դեմքը: Առանց դասախոսից թույլտվություն խնդրելու դուրս թռա: Ամբողջ մարմնով դողում էի:

— Տատիկը բարձր ջերմություն ունի... գիտակցությունը կորցրել է... Մեզ չի ձանաչում... Անընդհատ զառանցում է... քո անունն է տալիս, Տիգրան...

Գլխապատառ վազեցինք, ներս ընկանք տատիկի ննջասենյակը: Նաղեժդան, մոր մահձակալի կողքին նստած, գլուխը կորցրած, անվերջ կրկնում էր.

— Չեմ հասկանում, մայրի՛կ, ի՞նչ ես ասում:

Տատը չձանաչեց ինձ ու Վերային: Հայացքն անորոշ մի կետի հառած՝ խոսում էր ինքն իր հետ: Կռացա մահձակալին, ականջ դրի ու զարմանքից շշմեցի, մարմինս փշաքաղվեց: Նա բառեր էր արտասանում

*Աշխատանք և Հայ ժողովուրդ. ահա իմ դավանանքը: Ովստել եմ հավատարիմ մնալ այդ երկու հսկաներին մինչև ի մահ, հավիտյան: Նրանք իմ ուժն են և ինձ առաջնորդողները, որ երբեք չեն լքում ինձ: Թե՛ ոգեշնչումների և թե՛ հուսահատության պահերին նրանք հայտնվում են իմ գլխավերևում ու կանչում են ինձ զգաստանալու և գործելու:*

**«Սպիտակ դիրքը»**  
**պատմվածքից**



հայրենի Ղարաբաղի բարբառով. «Մնաք բարով, ան խոխեք, ես գնալական ամ, մնաք բարով»...

Ծանր էր շնչում, դեմքը ջերմից վառվում էր: Լռում էր մի պահ ու դարձյալ կրկնում նույնը

Ականջներին չէի հավատում: Ավելի էի կռանում հիվանդի վրա: Չէ, լսողության ոչ մի խաբկանք չկար: Ասյա տատը հայերեն էր խոսում: Յոթանասունհինգ տարի առաջ մարած, ժամանակի ու տարածության անհունի մեջ կորած հնչյունները կենդանացել ու արձագանքում էին հիմա նրա հոգու խորին գաղտնաբաններում և դուրս գալով՝ դողում, թրթռում էին նրա ծերունական շրթունքների վրա:

— Ի՞նչ է ասում, — հարցնում էր Նաղեժդան:

— Մի խանգարեք, թողեք, որ խոսի, ես լսեմ:

Ասյա տատն աստիճանաբար հանդարտվում էր: Աչքերը փակեց, երկար լուռ մնաց, ապա կրկին դող-դողացին շրթունքները.

— Ծարնվ ամ, աղջի՛, ծարնվ ամ, քե՛ մատաղ...

Վազեցի, ծորակից կես բաժակ ջուր բերեցի, մոտեցրի շուրթերին: Մի կում խմեց, մշուշոտ հայացքը մի քիչ լուսավորվեց, շշնջաց.

— Զորանան, քե՛ մատաղ, գորանան...

Ու ժպտաց, ձանաչեց ինձ. «Տիգրան»... Ճանաչեց Նաղեժդային ու Վերային: Եվ մի անգամ էլ հագիվ լսելի շշնջաց. «Զորանաս, քե՛ մատաղ»...

Երևոյթն իսկապես որ հրաշքի էր նման: Աչքերս լցվել էին արտասուքով:

— Նա հայերեն է խոսում, հասկանում եք, խոսում է հայերեն, — պետք եղածից ավելի բարձր ձայնով ասացի ես աղջկան, թոռնիկին ու հարևաններին, որոնք եկել ու լուռ կանգնել էին իմ թիկունքում:

Ասյա տատի շուրթերը կրկնում էին նույն բառերը.

— Զորանաս, քե՛ մատաղ, գորանան, գորանան...

Հուզմունքից թարգմանել չէի կարողանում, ո՛չ «քե մատաղ» արտահայտության և ո՛չ էլ «գորանաս» բառի հունանիշներ չէի գտնում ռուսաց հզոր ու հարուստ լեզվի մեջ, չնայած ռուսերեն լավ գիտեմ, մեծացել ու կրթվել եմ Ռուսաստանում:

Ասյա տատը դեռ մրմնջում էր հայերեն այդ բառերը. հետո աչքերը փակեց: Ավելի թեթև էր շնչում:

Երեկոյան ինձ մոտ եկան Նադեժդան ու Վերան:

— Տատիկը լավ է, Տիգրան, — ասաց Վերան: Բայց այդ ի՞նչ հրաշք էր, ի՞նչ անհավատալի բան էր...

Դրանից հետո այդ «հրաշքն» այլևս չկրկնվեց: Իսկ երկու շաբաթ հետո, երբ Ասյա տատն արդեն ապաքինվում էր, երբ պատմեցինք, չէր հավատում, որ բարձր ջերմության մեջ ինքը հայերեն է խոսել:

— Ինչէր էք հնարում, — ասում էր նա, — ես ոչ մի բան ու ոչ մի բառ չեմ հիշում...

Ես հատակ, հատ-հատ արտասանելով, կրկնեցի նրա ասած բառերը. «Մնաք բարով, ան խոխեք, ես գնալական ամ... Զորանան, քե՛ն մատաղ...»:

Ութսունամյա Ասյա տատը, զարմանքից բիբերը լայնացած, նայում էր ինձ՝ լսողությունը լարած: Ես ավելի դանդաղ կրկնեցի այն բոլոր բառերը, որ լսել էի նրա շուրթերից: Ավելի ու ավելի էին լայնանում տատի բիբերը: Հետո հուզված, դողդոջուն ձայնով նա շնչաց ռուսերեն՝ կոպերը փակած, որ ոչ միայն լսի, այլև տեսնի այն հնչյունները, որ թվում էր, թե վաղուց լռել-հանգել էին նրա մեջ.

— Կարծես հիշում եմ... Թվում է՝ այն բառերն են դրանք, որ ասաց տատս մեռնելու պահին...

Հիշում էր, բայց կրկնել չկարողացավ:

Քսանհինգ տարի է անցել այդ օրերից, բայց ես երբեք չեմ մոռանում այդ դեպքն ու այդ բարի կնոջը, հիշում եմ նրան, մանավանդ երբ խոսում եմ մայրենի լեզվի մասին: Այդպիսի թույլներին կարծես լսում եմ նաև նրա դողդոջուն ձայնը. «Զորանաս, քե՛ն մատաղ, գորանանս, գորանանս»...

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Դասընկերներով հայթայթե՛ք ասույթներ Հրայա Քոչարի մասին:
2. Կարդա՛ Հրայա Քոչարի «Նահապետը» վիպակը և համեմատի՛ր քո կարդացած այլ վիպակների հետ:
3. Կարդա՛ նաև Հրայա Քոչարի «Սպիտակ գիրքը» ժողովածուն ամբողջությամբ:

*Ինչքան էլ սուրբ լինեն նահատակների անուններն ու նրանց արյունը, մենք պիտի կոչ անենք նոր սերունդներին՝ խոսափելու նրանց օրինակից: Բավական է: Նահատակներն արդեն շատ են: Մեզ պետք են ապրող, մարտնչող ու հաղթանակող զինվորներ և ոչ թե նահատակություն, այլ հաղթանակ ուխտած զորավարներ...*

**«Սպիտակ գիրքը»  
պատմվածքից**



ԴԱՎԹԻ ՀՈՎՎԱԿԱՆ ԱՐԿԱԾՆԵՐԸ

Ձենով Օհանը Դավթի համար շինել տվեց մի զույգ պողպատե կոշիկ, մի պողպատե ցուպ, ասաց.

— Տղա՛ս, վաղը քաղաքի գառները կտանես մեր Սասնա սարերը, կարածեցնես, կեսօրին դադար կտաս աղբյուրի մոտ, կսպասես, մինչև քեզ հաց բերեմ:

Սասունցիներն իրենց ունին ու գառը բերին: Երբ տեսան Դավթի ցուպը, շատ վախեցան, ասին.

— Օհա՛ն եղբայր, վա՛յ թե Դավթի՞րը պողպատե ցուպով խփի, մեր գառները սպանի:

— Ես հո ծուռ չե՞մ, — նեղացավ Դավթի՞ր:

Գառներն առաջն արեց, բարձրացավ Սասնա սարը, արածեցրեց: Կեսօրին գառները քչեց մի քարայրի մեջ, ինքը մի մեծ քարի ստվերում քնեց: Երբ քնից ելավ, տեսավ՝ քարայրը դատարկ է: Գառներն ու ուլերը անհետ կորել են: Դավթի՞ր գոռաց.

— Հայ-հա՛յ, սարե՛ր, Սասնա՛ սարեր, ո՛ւր են իմ գառները, ո՛ւր են իմ ուլերը:

Դավթի գոռալուց ահռելի մի դմբդմբոց ընկավ սար ու ձոր: Աղվեսները, նապաստակները, կզաքիսները քարի ու թփի հետևից դուրս թռան, փախան:

— Վա՛յ, իմ ուլերը ո՛ւր են փախչում:

Ասաց ու վազեց հետևներից, որին քարի տակից, որին թփի հետևից բռնեց, բերեց: Դու մի ասի, Դավթի գառները արածելով էլի եկել հավաքվել են քարայրի առաջ: Դավթի՞ր բոլորին քչեց քարայր:

Ձենով Օհանը Դավթին հաց բերեց ու տեսավ՝ պողպատի կոշիկները կտրտվել են, ցուպը մաշվել է.

— Դավթ՛ի, օրական մի զույգ կոշիկ ու մի ցուպ որ շինել տամ, քո վարձը չի հանի:

— Է՛, հորեղբա՛յր, այնքան եմ վազվզել, որ կոշիկ չի մնացել ոտքիս: Վաղը ես էլ գառ չեմ արածեցնի:

— Ի՞նչ է, գառնարածությունն անուշ բան չէ՞:

— Անուշ բան է, հորեղբա՛յր: Այս կարմիր գառներն ու սև ուլերը շատ հանգիստ են, շատ խելոք: Բայց այն խատուտիկները, երկարապոչերը, ցիցականջները հոգիս կերան. ամբողջ օրը փախչում են:

— Դրանք ուլեր չեն, գազաններ են, թող գնան:

Բայց երեկոյան Դավթի՞ր բոլորին քչեց քաղաք: Տերերը եկան, իրենց գառները ջոկեցին, տարան, հետն էլ, ով ինչքան կարողացավ, կուզ, նապաստակ, աղվես տարավ: Նապաստակները մորթեցին կերան,



ազվեաններն ու կուզերն էլ քուրք արին, հագան:

Ձենով ՕՀանը Սասնա մեծերին կանչեց, ասաց.

— Սա չեղավ, Դավիթն ուլ ու նապաստակ չի ջու-  
կում, ամբողջ օրն ընկնում է գազանների հետևից,  
օրական մի գուլգ պողպատե կոշիկ է մաշում:

— Բերե՛ք Դավթին անենք նախորդ:

Լուսաբացին քաղաքացիները տավարը բերին:  
Դավիթը նախիրը տարավ Սասնա դաշտ, թողեց արո-  
տում, ինքը մեկնվեց մի քարի ստվերում, քնեց:  
Արթնացավ, տեսավ՝ նախիրը չկա:

— Հայ-հայ, Սասնա՛ սարեր, իմ նախիրն ո՞ւր է:

Դավթի գոռոցից ամպի դղրդյուն ընկավ սար ու  
ձոր: Այս անգամ էլ իրենց որջերից լույս աշխարհ  
թռան անհաշիվ գայլ, արջ, վագր ու առյուծ:

Դավիթը բոլորին հավաքեց բերեց: Նախիրն էլ  
սարում արոտից կշտացել, իջել էր դաշտը ու մա-  
կաղել գետափին: Դաշտը լցվել էր գազաններով:  
Դրանք Դավթի աչից իրար չէին դիպչում:

Կեսօրին հորեղբայրը Դավթին հաց բերեց, տեսավ՝  
դաշտը լիքն է գազաններով, հեռվից ձայն տվեց.

— Դավիթ, ի՞նչ ես արել: Արի՛, քո հացն ա՛ն:

Դավիթը իր հացն առավ, եկավ նախրի մոտ:

Ձենով ՕՀանը ափալ-թափալ հասավ Սասուն.

— Հե՛յ, սասունցիներ, քաղաքի դարպասները  
փակե՛ք. Դավիթն ինչքան գայլ, արջ, վագր, առյուծ  
կա, խառնել է նախիրին, երեկոյան կբերի քաղաք:

Երեկոյան Դավիթը նախիրը քչեց, բերեց: Տեսավ՝  
ոչ ոք չի գալիս, որ տավարը տանի տուն: Գլխարկը  
դրեց գլխի տակ ու քնեց: Լուսաբացին տեսավ՝ բո-  
լոր գազանները փախել են սար, մնացել են միայն  
կովերն ու գոմեշները: Քաղաքացիները վախվխելով  
եկան, իրենց կովն ու գոմեշը տարան տուն:

Սասնա մեծերը եկան Ձենով ՕՀանի մոտ, ասին.


— Օհա՛ն եղբայր, այս մեկն էլ չեղավ: Դավիթն  
իրոք որ ծուռ է, արջ ու կով չի տարբերում իրարից:

Դավիթը նեղացավ ու Ձենով ՕՀանի տուն չգնաց:

Առավոտյան Քեռի Թորոսը եկավ քաղաք: Խռոված  
Դավթին գտավ, տարավ իր տուն:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ սասունցիները հրաժարվեցին Դավթի նախրա-  
պանությունից:
2. Նկարագրիր Դավթի հավաքած «նախիրը»:





*Ո՛վ մարդ, հայոց տունն է քո  
ղեն, զգո՛յշ անցիր դու իմ բա-  
կից.*

*Ամեն քարը որմ է՝ պոկված  
մի հին բերդի աշտարակից:*

**Խաչիկ Դաշտենց**

Խսկական ազգանունը՝ Տոնոյան: Ծնվել է 1910-ի մայիսի 25-ին Արևմտյան Հայաստանում՝ Բիթլիսի նահանգի Խոյս-Բռնաշեն գավառի Դաշտաղեն գյուղում: Մեծ եղեռնից մազապուրծ՝ հանգրվանել է Գյումրիի ամերիկյան որբանոցում, որտեղ էլ ստացել է միջնակարգ կրթություն: Եղել է մանկավարժ Հոռոմ գյուղում: 1932-ին ավարտել է Երևանի պետական համալսարանի բանասիրական բաժանմունքը, 1940-ին՝ Մոսկվայի օտար լեզուների հաստատության անգլերենի բաժինը: Մի քանի տարի ապրել ու աշխատել է Իրինդ գյուղում: Ապա Երևանում զբաղվել է լրագրությամբ: 1965-ին ստացել է բանասիրական գիտությունների թեկնածուի աստիճան: 1965-1974 թթ. աշխատել է ՀԽՍՀ ԳԱ արվեստի ինստիտուտում: Դասախոսել է Երևանի բուհերում: Վախճանվել է 1974-ի մարտի 9-ին Երևանում:

Գրել է բանաստեղծություններ (ամփոփված են «Երգերի գիրք», «Գարնանային երգեր», «Բոց» և այլ ժողովածուներում), պոեմներ («Ֆայտոն Ալեքը», «Ծուռ խութեցին» և այլն), «Տիգրան Մեծ» թատերգությունը, վեպեր («Խողեղան», «Ռանչպարների կանչը»), գիտական աշխատանքներ («Բայրոնը և հայերը», «Ըղձյալ այգաբացի երգիչը»): Կազմել է հայկական դպրոցների համար անգլերենի դասագիրք, անգլերենից թարգմանել է Վիլյամ Շեքսպիր, Վիլյամ Սարոյան և ուրիշների:

Գլուխգործոցն է «Ռանչպարների կանչը» վիպա-քը՝ նվիրված հայ ֆիդայական շարժմանը:

## ՀԱՅԵՐԵՆ

Մեր շուրջը՝ լեզուներ նոր ու հին,  
Մեր շուրջը խոսում են այլորեն,  
Եկ խոսենք, եղբայր իմ, հայերեն:

Կույ չերթանք այս ահեղ լափումին,  
Թույլ չտանք՝ մեր լեզուն ավերեն,  
Եկ խոսենք, մի՛շտ խոսենք հայերեն:

Մենք ունենք աշխարհում Մասիս սար,  
Այդ սարը գալիս է դարերեն,  
Նա անվերջ խոսում է հայերեն:

Զավակիդ հայկազյան դպրոց տար,  
Եկ գրենք Մեսրոպյան տառերով,  
Եկ խոսենք մեր անուշ բարբառով:

Մեր հանդեպ՝ ապագա լուսեղեն,  
Թող հնչի մեր լեզուն վեհորեն,  
Թող այրվի մեր հոգին այդ հրեն:

Մեզ ցրեց մի բազուկ անօրեն,  
Թե կուգես՝ սերունդներ մեզ ներեն,  
Մենք Հայ ենք, եկ խոսենք հայերեն:

Այս օտար աշխարհի ցրտերում  
Եկ սիրենք մեր լեզուն ջերմորեն,  
Եկ վառենք ու վառվենք հայերեն:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր իսաչիկ Դաշտենցը:
2. Համացանցում գտիր լրացուցիչ տեղեկություններ իսաչիկ Դաշտենցի ու նրա երկերի մասին:
3. Հայթայթի՞ր ասույթներ իսաչիկ Դաշտենցի երկերից:
4. Կարդա՛ իսաչիկ Դաշտենցի «Ֆայտոն Ալեքը» պոեմը և համեմատիր քո կարդացած այլ պոեմների հետ:
5. Կարդա՛ նաև իսաչիկ Դաշտենցի «Խողեղան» վեպը:



Իսաչիկ Դաշտենցի  
դիմանկարը, 1956 թ.  
նկարիչ՝ Մարտիրոս Սարյան



Իսաչիկ Դաշտենցի դիմանկարը  
երգիծանկարիչ՝ Ալեքսանդր  
Սարուխան



ՀԱՐԻՍԱՆ ԵՎ ԱՎԱԶԱԿ ԴԵՎԵՐԸ

Ժամանակ անցավ: Գարուն էր: Դավիթն ասաց.

— Քեռի՛ Թորոս, վարուցանքի, հոտաղ-մշակի օրեր են: Ինձ էլի մի տե՛ղ տար, տո՛ւր նախորդը:

Քեռի Թորոսը գիտեր՝ Դավիթը խոսքը որ մի անգամ ասաց, կանի: Դավիթին խրատեց.

— Որդի՛ս, տավարը լուսաբացին կտանես մեր Սասնա սարերի հետև, այնտեղ արոտ կա, սպիտակ մի քար կա, աղբյուր կա: Տավարը կարածեցնես մինչև կեսօր, կբերես այդ աղբյուրի վրա, ջուր կտաս: Ջրնկնես այն շատ փախչողների հետևից, հա՛:

Դավիթը նախիրն արածեցրեց այնքան լավ, որ մինչև ամառ անասունները գիրացան, կովերն առատ կաթ էին տալիս, եզները ժիր լուծ էին քաշում:

Եկավ Աստվածածնի կիրակին: Դավիթն իր նախիրը տարավ սար: Յոթ գյուղի նախորդներ հավաքված էին այնտեղ: Սասունցիները՝ մեծ ու փոքր, իշխան ու ռամիկ, խմբով գնում էին դեպի սար:

— Սրանք ո՞ւր են գնում, — հարցրեց Դավիթը:

— Ուխտ են գնում, — ասին նախորդները: — Երաշտ կա այս տարի: Կգնան սուրբ Աստվածածին, մատաղ կանեն, հարիսա կեփեն, դափ կխփեն, զուռնա կփչեն, կպարեն, կուրախանան, հարիսա կուտեն:

— Վա՛խ, — հառաչեց մի նախորդ, — մեկն էլ չկա՝ գնա մեզ հարիսա բերի, մի գդալ ուտենք:

Դավիթը վեր կացավ:

— Իմ նախիրը պահե՛ք՝ ես գնամ, հարիսա բերեմ:

Գնաց, բարձրացավ ուխտատեղ: Տեսավ՝ յոթկանթանի պղինձը դրած է թոնրի մեջ, մի կաղ կին էլ խառնում է հարիսան: Դավիթը խնդրեց.

— Նանե՛, ինձ մի փշուր հարիսա տա՞ս: Յոթ գյուղի նախորդ ահա ժողովվել են Սպիտակ աղբյուրի մոտ: Գյուղի աղքատը որ կա, նախորդն է:

— Տերտերը պիտի հարիսան օրհնի, ժամավորն էլ պիտի իր հարիսան ուտի, նոր ավելցուկը տամ քեզ:

— Նանե՛, ավելցուկը շանն են տալիս, — բարկացավ Դավիթը, ձեռքը մեկնեց, պղինձը թոնրից հանեց, իր մահակն անցկացրեց պղնձի կանթերին, շալակեց, ինչքան որ հաց էին թխել, թևատակին դրեց:

— Ա՛յ ժողովուրդ, — ճչաց կինը, — Սասնա ծուռ Դավիթը հարիսան ու բոլոր հացերն առավ, գնաց:

Մի ուխտավոր աքլորացավ.

— Եկեք զարկենք դրան, հարիսան ձեռքից խլենք: Մի ալևոր մարդ ասաց.

— Գործ չունենք: Դա Մհերի որդին է, թե՛ ծուռ է, թե՛ ազնավուր: Զեզ կխփի, կանի խայտառակ:

Դավիթը հասավ Սպիտակ աղբուր: Տեսավ՝ նախորդներն ահից ցամաքել են: Մի նախորդ ասաց.

— Դավիթ, դու որ գնացիր, քառասուն ավազակ դե եկան, նախրից քառասուն կով քշեցին, տարան:

Դավիթը մահակն առավ, բարձրացավ սարը: Տեսավ՝ մի քարանձավից ծուխ է բարձրանում: Քառասուն դեռ էլ այնտեղ էին: Դավիթը մի հսկա ժայռ դրեց քարայրի դռան դեմ ու գոռաց: Սարսափը տիրեց ավազակներին: Սկսեցին մեկ-մեկ դուրս գալ: Դավիթը մեկ-մեկ վզները ոլորեց ու մի կողմ գլորեց: Մտավ քարայր: Մի սենյակում լիքը ոսկի էր, մյուսում՝ արծաթ, երրորդում՝ գուգս ու գոհարեղեն: Դու մի ասի՝ այն օրվանից, ինչ Մհերը մահացել էր, այդ ավազակ դեերը Սասունն ավերել, թալանել, բերել ու լցրել էին այդ քարայրը: Մի սենյակում էլ մի սիրուն քուռակ կար: Մախազը լցրեց ոսկով, գնաց, յոթ գյուղի մարդկանց հավաքեց, ասաց.

— Այս ոսկին առե՛ք, բաժանե՛ք ձեր մեջ՝ ի փոխ ձեր կովերի, որ դեերը տարան մորթեցին:

Դավիթը եկավ Սասուն, գնաց Քեռի Թորոսի մոտ.

— Քեռի՛ ջան: Մարդկանց հավաքի՛ր, քառասուն պարկ առնենք, գնանք, ոսկի բերենք:

— Գնա՛, ա՛յ ծուռ: Մի բուռ կորեկ չբերիր, քառասուն պարկ ոսկի՞ պիտի բերես:

Դավիթը մեջքից արձակեց իր մախաղը, ոսկին թափեց քեռու առջև: Քեռի Թորոսն ասաց.

— Դավիթ, սպանե՞լ ես այն ավազակ դեերին:

Վերցրին քսան ջորի, քառասուն պարկ, գնացին:

Դավիթը նրանց հասցրեց քարայր, ժայռը հետ տարավ, մտավ ներս: Հավաքեցին, ինչ որ կար՝ ոսկի, արծաթ, գոհարեղեն, լցրին պարկերը, բեռնեցին ջորիներին, եկան Սասնա քաղաք: Այդ ամենը լցրին Սասնա մառանները: Սասունը լողում էր ոսկու մեջ:

Դավիթն այդ առատ ավարից իր համար վերցրեց միայն մի քուռակ:



## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ քեռի Թորոսը չէր հավատում Դավիթին:
2. Նկարագրի՛ր սպանված դեերին պատկերացրածիդ պես:



**ՏԵՐԳԵՎԱՆՔԻ ԳԻՇԵՐԸ**  
(Հատված «Ռանչպարների կանչը»  
վիպասրից)

Ծծմակի գագաթի մոտ մի բարձր քարաժայռ կար: Մագլցեցի վեր և նստեցի այդ ժայռին: Աջից մի խոր կիրձ էր բացվում, երևում էին վիհեր, անձավներ:

Ծծմակը հայտնի էր կաքավներով, որ արևածագից մինչև մայրամուտ կվկվում էին ձորերի ու ծերպերի մեջ՝ գունագեղ փետուրները ժայռերին թափելով:

Վարժապետ Սենեքերիմը պատմում էր, որ երբ Մշո դաշտի հեթանոս տաճարները կործանվեցին, նրանց քրմերն ու քրմուհիները քարակաքավներ դարձան ու թռան դեպի ապառաժոտ բլուրները: Նրանց մի մասը թաքնվեց Ծծմակա Քթի ծերպերի մեջ:

Ահա նրանք խմբերով բխում են Ծծմակի քարուտներից և զգույշ պտույտներ գործելով արևի տակ՝ մայրամուտից առաջ շտապում են թաքնվելու իրենց խողզներում: Ես նայում եմ նրանց, և մի տեսակ սրբազան դող է պատում ինձ:

Բարձր քարաժայռին նստած՝ երկար նայեցի Մշո դաշտին: Դաշտի առաջին բնակիչները, ըստ ավանդության, եղել են Սիմ նահապետի սերունդները, որ ջրհեղեղից հետո բնակություն են հաստատել Մշո թիկունքի լեռներին, որոնք նրա անունով կոչվել են Սիմ: Նրա կրտսեր որդի Տարբանին բաժին ընկավ այդ լեռների առաջ տարածված հարթությունը. այն էլ նրա անունով կոչվեց Տարբանի կամ Տարոնի դաշտ:

Իսկ Մելքոն վարժապետը պատմում էր, որ Մաշտոցի գրերից առաջ Հայաստանում եղել են քարե հեթանոս մատյաններ: Երբ թշնամին մտել է Տարոն և



սկսել է դրանք ջարդել, նրանց միջի բոլոր գրերը մի ականթարթում դարձել են մեղուներ և աղմկալի դուրս փախչելով քարե մատյաններից՝ պարս են կապել Ծծմակի և Ծիրինկատարի ապառաժներին:

— Առաքելոց վանքի ձանապարհին, ուր Արաբոյի քարն է, — աչքերը սրբելով՝ ասաց մի անգամ Մելքոն վարժապետը, — մի գագաթ կա՝ թուխ ժայռերով, որ կոչվում է Մեղրի քարեր: Դա մեղրաձանձեր դարձած մեր հին ու հալածական գրերի հավերժական բնակավայրն է: Իմաստության փոխարեն նրանք այժմ մեղր են շինում մարդկանց համար:

Ծծմակա Քթի մեծ ժայռին նստած՝ նայում են Մեղրի քարերին: Մեղուները մայրամուտի ցուլքերի մեջ վերջին պտույտներն են գործում իրենց քարե փեթակների շուրջը:

Իմ աչքի առաջ է Տերգեվանքը՝ իմ մորաքրոջ գյուղը: Գինեվարդ մորաքույրս խաշած ցորեն է փռել տանիքին: Սարի կողերով շինականներ են իջնում դեպի գյուղ: Առաքելոց վանքից են գալիս: Գնացել են մոմեր վառելու Դավիթ Անհաղթի գերեզմանին: Մորաքույրս, ինձ մի օր վանքում տեսնելով, ասաց. «Դու էլ մի մոմ կպցրու Անհաղթի խաչքարին»: Ես ասացի՝ թող տերգեվանքցիք կպցնեն, իրենց գյուղում է ծնվել: «Ինչո՞ւ, դու հայ չե՞ս», — նեղացավ վրաս Գինեվարդ մորաքույրս և մի դեղնամոմ վառելով՝ տվեց ձեռքս՝ ինձ տանելով մի հին խաչքարի մոտ:

Այնքան հափշտակված էի Ծծմակից դեպի Մեղրի քարերը և Ալվառինջ ու Տերգեվանք գյուղերը բացվող տեսարանով, որ աննկատելի իջավ երեկոն: Նախ թանձր մթնեց, ապա երկնքի չորս կողմը առկայծեցին աստղերը՝ ասես իրարից լույս առնելով:

Գեղեցիկ է գիշերը Մշո դաշտում...

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայթայթիր ասույթներ հաչիկ Դաշտենցի մասին:
2. Կարդա՛ հաչիկ Դաշտենցի «Ծուռ խութեցին» պոեմը և համեմատիր քո կարդացած այլ պոեմների հետ:
3. Կարդա՛ նաև հաչիկ Դաշտենցի «Ռանչապարների կանչը» վեպն ամբողջությամբ:



*Խաչիկ Դաշտենցի  
գլխամակարը, 1961 թ.  
նկարիչ՝ Հարություն Կալենց*

*Իր կյանքը անանձնական ապրած հաչիկ Դաշտենցը իր հայրենիքի երջանկության բրաբիոն ծաղիկը որոնող «խենթերից» մեկն էր:*

*Մուշեղ Գալշոյան*



ՍԱՍՆԱ ՊԱՌԱՎԸ ԵՎ ՈՐՍՈՐԴ ԴԱՎԻԹԸ

Դավիթն ափազակ դեերին որ կոտորեց, եղավ Սասնա սիրելին: Ձենով Օհանը Դավթին էլի տուն բերեց, նրա համար գտավ մի լավ բազե, ասաց.

— Տղա՛ս, Մհերի որդուն վայել է՛, որ նախիր արածեցնի, գնա՛, քեզ համար ո՛րս արա:

Դավիթը, վերցնելով բազեն, հեծնելով դեերից խլած քուռակը, կաքավ, լոր ու ճնճղուկ էր բռնում:

Սասունում կար իմաստուն մի պառավ: Ասում էին՝ Չահել ժամանակ Սասնա Մհերի սիրածն էր եղել: Պառավն ուներ մի կորեկի արտ: Մի օր գնաց՝ իր կորեկին աչք ածի, տեսավ՝ Դավիթը, քուռակը հեծած, կորեկի արտում լոր ու ճնճղուկ է բռնում:

— Դավիթ, ի՞նչ ես անում, կորեկս ոտքի տակ ես տվել: Դու իմ արտի ճնճղուկներո՞վ պիտի կշտանաս: Գնա՛ սարերը, եղնիկ ու վայրի ոչխար սպանիր:

— Նանե՛, սար որ գնամ, վայրի ոչխար ինչո՞վ զարկեմ: Կարգին նետ-աղեղ չկա:

— Գնա՛, հորեղբորիցդ ուզի՛ր քո հոր նետ-աղեղը: Դավիթը եկավ տուն, հարցրեց Ձենով Օհանին.

— Հորեղբայր, իմ հոր նետ-աղեղն ո՞ւր է:

— Գնա՛ ցախատուն, այնտեղ է: Թե կարողացար լարը կեռն անցկացնել, տա՛ր:

Դավիթը նետ-աղեղը բերեց, ձեռքը գցեց ու լարն անցկացրեց կեռի վրա: Հորեղբայրը զարմացավ.

— Մհերը մի ժամ չարչարվում էր, նոր այդ լարը կեռն էր գցում: Դու հենց ձեռք տվիր, լարը կեռն անցավ: Դու հորիցդ ուժեղ ես:

Դավիթը հոր նետ-աղեղով ամեն օր որս էր անում: Մի օր ճանապարհին տեսավ՝ ագռավի երամն ընկել է Պառավի արտը, կորեկ է ուտում: Մտածեց. «Նետով քսան ագռավ էլ խփեմ, մնացածները կթռչեն»:

Ձեռքը մեկնեց, մի բարդի արմատահան արեց ու, որ չտարավ-բերեց արտի այս գլխից այն գլուխը, ագռավ, կորեկ մեկտեղ հավաքեց, արեց մի բարդոց: Պառավը եկավ, տեսավ, ծնկներին խփեց, ասաց.

— Դավիթ, քո ուժն իմ արտի՞ն պատեց: Քո հայրը՝ ողորմածիկ Առյուծ Մհերը, աղքատի հայրն ու մայրն էր: Դո՞ւ պիտի լինես այն հոր տղան: Իմ հույսը այդ կորեկն էր, դու արմատահան տրորեցիր: Ի՞նչ ուտենք ես ու աղջիկս: Դու, որ այդքան զորեղ տղամարդ ես, ինչո՞ւ էես գնում Ծովասար:

— Ծովասարում ի՞նչ կա:

— Ծովասարը քո ողորմածիկ հոր որսատեղն է: Չորս բոլորը պարիսպ է քաշած, մեջը՝ ինչքան ուզես արջ, գայլ, կիտար, եղնիկ, վայրի ոչխար: Մորա Մելիքը եկավ, քո հոր Ծովասարը գավթեց: Հիմա հրաման չկա, որ սասունցիները Ծովասար գնան, որս անեն: Ինչո՞ւ դու չես գնում՝ տիրես քո հոր որսասարին:

— Ես չգիտեմ՝ որտեղ է իմ հոր որսատեղը:

— Գնա՛, բռնի՛ր հորեղբորդ օձիքը, թող ցույց տա:

Դավիթը եկավ, բռնեց հորեղբոր օձիքը.

— Հորեղբա՛յր, տա՛ր ինձ Ծովասար:

Դավիթը, Ձենով Օհանը, Քեռի Թորոսը Սասնա Ջահելների հետ գնացին, հասան Ծովասար: Սարի չորս բոլորը պարիսպ էր քաշած:

— Սա ի՞նչ պարիսպ է, — հարցրեց Դավիթը:

— Որդի՛ս, այս պարիսպը քո հայրն է քաշել, որ իր որսը սարից չփախչի:

Դավիթը ներս մտնելու դուռ չգտավ, մի կաղնի արմատահան արեց, հարվածեց, պարիսպը քանդեց:

Բոլորը միասին ներս մտան, տեսան՝ չորս կողմը կանաչ անտառ է, վճիտ աղբյուր է, լճակ է՝ ափերը մարմարով շինած: Այնտեղ կային շատ գազաններ՝ արջ, գայլ, աղվես, կիտար, եղնիկ, վայրի ոչխար:

Սասնա Ջահելներն ուզեցին վայրի ոչխար սպանել:

— Հայ-հա՛յ, — գոռաց Դավիթը, — դուք դրանցից ոչ մեկին ձեռք չտաք: Հայրս մեղք է գործել, որ այս աստծու արարածներին դրել է բանտի մեջ: Բանտված գազանին Սասնա պառավն էլ կորսա: Տղամարդը նա է, որ իր որսին նշան կբռնի, կխփի ազատության մեջ:

Դավիթը պարիսպը չորս կողմից քանդեց. բոլոր գազաններն ու կենդանիները դուրս փախան: Դավիթը նայեց այս քարի տակ, այն ծառի հետև, ինքն իրեն ասաց. «Չլինի՞ թե մի գազան քնած է մնացել, մեղք է»: Ջահելներին ասաց.

— Հիմա գնացե՛ք, ով կտրիճ է, թող որս անի:

Ինքը երկու վայրի ոչխար խփեց, բերեցին լճակի մոտ, մորթեցին: Դավիթը մտավ ջուրը, լողացավ: Կրակ վառեցին, ոչխարները խորովեցին, կերան:



## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Դավիթը քանդեց Ծովասարի պարիսպները:
2. Նկարագրիր Ծովասարի որսատեղը:



Մաշտոցի հզոր լեզուն վառ  
հույսն է ամեն մի հայի:

Աշոտ Գրաշի

Ի սկական ազգանունը՝ Գրիգորյան: Ծնվել է 1910-ի մայիսի 9-ին Բաքվում (այժմ՝ Ադրբեջանում): 1929-ին ավարտել է տեղի Ալեքսանդր Մյասնիկյանի անվան հայկական դպրոցը, 1933-ին՝ Երևանի պետական համալսարանի պատմագրական բաժանմունքը: 1933-1946-ին եղել է Բաքվի հանրային գրադարանի հայկական բաժնի վարիչը, Ադրբեջանի խորհրդային գրողների միության հայկական բաժանմունքի քարտուղարը, «Կոմունիստ» հայերեն թերթի արվեստի և գրականության բաժնի վարիչը:

1946-ին տեղափոխվել է Երևան: Վախձանվել է 1973-ի փետրվարի 26-ին Երևանում:

Գրել է բանաստեղծություններ (որոնք ամփոփված են «Մուտք», «Քնարական», «Կռունկ», «Իմ գարունը», «Երգը թռչում է աշխարհով», «Սարերի սրինգը», «Ծիածանի յոթ երգը», «Արևի քույրը» և այլ ժողովածուներում), թատերգություններ («Ամպաբերդ» և այլն):

## ԵՎ ԵՐԲ ԳՆՈՒՄ ԵՄ ԵՍ ՕՏԱՐՈՒԹՅՈՒՆ

...Եվ երբ գնում եմ ես օտարություն,  
Քնքշորեն գրկած՝ տանում եմ ինձ հետ  
Ձեզ, իմ հայրենի անրտ ու արահետ,  
Եվ քեզ, կիրձերում հառաչող իմ գեն:

Եվ երբ գնում եմ ես օտարություն,  
Տանում եմ ինձ հետ իմ թախծոտ սրտում  
Քեզ, զով մարգերում կորած մանկություն,  
Ձեզ, լեռներ՝ քնած երկնի կապույտում:


Եվ երբ գնում եմ ես օտարություն,  
Մայրիկիս մի բուռ արցունքն եմ տանում,  
Օտար ցրտի դեմ՝ մեր արևն անհուն,  
Երկրիս անունը՝ անմար մի անուն:

## ՀԱՅՐԵՆԻՔ

Սարերդ ծաղկել, ձորերդ ծաղկել,  
Զմրուխտ գարունքի շողեր են հագել,  
Գարնան ձամփով ես գնում երջանիկ,  
Անճուղ հայրենիք, քնքրուղ հայրենիք:  
Վարդերը գարնան, շուրթերը վառման  
հոսում են մեզ հետ սիրով անսահման,  
Քեզնով ենք միայն զվարթ, երջանիկ,  
Անճուղ հայրենիք, քնքրուղ հայրենիք:  
Արտերդ լիքն են ցորենի բերքով,  
Լույս արտույտների հայրենի երգով,  
Բերքով երջանիկ, երգով երջանիկ,  
Անճուղ հայրենիք, քնքրուղ հայրենիք:  
Ես էլ մի հասկ եմ քո կյանքի արտում,  
Սիրտս՝ մի արտույտ, քեզ գովք է կարդում,  
Քեզնով է միայն որդիդ երջանիկ,  
Անճուղ հայրենիք, քնքրուղ հայրենիք:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչնով է նշանավոր Աշոտ Գրաշին:
2. Համացանցում գտիր լրացուցիչ տեղեկություններ Աշոտ Գրաշու ու նրա երկերի մասին և պատմիր դասընկերներիդ:
3. Դասընկերներով հայթայթե՛ք ասույթներ՝ քաղված Աշոտ Գրաշու երկերից:
4. Սովորիր Աշոտ Գրաշու խոսքերով գրված «Հայաստան աշխարհ» և «Բարի արագիլ» երգերը:
5. Գրքերում կամ համացանցում գտիր Աշոտ Գրաշու խոսքերով գրված երկու այլ երգ և սովորիր:



Աշոտ Գրաշիի «Արի գեանք Ղարաբաղ» գրքի կազմը

*Իմ տան մոտ ապրիր, բարի  
արագիլ,  
Բնյն հյուսիր ծառին՝  
Բարդու կատարին*

Աշոտ Գրաշի



ԴԱՎԻԹԸ ՎԵՐԱՇԻՆՈՒՄ Է ԻՐ ՀՈՐ ՏԱՃԱՐԸ  
Երեկոյան Քեռի Թորոսն ու Սասնա ջահելները  
գնացին քաղաք: Ձենով Օհանն ասաց:

— Դավիթ, բոլորը տուն գնացին, մենք էլ գնանք:

— Իմ հոր ոտքերը դիպել են այս քարերին: Ես  
գիշերը պիտի մնամ այստեղ: Ուզո՞ւմ ես՝ դու գնա՛:

— Ո՛չ, որ դու չես գնում, ես կմնամ քեզ հետ:

Նստեցին մի մեծ քարի վրա: Հարթ դաշտը երևում  
էր Սասնա սարերից մինչև Դիարբեքիր: Մուլթը մի  
քիչ էլ որ թանձրացավ, տեսան, որ ինչքան ասող  
կա երկնքում, այնքան կրակ է վառվում դաշտի մեջ:

— Հորեղբա՛յր, դրանք ի՞նչ կրակներ են:

— Գյուղեր են, արոտատեղ են, հովիվ են, հոտաղ  
են, ճամփորդ են, իրենց համար կրակ են վառում:

Ձենով Օհանը քնեց: Իսկ Դավիթը նայում էր  
կրակներին: Դրանք մեկ-մեկ հանգան, մնաց մի կա-  
նաչ-կարմիր բոց, որ սարի գլխին անվերջ վառ-  
վում էր ու կանչում: Դավիթը մտածեց. «Տեսնես դա  
ի՞նչ կրակ է»: Վեր կացավ, գնաց այդ լույսի մոտ:  
Մարմարե մի գերեզմանից բխում էր կանաչ-կար-  
միր լույսը ու կամար կապում Ծովասարի գլխին:  
Դավիթը մոտեցավ, ձեռք տվեց բոցին, ձեռքը չայր-  
վեց, հող լցրեց բոցի վրա, բոցը չհանգավ: Մտածեց.  
«Կա-չկա, սա է Մարութա բարձր Աստվածածինը»...

Այնտեղ նշան արեց, գնաց, հորեղբորը արթնացրեց:

— Հրաշք է եղել, հորեղբա՛յր, մարմարը բացվել  
է ահա, միջից կանաչ-կարմիր բոց է բխում, լույս  
կամար է կապել Ծովասարի գլխին: Գնանք, տե՛ս:

Դավիթը հորեղբորը տարավ գերեզմանի մոտ:

Ձենով Օհանը լաց եղավ, ասաց.

— Դա հորդ գերեզմանն է, տղա՛ս: Վանքն էլ, որ  
քարուքանդ է հիմա, քո հայրն է շինել: Նա որ մե-  
ռավ, Մսրա Մելիքը եկավ, հիմքից քանդեց քո հոր  
տաճարը, Սասունը թալանեց, գնաց:

Դավիթն այս բանը որ լսեց, մռնչաց ջահել առյու-  
ծի պես, ծունկի եկավ, գերեզմանի քարը համբուրեց,  
վեր կացավ. նետ-աղեղով մարմարի շուրջը գիծ քա-  
շեց, հորեղբոր ձեռքն էլ համբուրեց ու լալով ասաց.

— Հերահո՛տ հորեղբայր, ես իմ սրտի մեջ ուխտ  
արեցի, որ իմ հոր ավերված վանքը վերաշինեմ: Վա-  
ղը՝ մինչև կեսօր, քեզնից ուզում եմ հինգ հազար  
մշակ հինգ հարյուրական քարտաշ ու որմնադիր:



Թո՛ղ գան, մյուս օրը մինչև երեկո վանքը շինեն, որ այն մյուս օրը մեջը պատարագ լինի:

Ձենով Օհանը հիշեց իր երազը. Սասնա տան պարիսպը կանգնած էր, Սասնա բերդի ջահը վառվում էր, պարտեզը կանաչել էր, սոխակը երգում էր... Մտածեց. «Դավիթը կազատի Սասունը Մսրա Մելիքից: Ես Մհերի որդու խորհուրդը պիտի կատարեմ»:

— Մի՛ երկմտիր, տղա՛ս: Իմ ձայնը հասնում է քառասուն օրվա ճամփա, ձայն կտամ, քո ուզած մշակներն ու վարպետները կլսեն, կգան:

Ձենով Օհանը ձայն տվեց: Նրա կանչը լսելով՝ մշակներն ու վարպետներն ամեն կողմից եկան Սասուն, հավաքվեցին Ձենով Օհանի տանը, հաց կերան, գինի խմեցին, բարձրացան Ծովասար:

Տեսան՝ Դավիթը տաճարի տեղը գծել է, հիմքը փորել, հիմքում դրել ապառաժ մեծ-մեծ քարեր: Շատ զարմացան: Բոլոր մշակները թե միանային, այդ քարերից մեկն էլ տեղից շարժել չէին կարողանա:

Վարպետները եկան կանգնեցին պատի վրա: Մեծ քարերը Դավիթն էր բերում, դնում պատի վրա, մանր քարերը՝ մշակները: Սրանք շաղախ էին անում, վարպետներն էլ պատերն էին ձեփում: Վարպետ ու մշակ որ չէին նայում Դավիթին, որ չէին տեսնում նրա ազնվական ուժն ու եռանդը, գլուխ պահողն ամաչում էր, իրեն թափ էր տալիս ու բանում իր ուժից յոթ անգամ առավել: Մինչև երեկո Մարութա բարձր Աստվածածինը շինեցին:

Ձենով Օհանը կանչեց, եկան տաճարի սպասավորներ, շաբաթ օրը պատարագ արեցին վանքում:

Դավիթն ուրախացավ, հոգին փառավորվեց: Բաթմանա Բուղային ու Չարբահար Քամուն կարգեց վանքին պահապան, ասաց.

— Օտար չարամիտ մարդ որ կգա, դուռը վրան չբացեք, թե որ ուխտավոր կգա, աղքատ, անոթի մարդ կգա, դուռը բաց արեք, հաց տվեք՝ ուտեն:

Դավիթը դարձել էր կատարյալ մարդ. էլ չէր նեղում մարդկանց: Սասունցիներն իրար ասում էին.

— Դավիթն ասես Սասնա Առյուծ Մհերն է՝ հարույրուն առած:



## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ էր Մելիքը քանդել Մհերի կառուցած տաճարը:
2. Նկարագրի՛ր Մարութա բարձր Աստվածածին վանքը:



*Խանգաղյանը գալիս է զանգեզուրյան վեհանիստ լեռներից, գալիս է պարզ և հստակ, ինչպես անձեռագործ բնությունը, գալիս է հյուրասեր շինականի պես անսերթերթ, դարերից ժառանգած ներքին իմաստնությունը:*

*.... Հաճախ ինձ թվում է, թե նա հին, գունագեղ կարպետ է՝ ազգային նախշազարդերի հորինվածքով:*

*Նա գրական անընդմեջ ընթացքով կամրջվում է մեր գրականության դասական ավանդույթների:*

**Ռաֆայել Արամյան**

Ծնվել է 1915-ի դեկտեմբերի 3-ին Գորիսում: 1934-ին ավարտել է Գորիսի մանկավարժական ուսումնարանը, 1941-1945 թթ. մասնակցել է 2-րդ աշխարհամարտին: 1972-ից եղել է Հայաստանի գրողների միության գրական խորհրդական: Վախձանվել է 1998-ի հունիսի 26-ին Երևանում, թաղված է Կոմիտասի անվան զբոսայգու պանթեոնում:

Գրել է բանաստեղծություններ, պատմվածքներ («Այրված տունը», «Սպիտակ գառը», «Յոթերորդ աղբյուրը», «Խղձի խայթը» և այլն), վիպակներ («Մատյան եղելությանց», «Ծարավ եմ, ջրու բերեք», «Մեռածները հիշում են», «Արաքսը պղտորվում է» և այլն), վեպեր («Մեր գնդի մարդիկ», «Հողը», «Երեք տարի, 291 օր», «Քաջարան», «Սևանի լուսաբացը», «Խոսնք, Հայաստանի լեռներ», «Թագուհին հայոց», «Վարք հարանց», «Անդրանիկ», «Շուշի», «Գարեգին Նժդեհ» և այլն), թատերախաղեր («Վահրամ Որոտանեցի» և այլն), հուշագրություններ («Հորս հետ և առանց հորս», «Ինչպես հիշում եմ», «Ղարաբաղը կրակների մեջ» և այլն), ուղեգրություններ («Հայրենապատում» և այլն), հայ ժողովրդի պատմության, գրականության, լեզվի խնդիրներին նվիրված ուսումնասիրություններ:

Հեղինակ է նաև մանկական պատմվածքների, վիպակների, գրույցների ու հեքիաթների («Որոտանի կիրձում», «Քարանձավի բնակիչները» և այլն):

Գլուխգործոցն է «Մխիթար սպարապետ» վեպը:

Նրա երկերի հիման վրա նկարահանվել են «Լքված հեքիաթների կիրձը» (ըստ «Այրված տունը» պատմվածքի), «Հուստ աստղ» (ըստ «Մխիթար սպարապետ» վեպի) ֆիլմերը:

## ՏՈՐՔ ԱՆԳԵՂԻ ՀԵՏՔԵՐՈՎ (հատված «Հայրենապատում» գրքից)

Միսիանը քաղաք է դառնում: Միսիան անունն առաջինը հիշատակել է պատմիչ Կիրակոս Գանձակեցին (13-րդ դար): Զաքարիա Միսիանցին (17-րդ դ.), որ գրել է պատմական բնույթի բազմաթիվ աշխատություններ, 1683-ին Ֆրանսիայում տպագրված իր մի գրքում պատմում է, որ 1711-ին Տաթևի ամբողջ թեմը մորեխը կերավ՝ բացի Միսիանից: Պատճառն այն է, որ Միսիանը ծովից բարձր է 1600 մետր:

1607-ին գավառը կոչվում էր «Միսաքեան նահանգ», իսկ գյուղը՝ Միսիան (1617): Մովսես Խորենացին ասում է, թե Միսական (Միսիան) և Սյունիք անունները ծագել են Միսակ նահապետի անունից:

Միսիանը, սկսած 5-6-րդ հազարամյակներից, եղել է հայոց կյանքի կենտրոնավայրերից մեկը: Այստեղ է մեծաքար Երիվարաց բերդ-բնակավայրը: Ասում են՝ իբր այս քարե բերդը շինել է Շնհերում նստած Բոլի հսկան, որ Տորք Անգեղի ցեղից էր:


Որոտան գետի մեջ ցույց են տալիս մի քարե կղզի: Ասում են՝ Բոլին ժայռեր է պոկել լեռան կրծքից ու նետել գետը, վրան կալ շինել: Կաչաղակաբերդում էլ Հրուշան անունով հսկա է եղել: Նա իր ժայռեղեն բնի մեջ մի կարաս մածուն է թափել, իբր թե ինքը մարդ չէ, այլ արծիվ, որ ահա ծրտեց ու թռավ: Դրանով մոլորեցրել է մյուս հսկաներին ու քաշել դեպի իր ժայռեղեն խոռոչները, սպանել: Սրա նիզակը, ասում են, տասը զույգ եզ հագիվ է քաշել: Թերևս հայոց առասպելական Տորք Անգեղը՝ իբրև աստվածություն, պաշտվել է նաև Միսական աշխարհում:

1805-ին արևելյան ու կենտրոնական Սյունիքը, դրա հետ նաև Միսիան գյուղը, միացավ Ռուսաստանին: Միսիանի բնակչության մեծ մասը 1828-ին եկել է Պարսկաստանի Սալմաստ գավառից: Մինչ այդ գյուղում ութ տուն բնակիչ է եղել՝ Բոնակոթի Մելիք Սաֆրազյան տան մի ձյուղը: Հիմա էլ մնում են նրանց տները՝ եվրոպական ձաշակով շինված և զարդարված:

Թուրքական բանակի էմիսար Իթթիհադ Ջա-



*Միսականք  
(Սյունի վանք)*





*18-րդ դարի նշանավոր առակախոս Պըլը Պուղու երգիծական գրույթների մի փունջ՝ Սերո Խանչադյանի մշակմամբ*

բար բեյը 1918-ին գաղտնի ապրել է Սիսիանում: Սա գրգռել է Շաքի, Աղուտի, Վաղուտի և Ղզլջուղ գյուղերի թուրք բեկերին, որ ապրիլի քսանչորսի գիշերը անսպասելի հարձակվեցին Սիսիան գյուղի վրա՝ հայերին սրի քաշելու մտադրությամբ: Ընդամենը քսաներկու զինված հայեր դեմ են կանգնել յոթ հարյուրից ավելի հակառակորդին: Հայերից զոհվել են երեք հոգի, իսկ թուրքերը, յոթանասունվեց դիակ թողնելով գյուղի պատերի տակ, փախել են:

Սիսիանում է Սյունի վանքը, որ հինգ-վեցերորդ դարերի շինություն է: Մի քիչ հեռու Սյունյաց իշխան Սմբատի որդի Աշոտի պալատն է (1017 թ.):

Սյունի վանքը կարմրավուն ժայռերի տակ է՝ կառուցված սևավուն քարից: Եկեղեցին կանգուն է: Նրա հիմունքը եռաստիձան քառանկյունի է: Դրա վրա շատ ավելի հին շենքն է եղել՝ Ծղուկ գավառի իշխանական նստոցը: Ծղուկ անունը թերևս ծագում է «ծուղակ» բառից՝ խիստ անմատչելի, թշնամու համար ծուղակ: Ստեփանոս Օրբելյանը գրում է, որ եկեղեցին հիմնադրել է Սյունյաց տիկին Վարագդուխտը:

Վանքը շատ արձանագրություններ և բարձրաքանդակներ ունի: Մեզ հիացրին կառուցող վարպետների թողած նշանները: Քարերի վրա հաշվեցինք այդպիսի 33 նշան: Հայերեն Ա, Թ, Ն, Ս, Ռ և այլն: Կան նաև խաչ, ձանկախաչ, հնգաթև աստղ, խարիսխ և այլ նշաններ:

Ինձ հետաքրքրեց մի արձանագրություն, որում կա Ռոստոմ անունը: Այս Ռոստոմը ինձ հայտնի անձ է: Իշխանությունը պահելու համար նա հավատափոխ եղավ ու բարեկամացավ պարսիկ տիրապետողների հետ: Նստավայրը տեղափոխեց Աշտարակ և Ամբերդ, սկսեց զորք ստեղծել Հայաստանի գահը վերականգնելու ազնիվ նպատակով: Ապրել է տասնհինգերորդ դարի առաջին կեսում: Երևի մեղքը քավելու համար այս «կորուսյալ» իշխանն այստեղ շինարարություն է կատարել:

Զարմանալի բան. պատի վրա հունարեն տառերով արձանագրություն կա՝ «Ես Գրեգոր գրեցի»: «Ց»-ն հայերեն տառով է գրել: Կարծում եմ՝ սա էլ Եվրոպայից եկած մեղայական հայ է եղել:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Սերո Խանգաղյանը:
2. Համացանցում գտիր լրացուցիչ տեղեկություններ Սերո Խանգաղյանի ու նրա երկերի մասին:
3. Դասընկերներով հայթայթե՛ք ասույթներ՝ քաղված Սերո Խանգաղյանի երկերից:
4. Կարդա՛ Ս. Խանգաղյանի «Քարանձավի բնակիչները» և համեմատիր կարդացածդ այլ վիպակների հետ:
5. Կարդա՛ նաև Սերո Խանգաղյանի «Մխիթար սպարապետ» պատմավեպն ամբողջությամբ:

### ՍԱՍՆԱ ԾԻԵՐ

#### ՄՍՐԱ ՀԱՐԿԱՀԱՆՆԵՐԸ ՀԱՅԱՍՏԱՆՈՒՄ

Համբավը հասավ Մսրա Մելիքին, թե Դավիթը բարձրացել է Ծովասար, քանդել է Մհերի շինած պարիսպները, շինել է քո քանդած Մարութա բարձր Աստվածածինը, ասել է. «Ես Մսրա Մելիքին հարկատու չեմ, Մսրը՝ Մսրա Մելիքին, Սասունը՝ Սասնա Դավթին»:

Մսրա թագավորը այս որ լսեց, կատաղեց, մորը նախատեց, ասաց.

— Ա՛խ, մարե՛, ես այն շան որբին պետք է սպանեի, դու չթողեցիր: Տեսա՞ր՝ ինչ արեց:

— Բան չկա, հարազա՛տս, դուք եղբայր եք: Թող Մսրա երկիրը քեզ մնա, Սասնա երկիրը՝ Դավթին: Նրա դեմ դու կովի մի՛ գնա, դուք եղբայր եք:

Մսրա Մելիքը կանչեց իր երկրի խելոք մարդկանց, խորհուրդ հարցրեց. ի՞նչ կերպով Սասունն առնի ոտքի տակ, Սասնա Դավթին վերացնի: Ժողովում Կողբադին անունով մի կտրիճ ճառ ասաց.

— Թագավո՛րն ապրած կենա, քո քաջությանը, քո փառքին ու գահին վայել չի լինի, որ ինքդ գնաս անհավատի վրա կռիվ: Տո՛ւր ինձ հազար զինվոր՝ գնամ Սասուն ու բերեմ յոթ տարվա հարկը, Դավթին էլ սպանեմ, գլուխը բերեմ, դնեմ քո առաջ:

— Դա քիչ է, — ասաց Մելիքը. — կքանդես Մարութա բարձր Աստվածածինը, կշինես Ծովասարի պարիսպը: Քեզ իրավունք եմ տալիս, ա՛ռ, ինչքան պետք է, զորք ու զորական, գնա՛ Սասուն:





Կողբադիրնը զորք հավաքեց, մունետիկ ճամփեց այս ու այն կողմ, որ գովեն իր արշավանքը դեպի Սասուն: Մսրա կանայք, որն իր ամուսնուն, որն իր մինուճար որդուն տնից դուրս էր վունդում:

— Ի՞նչ ես տանը պարապ-սարապ նստել, վե՛ր կաց, կռի՛վ գնա Սասուն, թալա՛ն բեր մեզ համար:

Կողբադիրնն ու իր զորապետերը՝ Չարխադիրնը, Բադիրնը, Սուդիրնը, իրենց հազար կտրիճներով Սասնա սահմանի մոտ վրաններ խփեցին: Կողբադիրնը քառասուն զորեղ կտրիճի, իր զորապետերի հետ քառասուն զորեղ ուղտով եկավ Ձենով Օհանի մոտ:

— Մսրա Մելիքը ինձ ուղարկել է, որ տանեմ յոթ տարվա հարկը, մեկ էլ ծուռ Դավթի գլուխը:

Ձենով Օհանի ծնկներն ահից թուլացան, բերեց եզ ու ոչխար մորթեց, նրանց կերուխում տվեց, ասաց:

— Դուք այստեղ հանգստացե՛ք, ես գնամ հարկը հավաքեմ ու տեսնեմ՝ որտեղ է Դավիթը:

Ձենով Օհանը վախենում էր, որ Դավիթն իմանա Կողբադնի գալը, մեջ ընկնի, կռիվ անի, փորձանքի մեջ ընկնի: Գնաց այն կողմ տերտերի տուն, Դավիթն այնտեղ սաղմոս էր կարգում, դուրս կանչեց:

— Այսօր սիրտս վայրի ոչխար է ուզում: Գնա սա՛ր, մի հատ սպանի՛ր, բե՛ր՝ մորթենք, ուտենք:

Դավիթն անտեղյակ էր Սասնա գլխին եկած աղետին. նետ-աղեղն առավ, գնաց որսի:

Ձենով Օհանն ու Յռան Վերգոն ընկան քաղաքի մեջ, հավաքեցին քառասունական կույս աղջիկ, կարճ կին, երկար կին, բերին լցրին մի մեծ մարագ, դուռը կողպեցին: Ապա հավաքեցին քառասունական ձի, երինջ, եզ ու կով, լցրին ուրիշ երկու մարագ, դուռը կողպեցին: Ապա մտան Սասնա մեծ մառանը, որ չափեին քառասուն ուղտաբեռ ոսկի:

Կողբադիրնը, Չարխադիրնը, Բադիրնն ու Սուդիրնը ծալպատիկ նստած էին գորգի վրա, Ձենով Օհանը պարկն էր բռնել, Յռան Վերգոն կտտով չափում էր Սասնա ոսկին, լցնում էր Մսրա պարկերը:

Այն ժամանակ Մսրա զորքն էլ Լերա դաշտից եկել, խուժել էր քաղաք, տներն էր թալանում, կին ու աղջիկ առևանգում:

## ՀԱՐՅԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ էր զայրացել Մսրա Մելիքը:
2. Նկարագրի՛ր արշավանքի պատրաստվող Կողբադնին:



Ծնվել է 1916-ի դեկտեմբերի 15-ին Երևանում: 1940-ին ավարտել է Երևանի պետական համալսարանի պատմության բաժանմունքը: 1940-1943 թթ. մասնակցել է 2-րդ աշխարհամարտին: 1943-1956 թթ. եղել է Մատենադարանի ձեռագրատան վարիչը: Հետագայում աշխատել է «Սովետական գրականություն» ամսագրում որպես խմբագրի տեղակալ:

Գրել է պատմվածքներ ու նորավեպեր («Չատուխանի պարտությունը», «Կխտարի ձագը», «Աստվածամայրը», «Սրինգի վարպետը», «Ցայգածաղիկ», «Գլուխգործոցը», «Շիկացած ավազի վրա» և այլն), վիպակներ, վեպեր («Մեզ մոտ՝ հարավում», «Գիրք մաքառման», «Գիրք լինելության» և այլն), արվեստագիտական ակնարկներ («Գույներ և երանգներ» ժողովածուն և այլն), գիտահանրամատչելի երկեր («Գիրք գրոց» և այլն), մշակել է ժողովրդական գրույցներ ու լեգենդներ («Գիրք պանդխտության» ժողովածուն):

### ԳԼՈՒԽԳՈՐԾՈՅԸ

(հատված)

Ես Մոմիկն եմ: Երիցակ ծաղկողը իմ իսկական պապը չէ: Ես նրան իմ պապն եմ համարում, որովհետև տասնհինգ տարեկան եմ և աշխարհում ոչ ոք չունեմ նրանից բացի: Մի՞ հավատացեք նրա գրած խոսքին, թե իբր անարժան է հիշատակվելու, և գունաթափ են իր նկարները: Նա մեծ, շատ մեծ մարդ է և աշխարհում Հայոց՝ շատ նշանավոր: Ո՛ւմ ասես նա չի





*Վիգեն Խնչումյանի հուշատախտակը Երևանում*

հիացրել: Հատկապես Անի քաղաքում, որտեղ նա մի ժամանակ շուրջպարված էր փառք ու համբավով...

Թե ինչու հիմա մենք չենք ապրում այդ քաղաքում, ես ամբողջ իսկությունը չգիտեմ: Այնտեղ մի վատ դեպք է պատահել և պատճառ դարձել, որ Երիցակ պապը քաշվի հեռավոր այս գյուղակը:

Որ նշանավոր է իմ Երիցակ պապը, կհասկանաք իսկույն, եթե կես աչքով էլ տեսնեք, թե նա ինչպես է ձեռք գարկում ծաղկելու, երբ գրքի երեսները վեր ու վար ծածկում է գրով: Գլուխներից առաջ և լուսանցքում նա միևնույն եղեգնյա գրչով հազար ու մի հնարամիտ գարդ է հյուսում, հազար պատկեր քաշում, ծաղկավորում գլխատառերը:

Երկինք, ծով, գետ ու աղբյուր և ստվեր նկարելիս նա գործածում է թանկագին քարի փոշուց եփած այն մուգ կապույտ ներկը, որ կոչվում է լաշվարդ: Գայլի, հովազի աչք ու երախ, թռչունի ոտք ու կտուց և էլի շատ բան նկարելիս Երիցակ պապը քսում է հայոց որդան կարմիր կրակերանգ գույնը...

Մենք շատ ներկեր ու թանաքներ ենք եփում, նույնիսկ ջրից ու հրից չխամրող սաթե սև, արեգակնային նարինջ, զմրուխտե կանաչ... Եվ նույնիսկ ոսկի, որ չի կորցնում փայլը, և անգետները կարծում են, թե իսկական ոսկի է, ու փորձում են քերել մագաղաթից:

Սկզբում պապը չգիտեր, թե ես կարող եմ ծաղկել, ինչպես ինքը: Սկզբում ես հենց այնպես փորձեցի:

Ամռան մի օր էր, արև ու շոգ օր: Նստել էի մեր կիսավեր տնակի ստվերում, և հանկարծ մտքումս թուղթ տեսա և վրան՝ տարօրինակ մի թռչունի պատկեր: Նա սուր մագիլներ ուներ, ինչպես ցին, կեռապոչ էր, վիզը՝ երկար: Գլուխն էլ թռչունի չէր, ականջ ուներ, երկարուկ դնչիկ...

Ես տուն ընկա, ինչպես երդիկից՝ քամին, դուրս ելա թղթի մի անպետք կտորով, ներկով, հին մի գրչով և կպա գործի: Նկարեցի: Պապն այդպիսի պատկեր չէր արել երբեք: Ու ոչ ոք չէր արել...

Ու մեկ էլ գլխավերևս կանգնած տեսա նրան: Պապը թուղթս ձեռքն առավ, նայեց, ինչպես սովոր էր՝ խոժոռվելով: Բայց խոսք չասաց, միայն վերցրեց գրիչը և մի քանի տեղ մգացրեց կարմիր ներկը:

Մենք սնվում ենք միայն կորեկ հացով, խոտով ու ջրով: Տարին բոլոր հաց ու խոտ չկա: Միակ եղածը ձորապտունկի աղբյուրի ջուրն է, որ շառաչում, թափվում է քարերից ու խառնվում գետի ջրերին:

Իսկ թե պատահում է՝ հարևան շինականներից մեկնումեկը վարատեղ հաց տանելիս սառը սպաս կամ ոսպով կամ եղինջով ապուր է բերում մեզ համար, տոն է դառնում օրը: Երիցակ պապը վեր է առնում ձեռագրի թերթերից մեկը և ապա լուսանցքում մանր տատերով շարոց է անում մի քանի բառ. «Հիշեցե՛ք նաև հարս Վանինին, որ մի աման ապուր բերեց, և մենք Մոմիկի հետ կերանք ախորժակով»...

Նստել ենք մի անգամ աղբյուրատակին՝ եղեգնուտից քիչ հեռու, նայում ենք երկնքում ձախրող արծվին: Լողում է օդում՝ եղեգների գլխին: Ու մեկ էլ քարի նման ցած է ընկնում, կեռ կտուցով խփում եղեգնուտի եզրը ելած վայրի բաղին: Բաղը ձչում է և փռելով կարմիր ոտքերը՝ կպչում է գետնին:

Երեկոյան ես մագաղաթի մի անպետք կտորի վրա նկարեցի տեսածս: Ականջումս խեղձ բաղի աղեկտուր ձիչն էր: Երիցակ պապը թողեց գործը, նայեց, ժպտաց: Հավանել էր երևի...

— Ձչում է անհրավը, — ասաց: — Ականջ դիր, տեն՝ ոնց է ձայնը գլուխը գցել:

Եվ նորից ուզում էր գործը շարունակել, բայց ինչքան փորձեց, չստացվեց ոչինչ: Դժգոհ արածից՝ նա փակեց աչքերն ու մնաց:

— Հիվանդ ես, պապի, — վախեցա ես:

— Գործիդ մնա, — աչքը չբացելով՝ ասաց նա:

Եվ քանի որ այդպես ասաց, քանի որ միտքս դեռ իմ պատկերների հետ էր, քաշեցի միայն մի կարմիր, երկարավիզ աքաղաղի պատկեր: Այնքան կարմիր, ինչպես մառախուղի մեջ քարացած արեգակը:

— Որտե՞ղ ես այդ հավքը տեսել, — բարկացավ պապը:

— Տեսել եմ, երբ փակել եմ աչքերս, ինչպես դու ես անում նկարելուց առաջ: Մտքով եմ նկարել տեսքն էլ, գույնն էլ և կեցվածքն ամբողջովին...

— Փակ աչքով, — հարցրեց նա և թվաց՝ չի բարկանում: Բայց զայրույթ կար խոսքի մեջ: — Ես վաղուց է, որ մտքով ոչինչ չեմ նկարում: Ի՞նչ ես դու տեսնում առավել, քան ծաղկող Երիցակը...

*Տաղանդը նման է սիրո, բոլոր սերերը մի ընդհանրություն ունեն, բայց յուրաքանչյուրը նման չէ մյուսին, յուրովի միակն է և անկրկնելի:*

*Այդպես է նաև Վիգեն ինչոմյանի տաղանդը: Այն, ինչ նա է տեսնում, լսում, ընկալում, ոչ ոք չի լսում և չի ընկալում, այն, ինչ նա է անում, ոչ ոք չի կարող անել:*

**Պարույր Սևակ**

Դատն ու դժվարին էր ժամանակը, սով էր համատարած, առ ու ավար էր աշխարհում Հայոց...

Եթե հանդիպեք այս գրքին քսան, երեսուն սերունդ հետո, հիշեցե՛ք ինձ՝ Երիցակ անարժան գրչիս և ծաղկողիս, ինչպես նաև Մովսիկ անունով պատանուն, որ որք էր մանկությունից և մխիթարեց ինձ անօգնական ծերությանս օրերին իր հանձարով...

Եվ անմեղադիր եղեք, որ տառս և գիծս ծուռ եկան, ու արվեստս դարձավ գունաթափ...

**Վիզեն Խեչումյան**

Պապը կուզեր երևի չբարկանալ, բայց այդպես ստացվեց՝ բարկացավ: Ու երբ այդպես ստացվեց, նա ելավ ու գնաց տնից: Վերադարձավ, երբ մթնել էր:

Ինչպես եղավ, ամառնամուտին մի օտար ձանապարհորդ ներկ ու թանաք առավ Երիցակ պապից և փոխարենը մագաղաթե չժողկված աղոթագիրք սովեց: Մյուս առավուտից մենք քանդեցինք աղոթագիրքը և թերթերը կրի շաղախի մեջ մի գիշեր պահելուց հետո սուր դանակով քերեցինք գրի սևն ու գլխատառի կարմիրը: Հետո պապը հայտարարեց.

— Գրում ենք, Մովսիկ... Սրանց վրա գրելու ենք, երգ կա, հայրեն են կոչում... Լսածս ենք գրելու: Երեկոյան հավաքվում են արհեստի մարդիկ, խնջույքժողով են անում, հայրեն են լսում, կաքավող պարուհիների նայում...

Երիցակ պապը ամեն օր գրում ու կարդում էր բարձրաձայն, գրում ու ոգևորվում: Մի երկու տող թեթև զարդագիծ քաշեց, մի երկու տեղ ներկի աստառը ծածկեց, ասաց, թե կամաց-կամաց կծաղկի...

Գիշերն իջնում էր թե չէ, պապը պատկում էր քնելու: Ես զգույշ բարձրանում էի տեղից, ստվերում ձրագի լույսը և աշխարհից գաղտնի՝ ուղղում, փոխում պատկերի գիծը, ծածկում ներկով, նկարում նորերը: Այսպես՝ ամեն շաբաթ, ամեն ամիս:

Իմ խեղճ Երիցակ պապին թվում էր, թե հրաշքով հետ էր եկել իր կորած շահելությունը:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Վիզեն Խեչումյանը:
2. Համացանցում գտիր լրացուցիչ տեղեկություններ Վիզեն Խեչումյանի ու նրա երկերի մասին:
3. Դասընկերներով հայթայթե՛ք ասույթներ՝ քաղված Վիզեն Խեչումյանի երկերից:
4. Կարդա՛ն Վիզեն Խեչումյանի «Շիկացած ավագի վրա» պատմվածքը և համեմատիր այլ պատմվածքների հետ:
5. Կարդա՛ն նաև Վիզեն Խեչումյանի «Սրինգի վարպետը» պատմվածքը:

ԴԱՎԻԹԸ ՎՌԵ ԴՈՒՄ Է ՄՍՐԱ ՀԱՐԿԱՀԱՆՆԵՐԻՆ

Դավիթը սարերում ընկած էր որսի հետևից: Կեսորվա մոտ նետահարեց մի վայրի ոչխար, անցկացրեց նիզակի ծայրին, առավ ուսին, ճանապարհ ընկավ դեպի քաղաք: Ճանապարհին մտավ Սասնա պառավի բանջարանոցը: Դավիթը շողգամ շատ էր սիրում: Դրա համար նրան կանչում էին «Սասնա ծուռ շողգամակեր»: Մտավ բանջարանոց, որսը վար դրեց, նիզակի ծայրով շողգամ էր հանում, ուտում:

Սասնա պառավը, Դավիթին որոնելով, եկավ իր բանջարանոցը, տեսավ Դավիթին, լաց եղավ:

— Դու այստեղ քեզ համար շողգամ ես ուտում, այնտեղ Սասունը ձեռքից գնաց: Մսրա Մելիքը զորք է ուղարկել, որ յոթ տարվա հարկը տանեն: Ահա հորեղբայրներդ, քաղաքի մեջ ընկած, կին ու աղջիկ չեն թողել, հավաքել են, լցրել մարագը, որ ուղարկեն Մսրը: Մեկ մինուճար աղջիկ ունեի, այն էլ ինձնից խլեցին, տարան գերի: Կողբադինն իր զորապետերով մտել է քո հոր մեծ մառանը. քո հորեղբայրներ Յուան Վերգոն ու Ջենով Օհանը կոտով չափում են Սասնա ոսկին, լցնում են Մսրա պարկերը:

Դավիթը պառավի հետ մտավ քաղաք: Ամեն օր, երբ որսից գալիս անցնում էր քաղաքով, լսում էր մարդկանց խոսքն ու ծիծաղը, նվազն ու երգը, տեսնում էր նրանց պարն ու ուրախությունը: Այսօր քաղաքին ոնց որ հող մաղեն. լաց ու կոծ, վայ ու վայնասուն, ծեծ ու թալան: Դավիթին էլ սասունցիներն անիծում են:


— Այս ի՞նչ է: Սրանք ինչո՞ւ են ինձ անիծում:

— Դու որ Ծովասարի պարիսպը քանդեցիր, Մարութա բարձր Աստվածածինը շինեցիր, Մսրա Մելիքը բարկացավ, զորք ուղարկեց Սասուն: Քո հորեղբայրները հիմա հարկը հավաքել, մարագն են լցրել:

— Նանե՛, դու ցո՛ւյց տուր ինձ մարագները, ես չեմ թողնի, որ տանեն Սասնա երկրից մի մագ:

Սասնա պառավը Դավիթին տարավ մարագների մոտ: Պահակ էին կանգնած Մսրա տասը զինվոր: Դավիթը դրանց սպանեց, մարագի դուռը կոտրեց, կին ու աղջիկ ազատ արձակեց: Մյուս մարագները բացեց, Սասնա տավարը գերուժյունից ազատեց:

Հետո գնաց իր հոր մեծ մառանը, որ ի՞նչ տեսներ. Կողբադինը, Չարխադինը, Բադինն ու Սուդինը





ծալպատիկ բազմած են գորգի վրա, Ձենով Օհանը պարկն է բռնել, Յուան Վերգոն կոտով չափում է Սասնա ոսկին, լցնում է Մսրա պարկերը:

— Ի՞նչ եք անում, — գոռաց Դավիթը:

— Քո մեղքերն ենք սրբում, — ասաց Օհանը:

Դավիթը մոտեցավ, Յուան Վերգոյի ձեռքը բռնեց.

— Հորեղբա՛յր Վերգո, դու շատ ես ծեր, դու վե՛ր կաց: Մեր Սասնա ոսկին ես պիտի չափեմ:

— Գործին մի՛ խառնվիր, — ասաց Ձենով Օհանը:

Դավիթը Յուան Վերգոյի ձեռքից կոտը խլեց, շրջեց բերանքսիվայր, ոսկին թիակով լցրեց կոտի հետևի վրա, փայտով կոտի հետևը մաքուր սրբեց ու դատարկված կոտը շրջեց Մսրա պարկի մեջ.

— Սա՛ մեկ... սա՛ երկու...

— Ձենո՛վ Օհան, — գոռաց Կոզբաղինը, — դու այս ծուռ լակոտին բերել ես, որ մեզ ծաղրի՞: Հեռացրո՛ւ դրան, թե չէ վեր կկենամ, գլուխը կթոցնեմ:

Դավիթն աչքը ոլորեց Կոզբաղնի վրա, ասաց.

— Հայ-հայ, հենց այդպե՞ս, գլուխս կթոցնե՞ս:

— Ձենո՛վ Օհան, — վախեցած ասաց Կոզբաղինը, — Մսրա հարկը տալիս ես՝ տո՛ւր, թե չէ կգնամ կասեմ Մսրա Մելիքին, կգա ձեր Սասունը կավերի, Սասնա հողը պարկերով կբարձի ձեր ձիերին, Սասնա քարերը կբարձի ձեր հղի կանանց, կտանի:

Դավիթը զայրացավ, կոտն առավ, նետեց Կոզբաղնի վրա, Կոզբաղինը գլուխը կռացրեց, կոտը պատին դիպավ, պատը ճեղքեց, գնաց յոթ օրվա ճամփա:

Կոզբաղինը լեղապատառ վեր կացավ, որ փախչի, Դավիթը հասավ հետևից, օձիքը բռնեց, գլուխը յոթ անգամ պատին խփեց, ասաց.

— Գնա՛ Մսրը, Մելիքին բարև՛ տար, ասա՛ մեկ էլ զորք չուղարկի Սասուն: Սասնա հարկը մոռացե՛ք: Դավիթը՝ Առյուծ Մհերի որդին, հրեղեն Սանասարի թոռը, ասում է. «Մսրը՝ Մսրա Մելիքին, Սասունը՝ Սասնա ժողովրդին: Թող ինքն ապրի իր համար, մենք էլ ապրենք մեզ համար»: Գնա՛:

Հարկահանները Սասնա ոսկու մառանից լեղապատառ փախան, շունչ առան իրենց վրանների տակ:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ էր Սասունում լաց ու կոծ:
2. Նկարագրի՛ր զայրացած Դավիթին այնպես, ինչպես պատկերացնում ես:



Ի սկսկան անունը՝ Օնիկ Կարապետյան: Ծնվել է 1914-ի ապրիլի 27-ին Ալեքսանդրապոլ քաղաքում (այժմ՝ Գյումրի): 1920-ի թուրքական արշավանքի ժամանակ սպանվել է հայրը իր իսկ խրճիթի շեմին: Ընտանիքը ցրիվ է եկել: Թափառական Օնիկը որոշ ժամանակ անց հայտնվել է որբանոցում, հետո փախել այդտեղից: Ի վերջո գտել է մորը, որի հորդորով դարձել է կոշկակարի աշակերտ, ապա զբաղվել այլ արհեստներով: Միաժամանակ սկսել է գրել բանաստեղծություններ: Յոթնամյա դպրոցն ավարտել է Գյումրիում: Բարձրագույն կրթություն ստացել է Երևանի պետական համալսարանում և Մոսկվայի Մաքսիմ Գորկու անվան գրականության ինստիտուտում: Վախձանվել է 1984-ի մարտի 14-ին Երևանում: Թաղված է Երևանի Կոմիտասի անվան պանթեոնում: 2004-ին, համաձայն Հիրազի կտակի (նշված նրա բանաստեղծություններից մեկում), մի քանի հայրենասերների շնորհիվ նրա սիրտը թաղվել է Արարատ լեռան բարձունքներում՝ սառույցի մեջ:

Գրել է բանաստեղծություններ (ամփոփված են «Գարնանամուտ», «Արևի երկիր», Երգ Հայաստանի», «Բանաստեղծի ձայնը», «Երգերի գիրք», «Քնար Հայաստանի», «Հուշարձան մայրիկիս», «Համամարդկային» և այլ ժողովածուներում), պոեմներ («Բնության գլուխգործոցը», «Բիրլիական», «Հայոց Դանթեսականը», «Անի», «Խաղաղություն ամենեցուն», «Հայոց հրաշքը. Մեսրոպ Մաշտոց» և այլն), հուշեր («Մի փետուր իմ արծիվ կյանքից»), առակներ («Մարգարիտն ու փրփուրը», «Լեռան առակը», «Հավերժական վեճը», «Սոխակի պատասխանը», «Արծիվն ու մժեղը» և այլն), ակնարկներ:



*Ամեն օր՝ նույն ժամին, հայտնվում էր Արովյան, Ամիրյան, Տերյան փողոցների խաչմերուկներում՝ գլխին հավաքելով իր տաղանդի երկրպագուներին: Սրանք ասես թե հաղորդակցվում էին Նոյի վաղնջական ժամանակներից, Ավարայրի ռազմաղաշտերից, Անիի բերդապարիսպներից, հայոց պատմության քառուղիներից մեր օրերը հասած հրաշագործ առասպելական հերոսի հետ:*

**Սուրեն Աղաբաբյան**



*Հովհաննես Շիրազի  
դիմանկարը  
նկարիչ՝ Ալեքսանդր  
Գրիգորյան*

*Շիրազը սփյուռքի մեջ ամենաժողովրդական և սիրված բանաստեղծն է, հուզիչ կապ է մեր և մայր հայրենիքի ժողովրդի միջև, նրա ձայնը սփյուռքի մեջ սրտեր է գրավում... Տարբեր լարեր կան նրա քնարի վրա՝ թե՛ գուսանական, թե՛ քնարական, թե՛ իմաստասիրական, և նկարագրով էլ, որպես մարդ, նա հրաբխային բանաստեղծ է:*

*Լևոն-Ջավեն Սյուրմեյյան*

## ՀԱՅ ԺՈՂՈՎՐԴԻ ԵՐԳԸ (Վերելք)

Աչքերիս մեջ՝ գարնան օրեր,  
Ճամփես՝ բախտիս սարերն ի վեր,  
Ելնում եմ ես քարերն ի վեր,  
Ելնում եմ ես սարերն ի վեր,  
Քարեր, սարեր, դարերն ի վեր:

Բախտս աստղերն են վեր պահել,  
Ջահել եմ ես, ու ձիս՝ շահել,  
Չեմ նկատում քարեր ձամփիս,  
Չեմ նկատում սարեր ձամփիս,  
Քարեր, սարեր, դարեր ձամփիս:

Հանթն է բեկվում ձակտիս վրա,  
Մահ, չգիտեմ՝ կա՞, թե՛ չկա,  
Ելնում եմ ես ահերն ի վեր,  
Ելնում եմ ես մահերն ի վեր,  
Ահեր, մահեր, գահերն ի վեր:

Աչքերիս մեջ՝ գարնան օրեր,  
Ճամփես՝ դեպի աստղերն անմեռ.  
Ինձ ելնելու քարեր կան դեռ,  
Ինձ ելնելու սարեր կան դեռ,  
Քարեր, սարեր, դարեր կան դեռ...

## ԻՄ ՍՈՒՐԲ ՀԱՅՐԵՆԻՔ

Իմ սուրբ հայրենիք, դու սրտիս մեջ ես,  
Դու սրտիս մեջ ես, ո՛չ լեզվիս վրա,  
Իմ սրտի միջից թե սիրտս ձեռքես,  
Դրոշիդ բոցը պիտի հուրհրա:

Չեմ ուզում գոռալ իմ սիրո մասին,  
Սակայն իմացիր, հայրենիք իմ մեծ,  
Քեզ հարյուր տեղով խոցեց թշնամին,  
Բայց հազար տեղով իմ սիրտը խոցվեց:

Ես ամբողջովին քոնն եմ, հայրենիք,  
 Եվ մոմի նման ձամփեքիդ վրա  
 Քո փառքի համար թե մի օր վառվեմ,  
 Մոխրարիծ անգամ ինձնից չի մնա:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Հիրազը:
2. Համացանցում գտիր լրացուցիչ տեղեկություններ Հովհաննես Հիրազի ու նրա երկերի մասին:
3. Հայթայթիր ասույթներ Հովհաննես Հիրազի երկերից:
4. Կարդա՛ Հովհաննես Հիրազի «Բիրլիական» պոեմը և համեմատիր քո կարդացած այլ պոեմների հետ:
5. Կարդա՛ նաև Հ. Հիրազի «Հայոց Դանթեականը» պոեմը:

## ՍԱՍՆԱԿ ԾԻԲԻ

ԴԱՎԻԹԸ ՊԱՏԺՈՒՄ Է ԿՈՉԲԱԴՆԻՆ

Կոզբազդինը գորապետերին խորհրդի կանչեց.

— Մենք մեր թագավորին խաբեցինք: Հիմա ի՞նչ երեսով կանգնենք նրա առաջ: Գնանք, քանդենք Մարութա բարձր Աստվածածին վանքը, թալանը տանենք Մսրը, ասենք՝ սա է Սասնա հարկը:

— Բա որ Մսրա Մելիքը Դավթի գլուխը ուզի, ի՞նչ ասենք, — հարցրեց Սուզինը:

— Կասենք՝ Դավթը փախավ սարերը:

Կոզբազդինն իր գորքով բարձրացավ Մովսսար, պաշարեց Մարութա բարձր Աստվածածինը, բայց դուռը բացել չկարողացան: Չարխազինն ասաց.

— Բերեք զարկենք մի նապաստակ, Դավթի շորերի նման մի շոր արյունոտենք, նետենք պարսպից ներս, ասենք. «Կարիճնե՛ր, ձեր տիրոջը սպանեցինք»:  
 Դավթի շորերը որ տեսնեն, դուռը բաց կանեն:

Չարբահար Քամին ու Բաթմանա Բուղան ուժից հարուստ էին, խելքից՝ աղքատ: Նապաստակի արյունով ներկված հագուստը որ տեսան, մոխիր ցանեցին իրենց գլխին, լաց եղան, բայց վանքի դռները փակ պահեցին Մսրա զորքի դեմ:

Այն ժամանակ Կոզբազդինը բարձրացավ պարսպի վրա, վանքի միաբաններին ձայն տվեց, ասաց.

— Թե որ ձեր ձեռքով բացեք պարսպի դուռը, ձեր մեկ մազին էլ չենք դիպչի:



Հովհաննես Հիրազի դիմաքանդակը նրա շիրիմի վրա քանդակագործ՝ Արա Հիրազ





Բայց միաբաններն իրար ասին. « Դուռը չենք բացի, թող Կողբադինը գոռալով տրաքի »:

Այնտեղ կար Յուան Վերգոյի ցեղից մի վախկոտ վարդապետ: Գիշերը, երբ պահակ կտորիճները քնած էին, թաքուն մոտեցավ, պարսպի դուռը բաց արեց: Մտրա գորքը հեղեղի պես խուժեց ներս: Պահակները քնից արթնացան, տեսան՝ բանը բանից անցել է, գլուխներին խփելով փախան սարերը:

Մտրա զինվորները կոտորեցին բոլորին, վանքը թալանեցին, հավաքեցին շատ ոսկի, արծաթ, գոհարեղեն, գնացին: Սարկավագից մեկը թաքնված էր դիակների տակ: Նա առավ արյունաթաթախ մի փարաջա, բռնեց տարավ Սասուն:

Դավիթը իր հասակի տղա-աղջիկներին հետ խնջույք էր անում: Նա շատ գինով էր, երբ Մարութա վանքի սարկավագը լեղաճաք ներս մտավ.

— Դավիթ, Մարութա վանքը թալանեցին...

Սարկավագը արյունոտ փարաջան գցեց նրա առջև: Դավիթը գինովությունից սթափվեց: Վազեվագ հասավ Սասնա պառավի մոտ.

— Նանե՛, ինչպե՞ս Կողբադնի առաջը կտրեմ:

— Գնա կանգնի՛ր Բաթմանա կամուրջի մոտ: Նա ուր էլ գնա, պիտի գա այդ կամրջով անցնի:

Դավիթը արմատահան քաշեց մի բարդի ծառ: Հասավ Բաթմանա կամուրջ, ձիերի դոփյուն լսեց:

Կողբադինը ծիծաղում էր ու գոռգոռալով խոսում.

— Դավիթն ահից սարերն է փախել: Հիմա դեմս ելնի, վիզը պոկեմ, տանեմ Մելիքին:

— Հայ-հայ, Կողբադի՛ն, դե, վիզս պոկի՛ր:

Ասաց Դավիթը, ծառը աջ ու ձախ տարավ, Մտրա գորքը կոտորեց: Կողբադինը ուզում էր փախչել: Դավիթը բռնեց, գետին գցեց, բռունցքով խփեց, վիզը ծռեց, ատամները հանեց, ճակատին շարեց, ասաց.

— Դե հիմա գնա՛ Մտրը, պատմի՛ր, թե ինչ է Սասունը: Ասա՛ Մելիքը թող գա, կովենք:

Դավիթը Կողբադնին վերցրեց ու դրեց նրա ձիու վրա, ոտքերը կապեց փորի տակ, խփեց գավակին.

— Տա՛ր քո տիրոջը մինչև Մտրը:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Կողբադինը քանդեց Մարութա վանքը:
2. Նկարագրի՛ր Սասունից փախչող Կողբադնին:

### ՀԱՅ ՃԱՐՏԱՐԱՊԵՏՈՒԹՅՈՒՆԸ

Զգիտեմ՝ ինչու մանուկ ժամանակ  
Համբուրում էի խաչքարերը ես,  
Երբ մայրիկիս հետ միշտ ոտաբորիկ  
Վանքի սարն էի ելնում գառի պես...

Հիմա էլ սրտանց համբուրում եմ ես,  
Բայց հիմա գիտեմ, թե ինչի՛ համար  
Ես համբուրում եմ, ո՛վ նախահայրեր.  
Քարից լույս կերտող ձեր ձեռքը ձարտար,

Որ վայրի ու բիրտ ժայռերի վրա  
Ոգու տարերքն է հրաշագործել.  
Եվ համբուրելով սուրբ հետքը նրա՝  
Անմահությունն եմ համբուրում ես ձեր...

### ԷՔՍՊՐՈՄՏ<sup>1</sup>

Մենք խաղաղ էինք մեր լեռների պես,  
Դուք հողմերի պես խուժեցիք վայրագ<sup>2</sup>:

Մենք ձեր դեմ ելանք մեր լեռների պես,  
Դուք հողմերի պես ոռնացիք վայրագ:

Բայց մենք հավերժ ենք մեր լեռների պես,  
Դուք հողմերի պես կկորչեք վայրագ:



*Հովհաննես Շիրազը հայ ժողովրդի վշտի դարավոր մատախտոլից ծագած աստղն է:*

**Ավետիք Իսահակյան**

<sup>1</sup> հանպատրաստից, հանկարծակի և մի շնչով գրված երկ

<sup>2</sup> դաժան, կատաղի, բիրտ



*Հովհաննես Շիրազի հուշարձանը Երևանում, 2005 թ. քանդակագործ՝ Արա Շիրազ*

Նրա մեջ բոցկտում էր մաշտոցյան լեզվի կրակը, նրա երակներում հոսում էր Նարեկացու և Քուչակի արյունը, իսկ սրտի միջով անցնում էր խաչատուր Աբովյանի վերքը: Նա տիրապետում էր Սասունցի Դավթի ուժին, սակայն նրա բանաստեղծության մեջ ծաղկում էր մոր ծաղիկը, որի անունը քնքշություն է: Նրա քնարը պատվով կրում էր Կովհտասի կարոտը և Մարտիրոս Մարյանի գույների ներդաշնակությունը:

*Սուրեն Աղաբաբյան*

\* \* \*

Դուք ո՞ր երկրից եկաք, հովեր՝ Այսքան քնքուշ ու մեղմ այսքան, Ո՞ր լեռներից եկաք, հովեր, Համբույրի պես քրոջական. Այնքան մեղմ եք, հեռվի հովեր, Կարծես շունչն եք քնած մանկան:

Մեր լեռներից, հեռվի հովեր, Համբույր տարեք ձեր լեռներին, Վարդերի բոնյր տարեք, հովեր, Մեր դաշտերից ձեր դաշտերին:

Բայց թե մի օր, հեռվի հովեր, Հողմեր բերեք մեր լեռներին, Մեր ամպերը մեր սարերից Հանթ կբերեն ձեր լեռներին, Հանթ կբերեն մեր լեռներից, Մահ կսփռեն ձեր դաշտերին, Ձեր դաշտերին, ձեր լեռներին, Ձեր աշխարհին, ձեր արևին...

Մեր լեռներից, հեռվի հովեր, Համբույր տարեք ձեր լեռներին, Համբույր տարեք, Գարուն տարեք, Արև տարեք աշխարհներին:

## ՀԱՐՅԵՐ ԵՎ ԱՌԱՋԱԴՐԱՆՔՆԵՐ

1. Համացանցում գտիր զավեշտալի տեղեկություններ Հ. Շիրազի կյանքից և պատմիր դասընկերներիդ:
2. Դասընկերներով հայթայթեք ասույթներ Հովհաննես Շիրազի մասին:
3. Կարդա՛ Հովհաննես Շիրազի «Անի» պոեմը և համեմատիր քո կարդացած այլ պոեմների հետ:
4. Կարդա՛ նաև Հովհաննես Շիրազի «Առակս գինչ ցուցանե» առակների ժողովածուն:



ՄՍՐԱ ՄԵԼԻՔԸ ԶԱՅՐԱՅԱԾ

Լաց ու շիվան ընկավ Մսրա մեջ: Որն իր ամուսնուն էր ողբում, որն իր տղային, որն իր եղբորը: Մսրա քաղաքացիները գնացին Մսրա Մելիքի դուռը, գանգատ արին:

— Թագավորն ապրած կենա, Կոզբաղինը Մսրա գորքը տարավ Սասուն, գորքը թողեց այնտեղ, ինքը փախավ եկավ Մսրը: Կանչի՛ր, թող պատասխան տա:

Մսրա Մելիքը մեծ վեզիրին հարցրեց.

— Ո՞ւր է Կոզբաղինը: Ինչո՞ւ էի գալիս ինձ մոտ:

— Կոզբաղինը մեկ շաբաթ է, ինչ եկել պառկել է իր տանը, ամոթից չի գալիս քեզ մոտ:

— Հայտնե՛ք՝ թագավորը կանչում է: Որ չեկավ, թող ձեռնարկով բերեն:

Չորս կտրիճ գնացին Կոզբաղնի տուն, տեսան՝ գլուխը կապել, պառկել է:

— Ջորապե՛տ, Մսրա Մելիքը հրամայել է, որ գաս իր պալատ, որ չգաս, քեզ ձեռնարկով պիտի տանենք:

Կոզբաղինը եկավ, կանգնեց իր թագավորի առաջ:

Մսրա Մելիքը տեսավ՝ իր գորապետի վիզը ծուռ է, ատամները շարած են ճակատին, բարկացավ, ասաց.

— Կոզբաղի՛ն, այդ ի՞նչ օրի ես ընկել: Ո՞ւր են իմ հարկը, Սասնա թալանը, Դավթի գլուխը, իմ գորքը:

Կոզբաղինը կարկամել էր, լեզուն կապ էր ընկել, հազիվ կակաղելով պատմեց եղածը:

— Դավթին տեսա՞ր: Ի՞նչ ասաց:

— Դավթի՞թը երկու ձեռքով բռնեց երկու ծառ, իմ գորքը ջարդեց, ինձ այսպես հաշմեց, ասաց. «Գնա՛, Մսրա Մելիքին պատմի՛ր, թե ինչ է Սասունը»: Ասաց. «Մսրա Մելիքը թող գա՛ կռվենք»:

Կատաղեց Մսրա Մելիքը, աչքերն արյուն կոխեց, եկավ տուն, Իսմիլ խաթունին ասաց.

— Ա՛խիսխ, մարե՛, ես այն թ՛լոյ Դավթին պիտի սպանեի, դու չթողեցիր: Տեսա՞ր՝ ինչ արեց, ինչպես ինձ անպատվեց: Ես ի՞նչ հող տվի գլխիս, որ քո ասածն արի:

— Չէ՛, սիրելի՛ս, դու իմ ասածը չարիք, դու այն ճողած բերան Կոզբաղնի ասածն արիք: Դու որ ինձ լսեիր, Դավթին հյուր կգնայիր տարին երկու անգամ, Դավթին էլ քեզ մոտ հյուր կկանչեիր, կուրախանար, կասեր՝ ես եղբայր ունեմ, կբռնեիք իրար





թիկունք, իրար կօգնեիք, էլ ո՞վ աշխարհում կհամարձակվեր ասել՝ ձեր աչքի վերև հոնք կա:

— Մարե՛, ախր ես արաբ եմ, նա՛ հայ: Հայն ու արաբը կեղբայրանա՞ն:

— Մելի՛ք, հարագա՛տս, բա քի՞չ է եղել, որ արաբ ու հայ եղբայրացել են, մեկ-մեկի հյուր են գնացել, իրար օգնել են, պաշտպանել: Դավիթը մեր շահած-պահած մանուկն էր, դու որ նրա հետ լեզու գտներիր, Դավիթը քո ասածը կաներ, չէր խռովի քեզնից:

— Էէ՛, մարե՛, ասում ես, էլի՛: Ես ո՞նց հյուր գնայի անհավատի տուն:

— Լավ, դու նրա տուն հյուր չգնացիր, Դավթին քո տուն հյուր չկանչեցիր, էլ ինչո՞ւ զորք ճամփեցիր Սասուն, Դավթի շինած վանքն ավերեցիր: Դավթին էլ զայրացավ, տեղը հանեց:

— Ա՛խիսխ... Այդ Սասնա ծուռն ինձ այնպես անպատիվ արեց, որ ամոթից գլուխս չեմ կարողանա դուրս հանեմ: Չէ՛, ես պիտի գնամ, քարուքանդ անեմ Սասունը, Դավթի արյունը խմեմ, որ սիրտս հովանա:

— Մելի՛ք, դու Սասնա հետ գործ չունես: Ինչ որ ցանեցիր, այն հնձեցիր: Դու քո տեղը հանգի՛ստ կաց: Ես մի թուղթ կուղարկեմ Դավթին, նրան քեզ հետ կհաշտեցնեմ: Դու Սասնա հետ գործ չունես:

— Չէ՛, մարե՛, ես քո ասածն արի, վնաս տեսա: Ես պիտի գնամ Դավթի վրա կռիվ: Կա՛մ ես Դավթին կսպանեմ, կա՛մ Դավթին ինձ կսպանի:

— Մելի՛ք, իմ խո՛սքը լսիր, դու չես կարողանա սպանել Դավթին:

— Ես չեմ կարողանա սպանել Դավթի՞ն: — Մտա Մելի՛քը ելավ կանգնեց, ոնց որ օձի խայթած: — Չէ՛, մարե՛, դու իմ չարն ես ուզում:

Ասաց, մորը թողեց լաց ու շիվանի մեջ, գնաց:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ


1. Ինչո՞ւ Մտա Մելիքը չլսեց մորը, որ խորհուրդ չէր տալիս կռվել Դավթի դեմ:
2. Նկարագրիր սուգ ու շիվանը Մտրում այնպես, ինչպես պատկերացնում ես:

Ի սկական անունը՝ Հնայակ Գրիգորյան։ Ծնվել է 1914-ի ապրիլի 14-ին Սյունիքի մարզի Լոր գյուղում։ 1927-ին տեղափոխվել է Բաքու, որտեղ ստացել է միջնակարգ կրթություն։ 1939-ին ավարտել է Բաքվի մանկավարժական ինստիտուտի հայկական բաժանմունքը։ Աշխատել է Բաքվի «Խորհրդային գրող» ամսագրում։ 1941-1945 թթ. մասնակցել է Երկրորդ աշխարհամարտին։ 1945-1951 թթ. աշխատել է Բաքվի հայալեզու «Կոմունիստ» թերթում։ Այնուհետև տեղափոխվել է Երևան և աշխատել «Ավանգարդ», «Ոգնի» թերթերում։ 1965-1967 թթ. եղել է «Գրական թերթի» գլխավոր խմբագիրը։ Վախճանվել է 1993-ի հուլիսի 17-ին Երևանում։ Թաղված է Կոմիտասի անվան պանթեոնում։

Գրել է բանաստեղծություններ (ամփոփված են «Որոտանի եզերքին», «Առագաստ», «Սլացքի մեջ», «Ծիածանը տափաստանում», «Բարձունքի վրա», «Նաիրյան դալար բարդի», «Քարափների երգը», «Տարիներս», «Սեզամ, բացվիր», «Կանչն, կոռնկ», «Իրիկնահաց», «Ժայռին մասուր է կաթում», «Կանաչ, կարմիր աշուն», «Տոհմի կանչը», «Դադի ծաղիկ», «Ինձ բացակա չղնեք» և այլ ժողովածուներում), պոեմներ («Վերադարձ», «Հայրենի գյուղ» և այլն)։

### ԱՆՈՒՆ Դ ՏԱԼԻՍ

Հայաստան, անունդ տալիս  
Ժայռի մեջ մի տուն եմ հիշում,  
Ալևոր կամուրջի հոնքին  
Ծիծառի մի բույն եմ հիշում,



*Համո ՄաՀյանի հուշարձանը  
Սիսիանում, 2004 թ.  
քանդակագործ՝ Գեորգի  
Բաղդասարյան*



Իմ ձանաչած բանաստեղծներից և ոչ մեկը այնքան միաձույլ չէր հայրենի հողի հետ, որքան Համոն: Նա ականջ է դնում հողին նույնքան ուշադիր, որքան գրուցակցին, նրան նայում է կենտրոնացած, ուժգնորեն, սիրող ու իմաստուն աչքերով, ինչպես կնայեր մոր դեմքին, աչքերին ու խոր կնձիռներին: Հայոց հողը բանաստեղծի մշտական, ամենալավ ու պաշտելի գրուցակիցն է, նրա բարձրագույն սերն ու հարստությունը...

*Կայսին Կուլիև*



Թեքված մի մատուռ եմ հիշում  
Եվ բերդի տեղահան մի դուռ,  
Ավերակ տաճարի մի վեմ  
Եվ բեկված մի սյուն եմ հիշում:

Հիշում եմ լքված մի թոնիր՝  
Բերանին մամռոտած մի խուփ,  
Մամռոտած որմի խոռոչում՝  
Մասրենու վարսաթափ մի թուփ,  
Աշխարհի քարերին մաշված,  
Աշխարհից խռոված մի ցուպ  
Եվ հեռվում ինչ-որ ուշացած  
Ձիերի դոփյուն եմ հիշում:

Արևոտ մի սար եմ հիշում՝  
Ճակատին ձյունի պատառիկ,  
Սարն ի վար բարակ մի առու՝  
Շուրթերին հայրեն ու տաղիկ:

Ցորենի կանաչ արտի մեջ  
Առվույտի կապույտ մի ծաղիկ  
Եվ արտի եզրին՝ մենավոր  
Մի բարդու շրշյուն եմ հիշում:

### ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչն՞վ է նշանավոր Համո Սահյանը:
2. Համացանցում գտիր լրացուցիչ տեղեկություններ Համո Սահյանի ու նրա երկերի մասին և պատմիր դասընկերներիդ:
3. Դասընկերներով հայթայթե՛ք ասույթներ՝ քաղված Համո Սահյանի երկերից:
4. Անգիր արա Համո Սահյանի «Անտառում» բանաստեղծությունը և համեմատիր այլ ոտանավորների հետ:
5. Կարդա՛ նաև Համո Սահյանի «Ինձ բացակա չղներք» ժողովածուն ամբողջությամբ:

**ՄՍՐԱ ՄԵԼԻՔԸ ՊԱՏՐԱՍՏՎՈՒՄ Է ԱՐՇԱՎԵԼՈՒ ՍԱՍՈՒՆ**

Մսրա Մելիքը ժողով կանչեց: Եկան Մսրա վեզիր-նազիրը, Մսրա բոլոր իմաստուն մարդիկ: Մսրա Մելիքը նրանց հետ խորհուրդ արեց:

Մեջլիսում կային խելոք վեզիրներ, իմաստուն մարդիկ, որ չէին ուզում ո՛չ կռիվ, ո՛չ կոտորած, ո՛չ ավերմունք: Այդ մարդիկ վեր կացան, ասին.

— Թագավո՛րն ապրած կենա, Դավիթը քեզ ի՞նչ է արել: Ինչ որ արել ես, դու ես Դավիթին արել: Դավիթին իր երկիրը պաշտպանեց, հիմա դո՞ւ ես բողոքավոր: Մեր խորհուրդը մեկ է. մի՛ գնա Սասուն: Աշխարհի երեք մասը քոնն է, թող մեկ մասն էլ մնա Դավիթին:

— Զայններդ կտրե՛ք: Որ այդպես եք ասում, վե՛ր կացեք, այստեղից գնացե՛ք, էլ չերևա՛ք իմ աչքին, անհավատի որդի անհավատներ՛:

Խորհրդականները իրար կամացուկ ասին.

— Ինքն է անհավատի որդի, մեզ է ասում...

Մսրա Մելիքը ժողովը ցրիվ տվեց, կանչեց իր մոտիկ գորապետերին, նրանց հետ խորհուրդ արեց.

— Ի՞նչ կասեք, Սասնա Դավիթի հետ կռիվ անե՞նք:

Դավիթը Մսրա մեջ գուրգ խաղալու ժամանակ սպանել էր Կահան ու Ասլան կտրիճներին: Նրանց հայրերը Դավիթի վրա ռի ունեին պահած, ելան, ասին.

— Թագավո՛րն ապրած կենա, դու Դավիթի հետ պիտի կռվես կա՛մ այսօր, կա՛մ երբեք: Դավիթն այսօր փոքր է, քսան տարեկան է, պատերազմ անել չգիտի: Թե չէ, որ մեծացավ, եղավ երեսուն տարեկան, էլ Դավիթին հաղթելու հնար չի լինի: Դավիթը կզա քեզ վրա կռիվ, քեզ կսպանի, Մսրը կզավթի: Լավն այն է՝ դու հիմա քո ամբողջ զորքը հավաքես, գնաս անհավատի վրա, երկիրն ավերես, Դավիթի զլուխը կտրես, որ չմնա քեզ մշտական վտանգ:

— Դուք ճիշտ եք ասում. կա՛մ այսօր, կա՛մ երբեք:

Մի պղնձի տաշտ բերին, Մսրա Մելիքը ածելին զարկեց իր ճակատին, արյունը թափեց տաշտի մեջ, թուղթ առավ, իր արյունով գրեց, պատերազմ ու գորահավաք հայտարարեց:

Իսմիլ խաթունը գիշերը երազ տեսավ, գնաց, Մսրա Մելիքին ասաց.







— Մելի՛ք, որդի՛, կռիվ մի՛ գնա Սասուն: Ես այս գիշեր երազ տեսա. Սասնա տան աստղը պայծառ էր, Մսրա տան աստղը՝ խավար: Դավիթը քո եղբայրն է, կռիվ մի՛ գնա նրա դեմ: Սասունը փոքր է, իր թափն՝ ահագին: Դավիթն ունի Քուռկիկ Զալալին, Թուրկեծակին, Դավիթը հրեղեն է, քեզ կսպանի:

Մսրա Մելիքը այստեղ վախեցավ, ասաց.

— Մարե՛, ինչո՞ւ այդ ամենը չասիր առաջուց: Հիմա ինքս էլ չեմ ուզում կռիվ գնալ: Բայց զորք եմ հավաքել:

Իսմիլ խաթունը միտք արեց, ասաց.

— Դու զորապետեր քի՞չ ունես. ուրի՛շ մարդ բռնիր քո տեղ, թող զորքն առնի, գնա Սասուն: Ինքդ մի՛ գնա:

— Հայ–հայ, զորքս տամ ուրիշ մարդու ձեռք, տանի կոտորե՞լ տա: Ինքս պիտի գնամ կռիվ: Ուրիշ ճար չկա:

Իսմիլ խաթունն այստեղ լաց ու կոծ արեց, ասաց.

— Մելի՛ք, ես քեզ մենակ չեմ թողնի: Դու որ գնում ես, ես էլ կգամ քեզ հետ:

Իսմիլ խաթունը հավաքեց քառասուն տղամարդ, որ վրան զարկեն, խորոված անեն, զուռնա փչեն. քառասուն կին, որ հատակ ավլեն, սեղան գցեն, ոտք մածեն. քառասուն աղջիկ, որ դափ զարկեն, քյամանչա քաշեն, պարեն. այդ բոլորին առավ իր հետ, Մսրա զորքի հետեից ճանապարհ ընկավ դեպի Սասուն:

Մսրա Մելիքն իր զորքը բերեց մինչև Սասնա սահման, Լերա դաշտի մեջ վրաններ զարկեց ու թուղթ գրեց, ուղարկեց Սասնա քաղաքը:

«Դավիթ, կռիվներս կռիվ է, արի կռվենք: Թե չէ զորքս կթափեմ քաղաքիդ վրա, ինչքան որձ կա Սասնա մեջ, կսպանեմ, Սասունը քարուքանդ կառնեմ»:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ էին ոմանք խրախուսում Մսրա Մելիքի կռիվն ընդդեմ Սասունի:
2. Նկարագրի՛ր հրաման գրող Մսրա Մելիքին այնպես, ինչպես պատկերացնում ես:



\*\*\*

Մեր լեզուն մեր խիղճն է դա,  
Սուրբ հացը մեր սեղանի,  
Մեր հոգու կանչն է արդար  
Ու համը մեր բերանի:

Մեր լեզուն ծուխն է մեր տան,  
Մեր կշիռն աշխարհի մեջ,  
Նա աղն է մեր ինքնության,  
Էության խորհուրդը մեծ:

Մեր լեզուն արյունն է մեր,  
Արյունից ավելի թանկ,  
Մեր բուրմունքն ու գույնն է մեր,  
Մեր լեզուն մենք ենք ու կանք:

Նա պիտի մեր առաջին  
Ու վերջին սերը լինի,  
Ի՞նչ ունենք էլ աշխարհում,  
Որ այսքան մերը լինի:

\* \* \*

Գարունդ հայերեն է գալիս,  
Զյուներդ հայերեն են լալիս,  
Հայերեն են հորդում ջրերդ:  
Հավքերդ երգում են հայերեն,  
Խոփերդ հերկում են հայերեն,  
Հայերեն են տոկում գրերդ:  
Արևդ հայերեն է ծագում,  
Ծառերդ հայերեն են ծաղկում,



*Սուսկ բնան կարներ չէ, որ  
Սահյանը բերեց մեր բանաստեղծությանը, այդ բնանկարների ծալքերում, նրա ամենախորշերտերում մի արդար ու բարի, մեծ ու ազնիվ հոգու շարժում կա, հոգու ամբողջ մի պատմություն, իսկ ձշմարիտ բանաստեղծությունը ոչ այլ ինչ է, եթե ոչ պատկերների խորքում թաքցված հոգու պատմություն...*

**Վահագն Դավթյան**



**Համո Սահյանի գեղանկարը  
Կարինյէ՝ Հրանտ Մտեփանյան**

Վարպետի՝ բնության մասին գրած բանաստեղծությունները քեզ տեղափոխում են նախապատմական ժամանակների հախտուն ու լուսնկա հոսքի մեջ, քեզ պարտորում վաղնջական օրերի ու գույների մաքրությամբ: Ավելի ձիշտ՝ հարստացնում...

Եթե բանաստեղծ Սահյանը ոչինչ ստեղծած չլիներ, նրա բնապաշտական երգերն իսկ բավական են նրան դասելու հայ բանաստեղծության նվիրյալ մեծերի շարքին:

*Էդուարդաս Մեթեղայտիս*

Հայերեն են պայթում բառերդ:  
Հունդերդ ծլում են հայերեն,  
Ձեռքերդ կռում են հայերեն,  
Հայերեն են լռում քարերդ:  
Ձորերդ շնչում են հայերեն,  
Ձոհերդ ննջում են հայերեն,  
Հայերեն են տանջում ցավերդ:  
Որքան էլ ձեռքից գնացել,  
Դու էլի հային ես մնացել,  
Հայերեն են հառնում սարերդ:  
Թող Աստված եղածը պահի,  
Եվ հետո ինչ էլ պատահի,  
Ձյուներդ հայերեն են լալու,  
Գարունդ հայերեն է գալու,  
Հայերեն են գալու դարերդ...

### **ՀԱՐՑԵՐ ԵՎ ԱՌԱՋԱԴՐԱՆՔՆԵՐ**

1. Համացանցում գտիր լրացուցիչ տեղեկություններ Սյունյաց աշխարհի մասին և պատմիր դասընկերներդ:
2. Հայթայթի ասույթներ Համո Սահյանի մասին:
3. Կարդա՛ Համո Սահյանի «Նաիրյան դալար բարդի» բանաստեղծությունը և համեմատիր քո կարդացած այլ բանաստեղծությունների հետ:
4. Անգիր արա Հ. Սահյանի «Մասրենի» ոտանավորը:

### **ՍՆՍՆՆ ԾԻԵՐ**

#### **ՁԵՆՈՎ ՕՀԱՆ**

*Մսրա Մելիքի թուղթը բերեցին, տվեցին Ձենով Օհանին: Կարգաց, Մսրա Մելիքի կովակոչն առավ, գնաց Վերգոյի մոտ, կանչեց Քեռի Թորոսին, նրանց հետ խորհուրդ արեց.*

*— Դավիթը Մսրա գորքը որ տեսավ, կռիվ կանի, կզոհվի, մեր գլխին եկած փորձանքն էլ կավելացնի:*

*— Կռիվ անելը մեր բանը չի, — ասաց Յուան Վերգոն: — Մի սուտ կերուխում սարքենք, Դավթին ամուր խմեցնենք, որ չսթափվի, արծաթ ու ոսկի, աղջիկ ու կին տանենք Մսրա Մելիքին, ոտքերն ընկնենք, աղաչենք, որ մեզ չկոտորի:*

— Լավ, — ասաց Քեռի Թորոսը, — հիմա ժամանակ շահեք, մինչև ես իմ գործը հավաքեմ, տանեմ սար: Որ կռիվ եղավ, պիտի կռվենք:

Չենով Օհանը սուտ կերուխում սարքեց, Քեռի Թորոսը Դավթին կանչեց, ասաց.

— Թե որ այս յոթկանթանի պղինձը լիքը գինի խմես, կասեմ՝ դու Առյուծ Մհերի տղան ես:

Դավիթը խմեց, մինչև տակը դատարկեց, հարբած պռակեց գորգի վրա, քնեց:

Քեռի Թորոսն ասաց՝ փող փչեն, թմբուկ զարկեն, իր տոհմի քաջերին հավաքեց, այսպես խոսեց.

— Ակա՛նջ արեք, իմ որդիներ՛, իմ Սասնա տան քաջե՛ր. Մարա Մելիքը գործ է բերել, որ տանի մեր դառը դատած ոսկին, մեր կինը, մեր աղջիկը, մեր պատիվը: Չենք տա: Կռիվ է ուզում՝ կկռվենք: Մի օր ծնվել ենք, մի օր կմեռնենք:

Քեռի Թորոսն իր գործով վրաններ զարկեց Լեւրա սարի գլխին: Լույսը որ բացվեց, մերոնք տեսան Մարա Մելիքի գործը Լեւրա դաշտի մեջ: Երկնքի աստղերին հաշիվ կար, սպիտակ վրաններին հաշիվ չկար: Ոնց որ սարում ամառ լինեք, դաշտում՝ ձմեռ:

Քեռի Թորոսի կինը՝ Սանդուխտ տիկինը, եկավ Դավթի մոտ, նստեց, լաց եղավ: Արտասուքը, որ ընկավ Դավթի երեսին, Դավիթն արթնացավ.

— Քեռակի՛ն: Ինչո՞ւ ես լալիս:

— Ա՛խ, Դավի՛թ, դու կոտորեցիր Մարա հարկահաններին, Մարա Մելիքը բարկացավ. անհաշիվ գործ հավաքեց, եկել է մեզ վրա:

Դավթի գինովուխուցն անցավ, ասաց.

— Քեռակի՛ն, դու մի՛ վախեցիր: Ես կգնամ, պատասխան կտամ այն շուն Մելիքին: Ես չեմ թողնի, որ Մարա գործերը մեր մեկ հոտաղի մազին կպչեն:

Դավիթը գնաց իր հորեղբոր մոտ, ասաց.

— Հորեղբա՛յր Օհան, Մարա Մելիքը գործով եկել է ինձ վրա կռիվ: Ինչո՞ւ եք թաքցրել ինձնից:

— Դու ջահել ես, ո՞նց պիտի կռվես Մելիքի դեմ:

— Ես չկռվեմ, ո՞վ պիտի կռվի: Շուտ գե՛նք տուր: Յուան Վերգոն Դավթին ծաղրեց, ասաց.

— Դավի՛թ, Մարա Մելիքին երբ կսպանես, նրա ձուռն, թե որ կարողացար շալակել, բե՛ր հիշատակ:

Դավիթը մազ մնաց՝ մի հարված տար Յուան Վերգոյի գլխին, բայց մտքում ասաց. «Հորեղբայրս է, մեծ մարդ է, թող իր համար խոսի»:

Դավիթը հորեղբոր հյուրասենյակից առավ ժան-





գոտած մի թուր, ավազակներից խլած քուռակը հեծավ, գնաց: Սասնա պառավը ելավ Դավթի առաջ.

— Դավիթ, քո հորեղբայր Օհանն ինչո՞ւ է քեզներից պահել քո հոր զգեստները, գենքերն ու ձին:

Դավիթը հետ եկավ, բռնեց հորեղբոր օձիքը, բարձրացրեց, ոտքերը հողից կտրեց, ասաց.

— Հորեղբայր Օհան, իմ հոր զգեստները, գենքերը, Քուռկիկ Ջալալին որտե՞ղ են:

— Երբ Առյուծ Մհերը մեռավ, նրա զգեստներն ու գենքերը ես թաքցրի ներքնատան մեջ:

Իջան նկուղ: Դավիթը վերցրեց Մհերի զգեստները, հագավ: Մի քիչ մեծ էին իր վրա: Գնացին մեծ ախոռ: Քուռկիկ Ջալալին կապած էր այնտեղ: Դավիթը գրկեց ձիու վիզը, ճակատը համբուրեց.

— Մինչև այսօր քեզ տեր չկար, ես քո տերն եմ:

Դավիթը, իր հոր ձիու պախուրցը բռնած, ախոռից դուրս հանեց, Թամք-սաղաֆին դրեց նրա վրա, փոկերը ձգեց: Թուր-կեծակին կապեց իր մեջքին: Աստծու կամքով խաչ-պատերազմին եկավ իջավ Դավթի աջ թևին: Դավիթը հեծավ Քուռկիկ Ջալալին, փչեց իր հոր գալարափողը: Սասնա ամբողջ ժողովուրդը հավաքվեց հրապարակում:

Դեղձուն-Շամը այն օրվանից, ինչ Առյուծ Մհերն ու Արմաղանը մեռան, մտել էր իր սենյակը, ուխտ էր արել. «Մինչև չմեծանա մեր նորամանուկ Դավիթը, մինչև չբռնի իմ Առյուծ Մհերի տեղը, մինչև չառնի նրա զգեստներն ու գենքերը, մինչև չհեծնի Քուռկիկ Ջալալին, ես իմ սենյակից դուրս չեմ գա»: Գալարափողի ձայնը լսեց, ուրախացավ: Պատուհանից ներքև նայեց, տեսավ՝ Դավիթը հեծել է Քուռկիկ Ջալալին, կանգնել է պատուհանի տակ, կանչեց.

— Քուռկիկ Ջալալի, դու Մհերիս օգնականն ես եղել, նրա որդուն էլ օգնական լինես: Իմ Դավթին տանես Կաթնաղբյուր, որ ջուր խմի, գորեղանա: Իմ Դավթին տանես Փորձաքար, որ Դավիթը թրով զարկի, երկաթե սյունը կտրի, նոր գնա կռիվ:

Քուռկիկ Ջալալին լեզու առավ, ասաց.

— Մե՛ծ մամիկ, դու հանգի՛ստ կաց: Ես կանեմ այնպես, ինչպես դու կամեցար:


### ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ հորեղբայրները Դավթին հարբեցրին:
2. Նկարագրի՛ր Սասնա պառավին պատկերացրածիդ պես:

Իսկական անունը՝ Կառլեն Մուրադյան: Ծնվել է 1919-ի հոկտեմբերի 30-ին Աշտարակ գյուղում: 1927-ից ապրել է Երևանում: 1936-ին ավարտել է միջնակարգ դպրոցը, 1940-ին՝ Երևանի ձարտարագիտական համալսարանը: 1942-1944-ին ծառայել է խորհրդային բանակում: 1949-1950 թթ. սովորել է Մոսկվայի գրականության ինստիտուտին կից հայ գրողների ուսուցարանում, 1954-1956 թթ.՝ ԽՍՀՄ գրողների միությանն առընթեր գրական բարձրագույն դասընթացներում: 1951-1954 թթ. եղել է «Լիտերատուրնայա գագետա» թերթի սեփական թղթակիցը Հայաստանում, 1968-1972 թթ.՝ «Լիտերատուրնայա Արմենիա» ամսագրի խմբագիրը: 1973-1998 թթ. եղել է ՀՀ ԳԱԱ արվեստ ինստիտուտի ավագ գիտաշխատող: Վախճանվել է 1998-ի հունիսի 11-ին Երևանում: Թաղված է Աշտարակում՝ Կարմրավոր եկեղեցու բակում:

Գրել է բանաստեղծություններ (ամփոփված են «Նախաշավիղ», «Խաղաղության ծխամորձը», «Նոր ձանապարհ», «Նորք», «Որոնումներ», «Երևանի լույսերը», «Մինչև այսօր», «Երկու ձամփա», «Այս տարիքում», «Քսաներորդ դար» և այլ ժողովածուներում), պոեմներ («Սասունցիների պարը», «Արարատի գագաթին» և այլն), խոհագրական վիպակներ («Հավերժի ձամփորդը», «Յոթ երգ Հայաստանի մասին» և այլն), հուշեր, գրական դիմանկարներ, ակնարկներ, հոդվածներ:

Նրա բեմագրով ստեղծվել է «Յոթ երգ Հայաստանի մասին» ֆիլմը:



*Այն բանի համար, որ ես այսօր ոչ թե կամուրջներ կամ ջրանցքներ եմ սարքում, այլ գրում եմ գրքեր, շնորհակալ եմ դպրոցում ինձ հանդիպած հայ փայլուն գրողներից մեկին՝ Եղիշե Չարենցին: Ես նաև շնորհակալ եմ իմ մասնագիտությանը. միայն ձիշտ գիտությունը կարող է օգնել ստեղծագործողին զարգացնելու իր մեջ հոգևոր հավասարակշռություն՝ խուսափելով շատախոսությունից և հաճախակի տասը քայլ անելուց այնտեղ, որտեղ մի քայլը բավական կլիներ:*

**Գևորգ Էմին**



*«Ես Հայ եմ» բանաստեղծու-  
թյան առաջին տողը Գևորգ  
Էմինի գերեզմանի եզրին՝ Աշ-  
տարակի Կարմրավոր եկեղեցու  
բակում*

## ՄԵՆՔ (հատված)

Մենք փոքր ենք, այո՛, փոքր՝  
Լեռների ծերպից սուրացող այն քարի՛ նման,  
Որ դաշտում ընկած ժայռի ուժն ունի.  
Փոքր՝  
Լեռնային մեր գետերի պես,  
Որոնք վիթխարի ուժ են ամբարել,  
Անձանոթ  
Հովտի ծույլ-ծույլ գետերին:

Մենք փոքր ենք, այո՛,  
Փոքր ենք,  
Բայց ինչպես գնդակը՝ փողո՛ւմ,  
Ինչպես կաղնու սերմն՝ արգավանդ հողում,  
Ոսկու մի հատիկ,  
Որ վերևից է նայում  
Կապարի ու թուշի քաշին.

Մենք փոքր ենք,  
Սակայն համեմունք ենք մենք,  
Ա՛ղն այն մի պտղունց,  
Որ համ է տալիս մի ամբողջ ձաշի...

Մենք փոքր ենք, այո՛,  
Ձեզ ո՛վ էր ասում՝  
Մեզ սեղմե՛ք այնքան,  
Որ մենք ստիպված ... աղամանդ դառնանք.

Ո՛վ էր ստիպում՝  
Մեզ աստղերի պես ցիրուցան անեք,  
Որ միշտ մե՛զ տեսնեք,  
Որ էլ որ գնաք...

Մենք փոքր ենք,  
Սակայն մեր երկրի նման,  
Որի սահմանը  
Բյուրականից մինչ Լուսին է հասնում  
Եվ Լուսավանից մինչև Ուրարտո՛ւ...



Փոփոքր  
Այն հրաճք ուրանի նման,  
Որ դար ու դարեր  
Փայլում է,  
Շողում,  
Սակայն չի հատնում...

## ԵՍ ՀԱՅ ԵՄ

Ես հայ եմ, հին, ինչպես լեռան այս բիրլիական,  
Թաց են ոտքերս դեռ ջրհեղեղի ջրից,  
Իմ սուրբ հողն է տեսել Նոյն առաջին անգամ,  
Բաբելոնյան Բելը խորտակվել իմ սրից:

Իմ մատների հետքն է կրում կողի վրա,  
Քարն առաջին մամռոտ, որ իմ ձեռքով տաշված  
Եվ միացած հողին շաղախով իմ արյան,  
Արարատյան դաշտում մեհյանի վեմ դարձավ:

Իմ նահատակ որդոց արյունով է ոռոգ  
Ամեն ծաղիկ ու ծառ հողում հայրենական,  
Ամեն բլուր քաջի մի շիրիմ է նորոգ,  
Եվ կոթողի բեկոր՝ ամեն սանդուղք ու քար:

Ես հայ եմ, հին, ինչպես լեռան այս Արարատյան,  
Հագար սուր է բախվել իմ վահանին ահեղ,  
Բայց փշրել եմ նրանց ես ցասումով արդար  
Եվ լեռներիս նման գլուխս վեր պահել:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչնով է նշանավոր Գ. Էմինը:
2. Համացանցում գտիր լրացուցիչ տեղեկություններ Գևորգ Էմինի ու նրա երկերի մասին:
3. Դասընկերներով հայթայթե՛ք ասույթներ՝ Գևորգ Էմինի երկերից քաղված:
4. Կարդա՛ Գևորգ Էմինի «Սասունցիների պարը» պոեմը և համեմատիր քո կարդացած այլ պոեմների հետ:
5. Կարդա՛ նաև Գ. Էմինի «Հավերժի ձամփորդը» գիրքը:



Կես ենք՝  
Երկձեղքված,  
Կիսված,  
Երկգագաթ  
Մեր խորհրդանիշ սուրբ լեռան  
նման...  
Բայց վկա՝ ձեղքված Մասիս լե-  
ռը մեր,  
վկա՝ մեր կեսը՝ մորթված Տեր-  
ջորում  
Եվ այն կեսը,  
Որ ես եմ,  
Դու և նա,  
Մենք կմիանանք,  
Մենք կամբողջանանք,  
Կգտնենք մի օր  
Լրիվ դառնալու հնարն անհնար:  
**Հատված «Մենք»-ից**



ԴԱՎԻԹԸ ԵՎ ԻՄԱՍՏՈՒՆ ԾԵՐՈՒՆԻՆ

Քուռկիկ Ջալալին Մհերի որդուն տարավ Ծովասար, կանգնեց Կաթնաղբյուրի գլխին: Դավիթն իջավ ջուր խմեց, պառկեց Կաթնաղբյուրի մոտ, որ հանգստանա: Երկու ժամ քնելուց հետո արթնացավ, տեսավ՝ մարմնով այնքան զորացել ու խոշորացել է, որ զգեստները հագրիվ են վրայով գալիս:

Հեծավ ձին, գնաց մինչև փորձասյուն, Թուր-կեծակին զարկեց, երկաթե փորձասյունը կտրեց անցավ: Հետ նայեց. փորձասյունը մնացել էր կանգնած կտոր կտորի վրա: Դավիթն ինքն իրենից նեղացավ:

Մեկ էլ այն կողմից, ինքն իր պոչի վրա պտտվելով, եկավ մի զորեղ վիշապահողմ, փորձաքարը շուռ տվեց, անցավ: Դավիթը նայեց ու տեսավ՝ Թուր-կեծակին երկաթե սյունը մեջտեղից կիսել անցել էր: Ուրախացավ, ինքն իրեն օրհնեց, սրտապնդեց: Ապա ձին քեց, գնաց կովի դաշտ, կանգնեց մի բլուրի գլխին, աչք ածեց: Երկնքի աստղերին հաշիվ կար, դաշտի խոտերին հաշիվ կար, Մարա Մելիքի զորքին հաշիվ չկար: Նրա վրանները սպիտակին էին տալիս Ծովասարի ստորոտից մինչև Բաթմանա կամուրջ:

Դավիթը քաջ էր, բայց երկմտեց. «Հայ-հայ, ես ո՞նց պիտի կովեմ սրանց դեմ: Սրանք լինեն կորնգանի արտ, ես լինեմ գերանդրով հնձվոր, չեմ կարողանա քաղել: Սրանք լինեն զզած բամբակի մի դեզ, ես լինեմ թեժ բոց-կրակ, չեմ կարողանա վառել»:

Քուռկիկ Ջալալին լեզու առավ, ասաց.

— Մի՛ երկմտիր, Դավիթ: Ինչքան որ դու սպանես քո թրով, այնքան էլ ես իմ պոչով կսպանեմ, ինչքան որ դու կոտորես գուրգով, այնքան էլ ես կճխլեմ իմ ոտքերի տակ, ինչքան որ դու վառես քո թրի կրակով, այնքան էլ ես կայրեմ պնչերիս բոցով, ինչքան որ պատուհասի քո խաչ-պատերազմին, այնքան էլ կտապալի իմ վագքի քամին... Մի՛ վախենա, Դավիթ. հենց որ դու շոգես, հոգնես, ես քեզ կառնեմ, կբարձրանամ Ծովասար, այնտեղ Կաթնաղբյուրից պաղ ջուր կխմես, կհանգստանաս, նոր ուժ կստանաս, նորից քեզ կիջեցնեմ կովի դաշտ:

Դավիթն իր ձիու խոսքերից սրտապնդվեց, նոր ուժ ստացավ, պատրաստ էր նետվելու կովի դաշտ: Բայց, ինչպես որ Սասնա տան հինավուրց ավանդն

էր, վճռեց թշնամուն առաջուց իմաց տայ, նոր գարկել: Կանգնեց մի մոտիկ բլրի վրա, ձայն տվեց.

Ով քնած է, թող շուտով արթնանա,  
Ով արթուն է, թող տեղից բարձրանա,  
Ով վեր է կացել, գենք-գրա՛հ կապի,  
Ով գենքն է կապել, թող իր ձին հեծնի.  
Ելե՛ք, որ չասեք, ինքներս քնած՝

Դավիթը գող-գող եկավ ու գնաց:

Ապա Դավիթն իր ձին ասպանդակեց, թռավ ու կայծակի պես գարկեց Մսրա գորքի մեջ, աջ շուռ եկավ, ձախ շուռ եկավ, պտտվեց գորքի մեջտեղը, ինչպես ավազի մեջ վիշապ-քամին է պտտվում, և կոտորեց մինչև կեսօր: Ինչքան որ Դավիթը կոտորեց, այնքան էլ՝ Քուռկիկ Ջալալին:

Փոշին բարձրացավ երկիրնք: Արևը չէր երևում, Դավիթի թուրն էր միայն կայծակին տալիս: Կեսօրին արյունը դարձավ հեղեղ, Մսրա գորքի դիակները քչեց մինչև Բաթմանա կամուրջը, լցրեց գետը:

Մսրա գորքի կեսը կոտորվել էր, կեսն էր մնացել: Դրանց մեջ կար մի սպիտակամորուս ծերունի: Ուզում էր կոտորածի առաջն առնել.

- Ճամփա՛ տվեք, որ գնամ խոսեմ Դավիթի հետ:
- Ի՞նչ ես ուզում, ալևո՛ր, — հարցրեց Դավիթը:
- Դավիթ, ինչո՞ւ ես մեզ կոտորում:

— Ես ինքս էլ չեմ ուզում ձեզ կոտորել: Մսրա Մելիքը ինձ կանչեց կռիվ. բա ո՞ւմ հետ կռվեմ:

— Մսրա Մելիքն է քեզ կանչել կռիվ, դու մե՞զ ես կոտորում: Այս խեղճ ու կրակ մարդիկ ի՞նչ մեղք ունեն: Ամեն մեկը մի տան ճրագ է, ամեն մեկը՝ մի տան մինուճար: Որը տանն է թողել պառավ հայր ու մայր, որը՝ ջահել հարսնացու, որը՝ մի տուն լիքը երեխա: Մսրա Մելիքը բոլորին ուժով է բերել կռիվ, նա է Սասնա թշնամին. դու նրա՛ հետ կռվիր:


— Ալևո՛ր, դու արգար ես խոսում: Բայց ո՞ւր է Մսրա Մելիքը: Մի տեսնեմ՝ այսքան գորք ինչո՞ւ է բերել. ի՞նչ է ուզում ինձնից, ի՞նչ է ուզում ձեզնից:

— Մսրա Մելիքը իր վրանի մեջ քնած է: Ասա՛յ նրա վրանը՝ այն կանաչն ու մեծը:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Դավիթը դադարեցրեց Մսրա գորքը կոտորելը:
2. Նկարագրիր Մսրա իմաստուն ծերունուն այնպես, ինչպես պատկերացնում ես:





*Այրուրեն չէ սա,  
Բերդ է անմատուց,  
Գանձ է աննվաճ:*

*Դուռ է փրկության,  
Ելք, երբ հույս չկա,  
Զարթոնքի նվազ:*

*Էությունն է մեր,  
Ընթացքն ու ուղին,  
Թագ ու գորավար...*

*Հատված  
«Մեր այբուբեն»-ից*

## ԶԳՈՒՅՇ ԽՈՍԻՐ ՀԱՅԱՍՏԱՆՈՒՄ

Զգո՞ւյշ խոսիր Հայաստանում.  
Այստեղ ամեն գագաթ ու ձոր  
Արձագանք է տալիս հզոր  
Եվ քո խոսքը հեռու տանում...

Թե բարի են խոսքերը քո,  
Հայոց լեռներն ակնածանքով  
Կխոնարհվեն քո դեմ լռին՝  
Բաշը քսած քո ձեռքերին:

Իսկ թե չար են, լեռները մեր՝  
Հրաբխի բներն անմեռ,  
Որ լռել են, բայց չեն հանգել,  
Քեզ լավայրժ կարձագանքեն,  
Որ լեռներ է քշում տանում...  
Զգո՞ւյշ խոսիր Հայաստանում:

Զգո՞ւյշ խոսիր Հայաստանում.  
Նեղ են ձամփեքը լեռնական,  
Երկու հոգու տեղ չեն անում,  
Թե դեմ դիմաց ելնեն հանկարծ.  
Թե բարեկամ ես ու ընկեր,  
Ա՛նց կկենաք՝ իրար գրկված,  
Թե դավով ես այստեղ ընկել,  
Կզլորվես ժայռերից ցած,  
Ո՞վ եղավ քո գալու վկան,  
Գնալդ ո՞վ է իմանում...  
Նեղ են ձամփեքը լեռնական,

Զգոնյշ քայլիր Հայաստանում,  
Զգոնյշ գործիր Հայաստանում:

Մենք գահ ու թագ չենք ունեցել,  
Եվ ... արքան է ամեն մի հայ.  
Զորք ու բանակ չենք ունեցել,  
Եվ ... սպա է ամեն մի հայ:

Ամեն մի հայ՝ լեռան մի ծերայ,  
Ամեն մի հայ՝ ուրույն մի կերպ,  
Ամեն մի հայ՝ մի Հայաստան՝  
Բաժան–բաժան,  
Անմիաբան,  
Զատվանձ, հատվանձ,  
Եվ սակայն մի,  
Երբ սպառնում է թշնամին  
Մեր դարավոր անմահ երթին  
Եվ այս ժայռին թառած բերդին,  
Որ Հայրենիք ենք անվանում...

Զգոնյշ գործիր Հայաստանում:

### ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Դասընկերներով վերլուծեք «Մենք» բանաստեղծությունը և քննարկեք ձեր ուսուցչի հետ:
2. Հայթայթիր ասույթներ Գևորգ Էմինի մասին:
3. Անգիր արա Գևորգ Էմինի «Մեր այբուբենը» բանաստեղծությունը և համեմատիր մեր լեզվի մասին քո կարդացած այլ ստեղծագործությունների հետ:
4. Կարդա՛ նաև Գևորգ Էմինի «Յոթ երգ Հայաստանի մասին» գիրքն ամբողջությամբ:

## ՄԱՍՆԱԾԻԵՐ

### ԵԼՔ ԾՈՒՂԱԿԻՑ

Դավիթը քչեց գնաց մինչև կանաչ վրանը: Վրանի մուտքը պահպանում էին երկու զորեղ կտրիճ: Յոթ աղջիկ, Մսրա Մելիքի չորս բոլորը ծնկած, ճանճ



Գևորգ Էմինի հուշատախտակը Երևանում



Գևորգ Էմինի դիմանկարը նկարիչ՝ Գևորգ Պետրոսյան





էին քշում, յոթը՝ ոտքերն էին մաժում, գլխավերևում նստած էր Իսմիլ խաթունը: Վրանի դուռն անառ ճակատից փռված էր մի նախշուն գորգ: Դավիթն ասաց.

— Վե՛ր կացրեք Մսրա Մելիքին, թող դո՛ւրս գա:

— Յոթ օր պետք է քնի: Երեք օր է անցել:

Դավիթն ամպի պես որոտաց.

— Վե՛ր կաց, Մսրա Մելիք: Եկել եմ, որ կովենք:

Մսրա Մելիքը փնջալով վեր կացավ, ծանր ծմրկտաց, վրանից դուրս նայեց, տեսավ՝ Դավիթը, ոտքից-գլուխ արյունաթաթախ, կանգնած է այնտեղ: Մսրա Մելիքը փառ-փառ ծիծաղեց.

— Հա՛, հա՛, հա՛... Թլո՛ղ Դավիթ: Այդ ե՞րբ դու եղար ձիավոր: Ե՛տ դառ, գնա՛: Այն էլ պատիվ է քեզ, որ գնաս պարծենաս, թե «ես ձիով հասա Մսրա Մելիքի վրանը, նա վախեցավ, դուրս չեկավ»:

— Մելիք, ծիծաղողը նա է, որ վերջում կծիծաղի:

Մսրա Մելիքը փչեց, որ Դավիթն թոցներ, ինչպես փշախոտ: Նրա շնչից վրանը յոթ տեղով պատռվեց, խոտերն արմատահան եղան, խառնվեցին փոշուն, ծառերը կոտրվեցին, քարերը գլորվեցին, միայն Դավիթն էր աներեք նստած իր ձիու վրա: Մսրա Մելիքն այստեղ վախեցավ, եղանակը փոխեց.

— Դավիթ, ի՞նչ ես վրադում: Ձիուց իջի՛ր, արի նե՛րս՝ հաց ուտենք, հանգստանանք, նո՛ր դուրս գանք վրանից, կովենք:

— Ձե՛, չեմ իջնի ձիուց: Այն խեղճ ու կրակ մարդկանց բերել ես կռիվ, նրանք այնտեղ շարդվում են, մենք այստեղ հանգստանա՞նք:

Իսմիլ խաթունն անառ եկավ, ասաց.

— Դավիթ, հարազա՛տս, այսօր դու կռիվ շատ ես արել, հոգնել ես: Ե՛կ, ձիուց իջի՛ր, հա՛ց կեր, հանգստացի՛ր, էլի ձեր կռիվը կռիվ է:

Շատ որ դեմն ընկան, Դավիթն ուզում էր ձիուց իջնել: Քուռկիկ Ջալալին ծառս էր լինում, փախչում էր դեռ ու դեռ, չէր թողնում, որ Դավիթն իջնի:

Դու մի ասի՛՛ Մսրա Մելիքն ու իր մայրը վրանի շեմքի մոտ քառասուն գազ հոր էին փորել, բերանը ծածկել էին նախշուն գորգով, այնպես էին արել, որ Դավիթը գար, հորն ընկներ: Իսմիլ խաթունը շատ լեզու թափեց, աղաչեց, համոզեց ու Դավիթն ձիուց վար բերեց: Քուռկիկ Ջալալին խռովեց, փախավ:

Դավիթը հենց որ ներս մտավ, հենց որ ձախ ոտքը կռխեց փափուկ գորգին, թրը՛մմփ... ընկավ հորը:

— Հող էիր, հո՛ղ դարձիր, — մուլտաց Մսրա Մելիքը ու նորից պառկեց, մտավ քուն:



Ձենով Օհանն այդ գիշեր երազ տեսավ, զարթնեց.  
— Վե՛ր կաց, կնի՛կ, վե՛ր կաց: Երազ տեսա, Մսրա  
աստղը վառվռում էր, Սասնա աստղը՝ մարմրում:  
Կա-չկա, մեր Դավիթը փորձանքի մեջ է:

— Ինչո՞ւ չես քնում, մա՛րդ: Դավիթը հիմա, ով  
գիտի որ կնոջ ծոցը մտած, զվարճանում է:

Ձենով Օհանը զայրացավ.

— Օտարի աղջիկ ես, քո սիրտը չի ցավում Սաս-  
նա տան համար: Ե՛լ, ճրա՛գ վառիր, թե չէ...

Սառյան փնթփնթալով ելավ, ճրագ վառեց, բերեց  
մարդու զգեստներն ու գենք-զրահը:

Ձենով Օհանը իրեն փաթաթեց յոթ գոմշի կաշի,  
յոթ գուլթանի շղթա, որ գոռալուց չպատռվի, գնաց  
գոմ, հեծավ իր Սևուկը, մի ակնթարթում հասավ  
Ծովասար, կանգնեց լեռան կատարին, նայեց չորս  
բոլորը: Քուռկիկ Ջալալին հեռվից Դավթի հորեղ-  
բորը տեսավ, մոտեցավ: Ձիու աչքերն արցունքոտ  
էին: Ձենով Օհանը երկմտեց. «Վա՛խ, չլինի՞ Դավի-  
թը սպանված է»... Ձենով Օհանը ձիուց իջավ, իրեն  
մի հաստ պարանով կապեց կաղնի ծառին, որ գոռա-  
լու ձայնն իրեն չտանի, գոռաց.

Այ տղա՛, Դավի՛թի՛թ...

Որտե՞ղ ես, հիշի՛ր

Հացն ու գինին, տեր կենդանին,

Մարութա բարձր Աստվածածին,

Հիշի՛ր քո Խաչ-պատերազմին,

Որ կա քո աջ թևին.

Հիշի՛ր, կանչի՛ր ու թա՛փ տուր քեզ...

Ձենով Օհանի ձայնն ընկավ սար ու ձոր,  
դմբղմբալով գնաց հասավ Դավթին, որ հորի մեջ  
կապկպված, խճճված էր երկաթե շղթաների ցանցով:  
Մտքում ասաց. «Հորեղբորս ձայնն է»: Իրեն թափ  
տվեց, երկաթե շղթաները կտրատեց, հորից դուրս  
թռավ, կանգնեց Մսրա Մելիքի առաջ.

— Է՛, Մսրա Մելի՛ք, հիմա՞ ինչ կասես. լուսաբա-  
ցին եղբոր պես պիտի կռվե՞նք, թե՞ չէ:

Մսրա Մելիքի լեզուն ահից կապվեց: Նա էլ չհա-  
մարձակվեց Դավթին մոտենալ:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Դավիթն ընկավ ծուղակը:
2. Նկարագրիր ծուղակն ընկած Դավթին:





*Չլիններ ծովը, երկնքի պատկերը երկրի վրա չէր լինի, չլիններ քո բանաստեղծությունը, շատ խավար կլիններ մեր երկիրը:*

*Ավետիք Իսահակյան*

Ի սկսական անունը՝ Սիրվարդ: Ծնվել է 1919-ի հունվարի 20-ին Երևանում՝ Վանից գաղթած ընտանիքում: Նրա հայրը՝ Բարունակը, ազգային գործիչ էր, խմբագիր, որ սպանվեց 1920-ին: 1936-ին ավարտել է միջնակարգ դպրոցը, 1941-ին՝ ԵՊՀ բանասիրական բաժանմունքը, 1950-ին՝ Մոսկվայի Մ. Գորկու անվան գրականության ինստիտուտի բարձրագույն դասընթացը: Հրջագայել է սփյուռքի հայկական գաղթավայրերում, զբաղվել ազգային և հասարակական գործունեությամբ: Վախճանվել է 2006-ի օգոստոսի 25-ին Երևանում:

Գրել է բանաստեղծություններ (ամփոփված են «Երկու գրույց», «Օրերի հետ», «Հայնեական երգեր», «Երգ երգոց», «Լիլիթ», «Զմեռ է գալիս», «Զանգվի ափին», «Այս իմ երկիրն է», «Իմ հարազատները», «Սրտաբաց գրույց», «Բարի երթ», «Դեպի խորքը լեռան» և այլ ժողովածուներում), պոեմներ («Մտորումներ ձանապարհի կեսին» և այլն), ուղեգրություններ («Քարավանները դեռ քայլում են», «Խձանկար հոգու և քարտեզի գույներից», «Քարավանները հեռանում են», «Իմ կածանը աշխարհի ձանապարհներին»), հրապարակախոսական երկեր («Իմ ժամանակը: Հրապարակագրություն և ուղեգրություն», «Էջեր փակ գգրոցներից», «Վերջին զանգը» և այլն), թատերգություններ («Կռնակ, ուստի՛ կուզաս», «Եվ դո՛ւ, Բրուտո՛ւ»):

Գրել է նաև մանկական բանաստեղծություններ (ամփոփված են «Փոքրիկ Արա, ականջ արա», «Մեր Լալիկը, սիրունիկը», «Տանը, բակում, փողոցում», «Մի տարով էլ մեծացանք», «Ծաղկանոց», «Երկու քույրիկ, երկու ուլիկ» և այլ ժողովածուներում):

## ԸՆԴԴԻՄԱԽՈՍՈՒԹՅՈՒՆ

Այն ո՛վ է ասում,  
Որ Արարատը ձերն է ու ձերը,  
Անհեթեթ պատրանք,  
Քարտեզն է ձերը,  
Քարտեզի վրա չափած-գծածը,  
Իսկ ինքը՝ լեռը...

Նրա գագաթի գառամ ձյունները  
Մեր ընկալմանն են, որ հավերժության խորհուրդն  
են առնում.

Նրան պարուրող մշուշն ու ամպը  
Մեր աչքերում են եղեգան փողի ծուխ ու բոց դառնում.  
Նրա ամեն մի անշունչ, անկենդան ավագահատը  
Մեր արյան կարմիր գնդիկներին է կենսահյուս  
տանում:

Մոխիրն է ձերը,  
Մարը բաղադրող կոշկոռը քարե,  
Մեզ համար գործող հրաբուխ է նա,  
Խառնարանն ոգու,  
Որ դար ու դարեր  
Մեր ընդվզումի կրակն է ժայթքում  
Եվ բորբոքում մեր ցասումը կենաց:

Սառնյցն է ձերը,  
Սառը, անհաղորդ սառույցը դեղնած,  
Իսկ մեզ բյուրավոր արեգակների  
Ներուծությունն է անդուլ ձառագում նրա կողերից,  
Որ տաքացնում է մի ողջ հողագունդ,  
Այդ հողագնդին փռված-ծվարած մեր բեկորները:

Օ՛, սուրբ առասպել Արա արքայի,  
Մեր էությունը ցուլացնող պատում,  
Մեր փնտրումի գյճուտ,  
Որ երեսուն դար և դեռ ավելի  
Սոսկ հոլովեցին, բայց չհասկացան  
Բոլոր հին ու նոր Շամիրամները:  
Մարմինն է ձերը



*Մելվա Կապուտիկյանի  
դիմանկարը  
Երզիծանկարիչ՝  
Ալեքսանդր Սարուխան*



Սիլվա Կապուտիկյանը նկարիչ Մարտիրոս Սարյանի հետ

Արա արքայի՛ Արարատ լեռան  
Սպանված, մեռած մարմինը միայն,  
Որը չէ՛ն կարող, չէ՛ն կենդանացնի  
Ձեր այլարարբառ հարալեզները!...

Մերը հոգին է.  
Մերնդեսերունդ անշեշ թևածող,  
Վերջին շնչում իսկ հագար կերպ առած,  
նորի՛ց պոռթկացող,  
Մեզ արարչության հրահիրող հոգին,  
Որ չես սպանի զենքով ու դիրքով,  
Չես խլի երբեք գիր ու կնիքով  
Եվ սահմանների փշալարերով երբեք չես բանտի...  
Մերը հոգին է...

### ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայ գրականության համար ինչո՞վ է նշանավոր Սիլվա Կապուտիկյանը:
2. Համացանցում գտիր լրացուցիչ տեղեկություններ Սիլվա Կապուտիկյանի ու նրա երկերի մասին:
3. Հայթայթիր ասույթներ Ս. Կապուտիկյանի երկերից:
4. Անգիր արա Սիլվա Կապուտիկյանի «խոսք իմ որդուն» բանաստեղծությունը և համեմատիր մեր լեզվի մասին քո կարդացած այլ ստեղծագործությունների հետ:
5. Կարդա՛ նաև Սիլվա Կապուտիկյանի «Մտորումներ ձա՛նապարհի կեսին» պոեմը:

### ՍԼՍՆԱԾԻՒՄ

ԴԱՎԹԻ ԿՈՒՎՆ ՈՒ ՀԱՂԹԱՆԱԿԸ

Դավիթը վրանից դուրս եկավ, տեսավ՝ Քուռկիկ Ջալալին չկա: Ելավ Ծովասար, որ իր ձին փնտրեր: Ձենով Օհանը նրան հեռվից տեսավ, կանչեց.

— Արի՛, Դավիթ, Քուռկիկ Ջալալին այստեղ է:

Դավիթը գնաց հորեղբոր մոտ, նրա ձեռքը համբուրեց: Ապա ձին քշեց Կաթնաղբյուր, հանգստա-

<sup>1</sup> մեռածին վերակենդանացնող առասպելական արարած

ցավ: Լուսաբացին գնաց Մսրա Մելիքի վրանի մոտ.

— Վե՛ր կաց, Մելի՛ք: Էլ ինձ չես խաբի:

Դավթի ձայնը երկրաշարժի պես որոտաց, Քուռ-կիկ Ջալալին պնչերից բոց հանեց, Թուր-կեծակին արևի տակ բոցկլտաց: Մսրա Մելիքը դուրս եկավ.

— Դավիթ, արի հաշտվենք: Արի՛ քեզ հարկ տամ, քեզ հպատակ լինեմ՝ կռիվ չանենք:

— Հագիվ թե հաշտվենք: Մեր կռիվը կռիվ է:

Մսրա Մելիքը տեսավ՝ ճար չկա, հարցրեց.

— Դավիթ, իրար խա՞ռը զարկենք, թե՞ հերթով:

— Ուզում ես՝ խառը, ուզում ես՝ հերթով:

— Հերթով զարկենք, — ասաց Մսրա Մելիքը: —

Դավիթ... առաջին զարկը ի՞մն է, թե՞ քոնը:

— Քոնն է, Մելի՛ք: Առաջին երեք զարկը թող քոնը լինի: Դու իմ մեծ եղբայրն ես:

Դավիթը գնաց կանգնեց Լերա դաշտի մեջտեղը:

Մելիքն առավ իր վաթսուև փթանոց գուրգը, հեծավ իր Սևազդը ձին, քշեց գնաց մինչև Բաթմանա կամուրջ, թափ առած եկավ ու զարկեց՝ գը՛մփ...

Գետինը պատռվեց, փոշին բարձրացավ, բռնեց երկինքը, արևը չէր երևում: Մսրա Մելիքն ասաց.

— Հող էր, հող դարձավ Դավիթը: Ափսո՛ս, պահեցինք, շահեցինք, մի զարկով սպանեցինք:

Դավիթը փոշեմուժի միջից կանչեց.

— Մելի՛ք, ես կենդանի եմ: Մեկ է՛լ զարկիր:

Փոշին փարատվեց: Մսրա Մելիքը տեսավ՝ Դավիթն իր ձիու վրա կանգնած է դաշտի մեջ, ասաց.

— Հայ-հայ, մոտիկ տեղից եկա, թափ քիչ առա:

Այս անգամ քշեց գնաց մինչև Դիարբեքիր, ավելի ուժեղ զարկեց: Դավիթը նորից կանչեց.

— Մելի՛ք, ես կենդանի եմ, վերջին զարկը տուր:

Մսրա Մելիքը ահից կատաղեց: Ձին քշեց մինչև Մսրա հող, եկավ ու զարկեց: Դավիթը կանչեց.

— Մելի՛ք, կենդանի եմ: Ջարկելու հերթն իմն է:


Մելիքի երեսը ահից դեղնեց, շուրթերը դողացին, ոտքերը թուլացան, Իսմիլը ծնկաչոք մոտեցավ.

— Դավիթ, եղբայրասպան չլինե՛ս:

— Երբ քո Մելիքն էր զարկում ինձ, ինչո՞ւ չասացիր. «Մելի՛ք, Դավիթը քո եղբայրն է»:

— Դավիթ, — ասաց Մելիքը, — քեզ աղաչանք յոթ ժամ տաս ինձ՝ հանգստանամ, նոր դու զարկես:

Մսրա Մելիքը մտավ Դավթի համար փորած քառասուն գազ հորը, բերանին քաշեց քառասուն գոմշի կաշի, քառասուն ջրաղացի քար ու գոռաց.







— Դավիթ, հերթը քոնն է, գարկի՛ր:

Դավիթը եկավ, նայեց Մսրա Մելիքի հորին.

— Աստված վկա՛, մեր պապերը լավ են ասել.  
«Ուրիշին հոր փորոզն ինքը մեջը կընկնի»:

Դավիթը հեծավ ձին, Ծովասարից թափ առավ  
եկավ, պիտի գարկեր... Իսմիլը իրեն գցեց առաջ.

— Դավիթ, քեզ քաղցր ծիծ եմ տվել, այս մեկ  
գարկը բաշխի՛ր ինձ:

Դավիթն իր թուրն իջեցրեց, համբուրեց, ասաց.

— Մարե՛, դու չես թողել, որ Մելիքն ինձ սպա-  
ներ, երբ պստիկ էի... Այս մի գարկը բաշխեցի քեզ:

Դավիթը նորից թափ առավ, պիտի գարկեր... Մե-  
լիքի մեծ քույրն իրեն գցեց առաջ.

— Դավիթ, երբ դու փոքր էիր, շատ եմ քեզ շա-  
լակել, խաղացրել, այս մեկ գարկն էլ բաշխի՛ր ինձ:

Դավիթն իր թուրն իջեցրեց, համբուրեց, ասաց.

— Քույրի՛կ, այս մեկ գարկն էլ քեզ բաշխեցի:

Դավիթը նորից թափ առավ, եկավ: Իսմիլը իր  
հետ բերած աղջիկներին հրաման տվեց, որ փող

փչեն, թմբուկ գարկեն, պարեն: Դավիթը մտածեց.  
«Սա ինձ համար է, որ շփոթվեմ, գարկս թուլանա»:

Ու գարկեց ամբողջ ուժով: Կտրեց քառասուն ջրա-  
ղացքարն ու գոմշի կաշին, կտրեց Մելիքին գլխից  
մինչ ոտքեր, թուրը յոթ գագ էլ գնաց անդուռ:

Մսրա Մելիքը հորի միջից գոռաց.

— Դավիթ, ես այստեղ եմ, մեկ է՛լ գարկ:

— Ձէ՛, կտրիճի գարկը մեկ է լինում, երկու չի  
լինի: Մի շնո՛րհ արա, քեզ թա՛փ տուր...

Մսրա Մելիքն իրեն թափ տվեց: Կեսն ընկավ աջ,  
կեսն ընկավ ձախ: Մսրա Մելիքը սատակեց:

Մսրա Մելիքի մայրն ու քույրը լաց եղան, ողբա-  
ցին, վերջում Իսմիլ խաթունն աչքերը սրբեց, ասաց.

— Դավիթ, Մսրա Մելիքին դու սպանեցիր... Եկ  
նրա կնոջն ա՛ռ, Մսրըն էլ քեզ լինի, Սասունն էլ:

— Ձէ՛, մարե՛, Մսրա թագուհին ինձ կին չի լինի,  
Մսրա երկիրն ինձ հայրենիք չի լինի, ոնց որ Մսրա  
Մելիքն ինձ եղբայր չեղավ: Ուզո՞ւմ ես, արի՛ քեզ  
տանեմ Սասուն, մոր պես պահեմ: Թե չես ուզում,  
Մսրա հողը քոնն է, այնտեղ հանգիստ ապրի՛ր:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչո՞ւ Դավիթը հրաժարվեց իր երկու գարկերից:
2. Նկարագրի՛ր հորում թաքնված Մսրա Մելիքին:



ՄԵՐ ԱԶԱՏԱՄԱՐՏԻԿՆԵՐԻՆ

*Հայերը հատուկ զենք ունեն, որով  
մեր կռվողներին վախ են ներշնչում:  
(աղբրեջանական հաղորդագրություն)*

Հատուկ է զենքը մեր, արդարև,  
Օ՛, այն նյութված է բյուր տարրերից.  
Դեռ հնուց անտի<sup>1</sup>, դեռ դարերից  
Ալքիմիկոս ենք մենք հանձարեղ:  
Ու մեր գնդակը Հայկյան նետի  
Զորք-գորությունը ունի իր մեջ,  
Ունի հուտութքը<sup>2</sup> աստվածամերձ  
Մեր ձշմարտության, մեր հավատի:  
Վարդանանց հուշն է իր ձուլվածքում,  
հուրձ-խուրձ կայծեր կան Թուր-կայծակից,<sup>3</sup>  
Ու մեր ցատումն է արդարագույն  
Դուրս ժայթքում ամեն մի գնդակից:  
Ցասումը գերված, լլկված հողի  
Ու մեր պատմության առևանգված,  
Մեր լույս կույսերի՝ հարեմ տարված,  
Գողացված, պղծված մեր վանքերի:  
Ոգու հրաշքն է մեր զենքի մեջ,  
Ցավը մահերի մեր անհամար:

Օ՛, մեր վառողը նյութված է մեր  
Մեծ ազատության տենչից համառ:  
Դրա համար է խուձապահար



*Երդվում եմ՝  
Պահպանել քեզ որպես սերնդե-  
սերունդ փոխանցված  
Եվ ինձ վստահված տոհմական  
սրբություն,  
Նվիրումովս լրացնել քո մա-  
սունքանման կորուստները,  
Նորոգել քո մագաղաթյա ազն-  
վականությունը  
Նոր ժամանակների հյուսթ ու  
ավիշով.  
Քեզնով արտասանել միայն ար-  
դարության խոսքեր:  
Երդվում եմ կրել քեզ շնչովս,  
արյունովս, այրումովս  
Եվ ինձնով տանել-հաղորդել  
զավակներիս  
Քո հավերժական կենդանու-  
թյունը:*

**Հատված «Հայ պատանու  
երգումը մայրենի լեզվին»  
արձակ բանաստեղծություններից**

<sup>1</sup> անչափ հնուց

<sup>2</sup> հմայիլ

<sup>3</sup> Սասնա ծռերի թրից

Ոստիւր փախչում, ասես չարքից:

Մենք՝ ալքիմիկրն մի անհնար,  
Ու մեր գնդակը՝ արդար ոսկի՛...



*Սիլվա Կապուտիկյանի  
դիմանկաբը  
նկարիչ՝ Մարտիրոս, Սարյան*



*Սիլվա Կապուտիկյանը՝  
Ալիսիա Կիրակոսյանի հետ*

## ՄԵՐ ՍԵՐԸ

Հայաստանն աշխարհ,  
Դու մերը եղար ու մերը չեղան,  
Դրա համար էլ մենք քեզ սիրեցինք սիրահարի՛  
պես...

Դու մերը եղար,  
Ինչպես որ մերն է մեր երակներում հոսող արյունը,  
Եվ մերը չեղար,  
Ինչպես մերը չէ Վարագա սարի՛ արևածագը,  
Սասնա անտառին իջնող մանանան,  
Մշո դաշտերը շոյող սոսափը...

Դու մոտիկ եղար՝  
Սրտիդ տրուփը մեր կոշտ ձեռքերին հաղորդելն  
չափ,

Եվ հեռու եղար՝  
Սահմանից այն կողմ,  
Անիի կարմիր ավերակներից մեզ երևացող  
Մայր տաճարի՛ պես:

Դու տաք հրդ եղար,  
Մեր պիրկ խոփերի տենչանքին հլու,  
Մեր գգվանքներից ծլարձակող հրդ,

Եվ տեսիլք եղար՝  
Կապույտ, անշոշափ ու անբռնելի.  
Մենք՝ անվերջ հասնո՞ղ,  
Իսկ դու՝ հեռացո՞ղ, անվերջ հեռացո՞ղ...

Հայաստանն աշխարհ,  
Դու այսպե՛նս եղար,  
Եվ դրա համար մենք քեզ սիրեցինք

<sup>1</sup> Լեռ Արևմտյան Հայաստանում

Ո՛չ ազգականի հանդարտիկ սիրով,  
 Այլ սիրածի՛ն պես, սիրահարի՛ն պես.  
 Յավո՛տ, ցավախա՛նոն  
 Երազով, լույսով, երգող տխրությամբ,  
 Մերթ խռովելով,  
 Մերթ հաշտվելով,  
 Քո գրկո՛ւմ անգամ քեզ կարոտելո՛ւմ,  
 Քեզ կորցնելու ահից տազնապա՛նձ,  
 Քեզ ունենալու խիճնից երջանի՛կ  
 Եվ բախտիդ համար անվերջ, ամեն պահ մեռնել–  
 ապրելո՛ւմ...

Հայաստանն աշխարհ...

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Հայթայթիր ասույթներ Սիլվա Կապուտիկյանի մասին:
2. Կարդա՛ հատվածներ Ս. Կապուտիկյանի «Խձանկար հոգու և քարտեզի գույներից» ուղեգրությունից և համեմատի՛ր քո կարդացած այլ ուղեգրությունների հետ:
3. Անգի՛ր արա Սիլվա Կապուտիկյանի «Հայ պատանու երդումը մայրենի լեզվին» բանաստեղծությունը:

## ՍԱՍՆ ԾԻԵՐ

**ԴԱՎԹԻ ՊԱՏՎԵՐԸ ՄՍՐԱ ԶՈՐՔԻՆ**

Դավիթն իր ձին քշեց, մտավ Մսրա գորբի մեջ.

— Ձեզ հետ եմ, լսե՛ք, գինվորնե՛ր, գորապետե՛ր:  
 Ամենքի՛դ իրավունք եմ տալիս, գնացեք այնտե՛ղ,  
 որտեղից եկել եք: Հանգի՛ստ առեք, աղո՛թք արեք  
 ինձ համար, իմ հորն ու մորը ողորմի՛ տվեք:

Մսրա գորբերն այս ու այն կողմից օրհնեցին.

— Դավիթ, քո թևը թող դալար մնա, քո թուրը՝  
 կտրուկ: Ուր գնաս, քո ճամփին կանաչ բուսնի:

— Ձեր երկիրը ձեզ լինի. մեր երկիրը՝ մեզ: Իրար  
 հետ հաշտ ապրենք: Բայց որ մեկ էլ ընկել եք մեկ  
 ուրիշ Մելիքի հետևից ու եկել մեզ վրա կռիվ, լա՛վ  
 իմացեք. ձեր դեմ նորից դուրս կգան Սասնա Դավիթը,  
 Քուռկիկ Ջալալին ու Թուր-կեծակին:

Իսմիլ խաթունն իր գորբի մնացուկով գնաց Մսրը:



Սիլվա Կապուտիկյանի շիրիմը  
 Կոմիտասի անվան պանթեոնում





Մելիքի հետ եկած հարկատու թագավորներն ու զորապետերը իրենց մարդկանցով ցրվեցին աշխարհի չորս կողմը, ամեն տեղ Դավթի գովքն արին.

— Սասնա Դավիթն իր հոր ուխտը կատարեց, Մսրա Մելիքին կովում սպանեց. իր Սասունն ազատեց, աշխարհին խաղաղություն բերեց:

Դավիթը Մսրա Մելիքի կեսը թաղեց Լերա դաշտում, նրա ձուն կտրեց, բարձեց մի սայլի վրա, որ տաներ Սասուն՝ Ցուան Վերգոյին հիշատակ:

Սասունցիները խմբով եկան Դավթի առաջ, նրա ճամփին ծաղիկներ շաղ տվին, գորգեր փռեցին, երգով, պարով, ցնծությունով տարան քաղաքամեջ, Քուռկիկ Ջալալու արյունոտ պնչերը համբուրեցին, Դավթի արյունոտ զգեստներն ու զենքերը համբուրեցին, լաց եղան, խնդացին ու գոռացին.

— Դավիթ, մեր ազատարարն ես...

— Դավիթ, հազար ու հազար տարի ապրես...

Դավիթը նիզակի ծայրով Մսրա Մելիքի ձուն սայլի վրայից գցեց իր հորեղբայր Վերգոյի առաջ.

— Հորեղբայր Վերգո, Մելիքի ձուն բերել եմ. թե կարողանաս գետնից վերցնել, տա՛ր քեզ հիշատակ:

Ժողովուրդը փառ-փառ ծիծաղեց:

Սասունցիները յոթ պղնձով ջուր տաքացրին, Դավիթը լողացավ, Քուռկիկ Ջալալուն լողացրեց: Ապա գնաց Սասնա պառավի տուն, մի տակառ գինի խմեց, պառկեց ու քնեց երեք օր: Երբ քնից ելավ, ասաց.

— Նանե՛, ես մայր չունեի, դու ինձ մայրություն արիր: Այսօրվանից ինչ ասես, կգնամ քո խոսքով:

— Դավիթ, դու փոքր էիր, հիմա մեծացար, բռնեցիր Առյուծ Մհերի տեղը: Հորեղբորդ ասա՛, որ քո հոր գահասենյակը բաց անի, մեջը նստես:

Դավիթը գնաց հորեղբոր մոտ, ասաց.

— Հորեղբայր, հորս գահասենյակը բացի՛ր:

— Կբացեմ: Դու որ չնստես քո հոր տեղը, ո՞վ պետք է նստի: Սասնա ճրագը հանգած էր, դու վառեցիր: Քեզ վայել քո հոր զգեստներն ու զենքերը, քո հոր Քուռկիկ Ջալալին, քո հոր գահասենյակը, քո հոր անունը:

## ՀԱՐՑԵՐ ԵՎ ԱՌԱՋԱԴՐԱՆՔՆԵՐ

1. Ինչ պատվիրեց Դավիթը Մսրա զորքին:
2. Նկարագրիր ցնձացող սասունցիներին այնպես, ինչպես պատկերացնում ես:

## ԲՈՎԱՆ ԴԱԿՈՒԹՅՈՒՆ

|  |   |
|--|---|
| <p><b>ԴԱՍ 1</b> ..... 3<br/>Ե. ՉԱՐԵՆՑ, «ՀԱՅՐԵՆԻՔՈՒՄ», «ՄԵՐ ԼԵԶՈՒՆ»</p> <p><b>ԴԱՍ 2</b> ..... 7<br/>Ե. ՉԱՐԵՆՑ, «ՈՒՂԵՐԶ ՄԵՐ ՀԱՆՃԱՐԵՂ ՎԱՐՊԵՏՆԵՐԻՆ»</p> <p><b>ԴԱՍ 3</b> ..... 11<br/>Գ. ԴԵՄԻՐՃՅԱՆ, «ՀԱՅԸ»</p> <p><b>ԴԱՍ 4</b> ..... 16<br/>Ա. ԲԱԿՈՒՆՑ, «ԾԻՐԱՆԻ ՓՈՂԸ» (ՀԱՏՎԱԾ)</p> <p><b>ԴԱՍ 5</b> ..... 22<br/>Ա. ԲԱԿՈՒՆՑ, «ԱՂԻՍԿԱՆ ՄԱՆՈՒՇԱԿ» (ՀԱՏՎԱԾ)</p> <p><b>ԴԱՍ 6</b> ..... 28<br/>Ս. ԶՈՐՅԱՆ, «ԶՐՈՒՅՑ ԵՐԳԻ ՄԱՍԻՆ»</p> <p><b>ԴԱՍ 7</b> ..... 33<br/>Ս. ԶՈՐՅԱՆ, «ՍՄԲԱՏ ԲԱԳՐԱՏՈՒՆԻ» (ՀԱՏՎԱԾ)</p> <p><b>ԴԱՍ 8</b> ..... 39<br/>Կ. ԶԱՐՅԱՆ, «ՀԱՅՈՒԹՅԱՆ ԿՈՉՈՒՄԸ»</p> <p><b>ԴԱՍ 9</b> ..... 44<br/>Վ. ԹՈՒԹՈՎԵՆՑ, «ԿՅԱՆՔԸ ՀԻՆ ՀՈՒՎՄԵԱԿԱՆ ՃԱՆԱՊԱՐՀԻ ՎՐԱ» (ՀԱՏՎԱԾՆԵՐ)</p> <p><b>ԴԱՍ 10</b> ..... 49<br/>Ն. ԶԱՐՅԱՆ, «ՀԱՅԵՐԵՆ», «ՀԱՅՐԵՆԻ ՏՈՒՆ»</p> <p><b>ԴԱՍ 11</b> ..... 53<br/>Ն. ԶԱՐՅԱՆ, «ԱՐԱ ԳԵՂԵՑԻԿ» (ՀԱՏՎԱԾՆԵՐ)</p> <p><b>ԴԱՍ 12</b> ..... 57<br/>Գ. ՄԱՀԱՐԻ, «ՀԱՅԵՐԵՆ», «ԳԱԶԵԼ ՀԱՅԱՍՏԱՆԻ»</p> <p><b>ԴԱՍ 13</b> ..... 61<br/>Վ. ԱՆԱՆՅԱՆ, «ԱՀԸ»</p> <p><b>ԴԱՍ 14</b> ..... 66<br/>Գ. ՍԱՐՅԱՆ, «ՄԱՅՐԵՐԻՆ»</p> <p><b>ԴԱՍ 15</b> ..... 70<br/>ՍԱՐՄԵՆ, «ՄԵՍՐՈՊ ՄԱՇՏՈՑ» (ՀԱՏՎԱԾ)</p> | <p><b>ԴԱՍ 16</b> ..... 74<br/>Հ. ՔՈՉԱՐ, «ԱՐՏԱՍՈՎՈՐ ՊԱՏՄՈՒԹՅՈՒՆ»</p> <p><b>ԴԱՍ 17</b> ..... 80<br/>Հ. ՔՈՉԱՐ, «ԶՈՒԹԱԿԱՀԱՐԻ ՊԱՏՄԱԾԸ»</p> <p><b>ԴԱՍ 18</b> ..... 86<br/>Խ. ԴԱՇՏԵՆՑ, «ՀԱՅԵՐԵՆ»</p> <p><b>ԴԱՍ 19</b> ..... 90<br/>Խ. ԴԱՇՏԵՆՑ, «ՌԱՆՉՊԱՐՆԵՐԻ ԿԱՆՉԸ» (ՀԱՏՎԱԾ)</p> <p><b>ԴԱՍ 20</b> ..... 94<br/>Ա. ԳՐԱՇԻ, «ԵՎ ԵՐԲ ԳՆՈՒՄ ԵՄ ԵՍ ՕՏԱՐՈՒԹՅՈՒՆ», «ՀԱՅՐԵՆԻՔ»</p> <p><b>ԴԱՍ 21</b> ..... 98<br/>Ս. ԽԱՆԶԱԴՅԱՆ, «ՏՈՐՔ ԱՆԳԵՂԻ ՀԵՏՔԵՐՈՎ»</p> <p><b>ԴԱՍ 22</b> ..... 103<br/>Վ. ԽԵՉՈՒՄՅԱՆ, «ԳԼՈՒԽԳՈՐԾՈՅԸ» (ՀԱՏՎԱԾ)</p> <p><b>ԴԱՍ 23</b> ..... 109<br/>Հ. ՇԻՐԱԶ, «ՀԱՅ ԺՈՂՈՎՐԴԻ ԵՐԳԸ», «ԻՄ ՍՈՒՐԲ ՀԱՅՐԵՆԻՔ»</p> <p><b>ԴԱՍ 24</b> ..... 113<br/>Հ. ՇԻՐԱԶ, «ՀԱՅ ՃԱՐՏԱՐԱՊԵՏՈՒԹՅՈՒՆԸ», «ԷՔՍՊՈՐՏ», «ԴՈՒՔ ՈՐ ԵՐԿՐԻՑ ԵԿԱՔ, ՀՈՎԵՐ»</p> <p><b>ԴԱՍ 25</b> ..... 117<br/>Հ. ՍԱՀՅԱՆ, «ԱՆՈՒՆԴ ՏԱԼԻՍ»</p> <p><b>ԴԱՍ 26</b> ..... 121<br/>Հ. ՍԱՀՅԱՆ, «ՄԵՐ ԼԵԶՈՒՆ», «ԳԱՐՈՒՆԴ ՀԱՅԵՐԵՆ Է ԳԱԼԻՍ»</p> <p><b>ԴԱՍ 27</b> ..... 125<br/>Գ. ԷՄԻՆ, «ՄԵՆՔ», «ԵՍ ՀԱՅ ԵՄ»</p> <p><b>ԴԱՍ 28</b> ..... 130<br/>Գ. ԷՄԻՆ, «ԶԳՈՒՅՇ ԽՈՍԻՐ ՀԱՅԱՍՏԱՆՈՒՄ»</p> <p><b>ԴԱՍ 29</b> ..... 134<br/>Ս. ԿԱՊՈՒՏԻԿՅԱՆ, «ԸՆԴԴԻՄԱԽՈՍՈՒԹՅՈՒՆ»</p> <p><b>ԴԱՍ 30</b> ..... 139<br/>Ս. ԿԱՊՈՒՏԻԿՅԱՆ, «ՄԵՐ ԱԶԱՍԱՄԱՐՏԻԿՆԵՐԻՆ», «ՄԵՐ ՍԵՐԸ»</p> |
|--|---|

# ՀԱՅ ԳՐԱԿԱՆՈՒԹՅՈՒՆ

## 6

Սփյուռքի դպրոցների համար  
(արևելահայերեն ուսուցմամբ)

Հրատարակչության տնօրեն՝  
Համակարգչային ձևավորումը՝

Սրբագրիչ՝

Էմին Մկրտչյան  
Վահե Մուրադյանի  
Ժագ Թովալազյանի  
Տաթևիկ Մանուկյան

«Սասնա ծռեր» դրուցագնավեպի նկարագրողումը՝ Արա Բաղդասարյանի

Տպագրությունը՝ օֆսեթ  
Չափսը՝ 70x100 1/16: Թուղթը՝ օֆսեթ  
Ծավալը՝ 9 տպ. մամուլ  
Տառատեսակները՝ AraRusa, Grqee



**ՀԱՆԳԱԿ**  
ՀՐԱՏԱՐԱԿՈՒԹՅՈՒՆ

ՀՀ, 0051, Երևան, Կոմիտասի պող. 49/2, հեռ.՝ (+374 10) 23 25 28  
Էլ. փոստ՝ [info@zangak.am](mailto:info@zangak.am), էլ. կայքեր՝ [www.zangak.am](http://www.zangak.am), [www.book.am](http://www.book.am)  
Ֆեյսբուքյան կայքէջ՝ [www.facebook.com/zangak](http://www.facebook.com/zangak)